

ЎЗБЕК АДАБИЁТИ ДУРДОНАЛАРИ

ЎТКИР
ҲОШИМОВ

ИККИ КАРРА ИККИ – БЕШ



• ҲАЖВИЙ ҚИССА •

ЎТКИР ҲОШИМОВ

ИККИ КАРРА ИККИ – БЕШ

Хажвий қисса



**„O'QITUVCHI“ НАШРИЁТ-МАТБАА ИЖОДИЙ УЙИ
ТОШКЕНТ – 2018**

УЎК: 821.512.133-31

КБК 84(5Ў)6

Ҳ. 71

Элимизнинг атоқли ва ардоқли адаби, Ўзбекистон халқ ёзувчиси Ўткир Ҳошимовнинг „Баҳор қайтмайди“, „Дунёнинг ишлари“, „Икки эшик ораси“, „Тушда кечган умрлар“ каби салмоқли қисса ва романларини, юзлаб жиддий ҳикоя ва бадиаларини мутолаа қилган китобхон ларзага тушади, кўп саҳифаларни ўқиганида кўзига ёш келади. Ўткир Ҳошимов серқирра адаб. Унинг ўнлаб ҳажвий ҳикоялари, комедиялари ичак узди ҳангомаларини ўқиган ва томоша қилганда дилингиз равшан тортади, беихтиёр қаҳ-қаҳ уриб куласиз.

Адабнинг мазкур ҳажвий қиссасида ҳам воқеалар кескин юмор остига олиниб, ғоят ҳаётий акс эттирилган. Асар ўқувчига жуда кўп билим ва тарбия берадиган олишига ишонамиз.



© Ў. Ҳошимов

© „O‘qituvchi“ НМИУ, 2018

ISBN 978-9943-22-189-5

БИРИНЧИ БОБ

КАСАЛЛИК ТАРИХИ

— Э, дўхтиржон! Қийнаб нима қиласиз, одамни! Айтяпман-ку, соппа-соғман! Раҳмат, яхши даволадинглар. Эсингиздами, банисага келган кунларим, бир лунжим оқиб тушган нондек осилиб ётувди. Оғиз — ёмғирда қолган ўчоқ! Қўлим билан тўғрилайман, деб харчанд уринаман, қани жойига келса, тағин қийшайиб қолади, ҳумпар! Кўзнинг ҳам биттаси катта, биттаси кичкина үзи! Мана, ҳаммаси бип-бинойи! Энди, дўхтиржон, бизга жавоб берсангиз... Нима? Яна сўрайсиз-а? Жиноятчисан, деб терговчи сўроқ қилса, жиннисан, деб дўхтирлар сўроқ қилса... Нима қилай, ахир? Кимга айтай додимни!

А? Ҳеч қанақа касал бўлган эмасман! Болалигимда ҳам, ундан кейин ҳам... Ангина-мангина, қизамиқ-пижамиқ — биронтаси бизга йўлаган эмас! У ёғини сўрасангиз, беш ёшга тўлгунимчаям яланғоч юрганман! Нима? Ҳа, қишдаям!

Бир куни десангиз, қаҳратон қишда ҳовузнинг музини ёриб, ичига тушиб олганман. Дадам велосипед олиб бераман, деб ваъда қилмагунча, ҳовуздан чиқмаганман. Ўшанда онам „Вой, энди нима қилдим, болажоним ўлиб қолади“, деб чирқиллагани эсимда... Балоям урмади... Қайтага маза қилдим: яланғоч одам эркин нафас олади-да, тўғрими? Одамнинг ҳамма жойи нафас олиши керакми, ахир? Тўғрими-йўқми? Қолаверса, инсон боласи ўзини-ўзи чиниктириши керак. Ҳа, ана энди ўзингизга келдингиз, дўхтиржон! Раис бува ҳам доим шунақа дерди. Айтган гапини маъқулласам: „Ана энди ўзингга келдинг, Қўшовой, ақлинг тошни ёради“, дерди.

Оббо! Яна ўща саволми? Айтяпман-ку, умрим бино бўлиб грипп бўлган эмасман, томофим оғримаган,

ичкетар бўлмаганман. Тошни есам, қум қилиб юбораман!

А? Авариядаям қолган эмасман! Жўрам Шодивой билан бир марта авария қилишимизга сал қолган-у, Худонинг ўзи бир асраган.

Нима? Йиқилишга-йиқилганман! Ёнғоқдан! Қир учидан! Ўзиям ёнғоқмисан-ёнғоқ эди-да! Ёнғоқ-ку томорқада эди. Аммо шунақангги тарвақайлаб кетгандики, томорқадаги дараҳтнинг сояси кун тиккага келгунча ҳовлимиzinинг ярмисини қоплаб ётарди. Паҳтага дори сепадиган самолёт қишлоғимиз устидан учиб қолса, ҳовлимиzinинг тепасига келганида вариллаб, ҳаволаб кетарди. Бир сафар пастроқ учган экан, битта қаноти узилиб ёнғоғимизнинг шохига илиниб қолган. Ўн кунгача дақанг варракка ўхшаб лапанглаб турган. Темир шапка кийган одамлар осмон баравар нарвон келтириб, амаллаб тушириб олишган. Мен ана ўша ёнғоқнинг қир учидан йиқилиб тушганман. Нима? Неча ёшдалигимни қаёқдан билай? Ҳуллас, ҳали мактабга бормаган пайтларим эди-да!

Фира-шира эсимда. Томсувоқ бошланган кезлар эди. Томсувоқни биласизми? Ҳа, яшанг! Томорқадаги худди ўша ёнғоқ тагидан лойхандақ қазиб, сомон босишиди. Лойни сомонга аралаштириб роса қоришиди. Дадам шимининг почасини қайириб, лойхандаққа кирди. Ҳашарчиларнинг пақирига пайдар-пай лой солиб турибди. Ҳашарчилар зипиллаб ташиб турибди. Э, дўхтиржон, сиз билмайсиз! Қишлоқ жойда ҳашар деса, ҳамма ёпирилиб келаверади. „Қаёққа, нимага“, деб суриштириб ўтириш — номардлик бўлади. Ҳуллас, ҳовлимизга тумонат одам тўпланди. Қарасам, башанг кийиниб олган ўзим тенги бола ёнғоққа кесак отяпти. Шунақангги дўмбоқ, шунақангги думалоқ болаки, хўппа семиз қўёнга ўхшайди. Отган кесаги том баравар кўтарилса, ўла қолай! „Хой, кимсан?“ десам, йигламсираб, „ёнғо-оқ“ дейди. Чакқонлигимни бир кўрсатиб қўйгим келди. Кафтимга туфлаб туриб, ёнғоққа тирмашганим эсимда. Мехмон болани ёнғоқ билан сийлай қолай, деб маймундек типирчилаб, дараҳтнинг қир учига чиққаним

ҳам ёдимда. Ёнғофимиз ҳам хүп мева солған экан ўзи! Ҳар биттаси олмадек келади жонивор! Тагин фуж-фуж. Үшіңгюқоридаги шохни силтаганимни биламан. Бир маҳал қарасам... Телевизорда күрсатадиган сувга шұнғувчишар бор-ку, үшанга үхшаб лойхандаққа калла ташлаб тушяпман. Оёқ-құлларимни жуфтлаб олғанман, денг. Ҳали тушяпман, ҳали тушяпман, қани лойхандаққа етсам! Бир маҳал „шүлк“ этган овозни ўзим ҳам эшитгандек бўлдим. У ёғи эсимда йўқ. Кейин айтиб беришди. Лойхандақнинг қоқ үртасига бошим билан санчилиб қолибман. Дадам ишга қизиқиб кетиб сезмабдиям. Ҳатто бир-икки марта кетмөннинг орқасини жуфтлашиб турған оёғимга қоқиб, лойини тозалабди. Қозиқ деб ўйлаган-да! Анчадан кейин чарчаб „перекур“ қипти. Носқовогини товонимга уриб-уриб, тагидаги ёпишиб қолған носини күчирмоқчи бўлган экан, қитигим келиб, оёғимни типирлатиб қолибман. Қитигим ёмон-да! Отам турған жойида тахта бўпқопти. Ҳамма ёқ қий-чув бўлиб кетибди. Кўплашиб лойхандақдан сууриб олишибди. Ювиб-тараб, мундай қарашса, бошим тарс ёрилиб кетганмиш. Мен бўлсанмай үрганига кулиб ётганмишман. Тўғрисини айтайми? Үшандан бери ҳеч йиғламаганман. Нуқул куламан. Үшандаям онам „Вой, болажоним, сенга нима бўлди“, деб йиғлаганида кулиб тураверибман. Сал-пал эсимда бор, негадир үшанда онам кўзимга иккита бўлиб кўринди. Овози битта-ю, ўзи иккита.

— Тирикмисан, болажоним! — деди овози битта, ўзи иккита онам.

— Тирикман, эналар! — дедим илжайиб.

Кейин бошимга отам эгилди.

— Нима бўлди, Қўшовой?

Негадир дадамнинг кўзи тўртта бўлиб кўринди.

Үнг қўлимнинг тўртта бармоғини диккайтирдим.

— Кўзларингизга қўлларимни тиқиб олайми?

Дадам хуркиб, ўзини орқага ташлади.

Йўқ, уч кун ичида ҳеч нима кўрмагандек ўйнаб кетдим. Дадам жўраларига мақтанди: „Бизнинг ўғил маладес! Тегирмонга тушса бутун чиқади!“

Ха, айтмоқчи, ўша куни уйимизга меҳмон келди. Худди ўша — „ёнғоқ“ деб йиғламсираган дўмбоқ бола. Оти — Шодивой экан. Буни қарангки, Шодивой отасини бошлаб кепти. Раис буванинг ўғли экан. Раис бува кўлимга зарқоғозли ишқалад берди.

— Шодивой билан қиёматли жўра бўлларинг! — деди.

Майли, Шодивой билан жўра бўлсам, бўларман-у, ўша кундан бошлаб ғалати одат чиқардим. Бир қарсангиз, миям, тракторчи қўшнимиз Турсунбой аканинг пат-патига ўхшаб қарсиллаб ишлаб кетади, бир қарсангиз, ҳеч балога ақлим етмайди. Устига-устак, тагин битта айбим бор: лоф-қоф билан гапирмасам, кўнглим жойига тушмайди. Ўзимдан бир ёш кичкина Жу деган синглим бор. (Оти Мавжуда, мен уни „Жу“ дейман). Масалан, дадам синглимга дўппи олиб келса, кўчага чиқиб, шовқин соламан.

— Дадам Жуга тўртта дўппи олиб келди!..

Сигиришимиз туғса, яна кўчага югураман.

— Суюнчи беринглар! Сигиришимиз учта туғди! — бу ёгиниям бир зумда тўқиб ташлайман. — Иккитаси урғочи, учинчисиям урғочи!

Бирпасда онамнинг рўмоли саккизта, дадамнинг этиги ўн тўртта, ўзимнинг ботинкам ўн олтита бўлди! (Кошки ботинка кийсам!)

Турсунбой акамнинг мотоциклни битталигини биламан. Аммо бутун қишлоққа хабар тарқатиб келдим: „Турсунбой аканинг олтита пат-пати бор!“

Кечқурун Ойсара янгам бизникига чиқиб, онамга ҳасрат қилди.

— Қўшвой тушмагур ҳамма ёққа Турсунбой ака олтита пат-пат сотовлди, деб гап тарқатибди. Опажон, ўзи янги рўзгор бўлсак. Шу битта пат-пат ўлгурниям Раис бува олиб берди: куёвингиз яхши ишлагани учун. Билмаганлар, булар битиб кетган экан, демайдими? Болангизни тийиб қўйинг, опажон!

Ойсара янгамни яхши кўраман. Онамнинг айтишича, қишлоғимиздаги энг сулув жувон шу эмиш.

Жамоа хўжалиги кутубхонасида ишларкан! Шунаقا-ку, ингитманинг гапи менга ёқмади. Ҳозир калтак ейман, деб чўчиб турган эдим, ундан бўлмади.

Онам бепарво қўл силтади.

— Бола-да, ўргилай келин, бола! Нима қипти, ўғирлиб оғти демабди-ку. Яхшилигинги ошириб, ёмонлигинги яширса ёмонми!

‘Энамни шунақанги яхши кўриб кетдимки, кечкүрун дадам ишдан келиши билан мақтандим.

— Дада-чи, дада, энам бугун сизга уч қозон палов димлаб қўйдилар!

Онам, хурсанд бўлиш ўрнига, дадамга ҳасрат қилди:

Бу тентагингиз қачон одам бўлади-а, номусга ўтирияпти-ку! Бир ҳафта олдин сигиримиз учта туғди, леб ҳаммага айтиб чиқсан эди. Бугун Ойсара келин ҳасрат қилиб чиқди. Бечораларнинг битта пат-патини олтига деб гап тарқатибди.

Қараб турсам, дадамнинг ўнг лунжи учяпти. Кошки, одатини билмасам! Лунжи уча бошладими, жаҳли чиққани шу!.. Аслида дадам менга ҳам, Жугаям бирон марга қўл кўтарган эмас. Онамнинг айтишига қараганда, отам уруш битай-битай деб турганида фронтга кетган ёкан. Ўша ёқдан шунаقا баджаҳл бўлиб қайтган эмиш. Тўйдан кейин менинг битта акам, яна битта опам туғилибди-ю, акам чилласи чиқмай, опам ёшига тўлмай ўлибди бечора. Шунинг учун „Кўша-кўша фарзанд кўрайлик“, деган ниятда бизга Кўшоқвой деб от қўйишган ёкан. Болани яхши кўргани учун дадам бизни уришмас ёкан.

Ўша куниям дадам лунжи учиб-учиб қўйди-ю, барibir койимади.

— Ўслим, — деди елкамга қоқиб. — Одам бошқа нарсада адашса майли, лекин ҳисобда адашмаслиги керак. Мен — буғалтирман-ку, биламан-ку. Мана, сендан кичкина синглинг мактабга қатнаяпти. Эрта-индин сен ҳам борасан. Қани, айт-чи, йигирмани-йигирмага қўшса, қанча бўлади?

— Эллик! — дедим ўйлаб ўтирмай.

— Дард! — Дадамнинг жаҳли чиқиб кетди. Ўнг лунжи пайдар-пай уча бошлади. — Мисол учун, сенда иккита йигирма тийинлик бор. Пахта пункти ёнида ўтирадиган Раҳмон пистачидан семичка олмоқчисан. Бир истикон пистичка йигирма тийин туради. Икки истикони қанча бўлади?

Раҳмон пистачидан семичка олавериб пишиб кетганман.

— Қирқ тийин! — дедим ишонч билан.

— Бўпти-да, ўғлим! — Дадам қувониб кетди. — Ҳисобда адашиб бўлмайди. Адашсанг, ўзингга жабр қиласан!

— Адашмасам-чи?

Қизиқ, дадамнинг лунжи тагин учди.

— Ундаям жабр бўлади, — деди ҳўрсиниб. — Раис, ҳисобдан адашмаганим учун ёмон кўярпти-да мени. Унга ҳисобни билмайдиган ҳисобчи керак.

Дадамнинг гапини унча тушунмадим. Лекин мактабга боргунча ҳисобни бинойидек ўрганиб олдим. Кўшиш, кўплайтириш... Айниқса, пул ҳисобини...

Тўғрисини айтсам, ўшандаям лоф-қоф билан гапириш одатим қолмаган экан. Мактабга борган биринчи кунимоқ шу дардим қўзиб қолди.

ИККИНЧИ БОБ МАКТАБГА КИРИБ ОЛДИМ

Мактабга онам қўлимдан етаклаб олиб борди. Гулзор ҳовлининг икки томонидаги қатор-қатор оппоқ хоналардан бирига кирдик.

Чиройли кийинган, сочини силлиқ тараган бир қиз стол ёнида ўтирган экан. Лип этиб, ўрнидан турди.

— Мана, Мұҳаббатхон, сизга яна битта ўқувчи олиб келдим! — деди онам илжайиб.

Ўқитувчи опа бошимни силади.

— Вой, қандоқ яхши... Бу — Мавжуданинг... — шундай деди-ю, бир менга, бир онамга қараб, анграйиб қолди. Чамаси, тойлоқдек бўйимни кўриб ҳайрон бўлди: мен Жунинг укасиманми, акасиманми?

— Акаси! — деди онам тушунтириб. — Сал тоби ңүқроқ эди.

Үқитувчи опа яна бошимни силади. Фақат бу гал қоқ икки паллага бўлинганида томорқадаги ўқариқдек чуқур из қолган бошимга бармоғининг учини тегизиб қўя қолди.

— Ажаб қипсиз! — деди кулишга уриниб, ўзи куляпти-ю, афти худди йиглаётган одамникуга ўхшайди.

— Фамилиянг нима, болакай? — деди менга юзланиб.

— Салимип! — дедим бақириб.

— Салимовми? — У столдаги қаттакон дафтарни очиб, тез-тез ёзди.

— Отинг?

— Кўшовой!

— Кўшоқвой дегин... Яхши. Ёшинг нечада?

Худди шу пайт эски дардим қўзғаб, лоф-қоф билан айтиш касалим тутиб қолди.

— Ўн беш.

Үқитувчи опа бир чўчиб тушди. Кўзимга хавотирланиб қараб қўйди. Онам думбамни шу қадар ачитиб чимчиладики, илжайиб қўйдим.

— Мұҳаббатхон! — деди онам қулимсираб. — Кўшоқвой ҳазиллашди, ўзи шунаقا ҳазилкашроқ бола. Тўққиз ёнга тўлди.

Үқитувчи опа яна йигламоқдан бери бўлиб кулди.

— Шунаقا денг... Майли. Мавжуда қизимиз пишиқ, — деди онамга. — Аъло ўқияпти. — Кейин мендан сўради. — Бошқа сингилларинг ҳам борми?

— Бор. Ўнта!

Үқитувчи опанинг пастки лаби осилиб кетди. Оғирогири киприк қоқиб, онамга узоқ тикилиб қолди. Чамаси, тўққиз йилда ўн иккита бола туққан хотинни биринчи марта кўриб турган бўлса керак.

Онам думбамни чимчилашдан иш чиқмаслигини найқади шекилли, биқинимни ўймалаб олди. Қитифим келганидан ҳиринглаб кулиб юбордим. Үқитувчи опа тоҳ онамга, тоҳ менга қараб, қисқа-қисқа нафас ола бошлиди. Кўлидан ручкаси тушиб кетди.

- Қүшоқвой, — деди қўрқа-писа. — Дадангиз?..
- Иккита! — дедим шоша-пиша.
- Нима?
- Иккита!

Шу гапни айтганимни биламан! Онам уч қадам орқага тисарилди. Эскирган чит кўйлагининг ўнг енгини шимарди-да, юзимга чунонам тарсаки тортиб юбордики, хонадаги деразалар жаранглаб кетди.

Юзим оғриганидан эмас, кулгим қистаганидан кўчага отилдим.

— Тўхта, ер юткур! — Онам кетимдан чопди. — Тўхта, жувонмарг!

Тўхтаб бўлман! Ҳаллослаб, дадамнинг олдига чопдим. Биламан, дадам жамоа хўжалиги идорасида каталакдек хонада чўт қоқиб ўтиради.

— Дада, — дедим илжайиб. — Энам мени келисоп билан урди. Ўн марта урди. Юз марта урди!

— Кўявур, ўғлим, — деди дадам мени юпатиб. — Энанг сени келисоп билан урган бўлса, мен ҳам уни ураман! Ёмон ураман!

Ўша куни дадам айтганини қилиб, онамни кечаси билан уриб чиққан бўлса керагов! Нега деганда, онам эрта билан сақич чайнаб, очилиб-сочилиб, минғиллаб ашула айтганча, ҳовли супуриб юрганини кўрдим. Эрталаб дадам ўз қўли билан етаклаб мактабга олиб борди-ю, директор билан гаплашиб, мени ўқишга „жойлаб“ кўйди.

УЧИНЧИ БОБ

БИЗНИ СИНФДА ҚОЛДИРАДИГАННИНГ БОШИ ЎНТА!

Буни қарангки, биринчи кунданоқ Шодивой билан битта партада ўтириб қолдик. Ҳов ўшандা, уйимизда томсувоқ бўлган куни „ёнғоқ“ деб йиғламсираган, Раис бува „Икковларинг қиёматли жўра бўлларинг!“ деган Шодивой билан. Қуёндек юмшоққина, дўмбоққина Шодивой билан.

Иккаламиз биринчи партада ўтирган эдик, ўқитувчи опамиз мени таниб қолган эканми, фамилиямни иштиб, койиди:

Салимов! Орқа партага ўт! Бўйингни қара! Орқингида ўтирганлар доскани кўролмай қолади-ку!

Бизга барибир! Орқага ўтсак ўтаверамиз-да! Менга десп деразага ўтқазиб қўймайдими!

Энди ўрнимдан тураётган эдим, Шодивой билагимги осилди.

Она... — деди йифламсираб, — Кўшоминам бирга ўтираман!

Сен кичкинасан-ку!

Бирга ўтираман... — Шодивой яна йифламсиради.

Ўқитувчи опамиз иккиланиб қолди. Мен олдинда ғирсам, бошқалар доскани кўрмайди, Шодивой орқаги ўтса, у ҳеч нимани кўролмай қолади.

Билганларингни қил! — деди опамиз зарда билан. Кейин журнални очиб йўқлама қила бошлади.

Алимов! (Қаранг, Шодивой жўрам билан фамилиямиз ҳам уйқаш. Уники — Алимов. Меники — Салимов.)

Мен! — Шодивой бурнини торта-торта ўрнидан турди.

Бақоев!

Мен!

Ваҳобов?

- Мен!

Бора-бора йўқлама „С“ ҳарфига келди.

Самадов!

Мен!

Салимов!

- Биз! — дедим ўрнимдан сакраб туриб.

Ўқитувчи опамизнинг қоши чимирилиб кетди.

„Биз“ эмас, „мен“ дегин, Салимов! — деди тушунтириб. — Синфимизда битта Салимов бор. Уям бўлса сенсан! Тушундингми?

Тушундим!

Опамиз қайтадан ўқиди.

- Салимов!

— Биз!

— Вой, қанақа боласан ўзи? Сен биттасан! Салимов Күшоқвой! Нега „биз“ дейсан?

„Биз“ дейманми, „мен“ дейманми, нима иши бор? Ўқишини қойил қылсам бўлдими?

Ростини айтсам, ўқишини бопладим! Ўзбек тили, табиат — ҳаммасини дўндираман! Расм чизишдан бир марта „беш“ ҳам олдим. Фақат математика масаласида ўқитувчим билан ҳеч келишолмаймиз!

Опамиз ҳамма қатори мениям доскага чақиради.

— Қани айт-чи, Күшоқвой, иккни иккига қўшса қанча бўлади!

— Беш! — дейман бақириб.

Синфдаги болалар хахолаб кулади. Ўқитувчи опа икки чаккасини чанглаб жойига ўтириб қолади.

— Күшоқвой! — дейди жиғибийрон бўлиб. — Масалан, сенинг қўлингда тўртта олма бор...

— Ёнфоқ! — дейман бақириб.

— Нима?

— Мен олма емайман. Ёнфоқ яхши.

— Бўпти! — Ўқитувчи опамиз уф тортади. — Сенда тўртта ёнфоқ бор. Иккитасини менга бердинг...

— Йўқ!

— Нима?

— Ёнфогим ўзимга керак. Сизга бермайман!

— Мен мисол учун айтяпман, Салимов! Айиришни мисол қиляпман, тушундингми?

— Айиришни билмайман! — дейман мен ҳам зарда билан.

— Кўшишни яхши кўраман.

— Бўпти! Сенда олтига ёнфоқ бор эди. Мен тўртта кўшдим. Ҳаммаси қанча бўлади?

— Ўн битта!

— Күшоқвой! — Ўқитувчи опамиз қайтадан тушунтиради.

— Мана қараб тур...

— У бармоқларини букиб санашга тушади.

— Бир, икки, уч, тўрт, беш, олти... Яна тўртласини

қўшамиз. Демак, етти, саккиз, тўққиз, ўн... Кўрдингми?

Ҳаммаси қанча бўлди? Ўнтами?

Ўнта бўлганини ўзим ҳам биламан. Лекин ҳеч бўлмаса, битта қўшиб айтмасам, ақалли жиндек лоф қилмасам, бўлмайди-да, нима қиласай?

— Ўн битта!

Болалар яна хахолайди. Ўқитувчи опамиз астойдил ялиниади:

— Жон, Қўшоқвой! Ўнта дея қол.

— Ўн бир.

...Папкамни кўтариб уйга киришим билан онам сўрайди:

— Неча баҳо олдинг?

— Олти! — дейман илжайиб.

Синглим ёмон-да!

— Қани, ака, кундалигинги зинни бир қўрай! — деб папкамни титкилади.

— Эна! Акам учта „икки“ опти!

Онам шавла юқи капгирни бошимга ўқталади.

— Нима ҳунар кўрсатдинг яна, ярамас?

— Олти олдим!

...Онам ота-оналар мажлисига кулиб кетади-ю, қовоқ-тумшуғи осилиб қайтади.

— Қачон одам бўласан-а? — дейди зор қақшаб. — Ҳеч бўлмаса, синглингдан уялсанг бўлмайдими? Сендан бир синф юқорида ўқийди. Ҳамма баҳоси — беш...

Дадам келганида мени ёмонламайди-ю, ҳасрат қилади:

— Шу... Ўғлингизга ҳайронман-да, дадаси... Бошқа дарслардан бинойидек ўқиркан-ку, ҳисобни билмасмиш...

...Биринчи синфи-ку амаллаб битириб олдим. Иккичига кўчганимда ўқитувчи опамизнинг тоқати тоқ бўлди шекилли, дарсдан кейин мени олиб қолиб ташинлади:

— Бугун кечкурун отангни олиб келмасанг, мактабдан ҳайдатиб юбораман.

Кечкурун ота-бала бошлишиб, директорнинг хонасига кирдик. Мактабимизнинг директори похол шляпа

кийиб юрадиган қоп-қора одам. Қорни жуда фалати. Худди кетма-кет бир эмас, иккита тарвуз ютганга үхшайди. Қорнининг тепа қисмида тахминан менинг бошимдек, пастрофида ўртача қозондек тарвуз тиқилиб қолган...

Эшикдан кириб борсак, директоримиз у ёқдан-бу ёққа бетоқат юриб турган экан. Икки қадам ташлайдида, тұхтаб қолади. Уч қадам юради-да, тағин дам олади. Қорнидаги тарвузлар бир-бирига урилиб ичини оғритса керак-да.

Дераза олдида үқитувчи опамиз ўтирибди. Қовоғи солиқ. Кириб келганимизда менга қарамади ҳам. Да-дамнинг ҳурмати учун ўрнидан туриб, салом берди. Аммо үша заҳоти яна қовоғини солиб олди.

Директоримиз негадир йұталиб қўйди. Дадам билан қўш қўллаб кўришди-да, қорнини силади.

— Ҳа-а-а-ай! — деди чўзиб. — Сиз, Салимжон ака, ҳурматли одамсиз. Биз сизни жуда яхши кўрамиз, мактабимизга кўп ёрдам қилгансиз. Ремонт-пемонт, шипирип-мипири, ўтин-кўмир дегандек... Лекин... — у жуда чуқур ўйланиб қолди шекилли, яна қорнини силади. (Чамаси ақли қорнида, йўқ, қорнининг ўзида эмас, ичидаги кўшалоқ тарвузларда бўлса керак.) — Бу Кўшоқвойнинг ўзлаштириши чатоқ-ку.

Шунаقا дейишга деб қўйди-ю, яна пайдар-пай қорнини силай бошлади. Назаримда юзиям ёришиб кетгандек бўлди.

— Йўқ, Салимжон ака, биз Кўшоқвойни ёмон демаймиз, ўзи зўр бола. Интизоми дуруст, зеҳни ўткир. Қайси куни ҳурознинг расмини чизган экан. Кўриб ҳавасим келди. Ўзиниям худди тирикка үхшатворибди, азamat! Э, отангга раҳмат, девордим!

Директоримизнинг гапи иликдек ёқиб кетди. Маза қилиб илжаяётгандим, үқитувчи опамиз дик этиб ўрнидан турди.

— Кечирасиз-ку, — деди негадир қизариб-бўзариб. — Салимов математикадан — ноль! Иккинчи синфга аранг кўчирдик. Шу кетиши бўлса...

— Энди, Мұҳаббатхон, сизам қизишимнг-да, синглим. — Директор инсофга чақиргандек қисқагина йўта-

либ қўйди. — Бола — ёш. Вақт-соати билан ўрганиб олади...

Вой-бў, ўқитувчи опамнинг жаҳли шунаقا ёмонлигини билмаган эканман.

— Ўрганиб олади-и? — деди овози ингичкалашиб. Икки юзи шунағанги қизариб кетдик, бирор бехосдан тугурт чақиб юборса, лов этиб ёниб кетгудек аҳволда ўди. — Қачон ўрганади? Қачон? — У энтикиб қолди. — Яхши, — деди дадамга қараб. — Қўшоқвойга битта савол берсам майлими? Боғча боласиям биладиган савол...

Мундай қарасам, дадам директорга, директор дадамга тикилиб турибди. Иккаласидан ҳам садо чиқалиган эмас.

— Майли, — дедим отамнинг ўрнига ўзим жавоб бериб. Аниқ сезиб турибманки, ҳозир қўшиб ҳисоблаш касалим қўзғамаяпти. Ақлим, Турсунбой аканинг патшатидек қарсиллаб ишлаб турибди.

— Марҳамат! — ўқитувчи опам тантана билан гоҳ директорга, гоҳ дадамга, гоҳ менга қараб олди. — Икки карра икки қанча бўлади?

— Тўрт.

Дадам билан директор ярқ этиб ўтирилишди. Йўқ, менгамас, ўқитувчи опага. Ўқитувчи опам, негадир кўзимга узоқ тикилиб қолди. Бир-икки ютиниб қўйди.

- Беш карра беш? — деди нафаси ичига тушиб.
- Йигирма беш!
- Тўққиз карра тўққиз?
- Саксон бир!
- Саккиз карра ўттиз уч?
- Икки юз олтмиш тўрт.

Ўқитувчи опамнинг ранги кув ўчиб кетди. Директоримизнинг ичидаги тарвузлар бир-бирига пайдарнай урила бошлади, шекилли, қорни ўзидан-ӯзи лапиллаб кетди.

— Етмиш учдан ўн саккизни айирса-чи? — деди ўқитувчи опам. Ҳайронман, бу сафар овози шу қадар хоргин, шу қадар йиғламсираб чиқдик, саволини зўрға ўшийтдим.

Айтяпман-ку, мен айиришни билмайман. Фақат күнайтиришни қойил қиласан. Навбатдаги саволга нима дейишни билмай турган эдим, жонимга директор оро кирди.

— Бўлди! — Директорнинг овозиям жаранглаб кетди. Ўқитувчи опамизга қараб, қулини пахса қилди. — Ҳамма саволингизга мендан яхши жавоб бериб турибиди-ку! Тағин нима керак? Нега қийнайсиз болани?

Ростини айтсан, ўқитувчи опамга раҳмим келиб кетди. Худди мұъжизага дуч келгандек, нүқул фалати илжаяди. Оғзи ланг очилиб қолган.

Директоримизнинг қорни шитоб билан лапиллай бошлади. Шунақанги лапилладики, ўзиям тисарилиб бориб-бориб мөшранг мовут қопланган узун столга думбаси билан урилди, орқаси озор чекди шекилли, афти буришиб кетди.

Чамамда ўқитувчи опамиз хушидан кетиб қолдиёв! Ора-чора „ҳиқ-ҳиқ“ деб овоз чиқариб қўяди. Директор ҳам эсидан оғиб қолганмикан, десам, йўқ эс-хуши жойида. Тепамга келиб, иккига айрилиб кетган, қоқ ўртасида ўқариқдек из қолган бошимни силади. Мехр билан, узоқ силади.

— Рухсат сизга, Қўшоқвой, — деди овози товланиб. Товушидаги меҳрдан кўра сизлаб гапириши, айниқса, ёқиб тушди. Шу пайтгача мени ҳеч ким „сиз“ ламаган, ҳатто синглим ҳам камдан-кам „сиз“ дейди.

— Майли, — дедим эшикка йўналиб. — Раҳмат!

Йўлакка чиқсан, аллақачон қоронги тушиб қопти. Ҳамма ёқ жимжит. Йўлакда ҳам, мактаб ҳовлисида ҳам одам зоти кўринмайди. Туриб-туриб зерикиб кетдим. Ҳеч зоф бўлмагандан кейин, йилт этган нур кўринмаганидан кейин зерикади-да одам.

Қарасам, ҳозиргина ўзим чиқиб кетган директорнинг хонасидан чироқ нури тушиб турибди. Йўқ, хонанинг ўзидан эмас, эшик зулфинидан. Аввал калит солинадиган тешикдан ичкарига мўраладим. Ҳеч нима кўринмади. Кейин жиллаурса ўша ёқда нима гап бўлаётганини эшитгим келди. Ҳарчанд қулоқ солмай, ҳеч

балони эшитмадим. Охири, зулфинга қулоғимни қапиштириб олдим. Директоримизнинг зардали овозда тапиравётгани қулоғимга кирди. Аниқ-тиниқ кирди!

— Сиз, ўртоқ Икромова, шаҳардан келган одамсиз, — деди директор тажанг оҳангда. — Ёшсиз. Аммо билиб қўйинг. Қишлоқ — шаҳар эмас! Ҳамма олим булиб кетаверса, подани ким боқади?

Бир зум сукунат чўкди. Дадамнинг ғўлдираган товушни қулогимга кирди.

— Қўйинг, ўртоқ директор, Муҳаббатхон ёш... Ўғлимизнинг ўзиям...

Зулфин тешигига қапишиб турган қулоғимга ўқитувчи опамнинг ҳиқиллагани эшитилгандек бўлди.

— Мен... Мен... Болалар саводсиз бўлмасин, илм олсин, дейман... Болалар шу ҳолда кетаверса... Эртага ҳиммаси чаласавод...

— Бас! — директорнинг овози ўқдек қарсиллаб кетди. — Билиб қўйинг, ўртоқ Икромова! Бу — сизнинг Гонкентингиз эмас! Бизга оқбилак интеллигентлармас, дала заҳматкашлари керак! Беш йиллик қаҳрамонлари! Пахтакорлар! Мактабимиз бўйича юз процент ўзлаштириши берамиз деганимизда сиз ҳам бормидингиз?! Педсоветда кўл кўтарганмидингиз?

Директоримиз яна жимиб қолди. Чамамда, қорнини силаб қўйди шекилли.

— Хўш, нега энди ўзингизни панага оласиз? Нега раёно олдида, облоно олдида бизни шарманда қиласиз?!

Тағин жимлик чўкди. Кулоғимни эшикка янайм қаттиқроқ босдим.

— Майли, энди, малимжон... — Бу — дадамнинг овозилигини билдим.

— Йўқ, майлимас! — директоримиз тўсатдан чинкириб юборди. Овози ўқитувчи опамнидан ҳам интичкароқ чиқди. — Гап шу! Эртадан бошлаб биронта болага „икки“ қўймайсиз. „Уч“ ҳам қўймайсиз! Керак бўлса, боланинг уйига бориб ўқитасиз. Ёнида ётиб қоласиз. Хоҳласангиз шу, хоҳламасангиз каттақум. Поезд билстини олиб берамиз.



Ичкаридан тарс-турс қадам товушлари эши билди. Эшикка янаям қаттиқроқ ёпишдим.

Шу пайт... Эшик чунонам зарб билан очилди, бирор үнг қулоғимга... Йүқ, тарсаки билан эмас, нақд ўртачароқ кетмөн билан тушириб қолғандек бўлди. Ўзим ҳам камида олти марта умбалоқ ошиб кетдимов! Тўрт оёқлаб турганча мундай қарасам, ўқитувчи опамиз ним-коронги йўлакда чопқиллаб кетяпти. Пошналари „тарс-турс“, „тарс-турс“ қиласди.

Эмаклаб ўрнимдан турганча, гир-гир айланаётган бошимни ушлаб кўрдим. Хайрият, жойида экан! Ўнг қулоғим ловуллаётганига қарамай, илжайиб қўйдим.

Ўқитувчи опам математикадан эндиам „икки“ қўйиб кўрсин-чи! Хоҳласам, икки карра икки йигирма икки дейман! Хоҳласам, бешни бешга қўшса, эллик беш бўлади дейман. Мени синфда қолдириб бўпти!

ТЎРТИНЧИ БОБ ХИХ, ТУЛПОРИМ, ХИХ!

Тўртинчи синфи битираётган кезларим эди. Бир куни эрталаб папкамга яримта нон, бир ҳовуч ёнфоқ, беш-олтида попук қанд солиб, чиқиб кетаётсам, дадам тўхтатди.

— Шошма, ўғлим! Бугун бозорга борамиз.

Анграйиб қолдим. Ҳар куни таёқ олиб мактабга ҳайдагудек бўладиган отам, бугун бунаقا деяпти.

Ҳовли бурчагида бутига челак қистириб, сигир соғиб ўтирган онам ҳам дадамнинг гапини эшилди. Онам, ўзи жуда ювош-ку, бир жаҳли чиқса, шунақсанги бо биллаб берадики, мен тугул отам ҳам қочгани жой тополмай қолади.

— Ҳой! — деди онам сигир соғища давом этиб. — Нима деб алжираяпсиз? Болани ўқишидан қолдиргунча ўзингиз ишга борсангиз ўласизми? Раис бува нима дейди?!

— Бормайман! — дадамнинг лунжи учеб кетди. —

**Ишламайман ўша Раис буванг билан, тушундингми,
ишламайман!**

**Онам сигирни чала-чулпа соғиб, ярим пақир сутни
кўтарганча яқин келди.**

— Нима бўлди? — деди хуркиброқ.

— Ишла-май-ман! — дадам айвон пешида ўтирганча
тиззасига шаппатилади. — Алдам-қалдамга тоқатим йўқ!

Онам бирпасда шалпайиб тушди.

— Майли-ку, — деди ялиниб. — Кап-катта одам
ишламай қўйсангиз... Бу ёқда бола-чақа...

Дадамнинг лунжи баттар уча бошлади.

— Мен қамалиб кетсам, бола-чақани сен боқасан-
ми, аҳмоқ хотин! — деб муштини дўлайтирган эди, онам
пақирни лапанглатиб қочди.

— Майли, ўзингиз биласиз, — деди нарироқ бориб. —
Аммо шу топда Қўшони бозорга...

— Ишинг бўлмасин! Юр, ўғлим, Чиялига борамиз!
Суюнганимдан папкамни ҳовлига улоқтиридим.

Чияли бозорни кўрмабсиз, дунёга келмабсиз! Бу
бозорда-чи, хоҳ ишонинг, хоҳ ишонманг, одамдан бош-
қа ҳамма нарса сотилади. Тўғночидан тортиб бульдо-
їргача, сичқондан тортиб филгача! Овқатларининг
ўрлигини айтмайсизми? Хоҳласангиз, серқатиқ тўппа
они ичинг, хоҳласангиз, арча ҳиди анқиб турган тан-
дир-кабоб енг! Биламиз-да! Бултур келганимизда онам
мени яхна гўшт билан сийлаган.

Балки сиз Чияли бозор фиж-фиж чайқовчига тўлиб
кетган, деб ўйларсиз? Бекорларнинг бештасини ай-
тибсиз! Бозор куни ҳамма ёқни апталапка босиб кетади.
Ішр гал онам апталапқадан ялтироқ кўйлаклик олмоқчи
бўлган-у, пули етмаган.

Эсимда. Онам:

— Кристалингиз неча пул? — деса, бошига чўтирма
кийиб олган сотувчи:

— Олтмиш сўм — деган.

Онам:

— Бир кийимлиги олтмиш сўмми? — деса, чўтирма
кийиғин сотувчининг аччиғи чиққан.

— Магазиннинг моли кийимлаб сотилмайди, эна, метри олтмиш сўм! — деб жеркиб берган.

Онамнинг ҳам жаҳли чиқиб кетган.

— Мен биламан, давлат баҳосида метри ўн етти сўм туради! — деган.

— Йўлингдан қолма, эна! — деган сотувчи сансираб.

Онам ўзидан каттани сансираш мана бунақа бўлади, деб мелиса бошлаб келган. Мелиса яхши киши экан. Онамни юпатган:

— Хафа бўлманг, эна, нариги апталапқадан ола қолинг!

Онам иккаламиз нариги апталапқага борсак, худди ўшанақа ялтироқ матонинг бир метри етмиш сўм экан...

Чияли бозори ана шунақа! Бутун бошли Ўзбекистонни ўн марта, борингки, ўн бир марта айланиб чиқсангиз ҳам бунақа бозорни тополмайсиз!

Ростки, дадам мени бозорга етаклаб қолдими, бундан чиқди, аввало, қорним ёрилиб кетгунча меҳмон қиласди! Кейин бош-оёқ ясатади. Ким билсин, балки пат-пат ҳам олиб берар! Турсунбой акамнинг „пат-пат“ини ҳавас қилиб юрганимни онам дадамга айтган бўлса — айттандир-да! Нима қипти! Яккаю ёлғиз ўғилмиз!..

...Ажаб! Дадам яхна гўшт тугул айрон ҳам олиб бермади. Мотоцикл бозори у ёқда қолиб, эшак бозорига судради. Эчкидеккина хўтикка харидор бўлди. Савдолашиб-савдолашиб, йигирма сўмга „бор, барака топ!“ қилди.

Ростини айтсам, хўтигим хунуккина эди. Қилтириқ, қулоқлари шалпайган, узун-узун оёқлари қалтираб турибди.

— Билиб қўй, ўғлим! — деди дадам тантана билан. — Кўрасан, мана шу жонивор ҳали сенга қўп хизмат қиласди!

Янаям ростини айтсам, уйга етаклаб келгунча хўтигим ўзимгаям ёқиб қолди. Ювошгина экан. Катта-катта, қоп-қора кўзлари одамга маъюсланиб термилади. Ҳанграмоқчи бўлади-ю, эплолмайди. Оғзини ланг очиб, ингичка овозда „ҳҳи-ҳҳи“ қилиб қўяди. Худди кулганга ўхшаб.

Эртасигаёқ бутун мактабга хабар қилиб чиқдим:

— Менинг филдек ҳанги эшагим бор. Оти — Тулпор!
Бир тепса, түяни сұлайтиради!

...Бекорга мақтамаган эканман! Икки йил үтиб, олтингчи синфға күчганимда Тулпорим чуонам ҳанги әшак бұлиб етилдики, күрсангиз ҳавасингиз келади. Юрса ер титрайди, югурса „ман-ман“ деган пойгачи отни ярим йўлда қолдириб кетади. Бекорга Тулпор деб от қўймаганман-да! Ақллилигини айтмайсизми? Қишлоғимиздаги одамларнинг қоқ ярмиси соатини эшагимнинг ҳанграшига қараб тўғрилайди. Эрта билан будильникнинг жиринглаганидан эмас, Тулпоримнинг ҳанграганидан уйғонаман. Раппа-расо соат еттида раппа-расо етти марта ҳанграйди.

Дадам ҳам эшагим ҳанграши билан йўлга отланиб қолади. Энди жамоа хўжалиги идорасида чут қоқмайди. Пахта пункти ёнидаги дўкончада газета сотади. Онамнинг айтишига қараганда, Раис бува инсоф қипти: дадамнинг гуноҳидан кечиб, газета сотувчи қилиб қўйганиш. Лекин дадамнинг ўзи бу тўғрида оғиз очмайди.

Тулпорим бўлса, ҳар соатда ҳанграб туради. Кун бўйи. Бир минут ҳам кечикмай! Қўшни жамоа хўжалигида турадиган тоғам Тулпорингни „Москвич“га алмашасанми, деганида жон-поним чиқиб кетди. Эсимни ебманми, алмашиб? Эшак қаёқда-ю, аллақандай „Москвич“ қаёқда! Мана, мен санай, сиз бармоғингизни букиб туринг.

Биринчидан, машинага бензин керакми? Керак! Бензин дегани осонгина топила қолса экан! Бир марта әшагимни миниб узум олиш учун район марказидаги бозорга тушганимда ўзим санаганман. Бензоколонкада бир юз ўн тўққизта машина сафга тизилган аскардек қатор турган экан. Шопирлар сўкинган, машиналар пайдар-пай сигнал берган. Ўшанда Тулпорим машиналар ҳадеб библийверганидан ғаши келдими, бутун кучини тўплаб шунақанги ҳанграб бердики, тоғдек келадиган самосвалларнинг ҳам дами ичига тушиб, пилдир-пис бўлиб қолди. Шундай қилиб, машина зоти бензинсиз бир қадам юролмайди. Эшак-чи? 93 бензин у ёқда турсин, солярка ҳам керакмас!

Иккинчидан, ҳар қадамда мелиса тұхтатмайди. Бұлар-бұлmasға талонингни тешаман, деб дүқ урмайди. Демак, бу томондан ҳам пулингиз ёнингизга қолади.

Учинчидан, сиз томонларда қанақа билмадим-у, бизнинг туманда пахта терими бошланиши билан шахсий машиналарда юриш тақиқланади. Тұғри-да, ҳар ким үзининг машинасида катайса қилиб юраверса, пахтани ким теради? Шунинг учун күчада кетаётган машинани таққа тұхтатишида-да, шопирнинг ҳам, машинада үтирганларнинг ҳам құлиға этак тутқазишида. Марҳамат қилиб, 20 килодан пахта теріб берасиз-да, кейин түрт томонингиз қиблა! Этак тұлмагунча кетиш йүқ. Үн чақирим юрмасингиздан яна тұхтатишида. „Хозиргина теріб бердім-ку“, десанды, „У совхознинг пахтаси эди, энди жамоа хұжалигиникини терасиз“, дейишида. Тоғам айтты берган. Бурноғи йили янғамни туман марказидаги туғуруқхонага олиб кетаётганда уч жойда тұхтатиб „хашар“ қылдырышибди. Янғам туғуруқхонага етиб боришини кутиб үтирай, машинанинг ичида туғиб құя қопти. Шунинг учун жиянимнинг отини, эркалаб „Москвич полвон“ деймиз. Үзиям полвон бола. Кузда тили чиқди. Эна дебмас, дада дебмас, „па-па-а-п“ деб чиқди. Қаранг, машина ичида туғилғани эсида бор экан. Ақлли бола-да!

Хүш, энди айтинг-чи, әшак миниб кетаётган одамни биров тұхтатиб, пахта тер дейдими? Демайди. Одамлар шуни билиб қолишган. Хотини айни кузда туғмоқчи бўлса, машинаға үтқазиб эмас, әшакка мингаштириб боришида туғуруқхонага.

Тоғам айтган: битта ғилдирак давлат баҳосида етмиш сўм тураркан. Аммо устахонада ғилдирак йўқлиги учун бозордан икки юз сўмга оларкан. Битта аккумулятор олтмиш сўм тураркан. Устахонадаги қадрдони у ёқقا югуриб, бу ёққа югуриб аранг бир юз йигирма сўмга топиб берибди. Тоғам хурсанд бўлиб кетганидан ошнасига яна ўн сўм қўшиб берибди. Аккумуляторни „ювиш“ учун...

Әшакка-чи! Запчаст керакми? Керакмас. Хуллас, санайверсам, Тулпоримнинг мақтовига сўз тополмайман.

Меҳрибонлигини айтинг. Ҳар куни охирги дарс тугаши олидидан нуқул деразага қарайвераман. Ҳудди ўзим билгандек, деразада аввал бир жуфт диккайган қулоқ, кешини Тулпоримнинг тумшуғи кўринади. У кулранг-кўкиш либларини чўччайтириб, ҳавони ҳузур қилиб исказида, бошини силкитиб-силкитиб, пишқириб қўяди.

Ўқитувчилар ҳам таниб қолишган уни.

— Ие, Кўшовой, дарс тугаб қопти шекилли, эшагинг келди, — деб қўйишиади. Қўнфироқ чаладиган навбатчи адашса-адашадики, Тулпорим хато қилмайди. Чиқишга ўз вақтида қўнфироқ урмаса, секунд-секундини тўғрилаб ҳанграб юборади. Ҳанграганда ҳам қанақа денг? Нак деразага тумшугини тираб ўкиради. Ҳар биттаси таҳминан ярим метр келадиган қулоқлари диккайиб, ҳуми хода бўлиб кетади. Ўша заҳоти қўнфироқ чалинса — чалингани. Чалинмаса, дераза ортидан ўқитувчига жаҳл аралаш адоватли қараб қўяди-да, икки биқини кириб-чиқиб, кириб-чиқиб ҳирқиллай бошлайди. Ҳафа бўлганидан шунақа қилади, деб ўйлайсизми? Ҳечамда! Тулпорим янгидан ҳанграш учун куч тўплаётган бўлади. Ўпкасини тоза ҳавога лиқ тўлатиб олиши керакми, ахир? Агар ўшандаям қўнфироқ чалинмаса, шунақанги шовқин соладики, фақат бизнинг синфимиз эмас, бутун мактаб титраб кетади. Деразалар жаранг-журунг қилган, шиғтнинг оҳак сувоги кўчиб тушган...

Йўқ, кўпинча иш бунчаликка бориб етмайди. Тулпоримнинг овози билан дарсдан чиқишга чалинган қўнфироқ деярли баравар жаранглайди.

Синфхонадан отилиб чиқамиз-у, Шодивой иккамиз эшагимга мингашиб оламиз. Шодивой яхши болала, ўзи! Ўқитувчилар у ёқда турсин, директоримиз ҳам уни „сиз“лаб гапиради. Шодивой ҳам менга ўхшаган биттаю битта ўғил. Фақат менга ўхшаб синглиси эмас, ониси бор. Тўртта. Ҳов ўшанда, иккинчи синфда ўқиб юрганимда директоримиз ўқитувчи опамизни роса ўришганини айтгандим. (Ўшанда ўқитувчи опам эшикни Қўлтисроқ очган эканми, бошимдаги тухумдек фурра салқам икки ойгача кетмади. Фуррам жойига тушгунча

үқитувчи опанинг ўзи ишдан бўшаб кетди. Сабабини кейин билдим. Опамиз мен тугул, ҳатто Шодивойдек боланинг ҳам чорагига „икки“ чиқармоқчи бўлган экан. Директоримиз шунисига чидолмабди.)

Кейинги пайтларда Шодивой янаям семириб, янаям дўмбоқ бўлиб кетди. Аввал икки юзи лўппигина нонга ўхшарди. Ҳозир камида бир кеча-кундуз ошиб ётган хамирдек бўлиб кетган. Баъзан ҳазиллашиб жўрамнинг юзини силагим келиб қолса, бир юзини икки қўллаб силайман.

Шундай қилиб, Шодивой иккаламиз синфхонадан отилиб чиқиб эшагимга мингашиб оламиз. Мен-ку Тулпоримга минавериб уста бўлиб кетганман. Лип этиб устига чиқиб оламан. Папкамни тиззамга қўйиб, Шодивойни имлайман.

— Келавер!

Шодивой эшакка мингашгунча терлаб, сув бўлиб кетади. Ҳарсиллаб нафас олганча, гоҳ ўнг томондан келади, гоҳ чап томондан... Тулпорим бўлса тақдирга тан бергандек, қимир этмай туради. Эсли-да, Шодивой қил ўтмас жўрамлигини билади!

Жўрамнинг қўлтиғидан тортиб эшакка мингаштиргунча ўзим ҳам терлаб кетаман. Дадам минганида қилт этмайдиган Тулпорим Шодивой мингашици билан орқага чўнқайиб ўтириб қолгудек, бир силкинади. Чамамда, орқа оёқлари букилиб кетадиёв! Аммо сир бой бермайди. Аввалига уч-тўрт қадам гандираклаброқ боради-да, кейин йўргалашга тушади.

— Хих, Тулпорим! — дейман бақириб.

Мактабдан чиқаётган болаларни бир зумда қувиб ўтамиз. Кейин катта кўчага чиқамиз. Автобус бекатида дўппи кийган кишилар, атлас кўйлаги офтобда товланиб турган хотинлар бизга ҳавас билан қараб қолишиади. Баъзилари негадир афсусланиб бош чайқайди...

Шу... Хотинларга ҳам ҳайронман-да! Атлас кўйлак кийишни яхши кўришади-ю, қурт боқиши азобидан хабари йўқ! Ўйласа керак-да, атлас деган магазинга чиқади-ю, дўкончига эллик сўм қўшиб берса, пеш-

пахта тагидан бир жўра атласни олиб, газлаб беради, деб!

Пилла боқиши осон эканми? Сўри қуриш бор. Қанак қилиш бор. Сийраклатиш бор, сўри тагини тозалаш бор. Ерга тушиб кетган қуртларни битта-биттадан териб, жойига қўйиш бор. Жимитдек қутидан чиққан қуртлар ўн беш кунда бутун уйни эгаллади. Авваллари жой гонилмаганидан қурт учун мактабдаги битта-иккита синфониям бўшатиб беришаркан. Йўқ, кейинги пайтда Раис бува „Куртни одамлар уйида боқсин“, деб буйруқ берган. Тағин бу қурт дегани шунағанги таннозки, хона иссиқ бўлсаям ёқтирмайди, совуқ бўлсаям. Ҳаво сал қовоғини солса, азза-базза печка ёқасиз. Ҳаво исиб кетса, деразани қия очиб, салқинларатасиз. Шунинг учун ширель ойи охирлаши билан одамлар уйини қуртга бўшатиб, ўзлари ҳовлида ётишади.

Энг қийини бу ҳам эмас. Пилла қурт деганинг даҳаси бўлади. Биринчи даҳа, иккинчи даҳа... Учинчи даҳага кирганида ҳар биттаси аждардек очофат бўлиб кетади. Барг деганин ямламай ютади. Етказиб бермай кўринг-чи! Айниқса, катта даҳага кирганида кўрсангиз! Мингтачasi баб-баравар бошини қутариб, берсанг ейман, бермасанг ўламан, деб туради.

Аммо қани ўша барг? Авваллари пахта пайкаллари чистида қатор-қатор тутзорлар бўларкан. Раис бува, бўлтак-сўлтак ерлар кўпайиб кетган, техникага кенг майдон керак, деб тутларни кестириб ташлаган.

Ўшандан бери пилла қурти катта даҳага кириши билан югур-югур бошланади. Бизнинг жамоа хўжалиги-дагилар юқ машинасига ўтириб, нариги жамоа хўжалигига борса, нариги жамоа хўжалигидагилар бир эмас, иккита машинага ўтириб, бизнинг жамоа хўжалигига келади. Дадамнинг айтишича, бир сафар бизнинг пиллачилар тутнинг конини топишибди. Нариги хўжаликда каттакон тутзор бор экан. Ярим кечада бориб чопқи билан роса барг кесишибди. Машинага босишибди. Шонир машинани ҳайдайман деса, фидираги дақир-дуқир қиласмиш-у, юрмасмиш. Тушиб қарашса, машинанинг

тўрттала балони ёрилиб ётганмиш. „Бирорнинг молини ўғирлаш шунаقا бўлади! — дебди мўйловти бир киши уларнинг ёнига келиб. — Пилла керак бўлса, ўзларинг тут ўстиринглар! Раҳмат, ишимизни енгиллатиб барг кесиб бердиларинг“.

То бу ёқдан бошқа машина тўртта балон оборгунча тутзор эгалари тайёр кесилган баргларни ташиб кетишибди.

Бу гапларни айтмасдим-у, нима қиласай, бизникида ҳам бир қути пилла бор-да! Ҳозир катта даҳага кирган. Эрталаб дадам, „Ўғлим, Тулпорингни эгарлаб, барг қидирмасанг бўлмайди“, деган.

Шуни ўйлаб кетаётсам, орқамда мингашиб ўтирган Шодивой биқинимга туртиб қолди. (Муштиям биққигина, юмшоққина. Ўзи ўнг биқиним қичиб турган эди, жоним роҳат қилди.)

— Қўшовой! — деди жўрам. — Пахта пунктига бормаймизми? Бугун кино бор экан. Индийский кино...

— Э, кинони бошимга ураманми! — дедим тўнфиллаб. — Барг топмасам, дадам ўлдиради! Хих!

Эшагим шошиб турганимни сезди. Йўл четидаги тошларни шақир-шуқир босиб, илдамлаб кетди. Шодивойни ҳар куни Тулпоримга мингаштириш малол келмаса ҳам бугун алам қилди. Мен буни текиндан-текинга уйига обориб қўяман, бу маза қилиб кино кўради. Мен бўлсан, ҳали барг излашим керак! Шодивойнинг уйи яқин бўлсаям гўргайди. Йўл ўлгудек айланиш! Аввал идора ёнидан ўтамиш. Кейин атрофини аллақандай жилонжийдалар, юлқунзорлар ўраб ётган чакалакзор мозор четидан ўтамиш. Ана ундан кейин Шодивойнинг уйи келади.

— Баргни қаёқдан оласан? — деди Шодивой яна биқинимга туртиб.

— Мен қаёқдан билай? Хих, Тулпор!

Эшагим янайм илдамроқ дикиллаб кетди.

— Қўшовой! — деди жўрам бир маҳал. Овози фалати, сирли чиқди. — Бир эшак барг топиб берсам, кинога борасанми?

Севинганимдан бутун гавдам билан ўгирилдим-у,

Үртогимнинг юзидан ўпид олдим. Ўзиям бир тогора хамирнинг бир бурчидан ўпгандек бўлдим.

- Ростданми? — дедим бақириб.

Мувозанат бузилди шекилли, эшагим мункиб кетди. Лекин дарров қаддини ростлаб яна дикир-дикир қилиб ўлида давом этди.

- Ростдан, — Шодивой елкамга қоқди, — юравер биганикига!

Раис буванинг „Волга“ у ёқда турсин, ЗИЛ ҳам, борингки, танк ҳам сифадиган кунгурадор дарвозаси олида тўхтадик. Шодивой ерга тушиши билан эшагим ҳурсиниб-ҳурсиниб нафас ола бошлади. Қарасам, икки таби кўпириб, сарғимтири тили осилиб кетибди. Ҳанг-райлиган вақти бўлган эканми, бир-икки ҳирқиллаб ўкиргиси келди-ю, мадори етмади шекилли.

Жўрамникига шунча келган бўлсам ҳам ҳовлисига кирмаган эдим. Ҳозир ҳам ичкарига киргим келмади.

- Юравер! — деди Шодивой дарвоза ёнбошидаги ишники очиб. — Ўзимизнинг тутимиз бор. Баргини кесиб опамиз.

Кўрқиб кетдим.

- Даданг билиб қолса-чи?

- Дадам ишда.

• Энанг-чи?

- Юравер! — Шодивой қўлимдан тортди. — Энам Сожида опамнинг бешик тўйига кетган.

Йўлакка киришим билан бир эмас, учта машинага қўшим тушди. Биттаси оқ „Волга“, биттаси янги чиққан қилил „Жигули“, энг ичкарида ҳаворанг „Запорожец“ турибди.

• Кимники? — дедим „Волга“га имлаб.

Дадамники.

• Даданг „Нива“да юради-ку!

Жўрам кулди. Икки юзи қизариб, янаям лўпиллаб кетди.

- Униси — давлатники! Бу — ўзимизники!

• У-чи?

- Буми? — жўрам юмшоқ кафти билан қизил „Жигули“нинг томига шаппатилаб қўйди. — Кичик поч-

чамники. Дадам поччамга айтганди. „Үғил күрсанг, „Жигули“ сеники“, деганди. Сожида опам үғил туғди. Энди поччам машинани олиб кетади.

— Буниси-чи?

Шодивой ҳаворанг „Запорожец“га менсимайроқ қараш қилди.

— Буниси меники. Дадам ваъда қилган. Еттини битирган кунинг калитни қўлингга бераман деган. Янаги йил минаман...

— Ўзимнинг Тулпорим яхши! — дедим паст келишни хоҳламай.

Ховлига кириб, анграйиб қолдим. Худди томошабоннинг ўзи! Олмалар, гилослар қатор-қатор экилган. Ўртада катта гулзор. Атиргуллар очилган. Гулидан фунчаси кўп. Гулзор ўртасида мармар фонтан. Ҳали сув отилмаяпти-ю, аммо мармар устунчалари ювиб қўйилган. Ҳовлининг тўрт томонида қатор-қатор уйлар. Устуни нақшланган айвонлар...

— Қани тут, Шоди? — дедим гарангсиб.

— Ана! — жўрам ҳовли бурчагига имо қилди. Қарасам, жудаям бизнинг ёнгоқчалик баҳайбат бўлмаса ҳам камида ўшанинг ярмидек келадиган тут савлат тўкиб турибди. Фарқ пишганини айтмайсизми? Ҳатто тагига, асфальт босилган ерга анча-мунча тўкилибдиям.

Файратга кириб кетдим.

— Дасткалланг борми? — дедим ҳовлиқиб.

— Нима у дасткалла?

— Чопқи-да, ишқилиб, ошпичоққа ўхшаган! Барг кесадиган...

Шодивой узоқ ўйлаб қолди.

— Болта бор! — деди ниҳоят.

— Опкел!

— Йиқилиб тушма! — деди Шодивой тутга тирмашаётганимда.

Учи булаттга тегиб турган ўзимизнинг ёнгоқдан калла ташлаган одамга аллақандай тутга чиқиши нима бўпти. Болта бандини камаримга қистирдим-у, бир зумда тут шохига миниб олдим.

Болтани бир урганимни биламан! Бошимга дув этиб тут ёғилди. Тағин қанақа денг? Марварид тут! Ҳар биттаси бармоғимдек келади.

Шошма! Нуқул барғ кесавериб, тут ейиш эсимдан чиқиб кетибди-ку! Аввал бир түйиб олай! Құлим етган жойдаги шохларни синдириб, тутларни қаппалаб оғзимга тиқавердим. Шунақанги ширинки, ирис ишқаладга үхшайды.

— Күшовой! — пастдан жұрамнинг ингичка овози өшитилди. — Бұл тез! Ҳозир энам кепқолади!

Онаси билан нима ишим бор?! Шипиллатиб тут сийшга түщдим.

Эрталабдан бери қорним очиб кетгани учунми, шунақанги иштаңага кириб кетдимки, шу очофатлигимни күрса, катта даңага кирган қуртлар ҳам бир чеккага чиқиб таъзим қилиб турған бұларди.

— Күшо! — Шодивой пастдан туриб ялинди. — Жон Күшо! Сенга бир тоғора тут бераман! Йүқ, үн тогора! Үзим үйингга обориб бераман! Тезроқ бұла қол, жүражон...

Тезроқ бұлармишман! Шошиб нима қылдым! Ана, ұммаси тайёр! Тут үзимга, барғ — қуртимга. Тутни қаппалаб еявердим-еявердим, охири, қорним дарангос бұлыб қулдур-қулдур қила бошлаганини сездим. Чамамла, қорним қорин әмас, шинни тұлдирилған хұмга айланып кетдиёв! Бұпти, энди ишга киришамиз.

Үзимча дарахтдаги тутнинг ярмисини еб қўйдим, леб ўйловдим. Йўқ, ҳали қўп экан. Болта билан битта шохни кесгунимча юзта тут ерга дув тўкилади.

— Тезроқ! — Шодивой турған жойида ер тепди. — Бўлсанг-чи!

— Шохларни эшакка ортавер! — дедим бақириб. — Мен кесиб тураман, сен ташийсан!

Шундоқ қилдик. Мен пайдар-пай шох кесиб турибман, Шодивой пайдар-пай ташиб турибди.

Одам бир файратга кириб кетса, нима қилиб қўйинини ўзи билмай қоларкан! Бир маҳал қарасам, бутун болни тутнинг қир учидаги учтами-тұрттами шох қопти! Ҳули қамиш учидаги попилтириқдай.

— Кўшо-о! — пастан Шодивойнинг йиғламсираган овози келди. — Эшагинг кўринмай кетди. Ҳамма ёғи шо!

— Кўявер! — дедим илжайиб. — Тулпорим бир эмас, иккита зилнинг юкини кўтаради.

Худди шу пайт дарвозахона томонда янграган аянчли хитоб қулоғимга чалинди.

— Ё тавба! Ё Худо! Вой... Вой. Вой-до-о-од!

Аввал ўзим ерга сакрадимми, ё мен тушишимдан олдин ер қимиirlадими, билмайман. Шундоқ қарасам, камида бир кўрпага етгулик қора атласдан кўйлак кийган хотин кўзлари шокосасидан чиққудек булиб, чалқан-часига гурсиллаб ерга йиқилди. Кўлидаги тугун анча нарига отилиб кетди. Назаримда, уйлару айвонлар ҳам, яланғочланиб қолган тут ҳам силкиниб кетгандек бўлди.

— До-о-од! — хотин шунақанги йўғон овозда ҳайқирдики, худди станциядаги тепловоз гудок чалгандек, икки қулоғим чиппа битиб қолди.

— Вой-дод! Уйим кўйди!

Аланг-жаланг бўлиб, Шодивойни қидираман, қани кўринса! Ерга кирдими, осмонга учиб кетдими, билсан ўлай!

Мен ҳам вақтни ғанимат билиб, кўча эшикка отилдим. Бояги семиз хотин бўлса қаловланиб, қаддини ростлашга уринар, филнинг қулоғидек осилиб кетган юзини юлиб, нукул дод соларди:

— Уйим кўйди! Ўғри босди!

Ер билан битта бўлиб ётган тутларни босиб кўчага отилдим. Қарасам, дарвозахона рўпарасида ўртачароқ юқ машинасига ортса, тахминан чорак қисми ортиб қоладиган барг ғарами турибди-ю, эшагим кўринмайди.

Хаёлимга лоп этиб бир фикр келди. „Тамом бўлдим! Ҳозир Шодивойнинг онаси чиқиб, мени тагига бир босса, бургадек пирт этаман-у, жоним чиқади-кетади!“

— Тулпор! — дедим чинқириб. — Тулпорим!

Камида бир ярим машинага юқ бўладиган барг хирмонининг қоқ ўртасида „ҳирқ“ этган товуш келди.

Бор экансан-ку, Тулпорим!

Типирчилаб-типирчилаб барг ғармининг қир учига чиқиб олдим. Шодивой ҳам маладес-да! Шохларни

шу қадар шиббалаб юклаган эканки, биттаям барг түкимлами.

— Хих, Тулпор, хих! — дедим бақириб.

Хулди шу пайт кунгурадор дарвоза шарақлаб очилди. Шодивойниң онаси эшикдан чиқай деса сиқилиб қолишини билиб, дарвозаниң оңиб қўя қолганини гуашундим. Чамамда, у дарвозаниң ярмини эгаллаб турарди. У, ўзидан-ўзи судралаб бораётган фарамга, фарамнинг қир учидаги чордона куриб ўтирган қол-қора болага, яъни менга кўзи тущди-ю, ранги докадек оқариб кетди.

— Бис-бис-бисмилло! — деди дудуқланиб. Таппа ўтириб қолди. Ўша заҳоти яна ер қимирлагандек бўлди. Ўзим ҳам хирмон устидан ўшиб тушай дедим. Эшагимнинг қорни ўрнига тут шоҳларини тепкилаб бақирдим.

— Хих!

Хайрият, хавфли жойдан узоқлаб кетдик. Катта йўлга чиққанимизда бир нарсани пайқадим. Велосипеду мотоцикллар у ёқда турсин, юқ машиналари ҳам бизни четлаб ўтаяпти. Мотоциклчилар ўз йўлига. Ҳатто шопирлар ҳам эллик метрча олдинга ўтиб машинасини тўхтагали-да, азза-базза ерга тушиб, орқасига қараганча анграийиб қолади.

Мен бўлсан, фил устида ўтирган подшодек буйруқ бераман:

— Ҳа, Тулпор!

Тулпорим дикир-дикир қилиб илдамлайди. Дононгини қаранг. Ўзи-ку устига кўрпа ёпилган мушукдек шоҳнинг тагида кўринмай кетган. Йўлни қаёқдан топиб боряпти, билсан ўлай! Устига-устак ҳар соатда минутминутигача аниқлик билан ҳанграйдиган эшагим, мана, орадан уч соатча вақт ўтибдики, ғиқ этиб овоз чиқармайди. Яхши-да! Одамлар қойил қолсин! Бир ярим машина тутбарг ўзидан-ўзи Кўшовойларникига ўрмалаб кетянти. Баракалла, Тулпорим!

Ҳайронман, хаёл олиб кетибдими, онамнинг фалолиги қош билан қовоқ ўртасида туради, дегани ростми, нима бўлганини ўзим билмай қолдим.

Бир маҳал эс-хүшимни тўплаб олсан, каттакон чор-раҳанинг қоқ ўргасида турибмиз. Эшагим газабнок ҳи-қиллаяпти. Аввал ўнг томонимга қарадим. Ҳеч гап йўқ. Кейин чап томонимга қарадим. Ҳеч нима кўринмайди.

— Хих! — дедим ҳайқириб. — Хих, Тулпор!

Бироқ қадрдан эшагим қилт этмай тураверди. Аламли пишқириб қўйди. Ўтирган жойимда мундоқ орқамга ўгирилиб қарасам, не кўз билан қўрайки, аллақандай қирчанғи бир эшак биз не машаққатлар билан кесган баргларни бемалол кавшаяпти.

Қўлимни мушт қилиб бақирдим.

— Йўқол!

Вой сурбет-ей! Парво қилмайди! Тут баргини узиб-узиб олади-да, хузур қилиб кавшайди. Ростмана ҳанги бўлсаям майли-я, Тулпоримнинг ярмича келадими-йўқми-ю, голибона пишқириб қўяди.

— Хих! — дедим чинқириб. — Хих, ҳаром ўлгур!

Тулпорим, бунақа дағдагани ўзига тегишли деб ўйладими, жаҳли чиқдими, унисини билмайман. Шуниси эсимдаки, эшагим нафрат тўла оҳангда ҳанграб юборди. Хирмон ўзим билан қўшилишиб, раппа-расо бир юз саксон градус айланиб кетди. Шунақанги кескин айландики, ерга чилпарчин бўлиб тушишимга бир баҳя қолди. Бегона эшак хирмон тагида шундоқ қудратли рақиби борлигини билмаган экан шекилли, шаталоқ отиб қочиб қолди. Тулпорим ҳам уч соатдан бери жим турганининг хуморидан чиқиш учун тўхтовсиз ҳанграганча тоғ бўйи хирмонни, хирмон устида ўтирган мени ортмоқлаб „ўғри“ эшак орқасидан йўртиб кетди.

Ўғри эшак қанча тез чопса, Тулпор ҳам шунча тез йўргалайди. Ўғри эшак думини чотига қисиб нола чеккандек фиқ-фиқ қиласди. Тулпорим голибона ҳанграйди. Қарасам, ўғри эшак мозористон ёнидаги жилонжийдалар, қоратиканлар чирмашиб кетган чакалак орасига ўзини урди. Чакалакка кириб кетаётганда алам қилсин, дегандек икки марта шатта отиб ҳам қўйди.

— Иш-ш! — дедим жонҳолатда. — Иш-ш! Жон Тулпор, иш-ш!

Қаёқда? Тулпорим биттаям гапимни эшитмади. Е эшитсаям қирчанганинг ҳақоратига чидолмадими, билмайман. Аввал оёқларимга, кейин қўлларимга, ундан кейин юз-кўзимга тиканлар санчила бошлади.

— Иш-ш! — дедим бақириб. Жилов қўлимда бўлсаки, тортсам. — Иш-ш!

Аlam билан охирги марта қичқирганимни биламан. Анчадан кейин кўзимни очсан, тут барглари орасида ялпайиб ётибман. Ҳамма ёғим ловуллайди.

Йигламоқдан бери бўлиб эшагимни чақирдим.

— Тулпор!

Қаёқда „ўғри“ эшакдан ҳам, Тулпоримдан ҳам дарак йўқ! Амаллаб ўрнимдан турдим-у, бир тутам тут баргини кучоқлаб, туртина-туртина йўлга тушдим. Чакалакзордан чиққунимча кун ботди. Йўл-йўлакай баданимга санчилган тиканларни санаб олиб ташлай-ташлай уйга келсан, Тулпорим эшик олдида рақибини енгган аскардек, бошини фоз тутиб турибди. Мени кўриб қулоқлари динг бўлиб кетди. Ҳатто ғолибона ҳанграб ҳам қўйди.

БЕШИНЧИ БОБ МУШАК САБЗИ

Баргдан ажрашга ажрадим, икки орада Шодивой отасидан сўкиш эшитгани қолди. Эртасига дарсга ўртоғим қовоқ-тумшуғи осилиб келди. Онаси, уйимни ўғри босди, деб ёмон қўрқсан экан. Раис бувага йиғлаб шикоят қипти.

— Дадам тумандаги катталарни тутхўрликка айтиб қўйган экан, — деди Шодивой минғирлаб. — „Жўранг ақалли биттаям шохини қолдирмабди, қўлимга тушса, бутини йиртиб ташлайман“ деяпти, отамнинг қўзига қўринмай тур, Қўшо...

Одамнинг бути йиртилгандан кўра йиртилмагани яхшилигини ўзим ҳам биламан. Шунинг учун Раис буванинг қўзидан узокроқ юрган эдим, бугун қўлга тушиб қолдим.

Ҳаммасига онам сабабчи бўлди. Эрталаб далага чиқиб кетаётганида қаттиқ тайинлади:

— Ўрадан ярим пақир сабзи олиб Ойсара янганг-никига чиқариб бер. Ош қылмоқчи экан, сабзиси қолмабди.

Ўрадан сабзи олаётганимда хаёлимга бир гап келди. Сабзидан кўпроқ олиб чиқсан, Ойсара янгам пат-патга минишимга кўнармикан? Ойсара янгам ўзи яхши-ю, ўлгудек зиқна. Турсунбой ака олган мотоцикл доим бостирма тагида туради. Турсунбой акамга „Менгаям пат-пат ҳайдашни ўргатинг“, десам, „Пат-пат меникимас, янгангники“, дейди. Қўрқади-да, хотинидан.

Ойсара янгам сабzinи кўриб зора ийиса. Ҳеч бўлмаса эртага миниб, бир-икки бибиллатай. Ширин хаёллар билан сабзи тўла пақирни қўтариб, Турсунбой акамнинг эшигига келсан, тақа-тақ берк. Итариб кўрдим, муштлаб кўрдим. Ҳеч ким йўқ. Бундан чиқди Ойсара янгам кутубхонага кетибди-да.

Ҳафсалам пир бўлиб қайтиб келаётган эдим, дераза тагига етганимда ичкаридан Турсунбой акамнинг Ойсара янгам билан ғўнғир-ғўнғир гаплашаётган овози келди. Қаранг, иккаласиям уйда ўтирган экан-ку, дарвозани очмайди. Яқин келиб овозим борича бақирдим:

— Ойсара янга!

Ичкаридан жавоб чиқмади. Қайтага иккаласи жимиб қолишиди.

Ҳовлимизга қайтиб кириб, ўйлаб қолдим. Онам Ойсара янгангга ярим пақир сабзи олиб чиққин деганими — деган! Ярим пақир эмас, нақ бир пақир сабзи олдими — олдим! Шунча овора бўлганимдан кейин Турсунбой аканинг пат-патини бир мартагина миниб кўришим керакми — керак! Бўпти-да, эшиқдан кирдим нима-ю, туйнукдан тушдим нима? Ҳовлимизнинг эта-гида, девор тагида туйнук бор. Авваллари сув оқиб ётарди. Ҳозир пахтага сув йўғ-у, одамларнинг томорқасига сув қаёқда! Ариқ қуриб-қақшаб кетган. Ойсара янгамнинг товуғи ҳар куни ўша туйнукдан чиқиб, бизнинг ҳовлимиизда сайр қилади... Чопқиллаб бориб, аввал пақиримни нариги томонга ўтказдим. Кейин ўзим ҳам қисилироқ бўлса ҳам Турсунбой акамнинг ҳовлисига эсон-омон ўтиб олдим.

Бирпас қулоқ солиб турсам, ҳамма ёқ жимжит. Нима бало, булар боласини боғчага жұнатыб, үзлари қайтадан ухляяптыми? Құлимдаги пақирни саланглатыб энди уй томон юрган эдим, ойнаванд эшик шарақ-шурук қилиб очилди. Очилди-ю... Остонада Раис бува пайдо бўлди! Шодивойга „Жўранг қўлимга тушса, бутини йиртиб ташлайман“, деган Раис буванинг худди ўзи! Шифтдай бўлиб эшик кесакисидан ушлаб турибди. Эгнида кулранг китель, почаси кенг шим. Шунақа-ку, негадир этиги йўқ, оёқ яланг...

Қўрқиб кетганимдан сабзи тўла чеълакни қутарганча орқага тисарила бошладим. Ҳайронман, Раис бува мени қўриб, негадир остонада турганча қотиб қолди. Пишиллаб-пишиллаб нафас ола бошлади. Назаримда пастки лаби осилиб кетгандек бўлди.

— Ие, сенмисан? — деди фалати илжайиб. Овози ялиниброқ, йигламсираброқ чиққанга ўхшади. — Нима қилиб юрибсан, тутхўр?

„Тутхўр“ дедими? Бундан чиқди ҳалиям эсида эканда. Баттар қўрқиб кетдим.

— Мен... Мен, — дедим тутилиб. — Сабзи...

Раис бува бир менга, бир айвон кавшандозида қийшайиб ётган жигарранг этигига қараб қўйди-да, яна илжайди.

— Оббо сен-ей, нима қилиб юрибсан?

Илжайганидан сал дадил тортдим.

— Ўзим... Сабзи...

Шу пайт Раис буванинг орқасида Ойсара янгам кўринди. Негадир ранги ўчиб кетган, қўли титраб, ҳадеб сочини тузатарди.

— Вой, ўзимизнинг Қўшожон-ку! — деди-да, Раис буванинг қўлтифи тагидан лип этиб ўтди. — Сиз билмайсиз, Кўшовой шунақа яхши болаки! Пат-пат мингинг келдими, Қўшоқжон!

Ойсара янгамнинг меҳрибонлигидан талтайиб кетдим.

— Минаверайми? — дедим илжайиб. Қўлимдаги пақирни энди Ойсара янгамга узатмоқчи эдим, тўсатдан Раис буванинг қиёфаси ўзгарди. Кулиб турган одам дағдаға билан сўради:

- Шошма, ўв! Қаёқдан келдинг?
- Туйнукдан, — дедим ростини айтиб. — Товуқ ўтадиган...
- Нима?! — Раис бува яланг оёқ ер тепинди. — Эшикни бир тақиллатдинг, икки тақиллатдинг, кетавермайсанми йўлингга, қанақа сур боласан?
- Секи-и-ин! — Ойсара янгам Раис бувага ялиниб қаради. — Билмаганда, Кўшожон яхши бола!
- Кизик, Раис буванинг баттар жаҳли чиқди.
- Шу яхши болами? — деди-ю, устимга бостириб кела бошлади. — Сўроқсиз бирорнинг тутини каллаклаб кетса, сўроқсиз бирорнинг уйига туйнукдан тушса! Тўғрисини айт, ким юборди сени?
- Қарасам, важоҳати ёмон.
- Турсунбой акам! — дедим бақириб.
- Секин! — Ойсара янгам товуши титраб ялинди. — Жон Кўшожон, секинроқ!
- Турсунбой акам айтдилар! — дедим овозимни янада баралла қўйиб. — Бугун ош ейдиган кун дедилар. Иккаламиз сабзи олиб келдик...
- Ойсара янгам икки қўллаб юзини чангллади.
- Вой шўрим!
- Раис буванинг кўзи ола-кула бўлиб кетди.
- Нима?
- Дарвозани галма-галдан тақиллатдик.
- А? — Раис бува мен бу ёқда қолиб кавшандоз томон югорди. Ерга ўтириб олиб қўллари қалтираганча пайтава ўрай бошлади. Раис буванинг кўрққани таъсир қилдими, ё ўзимнинг ақлим қарсиллаб ишлайдиган пайт келиб қолдими, унисини билмайман.
- Шунча тақиллатдик, ҳеч ким жавоб қилмади! — дедим атайлаб кўча эшик томонга қараб.
- Бўлди-и-и! — Раис бува ўтирган жойида менга елкаси оша қаради. — Кар одам йўқ-ку, нега чийиллайсан!
- Шунча ёлғон тўқиганда бу ёфи нима бўпти дедим-у, тагин бақирдим:
- Кейин Турсунбой акам айтдилар: Кўшовой, туйнукдан кир, дедилар.

Ойсара янгам дағ-дағ титраганча мени қучоқлаб, илтижо қилди.

— Күшожон, жон укам! Барака топкур укам, бұлды, секинроқ...

Тұғрисини айтсам, Ойсара янгамга раҳмим келди.

— Пат-пат минсам майлими? — дедим овозимни анча пасайтириб.

— Пат-пат сендан айлансын! Юз марта мин, минг марта мин! Аканға айтаман, ҳайдашни ўргатади. — У ҳамон мени қучоқлаганча Раис бувага ўшқирди. — Бұлсангиз-чи...

— Этик... Сифмаяпти. — Раис бува пайтавани чала ўраганми, увалло уринади — қани этигини киёлса! Бечора бирпасда терлаб кетди. Этик оёғини сиқаётган бұлса керак, оқсоқланиб дарвоза томон юрган эди, Ойсара янгам инграгудек хитоб қилди:

— Қаёққа? Қанақа одамсиз үзи?

Раис бува алант-жаланғ бўлиб тұхтаб қолди.

— Нима қиласай ахир? — деди йиғламсираб.

— Бугун ўргатадиларми? — дедим Ойсара янгам ваядасини унутмасидан туриб тасдиқлатиб олиш учун. — Турсунбой акамни чақирайми?

Айвондан сакраб тушишим билан, Ойсара янгам сабзи тұла пақыр устига ўтириб қолди.

— Шурим қурсин! — деди инграб. — Сұяди! Тикка сүяди!

Раис бува құлымдан чангаллади.

— Ўчир-е! — деди рапидадек кафти билан оғзимни түсіб. Негадир құлидан атир ҳиди келарди. Нафасим қайтиб кетди. Типирчилаб кафтини қайириб ташладим. Оғзимни түсіб турганида ичимга анча-мунча ҳаво тұпланиб қолган эканми, чунонам ҳайқирдимки, Тулпорим ҳам бунчалик ҳанграмаса керак.

— Турсунбой aka-a-a!

Кучим борича күча әшик томон юрган эдим, Раис бува орқамдан лўқиллаб келиб, уй бурчагида етиб олди. Маңқам қучоқлаб, қулогимга әгилганча шивирлади:

— Юргин, бу ёққа юргин, ўзинг яхши боласан-ку.

— Нега бўлмаса оғзимни тұсасиз? — дедим жаҳлим чиқиб.

— Бўлти, иккинчи бунақа қилмайман. Юргин, жон болам...

Хоҳламайроқ орқамга қайтар эканман, ноз қилдим:

— Турсунбой акам дарвозани очасан деганлар, кутуб турибдилар-да.

Қарасам, Ойсара янгам ҳамон пақир устида ғужанак бўлиб ўтирибди.

— Ўзинг катта йигитсан-ку, тутхўр, — Раис бува эркалаб елкамга қоқди. — Пат-патни яхши кўрасанми?

— Жудаям!

— Шодивойникига ўхшаган велосипед олиб берайми?

— Йўқ, пат-пат! — дедим қовоғимни солиб.

— Бўлти. — Раис бува яна елкамга қоқди. — Янганг ваъда берди-ку, Турсунбой аканг пат-пат ҳайдашни ўргатади. Ўзим сенга зўридан падарка қиласман.

— Қачон?

— Кетсангиз-чи! — Ойсара янгам йифлаб ўзининг тиззасини чимчилади. — Шўрим қурсин! Иккита болам етим бўлиб қолади энди.

— Нима қиласай? — Раис бува гоҳ Ойсара янгамга, гоҳ менга қараб типирчилади. Тагин Ойсара янгамга ичим ачиди.

— Юринг, — дедим хотиржам илжайиб. — Бизни-кидан чиқиб кетасиз.

— Нима? — Раис бува аввалига ҳеч нимани тушунмади шекилли, бир зум талмовсираб турди-да, маҳкам кучоқлаганча шапиллатиб пешанамдан ўпди. — Раҳмат, тутхўр! Яхшилигингни унутмайман!

Узун-қисқа бўлиб туйнукка бордик. Раис бува иккилиниброқ ариқقا тушди.

— Ўтаверинг, сифасиз! — дедим билағонлик қилиб.

Раис бува эмаклаб бориб туйнукка бошини суқди. Елкаси кирди-ю, у ёги сифмай қолди. Нуқул инқиллаб оёғини типирлатади.

— Бўлмаяпти, — деди кучаниб. — Итар!

Икки қўллаб думбасидан итараман, қани кучим ет-

са! Раис бува кучанган сайин девордан шувуллаб тупроқ түкилади.

— Вой, ұламан! — деди инграб. — Торт!

Сонидан қүш құллаб ушлаганча чираниб бир тортган эдим, ариқ ичига йиқилиб тушдим. Раис бува ерга чўккалаганча кўзимга илтижоли мўлтиради. Бечоранинг афтига қараб бўлмайди: ҳамма ёғи тупроқ.

— Деворга осила қолинг, — дедим янги маслаҳат бериб. — Қўрқманг, йиқилмайсиз.

У ҳансираганча деворга тирмашди. Бирпасда қора терга тушиб кетди.

— Уйингда ким бор? — деди деворга миниб олиб.

— Пат-патни қачон олиб берасиз?

— Қачон десанг! Ким бор уйда?

— Ҳеч ким. Отам ишда, энам ишда. Жу мактабда.

Қўрқманг.

— Билиб қўй, — Раис бува мен томонга эгилиб астойдил йиғламсиради. — Мен сенга оталик қиласман.

Раис бува девордан нариги томонга ӯзини ташлади. Бурилиб қарасам, боядан бери пақир устида ўтирган Ойсара янгам айвонда чўзилиб ётибди. Пақир думалаб, сабзилар сочилиб кетган.

Қўрқиб кетдим. Ўлиб қолмасайди, бечора. Ошхонага кириб, ёғлоқда сув олиб чиққунимча анча вақт ўтди. Худ-бехуд бўлиб ётган янгамнинг оғзига сув тутдим.

— Ичинг.

Ойсара янгам сувдан бир-икки ҳўплади.

— Кетдими? — деди инграб.

— Ичаверинг! Турсунбой акам ҳам кетиб қоптилар.

Ойсара янгамнинг кўзи ярқ этиб очилди.

— Ростданми! — деди-ю, сувдан мўлгина ичиб, чукур уф тортди. — Хайрият-ей... — бирпас ӯйлаб турдилла, йиғламсираб ялинди. — Ӯзинг эсли боласан-ку, Қўшожон. Бу ерда Раис бувангни қўрганингни...

— Минаверайми? — дедим пат-патга имо қилиб.

— Минавер, жон укам, минавер. Акангта айтаман, ҳайдашни ўргатиб қўяди. Ҳар куни ўргатади.

Пат-патнинг эгарига минаётганимда Ойсара янгам айвонда сочилиб ётган сабзиларни йиғиштиришга тушди.

— Сабзинг мунча чиройли, Кўшожон! — деди овози товланиб. — Мушак сабзи экан!

Эгарга миниб олдим-да, пат-патни бибиблатавердим-бибиблатавердим, охири сигнал жонивор мушукдек биқиллайдиган бўлиб қолди.

ОЛТИНЧИ БОБ

„ЗАПОРОЖЕЦ“ДАН ТУФИЛГАН „ВОЛГА“

Еттини битириб таътилга чиқишимиз билан чопик-қа тушдик. Эрталабдан фўза чопик қиласвериб, қорним таталаб кетди. Тулпорим тушлик бўлганини мендан яхши билади. Аввал мени излаб мактабга бораради. Энди далагаям топиб кепти. Пайкал четига келиб, бир ҳанграган эди, баҳона топилганига суюниб, ўша томонга югурдим. Шийпонда салқинлаб ўтирган бригадир:

— Ҳой бола, қаёққа? — деган эди, йўл-йўлакай бақирдим:

— Эшагимнинг жаҳли ёмон, Тўлаш ака! Бормасам, ўзи ёнимга келади. Бир гектар пахтазорни пайҳон қилиб ташлайди.

Тўлаш ака иргиб ўрнидан туриб, чинқирди:

— Тезроқ йўқот, палакат эшагингни!

Кетмонимни эшагимнинг гарданига кўндаланг қўйганча, лип этиб миниб олдим. Тулпорим буйруғимни кутиб ўтирмай, уй томон йўрғалади.

Кўчага киришим билан эшигимиз олдида турган ҳаворанг машинага кўзим тушди. „Тофам кепти-да“, деб эшагимни никтадим. Яқинроқ қелиб қарасам, йўқ, „Москвич“ эмас, „Запорожец“. Чап эшиги очиқ. Жонажон жўрам Шодивой бир оёғини ташқари чиқариб, рулни чанглаб ўтирибди. Иссиқдан икки юзи қизариб, тандирдан янги узилган нондек ялтираб турибди. Мени кўриб, севиниб кетди.

— Қаёқда юрибсан? — деди илжайиб. — Боядан бери кутаман.

— Ким билан келдинг? — дедим эшагимдан тушмай.
— Ўзим!

Бундан чиқди, Раис бува ваъдасининг устидан чиқиб, Шодивойга „Запорожец“ совға қипти-да!

Раис бува менга ваъда қилган пат-пат эсимга тушди. Ойсара янгам-ку сўзининг устидан чиқди. Эрига „Узоқдаги қариндошдан яқиндаги кўшни афзал, Кўшовой ўзингизнинг укангиздай гап, шу боланинг пат-патга ишқи тушибди, миндира қолинг“, деб ҳол-жонига қўймаганидан кейин Турсунбой акам мотоцикл ҳайдашни унча-мунча ўргатди. Аввал мени лулкага ўтқазиб учирди, кейин эгарга мингизиб ҳайдатди. Аммо Раис бува пат-пат тутул велосипед ҳам олиб бермади.

— Ўзинг ҳайдаб келдингми? — дедим алам қилиброқ.
— Бўлмаса-чи!

Ростини айтсам, файирлигим келди.

— Ким ўзарга, ўйнаймизми? — дедим, Тулпоримнинг жиловини голибона силтаб.

— Қўйсанг-чи! — Шодивой машина рулини чангальлади. — Юр, катайса қилдириб келаман.

Иккиланиброқ эшакдан тушдим.

— Ҳайдашни биласанми, ўзи?

— Шу ергача ким ҳайдаб келди бўлмаса? — у ўтирган жойида эгилиб, ўнг эшикни очди. — Ўтири! — шундай деб ўнг томондаги суюнчиқни эгди. — Орқага ўт, ёнимда ўтирсанг, халақит берасан.

— Менам пат-пат минишни биламан, — дедим мақтаниб.

Шодивой индамади. Иккала эшикни қарсиллатиб ёпди-да, худди минг йил шопирлик қилган таксичилардай ишонч билан моторни гуриллатиб юборди. Худди шу пайт эшагим айни мен ўтирган ойнанинг рўларасига тумшуғини тираб ўқинч аралаш ҳангари. Хайрлашдиёв!

Машина вариллаганича тор кўчада физиллаб кетди. Ойсара янганинг тупроқقا бағрини бериб ётган курк товуғи қақақлаб қочди.

Катта йўлга чиқишимиз билан „Запорожец“ ўқдек учиб кетди. Санаб турдим: олтига тележка, учта юқ машинасини қувиб ўтдик. Қарасам, машинанинг фидираги ердан узилиб, осмони фалакка учиб кетадиган.

— Шоди, — дедим елкасига туртиб. — Секироқ...

— А? — У менга бутун гавдаси билан ўгирилиб қаради.

Кўзлари ола-кула, ранги ўчиб кетган. Нима? — деди овози ингичкалашиб.

Эллик қадамча олдинда сарғиш „Волга“ кўринди. Тўппа-тўгри устига бостириб боряпмиз.

— Йўлга қара, йўлга! — дедим чинқириб.

Шодивой чўзиб-чўзиб сигнал берди. Масофа борган сайин қисқариб борарди.

— Чапга бур, аҳмоқ! — дедим бақириб.

— Нима? — Шодивой яна орқасига ўгирилди. Ўзими ни ерга отай десам, эшик йўқ. Кўзимни чирт юмиб олдим. Бир маҳал қулоғимга Шодивойнинг чийилдоқ овози кирди:

— Амаки, „Запорож“ни биласизми?

Кўзимни очсан, „Волга“ни ўнг томондан қувиб ўтаяпмиз. Бир зумда „Волга“ орқада қолиб кетди.

— Секироқ! — кучим борича Шодивойнинг елкасига муштладим. — Тўхтат!

Худди шу пайт „Волга“ бизни қувиб ўтди. Назаримда, минг километрга босиб ўтдиёв, ўзиям!

— Тўхтат! — дедим жонҳолатда.

Қаёқда, зум ўтмай яна „Волга“га етиб олдик. Пеша-надаги ойнакдан кўриб турибман. Шодивой кўзлари аланг-жаланг бўлиб яна бибиллатди. „Волга“ чор-ночор тагин ўзини чапга олди.

— Амаки жон! „Запорож“ни биласизми? — бу сафар Шодивойнинг овози йиғламсираб чиқди.

Бир маҳал олд томонда бедаси ўриб олинган алла-қандай кенг майдон кўринди. „Запорожеъ“имиз қурбақадай сакрай бошлади. Ҳамма ёқ дақир-дуқир, дақир-дуқир қиласиди. Бошим пайдар-пай машина шифтига урилади. Назаримда ичакларим аралаш-куралаш бўлиб кетдиёв.

— Тўхтат!

Шодивой яна орқасига ўгирилди.

— Қ-қанақа... Қ-қанақа қ-қилиб...

У сўзини тугатолмайди. Рўпарамизда бостирмадек узун-узун оқиши бинолар, ўтлаб юрган ола-була сигирлар пайдо бўлди.

...Бир маҳал ҳушимга келсам, ҳамма ёқ қоп-қоронғи.
Негадир димоғимга пичан ҳиди кирди. Бошимни ушлаб
күрдим: жойида. Оёғимни силаб күрдим: бутун.

— Шоди! — дедим құрқа-писа.

Қоронғилик ичидан ингичка овоз келди:

— Ҳа-а!

— Тирикмисан!

— Шунақа шекилли!

— Қаёққа кепқолдик?

— Билмайман.

— Ы-ү-үл! — дедим чұзіб.

Фира-шира қоронғиликка охири күзим күнікди.
Шунда пайқадимки, иккаламиз ҳам тирикмиз. Машина
ичида үтирибмиз.

— Эшикни оч! — „Эшшак“ — дегим келди-ю, Тулпо-
рим эшитиб қолса хафа бўлишини ўйладим. — Эшикни
оч, ҳўқиз!

Шодивой үтирган жойида мингиллади:

— Очолмаяпман.

— Қаттиқроқ итар!

Пўписам таъсир қилди шекилли, аввал эшик фий-
қиллади, кейин шитир-шитир овоз эшитилди. Шодивой
омон-эсон ерга тушиб олди чоғи, нимқоронғилик ора-
сидан минғирлаган товуш келди:

— Тушавер, Қўшо...

Қизиқ, унинг овози ғилдирак тагидан эшитилгандек
бўлди. Олдинги ўриндиқ суюнчиғини пастга босган эдим,
қўлим рулга тегиб кетди. Машина „бееп“ деб қўйди.
Қоронғида ғалати эшитиларкан.

— Сигнал чалма, аккумлятори үтириб қолади, —
леди Шодивой негадир қув-қув йўталиб.

Э, аккумляторинг билан қўшмозор бўл! Ўзим эшик-
ни тополмай гарангман-ку!

Эшикдан тушишим билан юзимга хас-хашак урилди.
Қаддимни ростламоқчи эдим, устимдан аллақандай оғир
юқ босаётганини пайқадим. Димоғимга чанг аралаш пи-
чан иси кирап, қуриб қолган ўт-ўланлар бурнимга тегиб
акса ургим келарди.

— Қаёқдасан? — дедим бақириб.

— Билмайман, — Шодивойни яна йүтәл тутди.

Охири аллақандай хашак ғарами орасыда юргани-
мизга ақлим етди. Оёқ-күлимни баравар типирлатиб,
ұзимга йүл очганча, әмаклаб кетдим. Олд томонда нур
қүринди. Хайрият, ёруғ дунёга чиқиб олдим.

— Келавер, Шоди! — дедим үзим йүл топиб чиқсан
тешикка әнгашиб.

Шу пайт қоқ бошим устида фұлдираган овоз әшитилди:

— Ҳов, жүжахүрөз! Нимага үзингдан катта одамни
майна қиласан?

Қарасам, шундоқ тепамда калта енгли қўйлак, жин-
си шим кийган, қора кўзойнак таққан киши икки қўли-
ни белига тираб турибди. Билагининг ҳар пайи чойнак-
дек келади. Юз қадамча нарида, симтўсиқ ортида боя үзи-
миз қувиб ўтган сарғиш „Волга“ қийшайиброқ туриб
қолган.

— Амаки... — дедим ялиниб. — Менмас...

Пичан ғарами шитир-шитир қилди. Шодивой қорни
ер супургудек бўлиб әмаклаб чиқиб келди. Жўрамнинг
афт-ангорига қараб бўлмас, аъзои баданига хас-хашак
ёпишган, икки қулоғига салкам бир қулочдан пичан
илашиб қолган эди.

— Сенми шопир? — қора кўзойнакли киши Шоди-
войнинг устига бостириб борди. — Нега одамни майна
қиласан? „Запорожец“ни қўриб қўй демоқчимисан?

Шодивой юмронқозиқдай тисарилиб тешикка қай-
тиб кириб кетди. Секин бошини чиқариб мўралади.

— Амаки... — деди-ю, кетма-кет олти марта акса
урди. — Мен... Ап-шу!, „Запорожец“ни... Ап-шу, тормози...
Ап-шу... Тормози қаёқда бўлади, демоқчийдим, — у
гапининг якунига яна бир марта акса уриб қўиди.

Қора кўзойнакли киши инсофга келиш ўрнига бат-
тар жаҳли чиқиб кетди.

— Чиқ бу ёққа! — деди-да, бир чанг солиб, Шоди-
войни қўлтиғидан тортиб чиқарди. Ўртоғим бечора худ-
ди қассобнинг қўлига тушган биққигина қуёндек осил-
ди-қолди. Нуқул питир-питир қиласи. Қарасам, „Қора

кўзойнак“нинг важоҳати ёмон. Қочиб қолай десам, жўрамни кўзим қиймайди.

— Мен нима қилдим? — деди Шодивой баттар тиширчилаб.

— Нима қилди-им? — кўзойнакли кишининг афти аламдан қийшайиб кетди. — Сени қуваман деб рессордан айрилдим. Тұлаб бер машинани!

Худди шу пайт бостиrmага ўхшаш оқ бинодан бир киши отилиб чиқиб биз томонга югуриб келаётганини кўрдим. Оёғида Раис бува кийиб юрадиганига ўхшаш жигарранг этик, қўлида паншаха! Паншахаси офтобда шунақанги ялтирайдики, қорнингга санчилса борми, курагингдан тешиб чиқади. Худди кабобни сихга тортгандек! Бақириб юбордим.

— Қоч, Шоди!

— Қаёққа? — қора кўзойнакли киши бир қўлида Шодивойни чанглаб турганча иккинчи қўли билан човут солиб менинг ҳам билагимдан ушлаб олди. Шунақанги қисдики, суюкларим қисирлаб кетди. Ўртоғим бечора боядан бери типирчилаетгани бежиз эмас экан-да.

— Рессорнинг ҳақини чўз! — „Қора кўзойнак“ иккаламизни баравар силкита бошлади.

Шу орада паншаха кўтарган киши ҳам етиб келди. Паншахасини негадир менинг қорнимга тиради.

— Нима қилдинг? — деди ўшқириб. — Искирдни нима қилдинг, уйинг куйфур! Бўлинмас фонд эди-қу, бу фарам! Сийирларни нима қилдинг? Бўвоздари бола тайлаб қўйса ким жавоб беради? — У паншахани қорнимга қаттикроқ тиради. Қочай десам, „Қора кўзойнак“ чанглаб турибди. Паншаха қорнимга ботиши билан қитиғим келиб, ҳиринглаб кулиб юбордим. Паншахали кишининг жайра найзасидек яккам-дукам мўйлови диккайиб кетди. Паншахани қорнимга янаям қаттикроқ ботира бошлаган эди. Шодивойнинг йиғламсираган овози эшитилди:

— Унақа қилманг, Ферма тоға!

„Ферма тоға“ мен билан андармон бўлиб, Шодивойни пайқамай қолган эканми, ялт этиб ўтирилди-ю,

тұсатдан юзи ёришди. Назаримда диккайған мүйлови ҳам шалпайиб қолгандек бўлди.

— Ия, полвон! — деди илжайиб. Қўлидан паншаха тушиб кетди. — Хуш кўрдик, полвон, хуш кўрдик! — Аммо ўша заҳоти қийиқ кўзларида тағин ўт чақнади. Сийрак мўйлови қайтадан типпа-тиқ бўлиб кетди. Ерда ётган паншахани олиб таҳдидли силкитди.

— Жубор! — деди ҳайқириб. Паншахани „Қора кўзойнак“ нинг қорнига тиради. — Қўйиб жубор!

„Қора кўзойнак“ ҳамон бизни чангллаганча орқага чекина бошлади.

— Қўясанма-жўқма?

— Қанақа одамсиз ўзи? — „Қора кўзойнак“ қўлини бўшатди. Шодивой у ёқقا, мен бу ёқقا қочиб, ҳар эҳтимолга қарши ўн қадамча нарига бориб олдик. — Рессорим...

— Жўлингдан қолма! — „Ферма тоға“ паншахани бир силкитган эди „Қора кўзойнак“ ит кувган соқовдек симтусиқ томонга қочди. Ўзиям шунақанги тез юурдики, агар „Пахтакор“ нинг ўйинчилари шунақа чопса, рақиб дарвозасига бир минутда бешта голни бемалол урган бўларди! Зум ўтмай сарғиштоб „Волга“ нинг эшиги очилиб-ёпилди. Машина бедаси ўриб олинган майдондан бешиктебратардек чайқалиб-чайқалиб юриб кетди.

— Оббо, полвон-еї! — „Ферма тоға“ Шодивойнинг елкасига қоқди. — Шўхлиқ қибжатибман, денг! Аммо сийирларни кўрқитиб жубордингиз-да, полвон!

Қарасам, беш-олтита сигир олисдаги бино панасида тўдалашиб турибди. Биттаси, ҳалиям эс-хуши жойига келмаган шекилли, думини хода қилиб, у ёқдан-бу ёқقا шаталоқ отади. Кирроқ оқ халат кийган хотин сигир кетидан қувяпти. Бир томонда тўппа уюми, бошқа томонда гўнг уюми тоғдек савлат тўкиб турибди.

Шуни англадимки, бизнинг азамат „Запорожец“ симтусиқни қаҳрамонона янчиб ўтиб, ўзини фермага урган экан. Ҳовли ўртасидаги пичан ғарамига чунонам калла қиптики, у томонидан кириб, бу томонидан чи-

қиб кетмаганига ҳайронман. Ҳатто изиям қолмабди. Фарал аввал қандай турган бўлса, ҳозир ҳам худди шундай. Сим-сим эшиги қайта ёпилиб қолганга ўштайди. Яхшиям „Ферма тоға“ Шодивойни таниб қолгани, бўлмаса иккаламиз паншахага тортилиб, шашлик бўлармидик.

— Журиңизлар, жигиттер. Шай ичабиз. Кўк шай, — „Ферма тоға“ бир гапириб, ўн кулиб бизни азиз меҳмондек оқ бино томонга энди етаклаган эди, ҳовлининг нариги бурчагидаги дарвозада „Нива“ машинаси кўринди.

Шодивой аввал тўхтаб қолди, кейин бир қадам орқага тисарилди, ундан кейин икки қадам... Ана ундан кейин машинамиз калла урган пичан фарами томонга тиракайлаб қочди. Ўлганинг кетидан шаҳид, деб мен ҳам орқасидан чопдим. Йўл-йўлакай „Ферма тоға“нинг қувончли хитоби қулоғимга чалинди.

— Ия, Раис бува-құ!

Шодивой нега қочганини энди тушундим. Дадасидан қўрқяпти. Ҳаллослаб хирмон орқасига ўтсам, хирмоннинг бир бурчагида ўртоғим фужанак бўлиб ўтирибди. Шундоқ семиз жўражонимнинг гавдаси ингичка тортиб кетгандек. Ёнига келиб ўтиришим билан „жим“ деб имо қилди.

Аксига олгандек, мотор товуши гувиллаб пичан хирмонига яқинлашиб келарди. Ўзиям хирмоннинг нариги томонига тумшуғини тираб тўхтадиёв. Эшик қарсиллади. „Ферма тоға“нинг овози товланиб чиқди.

— Хуш кўрдиқ, Раис бува, ассалом алайке-е-ем!

— Қалайсан, Мусайип?

Шодивой дадасининг овозини таниб, ранги ўчиб кетди. Шитир-шитир қилиб орқаси билан хирмон ичига киришга уринди.

— Жотибмиз, Раис бува!

— Сен шунаقا ётишни биласан. — Бирпас жимлик чўқди. Кейин яна Раис буванинг овози эшитилди. — Ортага камиссия келади.

— Келса жахси.

— Яхши-я, яхши! Бу галгиси анойи эмас. Областдан келади.

— Жахси!

— Яна яхши дейди-я! Фермангга қара! Ахлатхонага айланиб кетибди-ку!

— Маъкул, Раис бува, тозалайбиз.

— Тозалайсан... Менга қара, Мусайип, гўшт пила-нини қанча деб ёзгансан?

— Жуз ўттиз поиз! Январда дўндириғанмиз.

— Испарапкалар жойидами?

— Жойида, Раис бува.

— Сут-чи?

— Ҳар сийирдан икки минг уч жуз кило.

— Қофози борми?

— Бор, Раис бува!

Яна жимлик чўкли. Ўрнимдан турмоқчи эдим, Шодивой қўлимдан силтаб тортди. Дўмбоққина муштини дўлайтирди. Хирмон орқасидан тағин Раис буванинг овози келди:

— Мусайип! Бу — қўзилатишни қанақа деб ёзувдинг?

— Жуз совлиқдан жуз жетмиш жетти.

— Жетмиш-петмиш демасдан, икки юз қилиб қўя қолсанг ўласанми?

— Ўзи тувфани жуз ўнта, Раис бува!

— Нима? — Раис буванинг овози жаранглаб кетди. — Виставкага боришни биласан. Медаль олиб, мажлисларнинг тўрида ўтиришни биласан. Бу ёғиниям тўғрилаб қўй-да. Туғмаса туғдир! Етмаса ўзингникини қўш!

— Маъкул, Раис бува, тувдирабиз.

Шу гапдан кейин Раис бува машинасига ўтириб жўнаб қолади, деб ўйлагандим. Йўқ, мотор гурилламади. Қайтага, Раис буванинг овози янайм тажанг чиқди:

— Мана бу рўдапони қачон йўқотасан?

— Камиссия кўрса жахши-ку, Раис бува. Бир жилда икки жиллик жем-хашак...

— Сен камиссияни ўзингга ўхшаган аҳмоқ деб ўйлайсанми? Тўрт йилдан бери шу хашакни рўкач қиласан!

Гурс-гурс қадамлар ғарамни айланиб ўта бошлади. Шодивой иккаламиз пичан ичига ўрмалаб кириб кетишни ҳам, қочиб қолишини ҳам билмай турган эдик, ғарам бошида Раис бува, унинг кетидан чопқиллаб келаётган „Ферма тоға“ кўринди. Раис буванинг эгнида доим кийиб юрадиган кулранг китель-шим, бошида дўпписи қийшайиброқ турарди.

— Анавилар нега думалаб ётибди иш пайтида? — Раис бува аввалига бизни танимади шекилли, қўлини пахса қилди. — Ухлаб ётибсанларми?

„Ферма тоға“ негадир илжайиб кўйди, Раис бува таққа тўхтаб қолди.

— Ия? — деди гоҳ бизга, гоҳ „Ферма тоға“га юзланаб. — Нима қилиб юрибди булар, Мусайип?

Ўртоғим иккаламиз ўрнимиздан туриб, эгнимизга ёпишган хас-хашакни тозалаган бўлдик. Шодивой миқ этмай тургани учун ўрнига мен жавоб қилиб қўя қолдим.

— Шундай, ўзимиз...

Раис бува лабининг бир бурчи билан жилмайди.

— Сенам жўранг билан келдингми, тутхўр?

Пат-патни эсига солгим келди-ю, қўрқдим.

— Ҳа... — дедим минғирлаб.

Шу... „Ферма тоға“ ҳам фирт жинни экан-да! Жим тура қолса-ку олам гулистон эди.

— Раис бува, — деди илжайиб. — Полвон бир шўхлиқ қипти-да.

— Нима? — Раис бува бирдан жиддий тортди.

— Мошин миниб...

— Қанақа мошин?

— Жахси қўрмадим-фу... Ранги кўкимтиров. Туври-ми, полвон?

— „Запорожец“ми? — Раис буванинг кўзи олазарак бўлиб кетди. — Минувдингми? Қани, мошин?

„Ферма тоға“ мўйловини учирив, ғарамфа имо қилди.

— Искирдда, Раис бува.

Раис бува оғир-оғир киприк қоқди. Тез-тез юриб, бутун ғарамии айланиб чиқди.

— Қани? — деди Шодивойнинг тепасига келиб.

Шодивой ҳиқиллаб йиглаб юборди.

- Ичида, — деди бурнини тортиб.
- Ниманинг ичида? — деди Раис бува тажант овозда.
- Қандоқ қилиб кирди?
- Жигит-да, жигит! — „Ферма тоға“ Раис бувани юпатди, — минғиси келған.
- Қамчибек! — Раис бува кафтини карнай қилиб бақирди. Зум ўтмай Раис буванинг коптоқдек дум-думалоқ шопири чопиб келди.

— Сим топ! — деди Раис бува шопирга. — Узунроқ!

Бироздан кейин шопир узунлиги йигирма қулоч келадиган йўғон симнинг бир учидан судраб келди. Раис бува „кир“ деғандек имо қилди. Аммо шопир гарамнинг қаёғидан киришни билмай, митти кўзларини жавдиратди.

— Менга беринг! — дедим симга қўл чўзиб. — Сиз тополмайсиз.

Симнинг илгак қилинган учини чангллаганча, эмаклаб боя ўзимиз чиққан тешикка кириб кетдим. Ҳали унчалик сезмаган эканман: фарам ораси ўлгудек иссик экан. Буям камлик қилгандек пичан босилиб ётавериб, димиқиб кетганми, ачимсиқ ҳид димофимни ёрай дейди. Бирпасда нафасим қайтиб, терлаб кетдим.

То машинага етиб олгунча бир кун эмаклагандек бўлдимов. Ниҳоят, қўлим машинанинг темирига урилди. Коронфида сим уладиган жойини топиб бўлса экан?! Йўқ, охири топдим шекилли. Зўрмиз-да, ўзимиз ҳам! Йўғон сим қўлларимни қайириб юборганига қарамай, илгакни чандилаб маҳкамладим.

Яна эмаклаб ёруғ дунёга чиққанимда Шодивой бир чеккада шумшайиб турарди.

— Аҳмоқ! — деди Раис бува ясамароқ дағдага қилиб. — Жўрангга ўхшаб уқувли бўлсанг ўласанми?! Қара, Қўшоқвой қандоқ ақлли бола! Сен нуқул бузишни биласан. Қани, Қамчибек, опке машинангни.

Шопир хирмон орқасига югорди. „Нива“ни гуриллатиб келиб, хирмонга рўпара қилди. Кабинадан чаққон сакраб тушиб, симнинг бир учини „Нива“ илгагига боғлади.

— Торт! — деди Раис бува құл силтаб.

„Нива“ чираниб тисарилди. Сим тараптаг тортапты, ғаралынан палахса-палахса пичан күчиб туша бошлади.

— Қоч, ҳамманг! — Раис бува тағин құл силтаб буйруқ берди. — Нари туриңглар!

„Нива“ девдек үкирар, сим рубобнинг торидек тараптаг тортапты, аммо „Запорожец“дан дарак йўқ эди. Ниҳоят, хирмон тагидан қалдир-қулдир, қалдир-қулдир деган овоз келди. Қарасам, негадир „Ферма тоға“нинг ҳар мўйлови найзадек типпа-тиқ бўлиб кетяпти. Бир маҳал хирмон орасидан оппоқ бир нарса чиқиб кела бошлади. Тушимми-ўнгимми? Шодивойнинг „Запорожец“и ҳаворанг эди-ку! „Нива“ яна бир файрат қилган эди, яп-янги, оппоқ „Волга“ ерга ёнбошлаганча ёруғ дунёга чиқиб келди. Оббо! Қоронғида симни эшик тутқичига боғлабман-да. Бунисиям майли-ку, Шодивойнинг машинаси ҳаворанглигини биламан, „Запорожец“лигини биламан, буниси оқ-ку, „Волга“ку!

Ўн томонимда ғалати овоз эшитилгандек бўлди. Талмовсираб үгирилсан, „Ферма тоға“ жўхори тиқилган хўроздек бўйнини чўзиб, „фийқ“ деб қўйди. Кейин қийиқ кўзларини чирт юмиб олди-да, диккайган мўйловини чанглаб, тағин икки марта „фийқ“, „фийқ“ қилди.

— Нима бу? — Раис буванинг ҳокимона хитобидан чўчиб тушдим.

— Сендан сўраяпман, Мусайип?

„Ферма тоға“ аввал битта кўзини очди, кейин иккинчисини... Кейин бир йўла оғзини ҳам очиб қўя қолди. „Нива“нинг шопири эсанкираб қолдими, тормоз бериш ўрнига газни босиб юборди шекилли, мотор бир варанглади-ю, „динқ“ этган овоз эшитилди. Тараптаг сим қоқ ўртасидан узилиб кетди. Боядан бери ёнбошлаб ерга судралиб келаётган „Волга“ бир силкинди-да, оёғи осмондан бўлиб ағдарилди. Ойналари чил-чил синди. Томи пачақланиб, ялпайиб қолди. Машина тўнтарилиб ётса, ғалати бўларкан. Худди оёғи осмондан бўлиб қолган қўнғиздек.

— Ҳов, Мусайип? — Раис бува „Ферма тоға“га чақчайди. — Нима бу?

„Ферма тоға“ жуда фалати илжайди.

— Мошин...

— Мошинлигини күриб турибман, кимники?

— Сиздиқи! — деди „Ферма тоға“ пинагини бузмай.

— Меники „Запорож“ку, — деди Раис бува хуноб булиб.

„Ферма тоға“ яна илжайди.

— Тувибди-да.

— Нима?

— „Запорож“ ингиз бўвоз экан, „Волга“ тувиб берди, Раис бува. Кутти бўлсин!

Раис бува нима дейишини билмай қолди.

— Бултур „Москвич“ олиб берувдим-ку, битта машина камлик қилдими, нокас! — деди қўлини пахса қилиб.

„Ферма тоға“ ялпайиб ётган машинага тикилганча товуқнинг оёғига ўхшаган бўйини чўзиб тағин бир марта „ғийқ“ деб қўйди.

— Сиздиқи, — деди яна. — Кутти бўлсин.

— Э, ўл-а! — Раис бува негадир ҳиқиллаб кулиб юборди. — Мошин сигирмиди, туғадиган?

— Тувади! — „Ферма тоға“нинг мўйлови учиб қўйди. Фақат бу сафар хомушроқ, маъюсроқ учди. — Тувмаса тувдирабиз.

— Бўпти, мошиннинг боласини сенга бердим. Юр, бу ёқقا.

„Ферма тоға“ фарзанди ўлган одамдек пачақ „Волга“га охирги марта қараб қўйди-ю, чор-ночор Раис бувага эргашди.

— Оптуш! — деди Раис бува бақириб! Шопир йигит „Нива“ ичидан магазинларда конфет солинадиган яшикка ўхшаган картон қутини олиб тушди. Кути оғирроқ шекилли, икки букилганча пишиллаб қўтариб келди-да, „Ферма тоға“нинг оёғи остига қўйди. Ичидагина шифирлади.

— Нима бул? — деди „Ферма тоға“ қовоқ-тумшуғи осилиб.

— Атир! — Раис бува қошини чимиради. — Эрталаб

ҳар бир сигирнинг устига сепасан. Камиссия келганда атири ҳиди анқиб турсин.

— Раис бува, — деди „Ферма тоға“ мўйловини қашлаб, — бурнови жили „Шипр“ сепқандада уйинф куйфур сийирлар бир-бировини жалаған шиқарми, уш кунғаша таппидан атири иси келиб жатти.

— Нима таппидан атири иси келмай, сендан келсинми! — Раис бува бизга юзланди. — Сенлар бу ёқقا юр.

Шодивой иккаламиз „Нива“нинг орқасига ўтиридик. Раис бува шопирнинг ёнига.

— Мусайип! — деди Раис бува машина ўрнидан жилганда. — Эштириб қўй, ҳамма ёқ чиста бўлсин. Испаррапкалар бехато бўлсин. — Кейин илжайиб қўшиб қўйди. — Скирдни очиб, „Запорож“ни бизнигига обориб қўй... Хафа бўлма, янаги йил юз совлиқдан икки юзтадан кўзи олсанг, ўзим „Волга“ падарка қиласман.

ЕТТИНЧИ БОБ

СИМЛИ АТЛАС

Раис бува „Ферма тоға“га янги „Волга“ совға қиласми-йўқми, унисини билмайман-у, мен пат-патдан аллақачон умидимни узиб қўйганман.

Авваллари Турсунбой акамнинг мотоциклига минишинга жон-жон деб рози бўладиган Ойсара янгам ҳам тўсатдан айнади-қолди.

Бир куни кечқурун пат-пат миниш илинжида уйлагрига кирсам, эр-хотиннинг жанжали устидан чиқиб қолдим. Ҳовли ўртасида ўнтача пахта гулли пиёла, иккита чойнак, сопол лаган чил-чил бўлиб ётибди. Айвонда Ойсара янгам сочи пахмайиб йиғлаб ўтирибди. Чап юзи моматалоқ бўлиб кетган. Турсунбой акам олма тагида турганча қўлини пахса қилиб, аллакимни бўралаб сўкяпти. Юзи тирналган.

Анграйиб қолман. Секингина жуфтакни ростлаб қолмоқчи эдим, бирдан Турсунбой акамнинг кўзи менга тушди.

— Ҳа, Қўшовой, пат-пат мингинг келяптими? — деди сўкишдан тўхтаб. Ҳатто ғалатироқ илжайиб ҳам

қўйди. — Жуда яхши-да, укам! — У тирналган юзини кафти билан силади. — Мана калит, минақол! — деди чўнтағига, қўл суқиб.

Айвонда хун-хун йиғлаб ўтирган Ойсара янгам ҳамма гапни эшитиб турган экан. Учиб ҳовлига тушди.

— Белингиз оғриб топибсизми, пат-патни! — деди чинқириб. — Бу ёққа беринг калитни!

— Ҳа-а! Жонинг ачидими? Бундан чиқди... Сенинг белинг оғриган экан-да! — Турсунбой ака аланг-жаланг бўлиб қолди. — Ҳозир! — деди ҳайқириб. — Ҳозир дабдала қиласман!

У югуриб бориб тандир тагида ётган тешани юлқиб олди. Ойсара янгам дод солиб тешанинг бандига ёпишиди. Турсунбой ака у ёққа тортади. Ойсара янгам бу ёққа. Уй ичидан калта кўйлак кийган қизалоқ билан оёқ яланг болача чиқиб, чирқиллаб уларга ёпишишди.

Вақт фаниматда оёқни қўлга олиб қўчага зинғилладим...

...Ўшандан бери Тулпоримни миниб тинчгина юргандим... У ёғини сўрасангиз, бу йил ўнинчини битирамиз. Давлат имтиҳонига тайёрланиш керак. Ўзим билан ўзим овора бўлиб, аравамни тортиб юрсам, бугун Раис бува яна эски ваъдасини эсимга солди. Йўқ, ундан ҳам каттароқ ваъда бериб юборди.

Папкамни саланглатиб, қўчага чиқсан, эшигимиз олдида „Нива“ турибди. Дарров танидим: Раис буванинг машинаси. Раис бува бизникида нима қиласди? Отам ишда, онам билан синглим далада. Бундан чиқди машина тўхтаб қолган бўлса, Қамчибек ака тагини ковлаштириб ётгандир-да.

Шу хаёл билан яқин борсам, рулда Раис буванинг ўзи ўтирибди. Мени қўриб, эшикни очди-да, ерга чақон сакраб тушди.

— Нега чопиққа чиқмадинг? — деди тўсатдан.

Эсанкираб қолдим. Ҳайронман, довдираб қолганимда миям қарсиллаб ишлаб кетади.

— Уч кундан кейин имтиҳон, Раис бува! — дедим тантана билан. — Шодивой иккаламиз ёзмадан тайёрланмоқчи эдик.

Раис бува аланг-жаланг бўлиб, бизнинг эшик томонга қаради.

— Шоди сеникидами? — деди овозини пасайтириб.

— Йўқ. Мен сизларни книга бормоқчи эдим.

— Маладес! — Раис бува эркалаб елкамга қоқди, — тўғри ўйлабсизлар. Давлат имтиҳонига яхши тайёрланиш керак. — У бир зум жимиб қолди-да, қўшнимизнинг дарвозасига зимдан қараб қўйди.

— У ёқда ким бор?

— Билмадим, — дедим ростини айтиб.

Раис бува тагин елкамга қоқди.

— Бўйингни қара! — деди илжайиб. — Оббо, тутхўр-еъ! Мендан ҳам ўсиб кетибсан-ку. Овозинг ҳам дўриллаб қопти. Отангга айтаман, уйлантириб қўяди.

Лабим ўзидан-ўзи бир томонга қийшайиб илжая бошлаган эдим, Раис бува бирдан жиддий тортди. Ҳатто қовофиям осилиб кетди.

— Менга қара, тутхўр! — деди хўмрайиб. — Ойсара янганг анчадан бери ишга чиқмаяпти. Касал бўпқопти. Мана шу китобни опкириб берасан. — У машина эшигини очиб ўриндиқ устида ётган, газетага ўроғлиқ китобни олди. — Ма! Раис бува китобингизни бериб юбордилар. Эртадан бошлаб ишга чиқаркансиз, Раис бува яна китоб ўқигилари кепти, дегин, уқдингми? У китобни қўлимга тутқазди.

— Югур! Шошма, папкангни ташлаб кетавер.

Қарасам, газетага ўроғлиқ нарса — юмшоқ. Турсунбой акамнинг уйидаги уриш-жанжални эслаб, ғашим келди. Устига устак, Раис бува ваъда қилган пат-патдан ҳамон дарак йўқ.

— Турсунбой акамга берсам ҳам, майлими? — дедим илжайиб.

Раис бува мендан ҳам ёйилиброқ илжайди.

— Турсунбой аканг далада. Ойсаранинг ўз қўлига бер! Бўл тез!

Оғриниброқ ҳовлига кирсам, Ойсара янгам айвонда ҳамир қориб ўтирган экан. Мени кўриб, қайрилиб ҳам қарамади.

— Манави китобни Раис бува бериб юбордилар — дедим фўлдираб. — Ўзлари кўчада машинада ўтирибдилар. Тезроқ ишга чиқиб яна китоб бераркансиз.

— Нима? — Ойсара янгам дик этиб ўрнидан турдида, айвон лабига келди. Хамир юқи қўли билан газета қатини очган эди, ловуллаб турган атласнинг бир учи ергача чўзилиб тушди. Оғзим ланг очилиб қолди. Ахир бу ялтироқ сим атлас-ку! Энам неча марта отамга айтган: „Мовжунинг тўйига ақалли бир жўра „сим атлас“ олиб қўймасак, уят бўлади“, деган. Отам „Бир жўра „сим атлас“инг чайқовда фалон сўм туради, қаёқдан оламан“, деб тўнфиллаган.

Қаранг, Ойсара янгам шундай нарсанинг қадрига етмади-я! Хамир юқи қўли билан атласни шарт-шурт газетага қайтадан ўради-да, қўлимга тутқазди.

— Раис бувангга айт! — деди лаби титраб. — Ўқийдиган китоби қўпайиб кетган! Ўшаларни ўқийверсин, хўпми?

Гурсиллаб юриб, жойига бориб чўнқайди-да, хамир эмас, Раис буванинг бошига ураётгандай хамирни шиддат билан муштлай кетди.

Менга нима! „Китоб“ни қўлтиғимга қистириб кўчага чиқсам, „Нива“ жойида йўқ. Йўл четида папкам ёнбошлаб ётибди. Энди ўша томонга юрган эдим, орқа томондан дағдағали овоз келди.

— Шошма, Қўшо! Анави нима?

Қайрилиб қарасам, ўн қадамча нарида Турсунбой акам қовоғини солиб турибди. Бошида унниқиб кетган эски дўппи. Кўйлак-шими бир энлик чанг.

Довдираб қолдим.

— Атлас, — дедим тилим тутилиб.

Унинг ранги қув учиб кетди.

— Қанақа атлас?

Баттар эсанкираб қолдим.

— География атласи, Турсунбой ака, — дедим мин-филлаб. — Тарих атласи... Имтиҳонга...

— Бўпти, кетавер... — У тишларини фижирлатганча уйига кириб кетди.

Раис буванинг „Нива“си икки кўча нарида турган экан. Эшикни очиб, имлаб чақирди.

- Бұлдими, тутхұр? — деди машинадан тушиб.
— Манг! — газетага ўроғлиқ атласни құлға тутқаздим.
Раис бува құзимга хавотирланиб қаради.
— Нима бұлди?
— Бошқа китобларни ўқиркансиз!
У атласни шоша-пиша ўриндиққа ташлади.
— Турсунбой сени құрмадими?
— Күрди.
— Нима деди?
— Құлингдаги нима, деб сұради.
— Сен нима дединг?
— Атлас, дедим.
— А?! — Раис буванинг күзи олайиб кетди. — Атласлигини қаёқдан билдинг, аҳмоқ!
Ие, нега менга ўшқиради бу!
— Ойсара янгам очиб күрди! — дедим бақириб. — Сим атлас экан. Чияли бозорда сотиладиган атлас экан! Аммо-лекин олмади!
— Бұлди, тутхұр, бұлди, — у пешанамни силамоқчи эди, бошимни орқага тортдим.
— Үзи олмаса мен нима қиласай?
— Ажаб қибсан, хұп қибсан, олмаса садқаи сар!
Турсунбой сени құрмадими, ахир?!
- Күрди деяпман-ку!
— Қаерда?
— Күчага чиққанимда.
Раис буванинг ранги гезариб кетди.
— Ростдан-а?!
- Нега ишонмайсиз! — хуноб бўлиб бир бақирган эдим, Раис бува қучоқлаб олди.
— Ишонаман, тутхұр, сен яхши боласан, кейин нима деди?
- Ким? — дедим қовоғимни солиб.
— Турсунбой.
— Құлингдаги нима, деди, деяпман-ку?
- Раис бува шилқ этиб, машинаға суюниб қолди.
— Қанақа атлас, деб сұрагандир? — деди овози титраб.
— Сұради.

— Сен нима дединг?
— Сим атлас дедим!

— Ким берди, дедими? — Раис бува оғир-оғир киприк қоқиб ингради. — Сен нима дединг? Раис бува, демадингми, ахир?..

Қарасам, Раис буванинг аҳволи чатоқ. Юпатгим келди.

— Индамай кетавердим! — дедим тантана билан.

— Маладес! — Раис бува бирдан жонланди. — Энди бундай қиламиз, тутхўр. Агар Турсунбой яна сўраб қолса, онам атлас олиб келган экан, қимматлик қипти, шунинг учун янгамга олиб чиқсан эдим, дейсан. Уқдингми?

Кўрқиб кетдим. Отам бу гапларни эшитса, теримга сомон тиқади. Онам ҳам соғ қўймайди.

— Турсунбой акам энамдан сўраб қолса-чи? — дедим тўнгиллаб.

— Сўрамайди! — Раис бува мамнун жилмайди. — Бу ёгини Ойсара янгангнинг ўзи тинчтади. Турсунбойни шунақсанги бурайдики, ҳеч кимга оғиз очмайдиган қилиб қўяди. Сен бир-икки ой жим юрсанг бас. Тушундингми?

Индамай бурилиб кетаётган эдим. Раис бува чақириб қолди:

— Шошма, ўв! Ҳали Шоди билан дарс қиламан деган эдинг-ку! Ўтирип!

У машинага чақон миниб, ўнг эшикни очди.

— Мин, — деди меҳри товланиб. Анчагача жим кетдик. Ўшшайиб ўтирганимдан хавотирга тушди, шекилли, идора ёнидан ўтаётганимизда тўсатдан гапириб қолди. — Сен маладес боласан, тутхўр! Ҳов бирда патпат олиб бераман дегандим. Мен бир сўзли одамман. Пайти келиб, албатта, олиб бераман. Унгача бир иш қиламиз. — У менга қараб, кўз қисиб қўйди. — Жўранг, Қўшо Тошкентга бормаса, мен ҳам институтга кирмайман, деяпти. Иккалангни битта институтга жойлаб қўяман. Тошкентда бизнинг жўралар кўп, билдингми? Бу ёғидан хотиржам бўлавер, тутхўр. Институтта кирдинг ҳисоб!

САККИЗИНЧИ БОБ „КАМПИР ҚОНУНИ“

Адабиёт ёзма-оғзакисидан-ку, амаллаб ўтиб олдим. Жудаям „беш“ бўлмаса ҳам уч-уч ярим дегандек. Лекин бу ёқда ҳали физика турибди. Энг ёмон кўрган фаним — физика! Адабиётни яхши кўришимнинг ҳам, физикани ёмон кўришимнинг ҳам сабаби бор. Адабиёт ўқитувчимиз — яхши одам. Бечоранинг тўққизта қизи бор. Ўқитувчимиз ҳар гал энди ўғил кўраман, деб ҳаракат қиласверган, хотини пайдар-пай қиз туфаверган... Ўгли йўқлиги учун ҳам адабиёт муаллимимиз билан қадрдан бўлиб қолганмиз: раҳмим келади. Ўт юлғанимда Тулпоримга икки боғгинасини ортиб, уйига обориб ташлайман. Томорқасидан жўхори узса қарашвораман. Еттинчи синфдан бу ёғига кузда ҳар куни атайлаб эшигининг олдидан ўтаман. Барибир қўмири олиб келади-ку! Физиллатиб ташиб бераман. Шунинг учунми, ўзим адабиётдан зўрманми, хуллас, шу ўқитувчим мени яхши кўради. Жудаям „беш“ қўймайди-ю (бешни Шодивойга қўяди), ҳар қалай, мендан „тўрт“ни аямайди. Мана, давлат имтиҳонида ҳам ёзмадан „уч“, оғзакидан „тўрт“ олдим.

Физика ўқитувчимиз — ёмон! Усмон Қиличев деса бошқа малимлар у ёқда турсин, директоримизнинг ўзи ҳам типирчилаб қолади. Усмон ака урушда бўлган: чап қўли йўқ. Лекин қўли битта бўлсаям, бизларни шунаقا ушлайдики...

Усмон акадан „беш“ оладиганнинг боши ўнта. Ҳаммани „икки“ билан сийлайди. Йўқ, ошириб юбордимов! Бултур синглим Жу бошқа фанлардан „тўрт“ олса ҳам, худди шу Усмон ака „беш“ қўйган. Чоракларига ҳам, йиллигига ҳам, ҳатто имтиҳонда ҳам.

Эсимда, эрта ёзда шу малим бизнига келган эди.

„Салимжон, жўра, қизингиздан малакали мутахассис чиқиши мумкин, политехника институтининг АСУ факультетига юборинг“, деганида дадам негадир узоқ ўйланиб қолган. „Биламан, малим, нима қилай, менинг ортиқча жамғармам йўқ-да“, деб қўя қолган эди. Усмон ака, „Сиздаقا фронтовик одамдан шунаقا гап

чиқса“, деб яккаю ягона құлини жаҳл билан силтаганида онам үртага тушган эди: „Қиз болага институтни ким қўйибди, шаҳарга борса айнаб кетади“. Жу бечора үшандада роса йифлаганди.

Гап бундаям эмас... Жонажон ўртоғим Шодивойни бутун мактаб, ҳатто районо ҳам олтин медалга тайёрлаётган экан. Тұққизинчи синфдан шу — Усмон ака физикадан дарс үта бошлади-ю, Шодивойнинг кундалиги „уч“га тұлиб кетди. Үшандан бери, айтишларича, Раис бува малимимиз Усмон Қиличевни ёмон қўриб қолганмиш. „Шу малимни пенсияга чиқариб қутулмасам бўлмайди“ деганмиш. Тағин у ёғини билмадим-у, шуниси аниқки, жўрам олтин медаль ололмайди. Устига устак, эртага физикадан давлат имтиҳони топширамиз.

...Имтиҳонга райондан, ҳатто областдан одамлар келади, дейишганди. Ҳеч ким келмади. Шодивойнинг фамилияси Алимов эмасми, Усмон ака, биринчи бўлиб жўрамни чақириб қолди.

Ўн йил ўқиб, биронта малимдан қўрқмайдиган Шодивой шу, Усмон акани кўрса, оёғи қалтирайдиган бўлиб қолган. Ҳозир ҳам фамилиясини айтиб чақиришганини эшитмади. Ҳаммамиз йўлакда типирчилаб турибмиз.

— Алимов! — қия очиқ эшиқдан Усмон аканинг зардали овози келди.

— Сени чақирияпти! — дедим секингина жўрамнинг биқинига туртиб.

Шодивой гарангсиб оғзини каппа-каппа очди:

— А?

— Кир! — қаттиқроқ бақириб юбордим шекилли, кимдир елкамга мушт туширди.

— Секин-е!

— Қўрқиб кетяпман... — Шодивой кўзимга шунақанги илтижо билан термилдики, ўзим ҳам қўшилишиб йифлагаб юборай, дедим.

— Шпаргалкани чўз! — ўртоғимнинг қалин қилиб тугилган чучварадек қулоғига шивирладим. (Шпаргалкаларнинг зўри Шодивойда бўлади-да. Бошқа болалар

далада файрат билан ишлаётганда жўрам уйига кириб олиб файрат билан шпаргалка тайёрлаган: ҳаммамиз учун.) — Деразанинг олдига ўтири. Билетингнинг номерини айтсанг, ошираман.

Шодивой ихчам қилиб букланган қоғозни чўнта-гидан олиб қўлимга тутқазди.

— Алимов! — қия очиқ эшикдан боягидан баттар зардали овоз келди.

Шодивойнинг қўлтигига кириб, судрагудек олиб бордим-да, эшикни каттароқ очиб, гарданига бир мушт туширган эдим, сузонғич буқадек бошини елкаси орасига тортганча, тўппа-тўғри Усмон аканинг устига бостириб бора бошлади.

— Жиннимисан! — Усмон ака ўрнидан туриб кетди. Ягона қўлини кўтариб, калла қўйишни мўлжаллаб келаётган Шодивойнинг пешанасига кафтини рўпара қилди.

Шодивой таққа тўхтаб қолди.

— Билет ол! — деди Усмон ака Шодивойга шубҳалироқ қараб.

Тезроқ синфхонанинг нариги томонига етиб бормасам бўлмайди. Папканинг бандидан чангллаганча йўлакдан югуриб кетдим.

Имтиҳонни далада топширганимиз қандоқ яхши оли-я! Баҳо қўйишда бригадиримиз Тўлаш ака қўмаклашиб юборарди. Бир гектар ўтоқ қилганга — „беш“. Ярим гектарга — „уч“... Шу... Раис бувагаям ҳайронманла! Давлат имтиҳони қонуний бўлсин, ўнинчилар мактабнинг ўзида синовдан ўтсин, камиссия келиб қолиши бор, дебди-да! Мана энди ўзининг ўғлига жабр бўлди!

Имтиҳон бўлаётган синфхонанинг деразаси олдига етиб олгунимча ҳали қанча бор! Аввал узундан-узоқ йўлакдан ўтишим керак. Кейин ҳовлига чиқаман. Ундан кейин мактаб орқасига ўтаман.

Ҳаллослаб чопиб боряпман-у, бир нарсани ўйлайман. Меҳнат дарсидан зўри йўқ экан-да, ўзи! Масалан, менга энг яхшиси — меҳнат дарси! Малимлар нукул савол беравериб бошингни қотирмайди... Шунисига хурсандманки, меҳнат дарси бизда, айниқса, кўп бўлади. (Бонқа жойда қанақа, билмадим-у, бизда шунақа.) Фўза

сал қаддини ростлаши билан ягана бошланади. Ўзингиз ўйлаб кўринг. Қорни оч тўртта одамнинг олдига битта ликопчада ош қўйиб, „Қани, олинг-олинг“ десангиз, тўртталаси баравар чанг солса, нима бўлади? Ҳаммаси оч қолади, тўғрими? Ғўзаям шунаقا-да! Бундан чиқди, биттасини қолдириб, бошқаларини юлиб ташлаш керак. Бирми? (Бармоғингизни букиб, санаб туринг.) Ундан кейин... Тўртта гўзадан учтасини юлиб ташлаганингиз билан бошқа ошхўр топилмайди, дейсизми? Сиз-ку, ерга минг хил „палов“ берасиз, маҳаллий ўфит, минерал ўфит. (Вой, ҳиди курсин. Одамни заҳарлаб ўлдираман, дейди-я!) Сиз-ку „палов“ни пахтага берасиз. Аммо унинг насибасига шерик бўладиган бегона ўтлар ҳам чиқадида! Ўшанаقا текинхўрларни таг-томири билан қуритиш керакми – керак! Бунинг оти ўтоқ дейилади. Иккита бўлдими? Ана ундан кейин чопиқ бошланади. Пахтаниям жони бор. Нафас олмаса, ўлиб қолади. Сиз билан биз-ку оғиз-бурнимиз билан нафас оламиз. Пахта бўлса, илдизи билан нафас олиши шарт. Демак, чопиқ қилиш керак. Кейин пилла мавсуми келади. (Бунисини айтиб берувдим, бошқа гапириб ўтирумайман.) Кетидан пичан ўриш кампанияси бошланади. „Ферма тоға“нинг сигирлари пичан емаса – ҳаром ўлиб қолмайдими? Ундан кейин, яна чопиқ, ғўза сугориш... Бу – пахта дегани сувга чунонам ўчки, жуда отчалик ичмасаям, камида менинг Тулпоримчалик симиради, қуриб кетгур!

Пахта очилганидан кейин-ку... Далада байрам бошланади. Аввал, биринчи нав пахта терасиз, кейин иккинчи терим, учинчи терим. Шу пахта дегани хўп эринмаган нарса-да! Бугун териб олсангиз, эртага яна илжайи-и-б, очилиб тураверади. Кейин подбор терасиз, яъни машина териб кетганида ариқقا тўкилиб қолган пахтани йифиб оласиз. Чаноқда ярим-ёртиси қолсаям увозда! Ундан кейин кўрак териш, кетидан кўрак чувиш... Охири далалар қип-қизил бўлиб қолганида ғўза-поя юласиз...

Ана энди ўзингиз ўйланг! Меҳнат дарсидан зўри борми? Ҳар куни очиқ ҳавода юрасиз. (Биология малимимиз айтгандек, „Очиқ ҳаво – танга даво“.) Ўқитув-

чилар ҳам қийнаб ўтирумайды. Биринчи сентябрдан ўқиши бошлайсиз-у, олтинчи сентябрдан теримга тушиасиз. Ўнинчи декабрда мактабга қайтиб келсангиз, журналлар тұлдирилган, чорак баҳолар чиқарылған!

А? Нима дедингиз? Катталар нима иш қиласы, дейсизми? Ким айтды сизга катталар бекор ўтиради деб?

Масалан, менинг отам ҳам Усмон ақага ўхшаган уруш ногирони. Раис бува дадамни, лунжи учишини ёқтирганы учун буғалтирликдан бүшатыб, газета со-түвчи қилиб қўйган, бўлсаям терим бошланганида отам дўкончада „Кепқолинг, газета опқолинг“, деб ўтиради дейсизми? Ҳечам-да! Синглим Жу, отам, онам тонг отмасдан далага чиқиб кетишади. Қоронги тушганда қайтишади! Не машаққат билан етиштирилган „оқ ол-тин“ни ерда қолдириш, фирт гуноҳ-ку!

Бошқаларми? Кечирасиз! Бизнинг „Машъял“ жамоа хўжалигига текинхўрлар йўқ. Ҳамма ишлайди. Раис буванинг жияни томорқасида кетмон чопади. Куёви ҳи-собчилик қиласы. Яна битта куёви — агроном. Кенжа куёви — иқтисодчи. Қайниси — дўконда атир-упа со-тади... Булар — эркаклар! Аёлларнинг ярмиси далада, ярмиси — уйида. Нега дейсизми? Аёл бўлгандан кейин туфиши керакми, ахир? Масалан, бизнинг қишлоқда ўттиз битта Қаҳрамон она бор. Битта боласини туфиши билан иккинчисига тайёргарликни бошлаб юборади...

Э, унақа чалгитманг-да, одамни! Жонажон жўрам Шодивойга шпаргалка узатмоқчи эканимни айтувдим-ку!

Мактабнинг узундан-узоқ биносини айланиб ўтгунча жиққа терга ботиб кетдим. Кун иссиқ. Бошқа синфлар чопиққа чиқиб кетгани учун мактаб жимжит. Ўзим ҳам шунақанги тез югурибманки, нафас оламан, десам, ичимга ҳеч ҳаво кирмайды. Бундай қарасам, тилим тахминан бир қарич осилиб қопти. (Қўлим билан тиқиб, жойига киргизиб қўйдим.)

Шодивой маладес-да! Ўзим айтганимдек, дераза ёнида ўтирган экан. Очиқ ойнадан бешта бармоғини кўрсатди. Демак, бешинчи билет!

Ерга таппа ўтириб олиб, имтиҳон билетлари ёзил-

ган дафтарчани титкилаб кетдим. Аксига олиб, ҳеч тополмайман.

Шодивой, қийналиб кетганимни тушунди шекилли, қалта, йўғон бўйини чўзиб, қаттиқ шивирлади:

— Кулон қонуни! Эшилдингми, Кўшо! Кулон қонуни!

Кулон қонуни бўлса, Кулон қонуни-да! Ҳозир топамиз!

Шпаргалканинг қатини ёйишга тушдим. Шодивой ҳам бутун китобни қўчириб чиққанми, нима бало! Шпаргалка қатини очганим сайин Шокир абзийнинг гармонидек чўзилиб кетяпти. Атайлаб қилгандек, Кулон қонуни ёзилган жой ҳеч чиқмайди. Бир маҳал кимдир „гармон“нинг ерга чўзилиб ётган учидан тортиб кетаётгандек бўлди. Қўрқа-писа қарасам, қай кўз билан кўрайки, Тулпорим шундоқ тепамда туриб олиб тасмадек шпаргалкани бир четдан ямлаб ютапти.

— Кўйвор! — дедим-у, жонҳолатда қофозни тортқиладим. Шпаргалканинг бир қисми сўлакка қоришиб эшагимнинг оғзидан қайтиб чиқди. Ўзиям ранги суйкалиб, мажаҳланган гулсафсардек илма-тешик бўлкетибди.

Тулпорим, ҳар қалай яrim қулочгинасини узиб олишга ултурган экан. Ҳузур қилиб чайнади-да, қулт этиб ютиб юборди. Ёқиб қолди шекилли, яна „гармон“-га талпинди. Ўрнимдан сакраб туриб, қулоқ чаккасига тарсаки тортиб юбордим! Биласиз, Тулпорим қалтак еб ўрганмаган. Қўзимга бирпас қараб турди-да, шунақанги алам билан ҳанграб юбордики, қўрқиб кетганимдан „тишш“ дедимми, „ишиш“ дедимми, эсимда йўқ.

Деразадан қараб турган Шодивойнинг лўппи юзи қийшаййб кетди. Папкамни шоша-пиша титкилаб, „Физика“ китобини олдим.

— Мана! — дедим эшагимнинг ҳанграб турганидан фойдаланиб, — ёзиб ол, Шоди! Вакуумда жойлашган зарядли қўзғалмас нуқтавий икки жисмнинг ўзаро таъсир кучи...

— Алимов! — синфхона ичкарисидан дағдагали хитоб янгради. Назаримда Шодивойнинг кўзи филай бўлиб кетди. Бир кўзи менга қараб турибди, биттаси Усмон акага. Эшагим ҳам тақа-тақ жимиidi-қолди.

Худди шу пайт синфхона ичида ғала-ғовур бошланди.

— Домулло! Қанақасиз ўзи! — деган товуш шантагиллади. — Нима қиласиз бачаларни қийнаб. Бўлингда, тезроқ. Чопиқ қолиб кетяпти.

Топдим. Бригадиримиз Тўлаш аканинг овози!

— Чиқинг! — Усмон ака столни бир қўллаб муштлади шекилли, алланима қарсиллади. — Чиқинг! Ким сизга рухсат берди, давлат имтиҳонига бостириб киришга!

— Имтиҳон-ку ўз йўлига... — Тўлаш аканинг товуши энди ялиниброқ чиқди. — Аммо бу ёқда шунча иш... Домулло...

— Йўқол! Қачондан бошлаб, сен саводсиз менга... Қирқ йиллик педагогга...

Ҳамма ёқ гумбур-гумбур бўлиб кетди.

— Шоди! Ма! — дедим бақириб. Фурсатдан фойдаланиб „Физика“ китобининг ўн беш варақчасини йиртиб, деразадан узатдим.

Синфхона томонидан Тўлаш аканинг алам тўла товуши келди.

— Домулломан, деб кўп керилманг, домулло! Раис бува келса ўзингиз жавоб берасиз.

Папкамни чанглаб, мактаб дарвозаси томонга югардим. Кетимдан Тулпорим эргашди. Дарвозанинг қоқ ўртасида Тўлаш аканинг боши бошим билан уришиб кетишига сал қолди. Унинг икки юзи хўрознинг тожисидай қип-қизариб кетган, ҳансираф нафас оларди.

— Шошмай тур! — деди муштини дўлайтириб. — Ҳозир Раис буванинг ўзи келади!

Кўрққанимдан лип этиб четга ўтдим. Тўлаш ака нарироқда турган кажавали мотоциклига минди, чунонам патиллатдики, қулогим ёрилиб кетай деди.

Чопиб, синфхона эшигига келсам, Шодивой илжайиб турибди.

— Тўрт! — деди икки юзи юмронқозиқнинг лунжидек ялпайиб. — Кир. Сени чақиряпти.

Кўлимдаги папкани дўстимга узатдим.

— Югар! Дераза олдига бор!

- Шпаргалкани чўзмайсанми?
- Чўзилиб бўлди! — дедим тўнгиллаб. — Китобни йиртавер.

Синфхонага кирсам, Усмон ака доска олдида турганча у ёқдан-бу ёқقا бориб келяпти. Бутун гавдаси муттасил чайқалади.

- Бемаънилик! — деди овози титраб. — Бориб турган bemanyailik!

Билет олишга шошилмасдим. Аввал Шодивой деразага етиб олсин!..

- Шармандалил! — малим лаблари титраб ингради. — Аллақандай чаласавод... Билет олмайсанми! — деди тўсатдан.

Кўрқа-писа, стол устида ётган узунчоқ қофозларга қўл чўздим. Титраб турган бармоғимга илашиб чиқсан битасини чўғ ушлагандек чимчилаб тортдим.

- Ўн уч... — дедим талмовсираб.

— Бемаънилик! — малим яна бир хитоб қилди-да, негадир овози майнглашди. — Ўтири, ўғлим, тайёрлан. Шошилмасдан, ўйлагин, хўпми?

Очиқ дераза ёнига бориб ўтиридим. Биринчи саволнинг маъносини энди тушундим: „Ампер қонуни...“

— Кўшо... — дераза орқасидан мингиллаган товуш келди. — Кўшо... Саволинг нима?

Кўз қири билан қарасам, дераза тагида Шодивой бўйинини чўзиб турибди.

- Ампер қонуни! — дедим қаттиқ пичирлаб.

Айтдим-ку, малимимизнинг ўзи ёмон деб.

— Ким у? — малим юргургудек бўлиб тепамга келди. — Куртинг борми? Нимага типирчилайсан?

— Ўзим, — дедим илжайиб. — Овоз чиқармасам, масала ечолмайман, малим.

Усмон ака ҳар эҳтимолга қарши дераза томонга қараб қўйди. Мен ҳам кўз қиrimни ташласам, ҳеч ким йўқ. Шодивойнинг ақли тошни ёради-да! Аллақачон куённи суриб қопти!

Малим бир қўллаб шарақ-шуруқ қилиб деразани ёпди. Доска олдига кетди. Ўша заҳоти дераза ортидан

яна Шодивойнинг баркашдек юзи кўринди. „Оч“, деб имо қилди. „Иложим йўқ“, дегандек бош чайқадим.

Шодивой дераза ёпиқ бўлгани учун мендан бошқа ҳеч ким эшитмайди, деб ўйлади, шекилли, китобни очиб олиб, ойнага яқин келтирди.

— Ёз, Қўшо! — деди овози борича бақириб. — Ўзидан ток кучи ўтказаётган ўтказгичнинг узунлиги...

Шипиллатиб ёзиб кетдим. „Ўзидан ток кучи...“

— Кичик кесимга у билан бурчак ҳосил қилувчи...

Шипиллатиб давом этдим: „Кичик кесимга...“

— Индуksия магнит майдони... — деди Шодивой овозини янаям баландроқ қўйиб.

— Салимов! Доскага!

Ноилож Усмон аканинг ёнига бордим.

— Бўлдингми?

— Бўлдим... Биринчи саволни.

— Қани эшитайлик...

Икки минут олдин Шодивой қанақа бақирган бўлса, мен ундан ўн ҳисса қаттиқроқ ҳайқириб жавоб бера бошладим:

— Ўзидан ток кучи ўтказувчи ўтказгичнинг...

Худди Ѣшу пайт синф эшиги тарақлаб очилди. Шуна-қанги шиддат билан очилдики, каптархонага бехосдан мушук оралаб қолса, қанақа бўлади? Ҳамма каптарлар ҳар ёқда патирлашиб учиб кетадими? Мендаям худди Ѣшунақа бўлди. Калламда ҳеч вақо қолмади, худди у қулогимдан кирган шамол фувуллаб, бу қулогимдан чиқиб кетаёттандек. Қарасам, остоңада Раис бува турибди. Кун иссиқлигига қарамасдан эгнига қора костюм кийиб олибди. Кўкси тўла медаль. Орқасида Тўлаш ака. Раис буванинг қўлтиғидан мўралаб-мўралаб қўйяпти. Худди эчкининг чотидан бошини чиқариб мўлтираётган улоқчадек.

— Малим... — Раис бува ғалати илжайди. — Рухсат этсангиз, қадрларимизнинг илмини бизам кўрсак.

Усмон аканинг юпқа лаби титраб кетди.

Раис бува рухсат кутмай, биринчи партага ўтириб олди. Тўлаш ака унинг ёнига чўкмоқчи эди, қорни сифмади. Эшиқ олдига қайтиб борди-ю, қўл қовуштириб тураверди.

— Умуман, Ампер, зўр олим бўлган! — дедим янам қаттиқроқ бақириб. — Ўзи немис бўлган, малим. Электрни ҳам шу одам топган. Яъни, малимжон, Ампер қонуни...

— Малим! — Раис бува ўрнидан силтаниб турди. Парта тарақлаб кетди. — Кўрдик, балога ақли етяпти, болаларни. Аллақанаقا „Кампир қонуни“ деб шунчалик чўзғилаш шартми?

— Кампирмас, Ампер! — назаримда малимимиз йифлаб юборгудек ингради. — Қачонгача саводсиз бола тарбиялаймиз!

Раис бува бир зум ўйланиб қолди. Билмадим, малимдан уям ҳайиқарканми ё андиша қилдими, ҳар қалай уялиброқ жилмайгандек бўлди.

— Қўйинг, энди, — деди илжайиб. — Эшитдик, камиссия келмайдиган бўпти. Йигитларимиз маладес! Йўлини топиб кетади. Кўриб турасиз, институтларнинг каттасига киради булар!

— Қандоқ қилиб? Пора берибми?

Малимнинг гапи жон-жонидан ўтиб кетди шекилли, Раис буванинг юзи қаҳрли тус олди.

— Ҳов, малим! — деди ҳар сўзни чертиб. — Ҳар йили ищ айни қизиганда бир ишқал чиқарасиз. Нима, булар оқбилак бўлсинми? Мана шу бола... — У менга қараб бармоғини бигиз қилди, — мана шу азамат кечаси билан тонготар ухламай фўза суғориб чиққанини биласизми?

Раис бува рост айтди. Жудаям тонготар бўлмасаям, ой чиққунча фўза суғорганим рост.

— Келажакни шу авлод яратади! — Раис буванинг овози шу қадар ҳокимона жарангладики, тўртта партада ўтирган синфдошларим пилдир-пис бўлиб қолишиди. — „Кампир қонуни“ни бошига урадими булар! Ўйлангда, сиз ҳам, малим.

Усмон ака ёмон дедим-ку! Тўсатдан уникиям тутиб кетди.

— Ҳов, Раис! — деди титраб. — Қўлингиздан келса оттирворинг. Мен саводсиз кадр тайёрламайман! Мактабда медаль олиб, институтга борганда „икки“га тортолмайдиган болани ёмон кўраман!

Анграйиб қолдим! Шу пайтгача биронта одам Раис буванинг кўзига тик қараб, бунақа гапирмаган эди. Раис бува ҳам бир зум эсанкираб қолди. Лекин ўша заҳоти шиддат билан ҳайқирди:

— Болалар яхши илм олмаган бўлса, айб сизда! Билиб қўйинг, шу болалар институтга киради. Албатта киради!

Ажаб, Усмон ака кулди. Кулгандаям, бўғик, хириллаб кулди.

— Сизнинг ўғлингизми, Раис? Хоҳласангиз олим ҳам қиласиз уни.

— Сенга нима?

Баттар довдираб қолдим. Малимнинг ёши Раис бувадан камида беш ёш, бўлмаса ўн ёш катта. Сочлари оқариб кетган. Раис бува уни bemalol сансираяпти!

— Тўрт йил олдин пенсияга чиқишинг керак эди! — деди Раис бува баттар тутақиб. — Нимага ивирсиб юрибсан?

— Яхши... — Усмон ака чуқур уф тортди. — Бўшайман. Ўзимниям жонимга тегди... — У негадир жилмайди. Пастки лабини тишлиб узоқ жимиб қолди. — Сенгаям боққан бало бордир... — деди секин.

— Э, ўчир-е, ифвогар! — Раис бува илдам келиб, менинг қўлимдан тутди. — Юр, тутхўр!

Талмовсираб орқасидан эргашдим.

Ҳовлига чиқсан Шодивой кутиб турган экан.

— Неччи қўйди? — деди кўзимга тикилиб.

Индамадим.

— Шу палид домланинг гапи учун ҳам иккалангни юрист қиласман! — Раис бува бир қўли билан Шодивойни, бир қўли билан мени билагимдан олиб судраб кетди.

Дарвоза олдига келсак, Тулпорим мени кутиб турган экан. Бошқа жой қуриб қолгандек нақ дарвозага кўндаланг туриб олибди. Четлаб ўтиб кетсан ҳам бўладику, Раис бува келиб-келиб эшакка йўл бўшатишни хоҳламади, шекилли, дағдаға қилди:

— Хих!

Тулпорим узун қулоқларини осилтириб хаёл суреб тураверди. Боя нега урганимни ўйлаётган бўлса керак.

Раис бува Шодивой билан менинг қўлимни қўйиб юборди-да, эшак бошида мушт кўтарди.

— Хих!

Тулпорим бошини хотиржам буриб, ўгирилди. Лабларини чўччайтириб Раис буванинг қулоғини ҳидлади. Кейин тилини икки қарич чиқариб унинг юзини ялаб ҳам қўйди.

Ҳозиргина малим билан уришиб ғазабланиб турган Раис буванинг жон-пони чиқиб кетди.

— Хих-е, ҳаром ўлтур! — деди-ю, икки қадам орқага тисарилиб, кучи борича эшакнинг қорнига тепди. Тулпорим бир силкиниб кетди. Кейин секин-секин бурилиб, раппа-расо тўқсон градус ўгирилди. Бир нимани нишонга олгандек, орқасига қараб қўйди. Ана ундан кейин Раис буванинг қовуғини мўлжаллаб туриб чунонам тепдики, Раис буванинг ичидан „Фиқ“ деган овоз чиқди. Тупроқ йўлга чалқанчасига йиқилди.

Шодивой иккаламиз анграйиб қолдик.

— Тўхтат! — Раис бува инқиллаб ўрнидан қўзғалди. — Тўхтат дейман. Кимнинг эшаги бу?! — У орқасига ёпишган чангни қоқиб, қаддини ростлагунча Тулпорим шаталоқ отиб фойиб бўлди.

ТЎҚҚИЗИНЧИ БОБ

БИЗ ТАЛАБА БЎЛАМИЗ!

Осмони фалақда учиб кетяпмиз! „ЯК-40“ да! Ёнида Шодивой ўтирибди. Оғзи қулоғида! Устара тегмаган мўйлови қийматахтадан ўтказса, бир қозон чучварага бемалол етадиган дўрдоқ лабини янаем қалин қилиб юборгандек. Юзига хуснбузар тошиб, афти устига ундаунда тош тўкилган асфальт кўчанинг ўзи бўлиб қолган. Тиф тегмаган мўйлов билан хуснбузар масаласида ўзимиз ҳам жўрамиздан қолишмаймиз. Шодининг юзи-ку сийрак тош сачраган асфальт. Бизники-чи? Нақ тош йўлнинг ўзгинаси!

Олдинги ўриндиқда Раис бува ўтирибди. Шляпасининг қирраси ўриндиқ суюнчигига тегиб қийшайиб-роқ турибди. Раис бува бунақа самолётларда учавериб, кўзи пишиб кетган шекилли, аллақачон етти уйқуни уриб бўлдиёв. Ора-чора ўртачароқ овозда хуррак тортиб ҳам қўяди.

Умрим бино бўлиб, самолёт у ёқда турсин, поездга ҳам минмаганман. Шунинг учун, трапдан кўтарилаёт-гандага юрагим салгина така-пуга бўлди. Аммо дарров ўзимни юпатдим. Самолёт Шодивойнинг „Запорожец“ и эмаски, „Ферма тоға“нинг фарамига калла қилса! Ростдан ҳам „ЯК-40“ жоннинг роҳати экан! Қилт этмайди-я! Худди бир жойда қотиб тургандек. Шундоқ тагимизда оппоқ, дўмбоқ булутлар сузиб юрибди. Шунақанги хўппа семизки, пахта хирмонидан фарқи йўқ. Устига чиқиб иргишилагинг келади. Ола-чалпоқ „йиртиғи“дан ерга тушиб кетмасанг бас! Жўрамнинг биқинига туртиб, юмaloқ деразадан „кўриб қўй“ дегандек, булутларга имо қилдим. Шодивой „зўр“ дегандек бош бармоғини дик-кайтириб қўйди.

Шундоқ қилиб, яқинда биз талаба бўламиз! Аслида бунақа ўй етти ухлаб тушимга ҳам кирмаганди.

Ўшанда Раис бува „Сенларни юрист қилмасам, раис отимни бошқа қўяман“, дейишга деб қўйди-ю, палакат босиб, Тулпоримдан тепки егандан кейин, бу гап пақ-қос эсидан чиқиб кетгандир, деб ўйлагандим. Биринчидан, Тулпор майдалашиб ўтирмайди. Тепса бирвара-кай тепиб қўя қолади. Раис бува уч кунгача ҳеч кимга кўринмади. Шодивойнинг айтишига қараганда, дадаси уч кунгача тумандан массажчи чақириб, вазелин билан қовуғини силатганмиш. Иккинчидан, Раис бува эшак меники эканини билган. Билмай қаёққа борарди: Тулпоримни мингта ҳангига орасига қўйиб юборинг: мана-ман деб ажралиб туради.

Хуллас, Раис бува Шодивой иккимизни институтга киритиб қўйишниям худди мотоцикл олиб беришга ўхшаб аллақачон эсидан чиқариб юборди, деб ўйлагандим.

Йўқ, унутмаган экан. Уч кун аввал саҳарлаб туриб

эшагимни сугораётсам, ҳарсиллаб-гурсиллаб, Шодивой келиб қолди.

— Чамадонингни тайёрла! — деди дўриллаб. — Тошкан борамиз.

— Нега?

— Ўқишига кирамиз. Юридическийга!

Юридический деганини жудаям яхши тушунмасам ҳам озми-кўпми ақдим етарди.

— Нима, одамларни қамайсанми?

Шодивой ҳам бу ёгини ўйлаб кўрмаган эканми, иккиланиб қолди.

— Ўзимга қолса-ку, — деди минғиллаб. — Физкульттурнийга кирмоқчийдим. Ҳозир юз кило штанга кўтаришман.

— Мен анавинаقا турникка осиладиганига кирадим, — дедим худди дадам дарров жавоб бера қоладигандек. Бўйим дароз.

— Шунаقا-ку, — Шодивой яна минғиллади. — Физкульттурнийда дадамнинг жўраси йўқ экан. Кейин... Юристлар михдай яшармиш.

Ҳафсалам пир бўлди.

— Боравер!

— Йў-ү-үқ! — Шодивой бошини сарак-сарак қилди. — Сен бормасанг, менам кирмайман ўқишига! Дадам жўрасига айтиб, сениям жойлаб қўядиган бўлди.

Дўстим рост айтган экан. Кечкурун онам эшиқдан ҳовлиқиб кириб, Раис бувани алқашга тушди. Раис бува онамни атайлабдан идорага чақириб олиб айтганмиш.

„Шундоқ-шундоқ, янга, Кўшоқвойни азалдан яхши кўраман. Уям ўзимнинг ўғлимдек, гап. Шодивой иккаласи ўқиб, юрист бўлиб келади!“

Ҳовли супураётган синглим энамнинг гапини эшитиб негадир ҳиринглаб кулди.

— Сиздан юрист чиқмайди, ака!

Супада жўхори уқалаб ўтирган дадамнинг ўнг лунжи уча бошлади. Онамга қараб чақчайди.

— Илоннинг ёгини ялаган ўша Раис оталик қилармишми, менинг ўғлимга? Раҳмат! Берадиганини белбогига боғласин!

Онам кўзига ёш олди.

— Доим шунаقا кажбаҳслик қиласиз. Бирор сизнинг ўғлингизни ўқитаман, одам қиласан, деса...

Дадам сутани улоқтириди-да, жаҳл билан қўл силтаб кўчага чиқиб кетди.

Кечак Шодивой яна келди. Чўнтағидан бир даста қоғоз чиқарди.

— Кўриб кўй! — деди мақтаниб. — Иншонинг зўри мана бунаقا бўлади! Адабиёт малимимизнинг ўзи ёзган.

Эсим оғиб қолай деди.

— Ҳой жинни! — дедим бақириб. — Тошкандаги институт сенинг мактабингми, шпаргалка кўчирсанг индамай турадиган! Деразадан ўзингни улоқтириб юборар!

— Улоқтирмайди. Дадамнинг жўраси бор.

Кечқурун отам ишдан келди-ю, айвон ўртасида турган бир дастурхон патир, бир тоғора бўғирсоқни кўриб ҳайрон бўлди.

— Нима бу?

— Йўлга! — деди онам тушунтириб. — Болам бечора мусоғир юртда оч-наҳор юрадими? Жилла қурса озроқ пул беринг. Нонушта қилиши бор, исталавойга кириши бор...

Дадамнинг бир эмас, иккала лунжи уча бошлади.

— Эҳтиёт бўл! — деди тўнғиллаб, — ўғлинг космосга учиб кетяпти... Кўрасан, ҳали, ҳафта ўтмай қайтиб келади тўрвасини кўтариб.

Онамнинг жазаваси қанақа тутишини айтувдим-а? Ҳозир ҳам шунаقا бўлди.

— Ҳой, — деди икки қўлини тиззасига баравар шаппатилаб. — Одамлар боласини ўқишига жойлайман деб сигирини сотади, мошинини сотади. Белига жарақжарақ пул туғиб, домланинг уйига боради. Раис бувадек одам бош кўшиб турганда сиз биттаю битта ўғлингиздан пул аяйсизми? — У тўсатдан йиғлаб юборди. — Майли, узугимни сотаман, сирғамни сотаман! Керак бўлса, Мавжунинг тўйига атаб қўйган гиламни сотаман!

— Бўлди! — дадам, боши муттасил чайқалиб шими-нинг чўнтағини ковлади, бир ҳовуч пулни хонтахтага улоқтириди-ю, ҳовлига тушиб кетди.

Онам дарров овуниб қолди. Шолчага чүнқайиб ўтирганча бош бармогини ялаб ҳафсала билан пул санади, рўмолини ечиб, пулни чандилаб боғлади.

— Ма, белингга туғиб ол! Шаҳар ёмон бўлади. Битта-яримтаси киссангдан олиб қўймасин.

Онам чамаси кечаси билан ухламадиёв. Аллақаёқдан эски чамадон топиб келди. Иссик тўр кўйлак (шамоллаб қолмаслигим учун), битта қора костюм (дадамники, куядори ҳиди келиб турибди), иккита шим, икки жуфт пайпоқ, ўн олтига патир (ўзим санаб турдим), бир тўрва ёнфоқ (ўзимизнинг томорқадаги ёнфоқдан), бир тўрва туршак (тоғамникидан келган, қуртлаганидан билдим), ярим тўрва қурут (ўзимизнинг қатиқдан), ярим тўрва бўғирсоқ (кеча пиширилган), яна аллақанча нарсаларни жойлаб, қопқоқни ёпган эди, чамадон аждарнинг оғзидек бир очилганча устига миниб олиб, босса ҳам қайта ёпилмади.

Онам ишнинг кўзини билади-да! Дадамнинг эски шимидан қалинлиги беш энли келадиган камарни ечиб олиб, бир тортган эди, чамадоним оғзини юмди. Фақат эшагимнинг хуржунидек икки томонга тарвақайлаб, дўмбайиб қолди.

Тонг саҳарда туриб, ташқарига чиқдим-у, энг аввал ёнфогим билан хайрлашдим.

— Хайр, қадрдон ёнфогим! Устингдан йиқилиб, бошим ёрилган бўлсаям, барибир сени яхши қўраман! Сенинг меваларингни еб, ақлим тўлишди. Эрта-индин талаба бўламан! Мабодо тош отиб, шохингни синдириб, хафа қилган бўлсам, рози бўл.

Ёнфогим қилт этмади.

Кейин оғилхонага кириб, Тулпорим билан хайрлашдим.

— Хайр, меҳрибон Тулпорим. Имтиҳон куни сени урмоқчи эмасдим. Ўзинг шпаргалкани еб қўйиб чатоқ қилдинг. Ҳафа бўлма! Рози бўл, Тулпорим! Ҳар куни мактабнинг деразаси олдига бориб турардинг. Энди мендан ким хабар олади?

Эшагим юзимга қараб бир хўрсинди, икки хўрсинди. Кейин энтикиб-энтикиб ҳанграб юборди. Қарасам, ўзим

ҳам йифлаб юборадиганман. Чопиб ҳовлига чиқдим. Синглим тандирга ғўзапоя тиқиб энди гугурт чақаётган экан.

— Хайр, Жу! — дедим йифламсираб. Синглимни бафимга босиб, пешанасидан ўпдим. — Калишимни йиртиб қўйганингда сўккандим, рози бўл.

— Вой қўлим куйди! — синглимнинг афти буришиб кетди. — Қанақа калиш?

Қаранг, аллақачон эсидан чиқиб кетган экан-ку, мен бўлсам...

Айвонда турган онам ўпкаси тўлиб, мени бафрига босди.

— Хайр, энажон, рози бўлинг! — деган эдим, хўнграб йифлаб юборди.

— Вой, болажоним, энагинангни ташлаб, қаёқларга кетяпсан?

— Хайр, дадажон! — уй томонга қараб хўрсишиб кўйдим.

— Даданг аллақачон ишга кетган! — онам рўмолининг учига бурнини қоқди.

Қаранг, дадам узоқ сафарга кетаётганимни кўрабила туриб, хайрлашгиси ҳам келмабди. Шу қилганига Тошкентга бориб олим бўлиб келаман! Праписир бўлиб келаман! Бир уялсин!

Мана, кетяпмиз энди „ЯК-40“да! Самолёт деразасидан қараб боряпман-у, бундан беш йил аввал қазо қилган моможонимнинг гапини эслайман. Бир куни моможоним мақтанган эди. Бу дунёда қурмаган жойим қолмади, бачам, бу ёфи Шалдирарамасойгаям бориб келдим! (Шалдирарамасой бизнинг қишлоқдан олти чақирим нарида. Эшакда бир соатли йўл.)

Самолёт манзилга яқинлашди шекилли, пастлай бошлиди. Ип тортилгандек тўппа-тўғри йўллар, оппоқ бинолар, поезд изи қўринди.

Олдинги ўриндиқда ўтирган Раис бува самолёт ерга қўнгандан кейингина уйғонди. Суянчиқ устидан бизга мўралаб қаради. Юзи қип-қизариб кетибди. Кафтининг орқаси билан сўлагини артиб, қийшайиб кетган шляпасини тўғрилаб олди.

— Келдик, полвон! — деди илжайиб. Менга айтдими, Шодивойгами, тушунмадим.

Вой-бү! Тошкент дегани ҳам хўп фаройиб шаҳар экан-да! Одамлар мунча кўп! Тағин ҳаммаси шошилади. Кўпкарига келган чавандозга ўхшайди-я! Машиналарнинг физиллашини айтмайсизми! Биз ўтирган такси осмон баравар бино олдига етиб келгунча эллик саккизта машинани қувиб ўтди. Санаб турдим.

Шодивой ўзининг чамадонини, мен ўзимнинг дўмпайиб кетган чамадонимни кўтариб, тепасига қарасангиз, дўппингиз тушиб кетадиган бинога кирдик. Раис буванинг қўлида юқ йўқ ҳисоб. Ихчамгина „дипломат“ кўтариб олган. У, кетимдан юрларинг, дегандек имо қилди-да, аллақанча одам тўдалашиб турган ойна тўсиқ олдига борди. Бинонинг ичи салқингина экан. (Одамнинг ухлагиси келади.) Шодивой иккаламиз чамадонни кўтарганча Раис буванинг кетидан сафга турдик. Ойнаванд тўсиқ ортига секин мўраладим. Шодивойнинг „Запорожец“ига ўхшаган ҳаворанг кўйлак кийган хотин баланд суюнчиқли курсида ўтирибди. Аввалига хотин памилдори еб ўтирган экан, деб ўйладим. Йўқ, лаби шунаقا, қип-қизил экан. Қошини айтмайсизми, қошини! Хоҳ ишонинг, хоҳ ишонманг, қошсиз туғилган бўлса, уялганидан қалам билан чизиб қўйгандир-да, деб ўйладим. Йўқ, разм солиб қарасам, „қил“нинг таги кўкариброқ турибди. Дадам соқолини гузардаги сартарошхонага кириб, Собит чўлоққа олдириб келган қуни шунаقا кўкариб қолишини кўрганман. Бундан чиқди, зангори кўйлакли хотин ҳам кунора сартарошхонага кириб Собит чўлоққа ўхшаган сартарошга қошини қирдирап экан-да! Оғригандир, бечоранинг қовоғи!

Хотин сариқ телефонни қулогига босиб, аллаким билан гаплашарди.

— Гуличка! Лёля эрини разводга берибди... Нима? Йўқ, пиёнистамас! А? Инженер эди-да! Оладиган маоши йўлкирасидан ортмасди. Тағинам Лёля бечора олти ой чидади!

„Сафимиз“нинг олд томонида асабий овоз янгради:
— Қизим!

Бўйнимни чўзиб, бу ёқда қарадим. Саратон бўлишига қарамай телпак кийиб олган чол туйнук томонга энгашиб ҳайқирди:

— Менга қара, қизим...

— Минуточку! — хотин телефонни қулоғидан нари суреб, чолга юзланди:

— Жой йўқ!

— Қизим...

— Менинг отам кўкариб чиққанига ўн тўрт йил бўлди, — хотин телефонни яна қулоғига босди. — Гуличка, эшитяпсанми? Эртага судга бораркан. Нима, квартираними?

— Жон опа! — бояги чол овозини баландроқ кўтарди.

— Минуточку! — хотин ипдек қошини чимириди. — Менинг укам йўқ!

— Опажон! — чол ялинишга тушди. — Ўғлим узум сотгани келган эди. Бозорда қўлга тушиб иши судга оширилибди.

— Спекулянт жазосини олиши керак, — хотин телефонни қулоғига босди. — Эшитяпсанми, Гуличка! А? Лёля дурочками, квартирани бериб қўядиган. Инженернинг кетига битта тепса...

Телпакли чол жой олишдан умидини узди шекили, нари кетди. Аввал Раис бува, кетидан Шодивой, Шодивойнинг кетидан мен — чамадонни кўтарганча раппа-расо бир қадамча олдинга жилдик. Мундай орқага қарасам, яна йигирматача одам тўпланиб кетибди. Войбў, бирпасда-я!

— Лёля Айрапетян билан гаплашибди...

Чолдан кейин турган, бошига рўмол ўраган қопқора хотин энди биринчи бўлиб қолганига қувонди шекилли, шангиллади:

— Синглим?!

— Гуличка, минуточку! — зангори кўйлакли хотин телефонни яна қулоғидан узоклаштиришга мажбур бўлди. — Опам учта! — деди мих қоққандек қарсиллатиб. — Тўртинчи опам борлигини билмасдим.

Қора хотин бало экан.

— Мен Қаҳрамон онаман! — деди чертиб-чертиси.
Бир эмас, ўнта михни баравар қоққандек қарсиллатиб
ташлади. — Ўн битта болам бор.

Зангори кўйлакли хотин пинагини бузмади.

— Табриклайман!

— Олтинчи қизим — оғир касал. Тошмига ётқиздим.
Кўчада тўрт яшар кенжам турибди.

— Қанақа одамсиз ўзи, ёш болани кўчада қолдириб
бўладими? Машина уриб кетса, буниям Тошмига обора-
сизми? — У яна телефонни қулоғига босди, — Гуличка!
Лёля Айрапетян билан гаплашибди. Айрапетян айт-
тибди. „Эринг яхшиликча уйини бўшатмаса, қаматиб
юбораман“, дебди. Нима? — Зангори кўйлакли хотин
кувонч билан хитоб қилди. Ҳатто ўрнидан туриб кетди. —
„Жижи?“ Арабскийми? Йўқ, биттамас, иккита! Кейин...
Биттагина „Адиdas...“ Шефингга айтсанг...

Қора хотин ростдан ҳам тўрт яшар боласини маши-
на уриб кетишидан қўрқди шекилли, ерда ётган тугун-
терсакларини кўтариб ташқарига отилди. Яна бир қадам
сурилдик.

— Гуличка! — зангори кўйлакли хотин телефонни
кулоғига янайм қаттиқроқ босди. — Шефингта айт: Мен
„лох“ эмасман. Шапкасини бошқаларга қўйсин.

Олд томондан ғўлдираган овоз келди:

— Опажон!

Қарасам, айвони катта шляпа кийиб олган йигит
туйнукка энгашиб ялиняпти:

— Жон опа!

Хотин бу гал телефонни қулоғидан олмади. Шляпа-
лига қарамадиям. Ўнг қўлидаги ручка билан туйнукнинг
ярмисини тўсиб турган тахтачага нуқиб қўйди. Бўй-
нимни янайм чўзиб қарасам, тахтага ҳар биттаси ўрта
бармоғимдек келадиган ҳарфлар билан „Жой йўқ!“ деб
ёзиб қўйилибди.

— Гуличка! — хотин сирли жилмайди. „Жижи“
билан „Адиdas“ни тўғрилаб берсанг, — деди овозини
пасайтириб, — битта „Лама“ биздан!

— Опажон! — шляпали йигит астойдил ялинди. —
Олислан келганман.

— Ўзбекмисиз? — хотин бу гапни „Гуличка“га айтдими, шляпали йигитгами, билмадим. Ҳар қалай, шляпалига айтган экан. Йигит қувониб кетди.

— Ҳа, опажон, ўзбекман!

— Ўзбек бўлсангиз мен ҳам ўзбек тилида айтяпман. Жой йўқ! Тушунарлимни?

— Ахир мен узоқдан келганман! Анжандан!

— Эҳ-ҳе! Мен Аргентинадан деб ўйлабман. Қирқ саккиз, Гуличка! Иккинчи рост. Сенинг размеринг.

Хайрият-ей! Раис бувагаям гал келди.

— Жой борми? — деди Раис бува негадир илжайиб.

Зангори қўйлакли хотин биз томонга қарамади. „Жой йўқ!“ — деб ёзилган тахтачага ручкаси билан нуқиб, давом этди:

— Ёқмай ўлсин! „Мистер-Д“дан тўртта керак. Фикон бўлсаям майли. Марат акамга! Ёқаси қирқ бир...

— Жой борми? — Раис бува бу гал дағдағалироқ хитоб қўлди.

— Савод борми? — хотин яна тахтачага нуқиди. — Гуличка! Эшитдингми, қирқ бир! Э, жинсини бошига урадими? Ўзида тиқилиб ётибди.

Раис бува тахтачани шахт билан юлқиб олиб нари сурив қўйди.

— Бизгаям-а!

— Минуточку, Гуличка! Бу нахаллар... — тўсик орқасидаги хотин қошини чимириб, биз томонга ярқ этиб қаради-ю, тұсатдан юзи ёришди. — Ие, — деди жилмайиб. Телефонни қулоғига босиб, ниҳоятда майнин, ниҳоятда мулойим гапирди. — Гуличка, уч минутдан кейин телефон қиласман. — Гўшакни қўйиб, ўрнидан туриб кетди.

— Бормисиз, Тошмамат Алимович! Нимага очерид кутиб турибсиз? Бу ёқдан келавермайсизми?!

— Ишингиз қийин экан... — Раис бува оғир-оғир бош чайқади. — Ҳар куни шу аҳволми?

— Э, шуларни деб гипертоник бўпқолдим, Тошмамат Алимович! — у шу қадар озор чекиб икки чаккасини қисдики, қўйиб берса ҳозир йиғлаб юборгудек эди. Хайрият, йиғламади. Кулранг телефонни қўтариб шоша-пиша рақам терди.

— Мухочка! — деди овозини пасайтирибороқ. — Етти юз үн тўқизнинг эгаси келди. — Кейин мулойим жилмайиб, Раис бувадан сўради:

— Бир ўзингизми?

— Кўпчилик! — Раис бува Шодивой иккаламизга имоқилди. — Кадрларни олиб келдик. Ўқишга кирмоқчи...

Хотин бир қўли билан телефонни қулоғига босган кўйи туйнукдан бошини чиқариб, аввал Шодивойга, кейин менга қаради.

— Сизам хитирсиз! — деди Раис бувага қошини учириб. — Ўғлим битта деб юардингиз-ку!

Раис бува биз томонга қараб қўйди.

— Битталикка битта! Буниси, — деб менга имоқилди. — Бунисиям яхши бола, ўзимизнинг кадр.

Хотин туйнукдан бошини ичкари тортди.

— Муха! Ҳозир чиқишиди. Уч киши! Нима? Йўқ, аёллар йўқ. Менга қара! Яна битта номер топасан.

— Керакмас! — Раис бува илжайиб қўл силтади. — Кадрларни жойлаштирайлик. Мен... Биласиз-ку, Ойдин! Бедананинг уйи йўқ, қайга борса питпилдиқ!

— Сизам хитирсиз! — хотин қип-қизил, узун тирнокли бармоғи билан пўписа қилди.

— Юрларинг! — Раис бува қовоғини солиб Шодивой билан менга буюрди.

Ўртоғим иккаламиз жонҳолатда чамадонларга ёпишган эдик, Раис буванинг жаҳли чиқиб кетди. Менгамас-у Шодивойга ўшқириб берди:

— Кўй, жойига, нока! Ўзлари опчиқади.

Аммо ўзи қўлидаги дипломатини ташламади. Шодивой зина томонга йўналган эди, тағин ўшқирди:

— Шошма, бу ёққа кел!

Негадир зина эмас, аллақандай жигарранг эшик олдига бориб қолдик. Икки кўзим Тулпоримнинг хуржунидек дўппайиб кетган чамадонимда! Нон билан бўғирсоқ, ёнғоқ билан куртлаган туршак-ку, майли. Аммо чамадонимда дадамнинг костюми бор. Онам сотиб олган пайпоқ бор. Бир эмас, икки жуфт. Бирор лип этиб ўмарид кетса...

Шу пайт жигарранг эшик ўзидан-ўзи шифиллаб очилди. Ичидан қора кўзойнак таққан малласоч чол

билин худди қишлоғимиздаги боғча болалариникига үхшаган калта иштонча кийиб олган кампир чиқиб келди. Анграйиб қопман. Чол-кампирлар аллақандай тилда „вe-o-ve-o“ деганча нари кетди.

— Кирсанг-чи! — Раис бува қўлимдан тортиб эшик ичита олиб кирди.

Тушундим. Лифтга чиқсан эканмиз. Зум ўтмай тағин эшик очилди. Раис бува ихчам портфелини саланг-латганча дераза олдида турған стол томон борди. Хаёлим чамадонимда!

— Бормисиз, Мұҳаббатхон! — Раис буванинг қувончли хитобидан ҳушим жойига келди.

Устига мoshранг мато ёпилган, бир чеккасига телефон, бир чеккасига гулдон қўйилган стол орқасида ўтирган хотин дик этиб ўрнидан турди. Бу хотин ҳам худди пастдаги аёлга үхшаб калта енгли зангори қўйлак кийиб олган, фарқи шуки, гавдаси пастдаги хотинга тахминан бир яримта келар, аммо Шодивойнинг онасидан, яъни ҳовлисида тут барги кесганимда йиқилиб тушиб, ерни қимирлатиб юборган Жамила холамдан анча ихчам эди.

— Ўзингиз камнамосиз, ўртоқ раис! — у Раис буванинг кафтини чангллаб, қўш қўллаб қисди. Шунда билдимки, ҳар билаги менинг сонимдан йўғон бўлса борки, ингичка эмас. — Эсон-омонмисиз? Планлар юзми? Бола-чақалар омон-эсонми?

У қулини ҳар силкитганида Раис буванинг чайир гавдаси силкиниб-силкиниб кетарди.

Пастдаги хотин „Муха“ деганида пашибадек қилтириқ аёлни кўз олдимга келтирувдим. „Муха“си шунақа бўлса, фили қанақа бўларкин?

„Муха“ опа, яъни Мұҳаббат опа стол тортмасини шарақ-шуруқ қилиб очди-ю, бандига тухумдек ёғоч илгич осилган калитни олиб, йўл бошлади. Тавба! Шундоқ семиз хотин, шунақанги зипиллаб юришини биринчи кўришим. Йўлакка тўшалган чўғдек гилам устида юриб эмас, учиб бораётгандек.

„Муха“ опа йўлак адогига етай деганда бир эшик олдида тўхтади. Калит солиб, шарақ-шуруқ қилиб очди.

— Марҳамат қылсынлар! — деди ёш келинчаклардек таманно билан икки құлини семиз күксига қўйиб.

Аввал Раис бува, кейин Шодивой, ундан кейин мен ичкари кирдик. Вой-бў! Гастинса деган зўр бўларкан-ку! Ерга оловдек гиламлар тўшалган. Бир томонда диван, бир томонда ёғоч каравот. Бурчакда холодильник...

Хаёлимга лоп этиб бир фикр келди. Майли, Шодивой каравотда ётсин, менга диван ҳам бўлаверади.

Шуни ўйлаб турсам, эшик журъатсиз тақиллади.

— Да! — деди „Муха“ опа зардалироқ оҳангда.

Эшик очилиб, иккита чамадон кўтарган, бошига зангори шапка кийган шоп мўйлов киши кўринди. Хайрият-ей, чамадоним омон экан!

Мўйловли киши иккала чамадонни ерга қўйиб, уф тортди. Энди бурилиб кетаётган эди, Раис бува тўхтатди.

— Шошма! — чўнтагини ковлаб пул чиқарди. — Раҳмат!

Мўйловли киши негадир хижолатли илжайди:

— Кўп-ку, Раис ака!

— Бўпти, боравер! — Раис бува қовогини солган эди, мўйловли киши пулни чангллаганча, тисарила-тисарила йўлакка чиқиб кетди.

Чамадоним омон-эсон топилганига қувониб кетдим. Бу ёфи-ку жойида! Шодивой каравотда ётса, мен диванда ётсан, Раис бува нима қиласди?

Худди шуни кузатиб тургандек, „Муха“ опа ёнбошдаги эшикни очди. Кўкимтири парда орқасидаги эшикни кўрмай қопман.

— Марҳамат! — деди таъзим қилиб. — Бу ёғи ётоқхона.

— Қорин оч! — Раис бува яна қошини чимирди.

— Ресторан соат еттигача перерив... — деди „Муха“ опа айбдор алпозда жилмайиб. — Шу ёққа заказ қиласизми?

Раис бува норозироқ алпозда хўрсинди:

— Нима бор ўзи?

— Аниқ билмадим-ку, антрикот, кавказский шашлик, киевский котлет, табака, мампар, лафмон...

— Бўпти! — Раис бува унинг гапини кесди. — Табака опчиқ.

— Учтами?

— Тўртта! Қорин пиёзнинг пўсти бўпкетди.

„Муха“ опа негадир кетишга шошилмасди.

— Раис ака, — деди эшик олдида тўхтаб. — Бу...
Болалар билан сиқилишиб қолмасмикинсиз... Қанчага келгансизлар ўзи?

— Мен билан ишинг бўлмасин! — Раис бува биз томонга қараб қўйди. — Кадрлар... Хуллас, ўқишга жойлашиб бир ёқлиқ бўлгунча туради. Хоҳласа, бир ой, хоҳласа, икки ой.

— Ўзлари-чи, хўжайин? — „Муха“ опа жилмайиб, қошини учирди. Икки қўлини ўғирдек белига тираб, қилпангламоқчи бўлган эди, яхши удалай олмади. Қорни лопиллаб кетди.

— Гапни кўпайтирмай табакани опчиқсанг-чи! — деди Раис бува ўшқириб.

„Муха“ опа чиқиб кетиши билан Раис бува Шодивой иккаламизни ичкари хонага бошлади. Қарасам, бояги хона бунинг олдида ип эшолмайди. Деразаларга пушти ранг пардалар тутилган. Икки дераза олдида иккита каравот, бурчакда рангли телевизор! Бир бурчакда магнитофон.

— Ие, японский шекилли? — Шодивой энди магнитофон томонга юрган эди, Раис бува бақириб берди.

— Аҳмоқ! Ўқишга киришга келганмисан, музыка эшлишишгами?..

Шодивой хона ўртасида таққа тўхтаб қолди.

— Унақамас-да! — деди Раис бува сал ҳовуридан тушиб. — Аввал институтга кириб ол... Кейин... — шундай леб гурс-гурс қадам босиб, нариги хонага чиқиб кетди. Зум ўтмай ўша томонда сув шовуллади.

...Табака дегани шунақанги мазали таом эканки, бунақасини Чияли бозорда ҳам тополмайсиз. Шодивой иккаламиз қовурма товуқнинг суюгиниям ғажиб ташладигов!

— Менга қара! — Раис бува ёф босган қўлларини, қалин лабларини қофоз рўмолчага артиб, ўрнидан турди.

Эрталабдан бери ўзи күтариб юрган дипломатни Шодивой танлаган каравотнинг тагига суқиб қўйди. — Йўқотиб қўйсанг... — деди Шодивоюга чақчайиб. — Ичагингни сугуриб оламан! Уқдингми? Ёстифингнинг тагига қўйиб ёт. Ташқари чиқсаларинг... — у энди менга ўгирилди. — Калитни этажний дежурга бермайсан! — Раис бува елкамга қоқиб қўйди. — Сен пишиқ боласанку, тутхўр! Жўранг аҳмоқ!

Шодивоюга қарасам, бармоини ялаб ўшшайиброқ ўтирибди.

— Унақамас, Раис бува, — дедим илжайиб. — Шоди — зўр!

— Бўпти! — Раис бува ўрнидан турди. — Менинг зарур ишларим бор. Эрталаб келаман. Эшикни қулфлаб олларинг. Калит оғзида қолсин. Ўшандада бирор кирмайди.

Шундай деди-ю чиқди-кетди. Шодивоюг менга қарди. Мен Шодивоюга.

— Эшикни қулфладингми? — деди Шодивоюг қўрқаписа.

— Қулфладим.

— Калит оғзида қолдими?

— Қолди. Сал чапроқ томонга буриб қўйдим. Шоди...

— Энди нима қиласиз, Қўшо?

— Телевизор қўрмаймизми? Тошкентда бошқача курсатса керак.

— Дадам билиб қолса, ўлдиради.

— Музика эшитамизми?

— Ўлдиради.

— Кўчани томоша қила қолайлик, Шоди.

— Майли-и-и!

Иккаламиз дераза пардасини очиб, кўчани томоша қила бошладик. Ҳамма ёқ чироқ! Машиналар шовуллаб ўтади. Аллақаёқда трамвай фийқиллайди. Пастдан, биринчи қават томондан „гумбур-гумбур“, „вош-вош“ деган садо келади. Ресторонда ўйин-кулги бўляпти, чофи. Рўпарадаги боф ичи чароғон. Боф ўртасидаги пушти ранг ёзувга кўзим тушди: „Мороженое“.

— Шоди-и! — дедим секин. — Морожний емаймизми? Менда пул бор. — Гапимнинг исботи учун бе-

лимни қашлаб қўйдим. Шунча пулни белга боғлаб юриш осон эмас экан. Эрталабдан бери биқиним қичишади.

— Иложи йўқ, Қўшо! — ўртоғим хўрсинди. — Эртага...
— Бўлмаса ухлай қолайлик.
— Майли...

Чироқни учирив ётдик. Шодивой у деразанинг тагига, мен бу деразанинг тагига. Уйқу келса қани? Дарпардани тортиб қўйганимиз билан Шодивойнинг ҳам, менинг ҳам ёстиғим устига бир тутамдан нур тушиб турибди. Нуқул бугунги воқеаларни эслайман. Тулпорим билан хайрлашганим. Онамнинг йиғлаб қолгани, самолёт, булатлар. Қошини сартарошга олдирган хотин, „Муха“ опа... Бир маҳал Шодивойнинг каравоти фирчиллай бошлади.

— Шоди, — дедим бошимни кўтариб. — Нима қиласан?

— Дадам айтди-ку! Ёстиғимнинг тагига қўйиб ётмасам... — Жўрам аввал ёстиқни кўтариб, бояги дипломатни жойлаб кўрди. Кейин, кўнгли ўрнига тушмади, шекилли, тўшак қатини очиб, дипломатини қўйди. Устидан тўшак ёпди. Унинг устидан чойшаб ёйди. Устига ёстиғини босди.

Шошма! Раис бува Шодивойни бекорга огоҳлантиридими?

Менинг чамадонимдаги нарсалар унидан камми? Ўн олтида патир, бир тўрва бўғирсоқ, ярим тўрва ёнғоқ, ярим тўрва қурут... Энг муҳими дадамнинг костюми, пайпоқ...

Мен ҳам ўрнимдан иргиб турдим-да, яланг оёқ шипиллаб бориб, шкафни тарақ-туруқ қилиб очдим. Чамадонимнинг бандидан икки қўллаб кўтариб келиб, ёстиғимнинг тагига босдим.

— Нима қиласан, Қўшо? — деди Шодивой пичирлаб.

— Чамадонимни эҳтиёт қиласман, жўра, — дедим мен ҳам пичирлаб.

Тўғри-да! Гастинсани ўғри босса, Раис бува йўқ, Шодивойнинг кичкинагина дипломатини ўғирлаганда менинг хуржундек чамадонимни соғ қўярмиди?

Бошимни ёстиққа ташлаганимни биламан. Дүк эт-ган овоз эшитилди. Гарданим чунонам зирқираб кетди-ки, афтиим олмақоқидек бужмайиб кетдиёв. Бүйнимни силаб-силаб бу гал ёстиққа бошимни секинроқ ташладим.

— Ухлаймизми, Шоди... — дедим пичирлаб.
— Майли, Күшо...

Шу Тошкент деганиям хұп серғалва шаҳар эканда! Күча тұла шов-шув, вағ-вуғ. Хонамиз зириллайди. Ҳаммасиям майли-ку, ётибманми, ўтирибманми, үзим билмайман. Ёстиқ остидан чамадоним ғұдайиб турибди. Гарданим ҳалиям зирқирайпти.

Охири күзим илинибди. Бир маҳал аллақандай шатир-шутур товушдан уйғониб кетдим. Товуш чап томондан келар әди. Аввалига қаерда ётганимни билолмадим. Фалати товуш эса ҳамон шипилларди.

— Олти минг бир юз йигирма беш... Олти минг бир юз эллик, олти минг бир юз етмиш беш... Олти минг бир юз саксон беш... Олти минг икки юз ўн...

Секин ўғирилиб қарасам, Шодивой каравотида чордона қуриб ўтирибди. Кун бүйи Раис бува құлида құтариб юрган дипломатнинг оғзи очиқ. Деразадан тушиб турған бир тутам нур остида каравотда юз сүмлик, эллик сүмлик, йигирма беш сүмлик, хуллас, бир құчоқ пул ётибди. Шодивой файрат билан санаяпти.

— Етти минг йигирма беш. Етти минг эллик.
— Менгаям ошир!

Үйқусираб турғаним учунми, овозим шунақанги дүриллаб чиқди, үзим ҳам құрқиб кетдим.

Шодивой пул санаңдан тұхтаб қолди. Ичидан ингрanganга үхшаш овоз чиқди. Кейин „дод“ деди-ю, үзини дипломат устига ташлади. Үша заҳоти тұшакда ёйилиб ётган пуллар эсига тушиб қолди шекилли, патир-путур қилиб юз сүмлик, эллик сүмлик пулларни чанглалаб, майкасининг ичиға тиқиши түшди.

— Вой-дод! Үғри!

Баттар құрқиб кетдим. Сапчиб үрнимдан туриб, чирокни ёқдим. Үртогимнинг ранги қув ўчиб кетган, тут-

қаноқ тутган одамдек оёқ-қўлини баравар типирлатиб, пулларни яширишга уриняпти.

— Шоди! — дедим бақириб. — Эсинг жойидами?

Стол устида турган графиндан стаканга сув қуйиб аввал юзига сепдим. Кейин ичирдим.

— Ким? — Шодивой тишлари такиллаб, стакандаги сувдан беш-олти қултум қултиллатиб ичганидан кейингина ранги сал ўзига келди. — Ким, Қўшо? — деди ҳамон титраб. — Пулингдан бер, деб ким айтди?

— Э, ўл-е! — жўрамнинг ялангоч елкасига қарсиллатиб сопқолдим. — Пулинг билан қўшмозор бўл-е!

— Меникимас... — Шодивой қўзимга илтижоли термилди. — Дадам айтган. Домланики... Санашиб юборасанми?

— Ухла! — дедим тўнғиллаб. — Эртага санайсан!

— Жон Қўшо... — Шодивой ҳамон титраганча ялинди. — Дадамга айтмагин, хўпми? Папкани нега очдинг деб ўлдиради!

ЎНИНЧИ БОБ

ДОМЛАЖОННИНГ „ХАТОСИ“

Эрталаб бўйним оғриб уйғондим. Хона тўридаги тошойнага қарасам, бошим чап елкамга ёпишиб қопти. Бундан чиқди, ўнг ёнбошим билан ётган эканман-да! Муттасил қичишаётган биқинимни қашлаган эдим, қўлим дўппайиб турган тутунчага тегди. Тугун баданимга ботиб, чуқурча қилиб юборибди.

Рўмолни ечиб, пулимни санаб қўрдим. Жойида: бир юз ўн тўрт сўм. Шошма, қийналиб нима қилдим? Киссамга солиб қўя қолсам бўлмайдими?! Зўр келса, қўлимни чўнтағимга суқиб юра қоламан-да!

Шодивойни уйғотиш қийин бўлди. Ювениш учун ваннахонага кириб кетаётганида бундоқ юзига қарасам, афтини кўриб бўлмайди. Ҳамма ёғига учук тошиб кетибди. Кечаси ёмон қўрқкан экан, шўрлик!

Чамадонимни очиб, иккита патир, бир ҳовуч тур-

шак, ёнғоқ, тұртта қурут олдим. (Хайрият-ей, қадрдон хуржуним сал-пал „озди“.)

— Ана энди бир чойнаккина күк чой бұлса...

Гапим оғзимдан чиқмасидан эшик тақиллади. Чопиб бордим:

— Раис бува...

Эшик ортидан құнғироқдек овоз келди:

— Завтрак!

Анграйиб қопман. Нима бало, чүпчаклардаги сеҳрли саройга кириб қолғанмизми? Нимани хоҳласанг, оғзингдан чиқмасдан муҳайё қилишади.

Калитни бураб, эшикни очсам, белига оппоқ пешбанд боелаган нозиккина, чиройликкина қызы ялтироқ тутқичли аравача бандидан ушлаб жилмайиб туриби.

У бир зумда стол устини тұлдириб ташлади. Иккى стакан қаймоқ, тұртта нон, иккى чойнак чой, иккита ишқалат, пишлок... Ҳатто үртачароқ лагандек келадиган торт ҳам бор. Яна иккита талинкада тұртбурчак перашкалар.

— Гүштли блинчик... — деди қызы жилмайиб.

Аравачасини филдиратиб эшик томон юрган эди „бойваччалигим“ тутиб кетди.

— Қанча бұлади? — дедим Раис бувага үхшаб, чүнтаққа құл суқиб.

— Пули тұланган... — олдига пешбанд таққан қызы эшикда тұхтаб, ширингина жилмайды.

— Чойингиз тұқсон бешми?

— Икки хил, — қызы бу сафар энсаси қотиброқ илжайды. — Биттаси қора — индийский. Биттаси күк.

Ваннахонадан елкасига сочиқ ташлаған Шодивой чиқиб келди.

— Үтир, заптрик қиласыз, — жүрамни құлидан судраб стол олдига обордим.

Қаймоғи бирам ёғли, нонлари бирам иссик, тұртбурчак сомсаси бирам мазали...

Мен-ку, ноз-неъматларни пок-покиза туширяпман. Қарасам, Шодивой, кечаси бехосдан тагини ҳұллаб қўйган боладек бўзрайиб үтирибди.

— Емайсанми? — дедим сомсага имо қилиб. — Қий-
масини ўхшатиб қовурибди.

— Еёлмайман! — жўрам оғзини кафти билан беки-
тиб минғиллади. — Лабим ачишяпти.

Бечора! Ювинганида икки лабининг бурчидаги учук-
лар қонаб кетибди.

— Оғзимни очолмаяпман, Қўшо...

— Олдин қаймоқни ичгин, Шоди! Лабинг ёғланиб,
ўзидан-ўзи йўли очилиб кетади.

...Нонушта қилиб бўлгач, дарс тайёрлашга ўтирдик.
Яъни, шпаргалкаларни ўқиб чиқа бошладик. Тўғри-да,
биринчи имтиҳон ёзмадан — иншо. Мактабдаги адабиёт
малимимиз ҳам роса файрат қипти, ўзи. Ўн олтита ин-
шони ипга тергандек ёзиб ташлабди. Алишер Наво-
ийнинг „Хамса“сидаги „Фарҳод ва Ширин“ достони,
Горъкийнинг „Она“ романи, Маяковский щеърлари,
Faфур Фуломнинг „Сен етим эмассан“ шеъри, Абдулла
Қаҳҳорнинг „Шоҳи сўзана“си, „Ҳамид Олимжон —
бахт куйчиси“, яна аллақанча иншолар. Эркин мавзу-
ларни айтмайсизми? „Тинчлик — бизнинг ҳаётимиз“,
„Меҳнат — менинг бахтим“, „Ватанимни севаман“,
„Мен севган касб...“ Хуллас, ўн олтита.

— Қўшо... — деди Шодивой учук тошган лабини
аранг қимирилатиб. — „Кутлуғ қон“ тушса яхши бўларди.
Шу осон.

Малимимиз ёзиб берган иншолар орасидан „Кутлуғ
қон“ни топдик. Тўрт ярим бет экан.

— Камроқмасми, Шоди? — дедим иккиланиб.

— Яна нимани қўшасан?

— Янами? — ўйлаб қолдим. Билагонлигимни кўр-
сатиб қўйгим келди. — Масалан, Йўлчи пахтада иш-
лайдими? Малим: „Йўлчи тўнка ковлади, ғўза суғо-
ради“, дебди. Тўнка ковлашнинг пахтага қандай алоқаси
бор?

Шодивой, яна нима қўшса бўлади, дегандек кўзим-
га термилди.

— Масалан, ягана қиласдими? Утоқ қиласдими? Чо-
пик қиласдими? Чеканка-чи? Культивация-чи? Пахта

териш, подбор териш, варахага күрак ташлаш... Шулар ҳам меҳнат-да!

Қизишиб кетиб, жўрамга иншо қандай ёзилишини шунақанги бақириб тушунтира бошлабманки, эшик очилиб, Раис буванинг кириб келганини кўрмай қопман.

— Эшикни қулфлаб ўтиларинг демабмидим?!

Раис бувадан роса дакки еймиз, деб қўрқиб кетдим. Йўқ, разм солсам, уришадиган ҳоли йўқ. Кечаси билан кўпкарида улоқ чопган айтир отдек сўлжайиб қопти. Ранги бир ҳолатда. Назаримда кўзлари юмилиб-юмилиб кетаётгандек.

— Заптирка бердими? — деди чўзиб-чўзиб эснаб. — Яхши! Кийинларинг. Бир жойга борамиз.

* * *

Тошкент шунақанги катта шаҳар эканки, таксида бир соат юрсак ҳам охири кўринмайди! Юриб-юриб икки чети олчазор кўчага кирдик, пишиқ фиштдан қурилган, деразасига темир панжара тутилган уй рўпарасида тўхтадик. Раис бува пушти ранг сирли бўёқقا бўялган дарвоза томон юрди. Шодивой иккаламиз биянинг кетидан эргашган тойчоқлардек зинфилладик. Раис буванинг дарвозасиниям мақтаб юрган эканман-да! Дарвоза деган мана бунақа бўлади! Раис буваникига танқ сифса, хоҳ ишонинг, хоҳ ишонманг, бу дарвозага осмондан учиб тушган самолёт пир этиб кириб кетаверади!

Раис бува дарвоза бурчагидаги тугмачани босган эди, ичкаридан „блюм-блюм“ деган овоз келди. Раис бува бир қадам орқага чекиниб, кафтини оғзига босганча хузур қилиб, эснаб қўйди. Ичкаридан жавоб бўлавермагач, бориб яна тугмачани босди. Қўнфироқ бийрон жиринглаб кетди. „Блюм-блюм-блюм“.

Дарвоза қия очилиб, ялтироқ, гулдор халат кийган новчагина, кўхликкина хотин мўралади.

— Келинглар... — деди иккиланиброқ.

— Ассалом алайке-ем, янга! („Ферма тоға“ Раис бувага қанақа салом берса, Раис бува ҳам „янга“га шунақа салом берди.) — Ассалом алай-ке-ем! Янгажон! Саломат, омонгина бормисиз? Эшик-эллар, кадрлар яхшими?

— Раҳмат! — „Янга“ хавотирланиброқ ҳаммамизга бирбир қараб чиқди.

Раис бува унинг унсиз саволини тушунди, чоғи, илжайиб сўради:

— Домла уйдамилар?

— Йўгийдилар-а! — „Янга“ афсус-надомат билан бош чайқади.

— Қаёқдалар?

— Ленинградга кетганлар.

— Қанчага?

— Икки ойга. Павищенияга.

— Ия, янгажон, катта домляям павищена қиласдими?

„Янга“ тағин ҳаммамизга бирма-бир қараб чиқди.

— Қачон қайтадилар? — деди Раис бува овозини баландлатиб.

— Сентябрнинг охирларида келиб қолсалар керак.

— Домла Ленинградга павищенага кетган бўлсалар, сентябрда қайтсалар айтиб қўйинг, янга! — деди Раис бува шанғиллаб. — „Машъал“ жамоа хўжалигидан раис жўрангиз келиб-кетди, бугун кечқурун соат ўнда яна келаркан, зарур юмуши бормиш, денг, уқдингизми?

„Янга“ олазарак бўлиб, у ёқ-бу ёққа қараб олди.

— Секин-е! — деди таҳдидли, аммо паст овозда. — Ўн иккидан кейин... — У бир зум жимиб қолди-да, норози тўнғиллади. — Таксини эшик олдигача опкелишга бало борми!

— Бўлди, янгажон, бенават! — Раис бува мамнун илжайди. — Юрларинг! — деди-ю, Шоди иккаламизни етаклаб нарироқда пойлаб турган таксига қайтадан ўтқазди. Аллақайси бекатга борганда машинани тўхтатди.

— Буларни бояги жойга обориб қўясан! — деди шопирга 25 сўмлик узатиб. — Уқдингми? — ўзи „дипломати“ни олиб, тушиб кетди.

Такси гастиниса олдида тўхташи билан жўрамга ялиндим.

— Биттадан морожний ейлик, Шоди.

— Пулим йўқ-да, Кўшо, — деди Шодивой мунғайиб.

— Бизда-да, пулнинг кони, жўражон! — пул тугукли рўмол солинган чўнтағимни шаппатилаб қўйдим.

Рұпарадаги бөг ичига кирдик. Салқын майдончага оппоқ, юмалоқ столлар қўйилган. Одамлар тўртта-тўрттадан ўтириб олиб, ялтироқ ликопчалардаги морожнийни уряпти.

— Сен жой олиб тур! — дедим Шодивойга. Ўзим ўнтача одам орқасидан очиридга турдим. Юмалоқ, ойнаванд уйча ичида ўтирган оппоққина, дўмбоққина хотин (ҳар куни текин морожний ейди-ку, дўмбоқ бўлмайдими?) Ҳар лаҳзада „следующий“ деб турибди. Морожнийси ҳам ўзимизнинг пахта пункти олдида сотиладиган музқаймоққа ўхшамайди. Ранги бошқачароқми-ей!

Морожнийчи хотиннинг ишиям осон экан. Биз томонларда морожнийни тарозига солиб тортиб беради. Бу хотин тўртбурчак ялтироқ қутининг тутқичини бир айлантирса, ликопчага морожнийнинг ўзи буралиб-буралиб тушади-ю, гулга ўхшаб қолади. Семиз хотиннинг қўли-қўлига тегмайди. Ликопчага тушган морожний устига бир қошиқ ишқалад кукуни, бир қошиқ қип-қизил шарбат, яна бир чимдим чақилган ёнфоқми-ей, алланима, сепади-да, туйнукдан узатади.

— Следующий!

— Икки порс! — дедим яқин бориб.

Хотин бир зумда икки ликопча тўла морожнийни туйнукдан узатди.

— Следующий!

Оббо! Ўзим ҳам қизиқман-да! Ҳали пулни санаганимда иштапил рўмолни шунақанги чандилаб болаган эканманки, ечаман деб тирнокларим кўчиб кетди.

— Следующий! — хотин бетоқат бўлиб, қўлидаги қошиқ билан пештахтани уриб қўйди. Тугунчани тишим билан ечишга уриниб ётганимда кимдир туртди:

— Сурилсанг-чи, ҳой!

Эси жойидами, пул тўламай, қаёққа суриламан! Хайрият, тугунни ечдим.

Эрталаб лаби ачишиб, оғзини очолмаган Шодивой морожнийни қўриши билан иштаҳаси шунақанги карнай бўлиб кетдики, ликопчага тўрт марта қошиқ ботириб, лўқ этиб ютиб қўя қолди. Шу, Шодивой ҳам фирт саводсиз-да! Морожний ейишни анави қизлардан ўрган-

са бўлмайдими? Нариги столда иккита қиз ўтирибди. Қошиқнинг учиға жичча морожнийни илиб олади-да, нозиккина пушти ранг тилини чиқариб, ялайди. Ўзлариям чунонам кетворган, чунонам оппоқ. Иккаласиям атлас кўйлак кийган. Кўйлаги шунаقا калтаки, дўмбоққина болдирлари кўриниб турибди.

Эсон-омон ўқишига кириб олай. Каттароқ домланинг кетворган қизи мени севиб қолади. „Кўшовой акажон!“ — деб бўйнимга осилади — „Сизсиз ўлиб қоламан“, — дейди. „Йиглама, — дейман оппоққина юзини силаб. — Майли, сенга уйланаман...“. „Дадамга айтаман, бизга уй олиб беради. Икки хонали“ дейди. „Йўқ, — дейман оёқ тираб, — қишлоққа кетмасак бўлмайди. Келин бўлганингдан кейин ота-онамнинг хизматини қилишинг керак-да!“, „Майли, беш хонали“, дейди у ялининб.

Хаёл суриб кетган эканман, бошим устида бирор гўлдиради:

— Бўлдингми, ҳов бола! Жойни бушат.

Қарасам, тепамда ингичка мўйлов қўйган йигит икки қўлида иккитадан тўртта ликопча қутариб турибди. Ёнида учта қиз. Менинг биттаям „қизим“ йўғ-у, буниги учта! Э, ўл очофат! Жилақурса иккитасини бер, Шодивой билан менга. Ия, Шодивой қани? Аллақачон морожнийни еб бўлиб дараҳт тагига бориб олибди-ку! Бояги қизлар қани? Осмонга учиб кетдими?

— Энди дарс қиласиз! — деди жўрам меҳмонхона томон судраб.

* * *

Ярим кечадан ошганда Раис бува бизни эргаштириб яна „катта домла“ жўрасининг уйига олиб борди. Фақат бу сафар таксига кўча бошида жавоб бериб юборди. Икки томонда олча дараҳтлари саф тортган, симёочлардаги лампочкалардан ола-чалпоқ нур тўкилиб турган жимжит кўчадан ўтиб, ўша қадрдон дарвоза олдида тўхтадик. Бу сафар кўнгироқ икки марта жиринглаши билан дарвоза қия очилди. „Катта домла“ деганда тилла қўзойнак тақадиган, тилла ҳасса тутиб юрадиган, сочлари оқариб кетган одам хаёлимга келган эди. Йўқ,

телевизорда күрсатадиган гимнастикачиларни киңиңиң күннен кийими кийиб олган киши дарвоза пештоқида ёниб турган лампочка нурида жилмайиб турарди. Чамамда „катта домла“ нинг юзидан ҳам нур ёғилиб кетгандек бўлди.

— Э, Тошмамат ака, хуш кепсиз! — „Катта домла“ шундай деб Раис буванинг қўлини қисди. Ҳатто Шодивой иккаламиз билан ҳам қўл олишиб куришди.

— Салом, йигитлар, салом! — деди мулойим кулимсираб.

Усти ёпиқ дарвозахонага киришимиз билан бир бурчакда ётган, қулоғи диккайган итни қўриб этим жи-мирлашиб кетди. Ўзиям Тулпоримнинг ярмичалик кепқоларов! Ечилиб кетсаям ғажийди-да одамни! Йўқ, ит жонивор кечаси келиб-кетадиган бизга ўхшаган меҳмонларга ўрганиб қолганми, занжирини шиқирлатиб, бошини бир силкиб қўйди-ю, оғзини катта очиб эснади. Ҳар биттаси ўртачароқ қозиқдек келадиган тишлари чироқ нурида йилтираб кетди. Обдан эснаб бўлгач, ёнбошидаги гулдор тогорачада ётган яримта тортни бир-икки исқади-да, энсаси қотиб узала тушиб олди. Ё тавба, ақалли номига бўлсаям бир марта „вов“ деб қўймади-я!

— Кесинлар, Тошмамат ака, кесинлар! — „Катта домла“ илдам қадамлар билан ҳаммамизни ҳовлига бошлаб кирди. Ҳовлиmas, нақ жаннатнинг ўзи! Айвон пештоқидаги ўқловдек узун, оппоқ чироқ нурида ҳовлидаги анвойи гуллар товланиб ётибди. Тунука томга туташиб кетган баланд-баланд сўрилардан узум бошлари мўралайди. Узумга кул тушганини дарров пайқадим. Ҳомтокни чала қилган-да. Олим бўлгани билан дәхқончиликни билмаганидан кейин шу-да.

„Катта домла“ ҳовли бурчагидаги олма тагига, нақшинкор сўри олдига бошлади:

— Лайло, қизим, битта чой ташкил қилинглар.

Раис бува дипломатини сўри бурчагига қўйиб, тўргачиқди. Биз пастроқча чўккаладик.

— Йигитларни опкепсиз-да, Тошмамат ака! — „Катта домла“ Раис бувага қараб яна кулимсиради. Шундагина унинг жудаям ёш эмаслигини, сочига оқ

оралаганини, кулганда юзи беш йил бурун қазо қилган момомнинг маҳсисидек тиришиб кетишини пайқадим. — Кадрлар ўқисин дебсиз-да? Э, маладес! Маладес!

— Энди, домлажон, бизлар ўқиёлмадик! — Раис бува чордана қуриб жойлашиброқ ўтириб олди. — План дедик, хўжаликни машъал қиласиз дедик... Жилла курса кадрлар олим бўлсин-да энди.

— Зап ўйлабсиз-да! — „Катта домла“ аввал сўри бурчагида ёнбошлаб турган „дипломат“га, кейин менга, ундан кейин Шодивойга, ана ундан кейин Раис бувага қаради. — Маладес, — деди-ю, овози негадир ҳазинроқ чиқди. Чамаси, бу „кадр“ларнинг қайси бирига ёрдам беришим керак, демоқчи бўлди.

Шу пайт орқа томонда шип-шип қадам товуши эшитилди. Мундай қарасам, юзи сутдек тиник, қопқора соchlари елкасига ёйилган қиз кумуш патнисча кўтариб келяпти. Ичимдан узундан-узоқ хўрсиниқ тошиб келди. Вой-бў! Шунақаям чиройли қиз бўларкан-да, жаҳонда! Ўзиям чунонам нозикки, сув ичса томоғидан, сабзи еса биқинидан кўринади-я! Бояги морожнийхўр қизлар бунинг олдида нима бўпти! Мана-да, дадажонимнинг бўлажак келини! Ўқишға кириб олай, Лайлохоннинг бошини шунақанги айлантириб ташлайманки! Аввал узумларини хомток қиласман, гулларини суфораман. Кейин секин-секин... Қарабсизки, бўйнимга осилиб йиглайди. „Жон, Қўшожон ака...“ Дадамга — бу ёқقا жўнаётганимда хайрлашмаган, „Ўглинг бир ҳафтада тўрвасини кўтариб қайтиб келади“, деган дадамга кўрсатиб қўямиз. „Дадавой, мана, келинингиз билан танишиб қўйинг!“ деймиз. „Унча-мунча одам эмас, нақ энг катта домланинг ўзлари билан қуда бўлдингиз, энди хоҳласам, ҳамма қариндош-уругларни Тошканни энг зўр институтларига жойлайвераман“, деймиз!

Шунақа-ку, келин бўлмиш сал озғинроқми? Зиёни йўқ. Кейин семириб кетади. Кийинишиям... А? „Катта домла“нинг ўзига ўхшаб „спортивний“ кийим кийиб опти. Майли, если қизга ўхшайди. Тушунтирамиз. „Лайлохон, қишлоқ жойда бунақа кийиниб юриш уят бўлади. Энам хафа бўлади. Сигир согиш бор, томорқа бор...“

Лайлохон зиналардан лип этиб сўрига чиқди-да, салом берди. (Овози мунча ширин! Боя „блюм-блюм“ қилган қўнгироқнинг ўзи-я!)

— Ва алайкум ассалом! Бахтли бўлинг, қизим... — Раис бува илжайиб алик олди. Оббо, ўзининг Шодивойига мўлжаллаб қўйди шекилли! Кўрамиз, ким олғирроқ экан. Менми, Шодивойими?

Лайлохон зинадан лип этиб тушди-ю, чопқиллаб уй томонга кетди. Қоматни қаранг!

— Қани, осинлар... — „Катта домла“ нон ушатди. Чой қуйди. Қанд-курс, бодом, асал солинган билур идиш тўла патнисчага имо қилди. — Марҳамат.

Асални бошимга ураманми? Икки кўзим Лайлохон кириб кетган уйда. Қарасам, Шодивой ҳам ўша томонга қараб кўзини лўқ қилиб ўтирибди. Вой, қўнглингнинг кўчасидан ўргилдим! Биқинингга сопқолайми?

— Лайлохон қизим неchanчи синфга кўчди? — деди Раис бува чой ҳўплаб.

„Катта домла“ кулди.

— Бу йил тўртинчи курсга боради. Ўзимизда ўқијати. Павишений стипендия олади.

Нима? Ширингина хаёлларим бир зумда алгов-далғов бўпкетди. Лайлохон тўртинчи курсга борса... Бундан чиқди мендан камида икки ёш катта экан-да. Мен уни нари борса саккизинчи синфга кўчган десам... Майли, бизга синглисиям бўлаверади. „Катта домла“нинг қизи битта эмасдир, ахир!

— Хў-ўш... — „Катта домла“ боя узилиб қолган гапини давом эттиргиси келди шекилли, бир менга, бир Шодивойга қараб, дангалига кўчиб қўя қолди. — Хуллас, Тошмамат ака, қайси бири кирмоқчи бизнинг факультетга?

— Бизнинг кадр буниси! — Раис бува Шодивойга имо қилди. — Муштдек болалигидан сўт бўламан, дейди. Бўлмаса-ку бошқа жойлардаям сизга ўшаган қадрдонлар кўп.

„Катта домла“, „Бўлмасам манави нега эргашиб юрибди“, дегандек менга чимирилиброқ қараб қўйди.

— Буям ўзимизнинг жамоа хўжалигимизни боласи. Отаси қўли қисқароқ одам-ку, ўзи дуруст бола. Бизни Шодивой, жўрамниям обормасангиз ўқишга кирмайман, деб туриб олса бўладими?

„Катта домла“ хўрсинди. Нимага хўрсинганини тушунмадим. „Бир болангни-ку олиб келдинг, иккинчи дардисарга бало бормиди“, демоқчи бўлдими, ё отасининг қўли қисқароқ деган гап ёқмадими, хуллас, билмадим.

— Тошмамат ака, — деди „Катта домла“ жиддий оҳангда. — Ҳозир замон нозик. Биринчидан бизга меҳнат стажи борлар киради.

— Бор-да, ўша истаж! — Раис бува дарров унинг гапини кесди. — Буларга еттинчи синфдан бошлаб меҳнат дафтарчаси очилган. Иккаласиям меҳнатдан қочадиган болалармас! Эсон-омон кириб олса қўрасиз. Пахта теримида энг передовойи шулар бўлади.

— Тўғри-ку! — „Катта домла“ қийшайиб ётган дипломатга зидан қараб қўйди. — Имтиҳон комиссияси жа строгий! Ҳар томонлама синовдан ўтказади. — У бир зум ўйланиб турди-да, тусатдан сўраб қолди. — Қани, айтинглар-чи, йигитлар: қу саккиз юз саксон беш квадрат илдизидан пи бир юз ўттиз уч куб илдизни айирса қанча бўлади?

Оғзим ланг очилиб қолди. Нима деяпти бу? Мен Шодивойга қарадим. Шодивой менга...

— Энди... Домлажон... — деди Раис бува салмоқлаб. — Булар „ку-пу“ ингизни биладими! Эсини танибдики, даладан бери келмайди. Қолаверса, ҳисоб факультетига кираётгани йўқ-ку.

— Барибир... — „Катта домла“ қовоғини солди. — Ҳозирги кунда юридика энг престижний соҳа. Талабгорлар кўп. Кейин... Умуман... Адлия ходими ҳамма нарсани билиши шарт. Тарихниям, математиканиям, экономиканиям.

— Пул сана什ни, — деб қўйдим дадамнинг гапи эсимга тушиб. „Катта домла“ мен томонга хавотирланиброқ қараб олди. Раис бувага шунақанги таъналомат билан ўқрайдики, ўзим ҳам қўрқиб кетдим.

— Аммо Шодивой — зеҳнли бола! — деди Раис бува шоша-пиша. — Кұрасиз, домлажон, ишончингизни бир юз эллик фоиз оқлади. Қолаверса, бу ёқда үзимиз турибмиз.

...Шодивой иккаламиз нимқоронғи күча бошида Раис буванинг чиқишини пойлаб анча туриб қолдик. Охири Раис бува „Катта домла“ни инсофга келтирди, шекилли, енгил тортиброқ чиқди. Үзи ҳам, құли ҳам...

— Бирпас гапга аралашмай турсанг үлармидинг, тутхұр! — деди менга хұмрайиб. Аммо бошқа койимади. — Қаттиқроқ тайёрланларинг. Экзаменни Бегматов деган одам оларкан. Домла айтиб құядиган бұлды. Бегматовнинг үзи сенларни топиб олади.

...Бегматов дегани юзи қошиқдеккина, құзойнаги пиёладеккина киши экан. Бир куни консультациядан кейин Шодивойга имо қилиб, „сен қол“ деди. Мени унтуиб құйдиёв! Ҳамма чиқиб кетганидан кейин Шодивой иккаламиз аудиторияда қолдик.

— Сен нима қилиб үтирибсан? — деди Бегматов құзойнаги устидан менга үқрайиб.

— Буям үқишиңде кирмоқчи! — Бегматов менга қанақа үқрайған бұлса, Шодивой ҳам унга шунақа үқрайиб қаради.

— Бұлти! — Бегматов Шодивойнинг қофоз папка-сидан малимимиз ёзиб берган иншоларни олиб текшириб чиқди. Баъзи жойларини тузатди. — Үқитувчинг пишиқ экан, — деди хұрсанд бұлиб. — Бехато күчирсанг, „беш“га тортади. Эртага охирги қаторға үтир. — Шундай деди-ю, чиқди-кетди.

...Мана, үтирибмиз охирги партада! Омадни қарангки, худди үша „Қутлуғ қон“ тушса денг. Каттакон аудитория жимжит. Юздан ортиқ йигитлару қыздар шипиллатиб иншо ёзиб ётибди. Нариги қатор оралаб кексароқ хотин, бизнинг қатор томонда Бегматов у ёқдан-бу ёққа бориб-келиб турибди. Малимимиз ёзиб берган иншони үртага қўйиб олганмиз. У ёқдан Шодивой кўчиради, бу ёқдан мен.

Энди учинчи бетга үтган эдик, үртароқда шовқин-сурон бўлиб кетди.

— Тур ўрнингдан! — деди Бегматов дағдаға билан. — Чұнтағингни күрсат. Унисинимас, чап чұнтағингни!

Эскироқ дүппи кийган йигит талмовсираб ўрнидан турди.

— Күчирганим йүқ, домла, — деди ялиниб. — Мен эркін тема ёзяпман. Унақаси йүқ менда.

— Манавилар шпаргалка бўлмай нима?

— Ишонмасанғиз қаранг! Менда унақаси йүқ! — йигит бечоранинг ранги оқариб кетди.

— Чиқиб кет!

— Домлажон! Мен уч йилдан бери келаман, — йигит алам билан ер тепинди. — Күчирганим йүқ. Үзим яхши биламан бу темани.

— Янаги йилга тўртинчи марта келасан! — Бегматов дўппили йигитнинг ёзаётган нарсасини олиб, икки буқлади. Шошилмасдан чұнтағига тиқди-да, эшикни кўрсатди. — Марш!

Вой-бў! Домлажоннинг аччиғи ёмон экан-ку! Бир маҳал қарасам, домлажон биз томонга бостириб келяпти.

— Бекит, Шоди! — дедим жонҳолатда.

Шоди шошиб қолганидан малимимиз ёзган иншони бир тортган эди, қофоз „шалоп“ этиб стол тагига тушди. „Бўлди! Тамом бўлдик!“ Мен-ку, майли, қайтиб кетавераман. Жўрам дадасидан балога қоладиган бўлди-да!

Домлажон зипиллаб тепамизга келди. Ерда ётган шпаргалка-қофозни энгашиб олди.

— Туппа-тузук ёзибсан-ку! — деди кўзойнаги орқасидан мулоим жилмайиб. Қофозни стол устига қўйди. — Шошмасдан ёзгин, хўпми? Ундан кейин... „Меҳнат қилип“ деб ёзилмайди. Охирги ҳарфи „б“ бўлади. „Меҳнат қилиб“... Тузатиб қўй...

Шодивой черновойдаги „п“ни „б“ қилиб ўзгартириди. Мен ҳам иссигида ўзгартириб қўя қолдим.

— Ёзишинг дуруст! — деди Бегматов домла Шодивойнинг ишига кўз югуртириб. — Шошилма, ҳали икки соат вақт бор.

Черновойни эсон-омон ёзиб бўлдик. Энди оққа кў-

чириш керак. Файрат билан ишлаб ётган эдим, домлажон яна Шодивойнинг тепасига келди.

— Яхши... — деди биринчи бетни ўқиб. — Кейин Шодивойнинг қўлидан ручкани олди-да, иккинчи бетнинг бурчагига билинар-билинмас нуқта қўйди. — Ёзавер, — деб нари кетди.

Қаранг, иккинчи бетнинг бурчагига, нақ қизил чизик ёнбошига нуқта қўйиш кераклигини билмас эканмиз-да! Яхшиям домлажон ўргатгани! Домлажон Шодивойнинг иншосига қанақа нуқта қўйиб кетган бўлса, мен ҳам худди ўша иккинчи бетнинг худди ўша бурчагига, худди ўшандай нуқта босдим. Катта ҳам эмас, кичик ҳам.

Шодивой иккаламиз жудаям биринчи бўлиб эмаску, тўртинчими, бешинчими бўлиб, иншони топшириб чиқдик. Оғиз қулоқда.

— Иккаламизникиям „беш“ бўлади! — деди Шодивой илжайиб.

— Йўқ, Шоди... — дедим камтарлик билан. — Сенини „беш“, менини „тўрт“ бўлади.

Раис бува жуда меҳрибон-да! Садақайрагоч тагидаги скамейкада шляпаси билан юзини елпидаги кутиб ўтирган экан. Умуман, институт олдидағи майдон одамга тўлиб кетибди. Ҳайронман, анави чол-кампирлар ҳам имтиҳон топширгани келганми, нима бало?

— Бўрими-тулки? — деди Раис бува шляпасини бошига илиб.

— Йўлбарс! — дедим илжайиб.

— Маладес! — Раис бува Шодивойнинг елкасига қоқди. — Индинга баҳоингни эълон қилишади. Шуни-сидан „беш“ бўлса, оғзакиси чепуха!

...Индинга Раис бува, Шодивой, мен — узун-қисқа бўлиб яна ўша кўп қаватли бино олдига келдик. Вой-бў! Аввалги куни тўпланган одамлар ҳам баҳарнов экан. Чияли бозор бўпкетибди-ку, ҳамма ёқ! Похол шляпа кийган қориндор кишилар. Бири атлас, бири ҳилҳилойим кўйлак кийган хотинлар. Майдонча машинага тўлиб кетган. „Волга“лар, „Жигули“лар... „Москвич“-лар, ҳатто ойнасига „Р“ деган ҳарф ёпиширилган „Запорожец“гача бор. Тағин номериям ҳар ёқники. Отанинг

оналар ҳар жой-ҳар жойда түп-түп бўлиб туришибди. Олакуроқ матодан кенг-мўл кўйлак кийган хотин ўрта-чароқ самовардек келадиган термосдан чой қуиб, ёни-даги олача тўнли кишига узатади. Ерга тушалган ихчамроқ шолчага ўтириб олган тарашадек озғин хотин тоғорадан манти олиб, ўғлига тиқиширади: „Олсанг-чи, иби, кот-мотта бача уч кундан бери авқот емайсан-ку!“

Бизнинг факультетга харидор жуда кўп эканми, Раис бува бирони тирсаги билан, бирони думбаси билан туртиб, йўл очгунча терлаб кетди. Охири ёғоч панжара тахтага илиб қўйилган рўйхат олдига соғ-саломат етиб бордик. Шоша-пиша рўйхатни топдим. Мана, „Олтинчи В группа...“ Юрагим така-пуга бўлиб ўқий бошладим.

— Аббосова — 2, Абдуллаев — 3, Абдураҳмонов — 2, Абусаломова — 2, Аъзамова — 3, Азимова — 4, Алимов...

Нима? Аввал ўнг кўзимни ишқалаб кўрдим. Кейин чап кўзимни... Ҳафсала билан ишқалаб-ишқалаб, қайта ўқидим. Алимов — 2. Ие, бу қанақаси? Ахир Бегматов домланинг ўзи Шодивойни мақтовди-ку! Шошма, балки бошқа Алимов бордир? Йўқ. Аниқ-таниқ қилиб ёзиб қўйибди. „Алимов Ш. — 2“.

Ёнимда аллаким отдек, йўқ, менинг Тулпоримдек пишқирди. Қарасам, Раис бува энтикиб-энтикиб нафас оляпти.

Шоша-пиша „С“ ҳарфини қидира бошладим. Аслида-ку, излашдан фойда йўқ. Шодивойники 2 бўлса, бизники 1 бўлади-да!

Садриев — 4, Самадова — 2, Сатторова — 5 (хайрият-еїй, „беш“ ҳам қўяркан-ку), Салимов...

Салимовни пичирлаб ўқидим-у, кўзим тиниб кетди. Назаримда ҳаво етишмагандек, нафасим қайтиб кетгандек бўлди. „Салимов К...“ нинг рўпарасида 5 рақами жаранглаб турибди-да! Шошма, тағин бошқа „Салимов“ бўлмасин! Йўқ, у ёғи „Тўхтаев — 2“га айланиб кетибди. Шуни гира-шира англадимки, бир юз йигирмата фамилия орасида бор-йўғи учта „беш“ бор экан. Тўрттами-бештами — „тўрт“. Еттига — „уч“. Қолгани қаторасига — „икки“!

— Кетдик! — Раис бува шундай ҳайқирдики, муттасил чуғур-чұғур қилаётган одамлар ўқ овозини эшитган чумчуклардек жимжит бўлиб қолди. Раис бува Шодивойнинг билагига чанг солди. — Тезроқ!

— Шошманг! — деди Шодивой юлқиниб. — Қўшоқникини кўрай!

— Э, Қўшогингни! — Раис бува жўрамнинг билагидан чанглаб судради. Ўз-ўзидан жонли йўлак очилганига хурсанд бўлиб, мен ҳам эргашдим.

— Падарингга лаънат! — Раис бува ташқарига чиқиб баттар энтикли. — „Катта домла“ бўлмоқ тугул академик бўлмайсанми! Ҳали шунақанги ўйнатайки, шогирдинг билан... Тезроқ! — деди Шодивойга ўшқириб.

Катта йўл бўйига чиқиб олдик. Раис бува дуч келган машинага қўл кўтара бошлади. Аксига олиб, қани тўхтаса!

— Қўшо? — деди Шодивой пичирлаб, — сеники нечча?

— „Бе-еш“, — дедим мен ҳам пичирлаб. — Хафа бўлмагин, жўра, сен кирмасанг, менам кирмайман. Кетаман.

Ниҳоят, сурмаранг такси Раис бувадан сал нари ўтиб тўхтади.

— Гастинисага! — деди Раис бува олд эшикни очиб. Қайси гастинисага боришимизни айтди.

— Мен паркка кетаётган эдим, меҳмон... — кексароқ таксичи хижолат чекқандек илжайди.

— Оғзингга сиққанини олмайсанми, қанақа одамсан! — Раис бува шопир олдига ўтириб эшикни қарс ёпди. — Ҳой, — деди бақириб. — Мин чаққонроқ!

Таксичи бир ранги ўчи-ю, индамади. Гастиниса олдига келгунча ҳеч кимдан садо чиқмади. Етиб келишимиз билан Раис бува орқага қараб ўшқирди.

— Тушларинг! Шу ерда пойлаб турасан. Мен ярим соатда келаман. Кетдик! — деди шопирга имо қилиб. — Праписрский городокка!

— Гастинисага дегансиз, меҳмон! — шопир ниҳоятда хотиржамлик билан моторни ўчирди. — Мен паркка боришим керак.

— Ҳов, боди! — Раис қўли титраб чўнтагини ковла-

ди. Кафти тұла пулни шопирнинг тиззасига шаппати-
лади, — етадими ё яна берайми?

Ажаб, таксичининг жаҳли Раис буваникidan баттар
екан. Лип этиб эшиқдан чиқди-ю, машина олдидан
айланиб үтиб, бериги эшикни очди.

— Туш! — деди овози титраб.

Раис бувадек одамни „сенсираган“ кишини иккин-
чи марта күришим эди. Ҳов, мактабда физика муал-
лимимиз Усмон Қиличев шунаقا муомала қилганда
ҳайрон қолган эдим. Бу сафар ҳам оғзим ланг очилиб
қолди.

— Туш-е, ўргилдим бойваччалигингдан! — Таксичи
шундай деди-да, пулларни улоқтириб юборди. — Раис
бувани ёқасидан бўғиб пастга туширди. Жойига үтириб
эшигини қарсиллатиб ёпди-да, жўнаб кетди.

Раис бува жонҳолатда ўзини четга олди.

— Номири нечча, Шоди? — деди чийиллаб.

Шодивой иккаламиз эс-хушимизни йифиб олгуни-
мизча такси кўчадан шовуллаб ўтаётган машиналар
дарёсига шўнғиб, кўздан фойиб бўлди.

— Кутиб турларинг! — Раис бува такси номерини
ёзib олишниям унутиб, кўча четига югарди. Аллақандай
„Жигули“ни тўхтатиб, үтириб олди.

Шодивой иккаламиз мунгайиб қолавердик. Қарасам,
ўртоғимнинг кўзига ёш тўлиб турибди.

— Шоди-и! — дедим ялиниб. — Юр, морожний
ейлик.

Жўрам индамай кетимдан эргашди. Оқшом тушиб
қолгани учунми, морожнийхонада одам кўп эди. Бу
гал бир эмас, иккитадан музқаймоқ олдим.

Аввалги сафар Шодивой икки ямлаб бир ютган эди.
Энди бўлса, қошиқни ялаб, эрмак қилиб үтирибди.

— Шоди... — дедим секин. — Яна морожний оп-
келайми?

— Бўлди, — деди Шодивой илжайишга уриниб. —
Тўйдим.

— Шоди, — дедим тагин ялиниб. — Хафа бўлмагин.

— Хафамасман, Кўшо...

Ўйлаб-ўйлаб бир нарсани топдим.

— Менга қара, Шоди... Дедим тантана билан. — Биласанми, нима қиласиз? Мен ўзимнинг „беш“ имни сенга бераман! Сенинг „икки“ нгни мен оламан!

— Жиннимисан! — Шодивой боядан бери биринчи марта кулиб юборди. — Иккаламиздан биттамизники барибир „икки“ бўлиши керак эди-ку!

— Бўлти-да! Менини „икки“, сенини „беш“ бўлади!

— Кўй, жўра! — Шодивой кўзимга шунаقا ақлли, шунаقا маъноли тикилдики, дамим ичимга тушиб кетди. — Ўқисам, сен билан ўқийман, бўлмаса керакмас! Сенсиз бир кун ҳам турмайман бу ерда.

Қоронги тушиб қолганида иккаламиз шўлтиллаб, гастиниса томонга ўтдик. Лифтга ўтириб, еттинчи қаватга кўтарилидик. Бугун „Муха“ опанинг навбати экан. Негадир биздан олдин салом берди.

— Келдингларми? Раис ака кутяптилар, — деди илжайиб.

Ўзимизнинг етти юз ўн тўққизинчи хона эшигини энди итармоқчи эдим, ичкаридан келаётган овозни эшитиб, тўхтаб қолдим. Биламан, Раис буванинг аччиғи ёмон. Шодивойга „тўхтаб тур“ деб имо қилдим.

— Тартиб борми ўзи сизларда! Лабз борми? Масалан, мен пахта планини бир юз эллик фоиз бажараман дедимми — бажараман! — Бу Раис буванинг овози эди. — Ернинг тагидан олиб бўлсаям бажараман! — Бригадиримга ҳар гектардан 55 центнердан оласан, дедимми — олади. Олмасин-чи, ичагини бошига салла қилиб кўяман! Сиз-чи, сиз? Ким бўпсиз? Нари борса, бир домлачазиз! Нега катта домланинг топширигини бажармайсиз?

— Бажариш бундан ортиқ бўладими? — бегонароқ товуш асабий жаранглади. — Катта домланинг айтганини қилдим. Черновикни текширидим. Беловикка белги қўйдим. Нима, имтиҳон комиссияси аҳмоқми! Бу — сизнинг жамоа хўжалигингизмас, Раис ака! Шифрларни чалкаштириб ташлашган. Ўғлингиз тайёр иншониям ўн иккита хато билан кўчирибди. Черново-ю беловойини минг мащаққат билан топдим. Катта домланинг юзидан ўтолмай уйимга обордим. Бешинчи курсда ўқийдиган синглимга қайта ёздиридим, тафн нима дейсиз?

— Кимникини? — Раис бува шунақанги чийиллади-
ки, йиғлаб юборай деди. (Бечорага раҳмим келиб кетди.)

— Қаёқдан билай? — Раис „домлача“ деган одам
ундан баттар йиғламсиради. (Энди „домлача“ шүрликка
юрагим түздек ачиша бошлади.) — Аниқ эсимда бор:
беловойга ўз қўлим билан белги қўйганман. Мана шу
қўлим билан.

— Кимникига?

— Қаёқдан билай! Белги қўйганимни „беш“га тўф-
риладимми, ахир. Тағин нима дейсизлар.

— Гапни айлантирма, домлача! Сенгаям улуш тег-
дими-йўқми? Шундан гапир!

— Э, қанақа одамсиз ўзи? Менга унақа гапларни
гапирманг, ака! Хотиним бўлмаса, бола-чақам бўлма-
са... — „Домлача“ энтикиб қолди. — Жонимга тегди, —
деди инграб. — Тўрт йилдан бери кандидатскийни
ёқлолмайман. Катта домланинг юзидан ўтолмай...

— Вой, нимага кирмай турибсизлар? Раис ака
кутяптилар! — қулоғим тагида шақиллаган овоздан чўчиб
тушдим. Қарасам, „Муха“ опа икки қўлида икки чойнак
кўтариб турибди. Мени Раис буванинг ўғли деб ўйлади
чоғи, огоҳлантириди. — Мана, йигитча, дадангизга айтиб
кўйинг. Бунақа гапларни бақириб айтмайди одам. Гости-
ница — нозик жой. Бунақа ишлар ими-жимида қилинади...

Эшикни қандоқ очдим, чойнак кўтариб қандоқ ич-
карига кирдим, эсимда йўқ. Қарасам, тўртбурчак стол-
нинг у томонида Раис бува, бу томонидан Бегматов дом-
ла бир-бирига жўжаҳуроздек бўйини чўзид турибди.

Бегматов домла аввал Шодивойга, кейин менга кўз-
ойнаги орқасидан терсайиб қараб қўйди.

— Сен — Салимовсан-а? — деди Шодивойга.

— Йўқ, — Алимов! — Шодивой елкасини қисди.

Домлажон энди менга юзланди.

Сенинг фамилиянг Алимов эмасми?

— Йўқ, домла, Салимов, — дедим ҳеч балога ту-
шунмай.

Бегматов домла, негадир қўллари титраб, ҳар кўзи
пиёладек келадиган кўзойнагини ечди-да, тарақлатиб
столга ташлади. Тирнаб тешилгандек митти кўзларини

менга қадаб, тахминан беш минут турди. Кейин Шоди-войга юзланди. Чамамда жўрамга мендан кўра кўпроқ тикилди. Ундан кейин Раис булага қаради-да, ингичка елкалари силкиниб фалати овоз чиқарди. „Их-хи“ дедими „Хих-ҳо“ дедими яхши эшитмадим. Ана ундан кейин тўсатдан ўзини орқага ташлаб, Шодивойнинг каравотига йиқилди-да, файритабий қилиқлар қила бошлади. Тикилиброқ қарасам, кулаётган экан. „Хих-ҳи-ҳо!“ „Ҳи-ҳи-ҳи!“ „Воҳ-ҳо-ҳо!“ У каравотга ўтириб олиб чиллақдек тиззаларига уриб қула бошлади.

— Раис ака! — деди энтиқиб. — Буларнинг фамилиясини адаштириб юборибмиз-ку, Раис ака! Алимов билан Салимовни чалкаштириб юборибмиз. Иншони Алимов „беш“га ёзган. — У дик этиб ўрнидан турди-да, кўз ёшларини артиб, Шодивойнинг рўпарасига келди. — Оббо, ука-ей, оббо азамат-ей! Сал бўлмаса, фирт адолатсизлик бўларкан-да! „Кутлуғ қон“да инқилобий онгнинг ривожланиши“ни сен ёзганмисан? Шуни айтмайсанми, укажон! Табриклайман! — у Шодивойнинг юмшоққина қўлини олиб қисди. — Ёзманг — зўр! Оғзакидан ҳам „беш“ олсанг...

Шодивой аланг-жаланг бўлиб қолди.

— Кўшо-чи? — гоҳ домлажонга, гоҳ дадасига қаради. — Кўшонинг иши нима бўлади? — деди қўлини тортиб олишга уриниб.

— Адашибмиз-да, укам! — домлажон Шодивойнинг елкасига қоқди. — Ўртоғинг бу йил бўлмаса янаги йил кираверади. Арзимаган хатолик ўтибди-да, Раис ака... Дарров тўгрилаймиз! — Домлажон пилдираб эшик томон юрди. Боядан бери анграйиб турган Раис бува энди ўзига келди.

— Катта домлага салом айтинг! — деди юзига қон югуриб.

Хатосини ўз вақтида пайқаган „домлажон“ чиқиб кетиши билан учаламиз бир-бишимизга қарадик.

— Домлалар ҳам тирик жон-да! — Раис бува хиёл қизаргандек бўлди. Эркалаб кифтимга қоқди. — Қара, Шодивой билан сенинг фамилиянгни адаштириб юбо-

рибди. Йигитлар, энди ресторанга тушиб бир маишат қилайлик.

Раис бува эшик томон йўналган эди, Шодивой тўсатдан фўлдираб қолди:

— Дада!

— Ҳа! — деди Раис бува унинг рўпарасида тўхтаб.

— Дада... — Шодивой бошини қуи солди. — Агар Қўшо институтга кирмаса, мен ҳам ўқимайман!

— Ним-ма? — Раис бува икки қадам орқага чекиниб бўйини чўзди.

— Нима дединг?

— Агар Қўшоям кирмаса...

— Аҳмоқ! — Раис бува рапидадек кафтини ёзиб, Шодивойга пўписа қилди. — Ўчир!

Қарасам, Шодивойнинг кўзида фалати, ёввойи ўт ёниб кетяпти. Қўйиб берсам, ота-бала ёқалашиб кетадиган.

— Шоди... — дедим ялиниб. — Барибир мендан сўт чиқмайди. Сен ўқийвергин, жўражон! Мен паҳтада ишлаганим тузук.

— Ўқимайман! Қўшо ўқимаса, менам ўқимайман! — Шодивой жини кўзиб, ҳамма ёқни тўс-тўполнон қилиб юборди. — Бошида айтганман: Қўшо кирмаса, мен ҳам кирмайман, деганман.

— Хўп, ўғлим, хўп... — Раис бува унинг елкасига қоқди. — Мана, жўранг ўнча ўйнади, кўрмаган жойларни кўрди. Бир йилча сабр қилиб тургин. Янаги сафар жўрангни ўзим олиб келиб, ўзим ўқишига жойлайман... Ким билади, ҳали сен ўқишини битириб боргунингча Қўшовой сенданам зўр одам бўпкетадими?

— Керакмас! — Шодивой қайсарлик билан ер тенинган эди, юпатдим.

— Унақа қилмагин, жўражон! Хўп дегин, ўқий қолгин!

ЎН БИРИНЧИ БОБ

„АРПАТЕХНИКА“ ҚОИДАЛАРИ

Бугун вилоят радиосидан мухбир келиб, раппа-расо бир соатча қийнади одамни! Ўв, биродар, сендан бошқа ишим йўқми, бу ёқда культивация қолиб кетяпти, де-

гим келди-ю, тилим бормади. Ростини айтайми? Мақтаган Худога ёқибди, деган гап ҳақ-рост экан! Кейинги пайтларда аканг қарағай машхур бұлкетганның! Бир қарасаң, ашқол-дашқолини күтариб сураткаш келади. Бир қарасаң, дафтар-қаламини күтариб, газетадан мухбир келади. Суратта тушиш-у газета мухбири билан гаплашишга устаси фаранг бұлкетганның. Масалан, сураткаш гоҳ трактор кабинасига ўтқазиб, гоҳ чеккамга „барака“ чаноқни қистириб, беш-олти марта чиқиллади-ю, кетаверади. Мухбирнинг ишиям осон. Тушликда шұрвадан қуруқ қолганиң демаса, нариси билан ярим соат вақтингни олади. „Бригаданғизда неча гектар ер бор?“ дейди. „Хар гектардан қанча ҳосил олмоқчысыз?“ дейди. „Үтган хұжалик йилида қанчадан олгансиз?“ дейди. Саволи оғзидан чиқмасидан жавобни қотириб ташлаймиз. Ёзади, ёзади-да, кетаверади.

Қарабсизки, газетада илжайиб турған суратингиз чиқиб турибди. Вой қызталоқ! Шу — ёзувчиларам жа гапга уста бўлади-да! Сарлавҳасининг зўрлигини айтмайсизми? „„Машъал“нинг машъали“, „Пахтазорда туғилған йигит“, „Оқ олтин заргари...“ Хуллас, одам бир оғизга тушдими, ошиғи олчи бўлиб кетавераркан. Тўғрисини айтайми? Ҳадеб күтар-күтар қиласкерганидан кейин йилига камида беш-олти марта газетада мақтаб чиқмаса, бир нарсасидан айрилған одамдек мункайдиган бўлиб қоларкансиз!

Э, нимасини айтасиз! Раис бува одам қилди-да, мени! Шундоқ отахоним бўлмаса, юраверардим-да, Тулпоримга миниб, кўча чангитиб. Мана энди кимсан Кўшоқвой Ортиқов деса танимайдиган одам йўқ!

Аммо Раис бува сўзининг устидан чиқадиган одам экан. Тўрт йил аввал Шодивой жўрамга: „Сен институтни битириб боргунингча Кўшовой сенданам улуғ одам бўлкетади“, деганда каромат қилған экан-да!

Берироқ келинг: қулоққа айтадиган гап чиқиб қолди.

Аслида менинг „машъал“ бўлишим-у, бутун бошли бригадага раҳбарлик қилиб, ҳосилдорликни „мисли кўрилмаган“ даражада оширишим, яъни ҳар гектар пахта

майдонидан 51 центнердан ҳосил күтаришим арзимаган гапдан бошланди.

...Үшанды қадрдан жўрам Шодивойни қон-қон йифлатиб, мусоғир юртларга ўқишга ташлаб келганимда ўзим ҳам бир ҳафтагача гарангсиб юрдим. Шодивой бечоранинг бошига не-не ташвишлар тушмадийкин? Жўрам эрталаб вақтида уйғонолмай қийналмаяптими? Домлажонлар шўрликни сиқиб сувини ичмаяптими?

Икки ҳафта ичида „озиб“ қолган чамадонимни күтариб қишлоққа қайтганимда аканг қарағайни ҳар ким ҳар хил кутиб олди. Онам суюниб кетди. „Ажаб қипсан, болам, — деди. — Етти ёт бегоналар орасида рангинг сомондек сарғайиб юргандан кўра, бағримда бўлганинг яхши, ҳозир институтни битирғанлар аптобусга осилиб юрса, тракторчи меҳайниклар ўзининг машинасида катайса қиласи. Эрта-индин синглингни узатсак, сениям оёғингни тўртта қилиб қўямиз“. Онамнинг охирги гапи, майдек ёқиб тушди. Тўғри-да, қишлоқ жойда қиз болани вақтида эгасига топширмаса, гап-сўз кўпаяди. Синглимга шуни айтиб, ётиғи билан насиҳат қилмоқчи эдим, мендан олдин фичиллаб қолди.

— Тўғри бўпти, ака, сизни институтдан барибир ҳайдаб юборишарди.

Гапини қаранг! — Менга ақл ўргатгандан кўра, тезроқ эрга тегиб, йўлни бушат, маҳмадона!

Дадам эса, ўнг лунжи учиб киноя қилди.

— Қара-я! Мен сени олим бўпкелади, девдим. Билиб қўй, катта институтда раисларнинг боласи ўқииди, ўғлим! Сендақаларга йўл бўлсин.

Мени кўриб ҳаммадан кўп қувонган Тулпорим бўлди. Оғилхонага киришим билан шунақанги дикирлаб кетдики, онасини соғинған улоқча ҳам бунчалик ирғишишламайди.

Кўп ўтмай терим кампанияси бошланди. Эл қатори ишга тушиб кетдим. Жимгина пахта териб юрган эдим, ҳамма ишни бригадиримиз Тўлаш ака бузди. Бир куни (кеч куз эди) икки этак подбор териб, хирмонга олиб чиқсам, тарози бошида бригадиримиз қорнини осилтириб телпагини қийшиқ кийиб турибди. Терган пах-

тамни тарозига илдим. Уч оёқ құлтириқ чүпга илинган осма тарозиси қийшайиб кетди.

— Йигирма кило! — Тұлаш ака „ұт“ дегандек соқоли тиканак бұлиб кетган ияги билан имо қилди.

Жон-поним чиқиб кетди!

Икки этак подбор йигирма кило бұладими? Орасыда аллақанча хом-хатала құсак бор, баракасини берсин, деб эринмасдан құшган тупротимнинг үзи камида беш кило келади. Мактабда үқиб юрганимда ҳам шу — Тұлаш ака доим „чүмичда қоқарди“. Бригадирнинг тарозиси йигирма килодан ортиқ тортолмаса, мен айборманми? Йүқ, энди мен содда-гүл бола әмасман. Нақд Тошкентнинг үзига бориб келган салкам талабаман! Тұлаш аканинг „камайтириб айтиш“ касали туттганини күрдим-у, менинг ҳам „ошириб айтиш“ касалим құзғаб кетди.

— Саксон кило! — дедим бақириб.

— Нима? — Тұлаш аканинг күзи ола-кула бұпкетди.

— Тұқсон! — дедим ер телиб.

— Ұв, тентак! — бригадир телпагини олиб, сийрак сочли бошини ҳафсалы билан қашиди. — Икки этак пахта саксон кило чиққанини күрганмисан ҳеч!

— Юз! — уч оёқли тарозини бир тепган әдим, чиллақдек ёғочлардан бири синиб, этаклар осилған тарози шарақлаб ерга тушди.

— Ахмоқ! Тарозини нима қилдинг? — Тұлаш ака мушт күтариб устимга келаётган әди, тормоз фийқиллади. Билмайман, осмондан түщдими, ердан чиқдими, Раис буванинг „Нива“си шундоқ хирмон ёнига келиб түхтади. Похол шляпа кийган Раис бува эшикни қарсылатыб ёпиб ёнимизга келди.

— Нима гап? — деди қовоғини солиб.

— Манавуни қаранг! — Тұлаш ака менга құлинини бигиз қилиб, йиғламсиради. — Шу матоҳни саксон кило деялти! Тарозини синдириди.

Раис бувага хавотирланибороқ қараб турған әдим, у негадир илжайди.

— Юз йигирма! — деди шахсан үзим терған икки этак подборга қараб.

Тұлаш ака эсанкираб қолди. Тұғрисини айтсам, үзим ҳам анграйиб қолдим.

— Раис бува... — деди Тұлаш ака минғиллаб. — Ахир бу...

— Үчир! — Раис буванинг қоши чимирилиб кетди. — Күпдан бери кузатиб юрибман. Оширилган мажбурият олганимизни күра-била туриб, атайлаб темпни тушириб юборяпсан.

— Раис бува! — Тұлаш ака сийрак киприкларини пириратди.

— Бугун уч процент беришиңг шарт!

— Раис бува, ахир қанақасига... Пахтанинг үзи йүқкү, — Тұлаш ака шунақанги илтижо қылдикі, бечорага раҳмим келди. У ёғини сұрасанғиз, терган подборим тупроқ-мупроғи билан құшиб ҳисоблашгандаям, үттиз килодан ошмаслигини үзим ҳам биламан.

— Майли, қирқ килога розиман! — дедим инсофға келиб.

Раис бува гапимни әшитдими-йүқми билмайман-у, ҳар қалай Тұлаш акага құлинни пахса қылди.

— Гап шу. Бугун уч процент берасан!

— Қаёқдан оламан йүқ паҳтани?! — Тұлаш ака сийрак сочли бошини алам билан фиртиллатиб қашлади. Раис бува гапнинг лұндасини айтиб қоя қолди.

— Қарибсан, Тұлаш! Үсиб келаётган ёш кадрларга йўл бериш керак. Тўрт ойдан кейин үрнингга шу бола бригад бўлади!

Раис бува „Нива“сига ўтириди-ю, кетди-қолди. Тұлаш ака менга қаради, мен Тұлаш акага.

— Майли, үттиз кило! — дедим ачиниб.

— Э, бор-е! — бригадиримиз бошини икки қўллаб қашлаганча нари кетди.

Раис бува ҳазиллашди десам, чин экан, тўрт ой механизаторлар курсида ўқидим-у, бригад бўлиб қолдим. Қаёққа қарасам, „Қўшоқ Салимов, Қўшоқ Салимов!“ Кўйинг-чи, Қўшоқ Салимовга ит боқмайди!

Тұлаш акаям юрган экан-да, бригадирман деб! Ҳар гектардан оладиган пахтаси үттиз центнердан ошмасди. Ишни дўндиришни биздан сұрасин! Болалигидан пай-

кал ичида юрган одамга пахта етишириш нима бўпти? Биринчи йил ҳосилдорликни гектарига қирқ уч центнерга етказдик. Иккинчи йили қирқ етти центнерга. Мана бу йил эллик бир центнерга чиқармоқчимиз. Аслида-ку, ҳосилнинг чўғи кўпмас. Начора, катталар айтса план ҳам бўлавераркан-да. Ишлар гумбур! Газеталарда суратлар чиқсан! Мақолалар босилган! Мажлисларнинг тўрида ўтирамиз! Раис буванинг айтишича, шу йил медаль олсак ажабмас.

Бугун келган радио мухбирига шуларни бир чеккадан айтиб бермоқчи эдим, даҳмазаси кўп экан! Қоқ пешинда фўза культивация қилиб юрсам, шийпон томонда Раис буванинг „Нива“си қуринди. Машина Тулпорим боғлаб қўйилган тол салқинида тўхтаб, чўзиб-чўзиб, сигнал берди. Эрталаб далага эшагимни миниб келаман. (Трактор миниб келмайди-ку, одам, тўғрими? Менда пат-пат йўқ.) Кейинги пайтларда Ойсара янгам гулдек очилиб, лорсиллаб кетган. Устига-устак баттар зиқна бўлиб қолган. Мотоцикл калитининг бандига ип боғлаб, бўйнига осиб юради. Хотини семирган сайин Турсунбой акам озиб кетяпти. Аллақандай одамови бўлиб қолган. Ҳайронман...

Шундай қилиб, тракторимда культивация қилиб юрсам, шийпон томонда Раис буванинг „Нива“си қўриниб қолди. Тракторни дала ўртасида тўхтатиб, белга уриб ётган фўзалар оралаб ўша томонга югурдим. Ҳаллослаб етиб борсам, бўйнига тасмаси узун аппарат осган сап-сариқ жингалаксоч йигит, дўппи кийган ўрта ёшлардаги киши, Раис бува тол соясида гурунглашиб туришибди.

— Мана, бизнинг „Машъал“ бригадир — Қўшоқ Салимов! — деди Раис бува тантанали оҳангда. — Қўшоқвойнинг тажрибасини область эмас, бутун республикага ёйса арзийди! Гектаридан эллик бир центнердан ҳосил кўтараман, деб жон куйдириб ётибди, азамат! Бўпти, бир соатдан кейин машина келиб, сизларни боққа олиб боради. Тушликни ўша ерда қиласиз. — Раис бува шундай деди-ю, „Нива“га ўтириди.

— Кетдик, Қамчибек! — деди ўширга.

„Нива“ чанг-тўзон қўтариб физиллаб кетди.

Дўппили киши ҳам, жингалак малла сочли йигит ҳам мен билан қўш қўллаб сўрашди.

— Гап бундай, ўртоқ... — дўппили киши чўнтағидан тўрт буклоғли қофоз олиб, шоша-пиша ўқиди. — Ўртоқ Салимов. Биз облрадиоданмиз. Менинг фамилиям Пўлатов, бу йигит — у елкасига тасмаси узун магнитофон осиб олган малласоч йигитга имо қилди. — Операторимиз Коля. Коля, тайёрлан! Энди гап бундоқ... — У яна қофозга қараб қўйди, — ўртоқ Салимов! Мен сизга савол бераман. Сиз, мана бу қофозга қараб, шариллатиб ўқийверасиз. Гатопми, Коля? — мухбир жингалаксоч йигитга буюрди. — Бўла қол!

Малласоч йигит елкасига илиб олган чамадондан аввал магнитофон чиқарди. Кейин микрофонни магнитофонга улаб, Пўлатовга узатди. Магнитофон мурватларини бураб, созлади.

— Всё, Пулатов ака, — деди жилмайиб.

Мухбир микрофонни оғзига тутди.

— Бир, икки, уч... Қалай, Коля?

Коля михдай, дегандек бош бармоғини диккайтириди.

Мухбир, микрофонни оғзидан тахминан ярим қулоч узоқлатиб гап бошлади.

— Ҳурматли дўстлар! Бугун биз вилоятимизнинг Машъал туманидаги „Машъал“ жамоа хўжалигига ташриф буюрганмиз. Йўқ, азиз тингловчилар! Бу рамзий маънодаги сўз эмас! Бутун республикага донғи кетган нишондор раис, пахта илмининг ҳақиқий академиги Тошмамат Алимов раҳбарлик қилаётган хўжаликнинг номи „Машъал“ деб аталади. Мана, биз „Машъал“ жамоа хўжалигининг „оқ олтин“ заргари Қўшоқбой Салимов бошчилигидаги энг илфор бригадаси дала шийпонидамиз. — У микрофонни баланд кўтариб, тол томонга тўғрилади. Шу алпозда анча туриб қолди. Назаримда оёғининг учидаги чўзилиб туравериб, чарчаб кетдиёв. Тол шохига чумчуқлар тинимсиз чирқиллар эди.

— Эшитяпсизми? — деди микрофонга. — Қушларнинг шодон чуғурини эшитяпсизми? Бу — заҳматкаш

Құшоқбай Салимов бошчилик қилаётган азamat пахта-корларнинг шинам дала шийпони. Қушлар шод-хуррам сайраб турибди. Фир-фир шабада эсади. — Мухбир бир зум жимиб қолди. Шимининг чұнтагидан рұмолча олиб, пешанасидан дув-дув оқаётган терни артди. — Шийпон атрофи гулзор! — деди тантана билан, — анвойи гуллар майин шабадада оҳиста тебраниб турибди. — У саратон офтобида ҳансираб ётган пахтазорга қараб қўйди. — Гулларнинг муаттар ҳидини айтмайсизми? Ҳозир тушлик пайти. Яхши дам — меҳнатга ҳамдам, деганларидек, бригада аъзолари мириқиб овқатланиб бўлиб, дала шийпони кутубхонасида газета-журналлар ўқишаپти, баъзилари рангли телевизор кўришаپти. — У сувоқлари кўчиб тушган деворларга, деразаси синиб кетган шийпон ҳужрачасига, ерга тўшалган эски шолчага меҳр билан қараб, давом этди. — Биз меҳнат майдонида жавлон ураётган ёш қаҳрамон, йил сайин ҳосилдорликни ошираётган, бу йил ҳар гектар майдондан 51 центнердан хирмон кўтаришга азму қарор қиласа бригада бошлиғига — Құшоқбай Салимовга сўз берамиз. — У менга қараб мулойим жилмайди. — Құшоқбай! — деди тантанали оҳангда. — Ўз ишларингиз ҳақида икки оғиз гапириб берсангиз. — Шундай деди-ю, „ўқинг“ дегандек боя қўлимга тутқазган қофозга имо қилди.

Худди шу пайт, палакат босиб, йўтал тутиб қолса бўладими? Билмадим, болалигимдан шу касалим бор. Мактабда доскага чиқсам ҳам аввал бир йўталиб олиб, кейин гап бошлар эдим.

— Ўх-хў, ўх-хў! — дедим бўғилиб.

Мухбирнинг кўзи аланг-жаланг бўпкетди. Хавотирланиб, малласоч Коляга қаради Коля „зиёни йўқ“ дегандек қўл силтади. Мухбир менга ўгирилиб қўлини оҳиста силтади. Тушунмадим, „тўхта“ деяптими, „бошла“ деяптими?

— Ўқиверайми? — деган эдим, мухбир чинқириб юборди.

— Стоп, Коля! — кейин менга тушунтириди. — Имо қилдим-ку, бошламайсизми? Запись, Коля!

Микрофонни оғзимга тиққудек бўлиб, бақириб ўқиб кетдим.

— Биз, „Машъал“ жамоа хўжалигининг азаматлари...

— Стоп! Микрофонни ёриб юборасиз-ку, қанақа одамсиз ўзи! — мухбир микрофонни менга ишонмай, ўзи ушлаб турадиган бўлди. Ярим қулоч нарида. — Марҳамат, — деди шивирлаб.

— Биз, „Машъал“ жамоа хўжалигининг азаматлари арпатехника қоидаларига амал қилиб...

— Стоп! — мухбир алам билан қўлини пахса қилди. — Машинкада кўчирилган тайёр нарсаниям ўқиёлмайсизми?! „Арпатехникага“ бало борми? „Агротехника“!

— Қаёқдан билай, aka! — қофозни мухбирнинг тумшугига тиқишитирдим. — Мана, ўзингиз ўқинг.

Мухбир қофозга кўз югуртириб, хижолатли илжайди.

— Ҳеч машинисткага ёлчимадик-ёлчимадик-да! Бошладик, Коля!

Бояги сўзларни қайтадан ўқиб кетдим.

— Биз, „Машъал“ жамоа хўжалигининг азаматлари арпатехника қоидаларига қатъий амал қилиб, ўтган хўжалик йили...

Мухбир қўлини пахса қилиб ўдафайлади.

— Арпатехника эмас, дедим-ку, агротехника! Тушуняпсизми, аг-ро-тех-ни-ка!

Меникиям тутиб кетди.

— Нега бақирасиз? Ўзингиз шунақа деб ёзиб қўйисиз-ку!

— Яхши, — деди юзидан дувуллаб оқаётган терни артиб, — жонли суҳбат қилиб қўя қоламиз. Текст керакмас. — Коля, бошладик! — У микрофонни оғзига яқин келтириб гап бошлади. — Ҳурматли Кўшоқбой! Мана, сиз ёш бригадирсиз. Ёшлиқ — шижаатдир, деган мақол бор. Уч йил аввал сиз бошчилик қилаётган заршунослар гектаридан 43 центнердан ҳосил олишган, тўғрими?

— Тўғри! — дедим бақириб.

Мухбир „Жудаям унчалик ҳайқириш шарт эмас“ дегандек кўрсаткич бармоғини лабига босди.

— Ўтган йили 47 центнердан хирмон кўтарғансиз. Тўғрими?

— Тұғри!

— Бу йил гектаридан 51 центнердан дурдона йиғиб олмоқчысиз. Айтинг-чи, бу муваффақиятларнинг сири нимада?

— Ҳеч қанақа сир-пири йўқ! — газетачиларга доим айтадиган гапларим ёд бўлиб кетгани иш берди. Ўзиям булбулиғё бўпкетдимов! — Файрат билан ишляяпмиз. Агар ҳурматли Раис бувамиз гектаридан 60 центнердан ҳосил кўтарасан деса, униям дўндираверамиз! — Тусатдан жамоа хўжалиги идорасининг пештоқига илиб қўйилган шиор эсимга тушди. — Мухбир aka! — дедим тантанали оҳангда. — „План қонун, мажбурият — виждон“ деган гап бор! Биз ҳар қанча мажбурият бўлса уддалайверамиз!

Мухбир микрофонга эгилди.

— Кўшоқжон! — деди менга эмас, микрофонга қараб. — Халқимизда ажойиб ҳикматли гап бор. Даромадга яраша буромад деганлар. Айтинг-чи, бригада аъзоларининг даромади қандай? Шу жумладан ўзингизнинг ҳам?

— Даромаднинг мазаси йўқ! — дедим хўрсиниб. — Яқинда синглимни узатаман, деб дадамнинг бели чиқиб кетди. Шаҳар жойда қанақа, билмайман-у, бизнинг удумимизда қиз узатган ота-она ақалли тўққизтагина кўрпа қилиши керак. Дадам шўрлик тўққизта кўрпага чит излаб, Тошкентгача бориб келса, денг. Ҳайронман, мухбир aka, паҳта планини қанча ошириб бажарсак, чит, сатин, сочиқ деган матоҳлар шунча камайиб кетяпти.

Қарасам, мухбирнинг оғзи ланг очилиб, жағи осилиб қолди. Нуқул оғир-оғир киприк қоқади.

— Ҳали бу ёқда ўзимнинг уйланишим бор, — дедим ғўлдираб. — Юравераманми, бошим туйнуқдан чиқиб! Уйланиш ҳазил гапми, мухбир aka! Дадам бир инвалид бўлса...

— Бу ёгини монтаж қиласиз, Коля! — деди мухбир гапимни бўлиб. Кейин яна менга юзланди. — Фидойилик бор жойда ғалаба бор, дейдилар. — Сиз бошчилик қилаётган бригада аъзолари чинакам фидойи одамлар.

Айтинг-чи, улар орасидан кимларни алоҳида таъкидлаган бўлардингиз?

— Ҳаммасиям яхши! — дедим бояги гапим чала қолганидан фижиниб.

— Масалан?

— Яъни, масалан, Турсунбой ака! Ҳалол одам! — дедим ростини айтиб. — Яхши механизатор. Аммо-лекин хотини Ойсара янгам... Ҳа, майли, у ёғини айтмай қўя қолай. Чориям яхши механизатор. Панжи сув тарашнинг устаси. Аммо шу Панжи уйланди-ю, айниди, мухбир ака! Кеча денг, ғўзани сугориб туриб ярим кечада уйга жўнаб қопти, ярамас. Ўн олти этатга сув тошиб кетибди. Мана, ҳалиям дараги йўқ! Ётгандир-да, сулайиб! Қўлимга тушсин...

— Стоп! Коля! — мухбир яна чинқирди. — Ўйлаб гапиргин-да, ука, — деди сенсираб. — Ойсара янгангни гапирасан, аллақандай тўйни гапирасан. Мен сендан ишни сўраяпман, ука!

— Чори ўзи яхши йигит-ку, битта айби бор, — дедим салмоқлаб. — Нос чекади, қизталоқ. Тушликни ҳаммадан олдин паққос уриб олиб, дарров нос отади. Нос чекиши майли-ку, тупласа, одамнинг юзига сачрагани чатоқ.

— Жон ука! — мухбир астойдил ялинишга тушди. — Барака топкур, укажон! Ютуқлардан гапир! Жамоа хўжалигидан гапир! Бошладик...

— Хуллас... — дедим ўйланиб. — Ҳўжалигимизнинг доно раҳбари Тошмамат Алимов бошчилигида йил саёчин ҳосилдорликни ошириб бажаряпмиз. „Машъял“ жамоа хўжалиги байроқдор вилоятимизда чинакам машъял бўляпти. Биз меҳнат фалабаларимизни мустаҳкамлаб бораверамиз!

Мухбир „Мана бу бошқа гап“, дегандек мамнун бош иргади.

Мухбирнинг далдасидан руҳланиб кетдим.

— Ҳўжалигимизнинг пахта пункти билан алоқаси зўр! — дедим уста нотиқлардек чертиб-чертиб. — Масалан, Жовли ака деган приёмчик бор. Мен сизга айтсан, мухбир ака, районимиздаги энг ҳурматли, энг бели ба-

кувват одам шу — Жовли ака. Фақат битта айби бор: афти хунук. Күзи худди уккиниги үхшайди. Аммо үзи яхши одам. Энди пахта пунктимизам катта-да, ака! Бир эмас, түртта районнинг пахтасини қабул қилиб олади. Ёнида пахта заводиям бор. Раис бува у ёқда турсин, Райком бува ҳам Жовли акани кўрса, „Жовли Менглиевич, Жовли Менглиевич“, деб типирчилаб қолади.

Мухбир микрофонни чангллаган кўйи йиглагудек бўлиб илжайди.

— Ўртоқ Салимов! — деди микрофонга эгилиб. — Газеталарда сизни уста пахтакор, ҳатто эгат орасида туғилган бола деб ёзишган. Айтинг-чи...

Нима дейди бу? Мухбир бўлса ўзига! У менинг гапимни белига тепади-ю, мен индамай туравераманми!

— Ёлгон, — дедим бақириб. — Сўрадим, энам мени қаҳратон қишида, сандал четида туқсан экан.

Мухбир Коляга „давом этавер“ дегандек имо қилди-да, тагин савол берди.

— Қўшоқжон! Сиз туғилиб ўстган оила пахтакорлар сулоласи. Мұхтарам отангиз, мұхтарама онангиз эски пахтакорлар. Тўғрими?

— Буниси тўгри! — дедим қаддимни гоз тутиб. Мухбир микрофонни оғзимга яқинроқ олиб келди. — Дадам қирқ бешинчи йилда урушга кетган экан. Германияга боролмабди-ку, японларнинг пачагини чиқариб кепти. Ўшандан кейин энамга уйланган экан. Мендан олдин туғилган иккита боласи турмабди. — „Қалай, қойил қиляпманми?“ дегандек мухбирга қараган эдим, у суюниб кетди. „Давом этавер“ дегандек имо қилди. — Ота-энам эсини танибдики, пахтадан бери келмайди. Фақат дадамнинг жаҳли тез. Жамоа хўжалигида буғалтир эди. Раис бува билан уришиб қолиб...

— Ўртоқ Салимов, — деди мухбир шоша-пиша гапимни бўлиб. — Демак, сиз оиласда ёлғиз фарзандсиз, шунақами?

— Эсингиз жойидами? — дедим микрофонга ёпишиб. — Ҳали айтдим-ку, яқинда синглимни узатдик, деб. Куёв „Сельхозтехника“да ишлайди. Номард экан! Синглимга уйланиб олгунча итдек ялтоқланди. Кунора

онаси келади, ҳафтада отаси келади. Борингки, Жовли ақаниям ўртага қўйди. Жуга уйланиб олди-ю, айниди, абраҳ! Аккумулятор у ёқда турсин, арзимаган ременниям текинга бермайди! „Кисса касал эмасми, чўталдан чўзинг“, деб туроди, ҳайвон! Унисиям майли-ку, икки ҳафта олдин Жу уйга йифлаб келди. Ҳар куни ичиб келиб, синглимни урармиш. Кўчада тутиб олиб, ўзиниям итдек дўппосладим. Агар синглимга яна бир марта қўл кўтарсанг, энангни қўрсатаман дедим. Биламан, энди менга запчастни чўталгаям бермайди.

— Стоп! — мухбир қўл силтади. — Бўлди, укам! — деди елкамга қоқиб. — Бу ёғига жим ўтирасан.

У бир имо қилган эди, жингалаксоч йигит тағин магнитофон тутмачасини буроди.

— Ҳурматли тингловчилар! — деди мухбир микрофонга. — „Машъал“ жамоа хўжалигининг машъал бригадири, „оқ олтин“ ижодкори Кўшоқбой Салимов билан қурган қизгин суҳбатимиз ҳам охирлаб қолди. Бу хўжалик областимиизда энг илфор саналади. Салимов бригадаси эса, машъалларнинг машъали. Мана, тушлик ҳам тугади.

У менга аллақандай имо-ишоралар қила бошлади.

— Ҳа, яна гапирайми? — дедим шанғиллаб.

Мухбир микрофонни кафти билан тўсиб ўдағайлади.

— Бормайсанми!

— Қаёққа?

— Тракторга! — деди у энсаси қотиб. — Югур моторни юргиз!

Шошилмай ўрнимдан турдим.

— Бир соатли мазмунли ҳордиқ тугади! Азамат пахтакорлар ўз меҳнат постига, яъни „оқ олтин“ даласига йўл оляпти. — Мухбир микрофонга қараб файрат билан гапира кетди. — Ҳозир зумрад далалар узра, яна моторлар овози гуриллайди. — У бир қўлида микрофон тутганча иккинчи қўли билан „чоп“ дегандек имо қилди. — Келинг, азизлар... Меҳнат симфониясини биргалашиб тинглайлик!

Худди шу пайт толга боғлоқлик турган Тулпорим

овози борича ҳанграб юборди. Оббо, соат бир бўлдимикин, иккими? Эшагим бекорга ҳанграмайди.

— Стоп! — мухбир микрофонни чанглаб бақириди. — Стоп!

Жингалаксоч йигит негадир беписанд жилмайди.

— Ничего, Пулатов ака, ишак отрежем!

Жон-поним чиқиб кетди.

Югуриб қайтиб келдим.

— Нима? — дедим мушт дўлайтириб. — Эшагимни сўядиган сенмисан?

— Боринг! Жон ука! — мухбир негадир яна сизлашга ўтди. — Боринг, ишингиздан қолманг. Шунча плёнкани расво қилганингиз ҳам етади. Бир соатлик суҳбатдан беш минутлик интервью чиқсаям катта гап!

...Эртасига кечкурун ҳовли ўртасидаги сўрида концерт эшишиб ётсан, радиода бирдан ўзим гапириб қолдим. Қизиқ, товушим ўзимниги ўхшайдиям, ўхшамайдиям. Онам зийрак-да, дарров таниди.

— Дадаси, ўғлингиз гапиряпти, — деди айвонда газета ўқиб ўтирган отамга. — „Машъал“ боламдан айланай! Овозларингдан ўзим ўргилай!

Онамнинг айланиб ўргилгани яхши. Лекин микрофонга айтган гапларимни мухбир пўстдумбага чиқариб ташлабди-ку!

Қизиқ, мухбир даромадни сўраса, мен центнердан гапираман. Эгатда туғилганимдан гап очса, дадам урушга борганини айтаман.

Бунисиям майли-ку, дадам ғалати иш қилди. Ўқиб турган газетасини кўрпачага ташлади-да, салмоқлаб уйга кириб кетди. Онам айтганича бор. Ўлгудек кажбаҳсда, дадам! Мен уни шунча мақтасам-у, эшитгиси келмаса. Буям етмагандек кафтининг орасида бир нима чанглаб келиб индамай қўлимга тутқазди. Ҳайрон булиб қарасам, шалвираб ётган пуфак. Ёш болаларнинг уч тийинлик пуфаги. Кўм-кўк!

— Пуфла, ўғлим! — деди лунжи учиб.

— Шошманг, охиригача гапириб бўлсин! — ҳовли супураётган жойида тўхтаб қолган онам озорланиб койиди. — Нима қиласиз, чалғитиб?

— Пуфла! — дадамнинг бир эмас, икки лунжи уча бошлаганини кўриб, ноилож пуфакни қўлга олдим. Тезроқ шишириб бера қолай, деб ғайрат билан пуфлай кетдим. Пуфакка дам беряпман-у, икки қулогим радио-ла!.. Йўқ, уч тийинлик эмас, нақ етти тийинлик пуфак экан, лаънати. Ўзиям дирижабль бўлиб кетдиёв!..

Радиодан „меҳнат симфонияси“ деган гап эшитилиши билан пуфак „пақ“ этиб ёрилиб кетди. Ўзиям шунақсанги варангладики, икки қулогим шангиллаб ҳеч нимани эшитолмай қолдим.

Кулогим очилганида радиода концерт бошланган экан.

— Шунаقا бўлади! — дадам мийифида кулганча нари кетди.

ЎН ИККИНЧИ БОБ

ПАХТА ПУНКТИДАГИ МАЖЛИС

Авваллари „маза-маза катталар“га! деб юрадим. Нима қилса — оғзининг ели! Ҳамма икки букилиб, таъзим қилиб туради. Қандоқ яхши! Энди билсам, фирт аҳмоқ эканман. Амалдорликнинг ғалваси шунақсанги кўп бўларканки, бошига тушмаган одамнинг етти ухлаб тушигаям кирмайди. Мана, ўзимни олайлик. Нари борса битта бригадирман! Шу қилтириқ амалниям бир кунлик нағмасини йиғиб филнинг елкасига ортинг, фил бечоранинг бели чўрт узилиб кетмаса, мен кафил! Мен айтиб турай, сиз бармоғингизни букиб туриңг. Кузда корчёвка қилиш керакми — керак! Қишида шўр ювиш, яхоб бериш керакми — керак! Баҳорда, радиода ҳар куни айтадигандек, барака уруфини қадаш керакми? Ўтоқ қилиш, чопиқ, дорилаш, сугориш... Кейин чеканка, дефолиация... Омон-эсон терим кампаниясига этиб олганингиздан кейин ғалванинг каттаси бошланади. Пахта терадиган машиналар ҳам ўлмасин. Шир этиб ём-фир қуйса, отасидан калтак еган боладек бир чеккага чиқиб, сўппайиб тураверади. Мактаб ўқувчилари-ку, ўзимзининг болалар. Гапга кўнади. Ҳай-ҳай, шаҳардан келган талабалардан асрасин! Ҳар куни битта фавро! „Ётоқ-

хонангиз молхонага ўхшайди“ дейди... „Совқотиб қоляпмиз, қачон печка ўрнатиб берасиз?“ дейди. „Макарон шўрванинг гўшти қани?“ дейди. Ўзимга йўқ гўштни сенга қаёқдан топаман, олифта. Қўйиб берса рангли телевизор ҳам сўрарсан, ҳали. Қайси куни биттаси олдимга келиб, дафтар-китобини ёйиб ташлади. „Ҳа“ десам, „Ҳисоблаб чиқдим, ака, битта чаноқ тўрт грамм бўлса, бир кило пахта териш учун ерга 250 марта эгилиш керак экан, нормани пасайтиинг, мен бир кунда йигирма беш минг марта эгилолмайман, машинани ишлатинг“, деб ақл ўргатяпти. Кўтар-ей, тўрва халтангни, дегим келди-ю, Раис бувадан ҳайиқдим.

Майли, булар-ку, ўзимиз ўрганиб кетган гаплар. Энг алам қиласидигани шуки, давлатнинг ўзи белгилаб қўйган матоҳларниям ололмайсиз. Радио мухбирига айтган гапим гап: куёв — бориб турган апирис. Аккумуляторми, релеми сўраб борсанг, юзинггамас, қўлингга қарайди. (Калтак еб ҳам одам бўлмади, уккафар!) Бирорвга ўғит деб ялинасан, бирорвга шпиндель деб сарфаясан... Тағинам Раис бува менга озми-кўлми қайишади. („Машъял“ бригадирмиз-а!)

Бригадамдаги аъзоларни айтмайсизми! Иш деса кетини қуруқقا опқочади. Қулоғингизга айтайми: уларгаям осон тутиб бўлмайди. Мана, масалан, Турсунбой ака. Бултур кузда машинада юз эллик тонна пахта терди. (Планга зарур бўлиб қолган эди, Раис бува Турсунбой аканикини 250 тонна, мен терган 170 тоннамни 300 тонна деб ёздириб қўя қолди.) Шундоқ бўлсаям, Турсунбой ака ҳамма нарсадан қўнгли совиган одамдек маъюсланиб юради. Чорини айтмайсизми? Ёшгина хотини сариқ бўлиб қолди. (Ҳайронман, шу, куз келиши билан сариқ касал кўпаяди.) Чорининг хотини ўзи сапсариқ яна қанақасига сариқ бўлганига одамнинг ақли етмайди. Яна бечоранинг юзи сариқ, сочи қизил. Шунинг учунми, касал бўлганини ўзиям сезмабди. Орадан анча ўтиб биқиним оғрийди, сариқ бўлдим шекилли, деган экан, Чори ҳазилга олибди. „Кўявер, хотин, онангнинг қорнида узоқ ётганинг учун сарфайиб кетгансан“, деб қўя қопти... Хотини шўрлик касалхонада уч ой ётди.

Ёки Панжини олайлик. Уйланаман деб қулогигача қарзга ботган экан. (Шуни ўйласам, юрагимни ваҳима босади: ҳали-бери бизнинг оёқ тўртта бўлмайди, шекилли.) Ишга тоби йўқ. Ҳар куни бир баҳона топиб томорқасига югуради. Тўғри-да, унгаям осонмас: қаринлош-уругидан бир қоп пул қарз кўтарган одамга жамоа ҳўжалигидан тегадиган маош урвоқ бўладими? Шунинг учун жамоа аъзолари томорқасида ўзи ишлаб, боласини пахтага ҳайдайди-да! Панжининг далада ишлашга яроқли боласи йўқ. Хотини ҳозирча туғишга ултурмади.

Ана энди ўзингиз ўйлаб кўринг. Мендек пўристой бригаднинг бошидаки, шунча фалва бор экан, тағинам Раис бувалар фил экан-да!

Бугун Раис бува ишнинг кўзини билишига яна бир марта тан бердим. Ноябрь охирлаб қолган, далада пахта тугул, йилт этган кўсак ҳам йўқ. Устига-устак икки ҳафта олдин қор ёғиб ҳамма ёқнинг аталасини чиқариб юборди. Вилоят пединститутидан келган ҳашарчи талабалардан икки юзтаси бизнинг бригадага ҳам тушган. Тушликда борсам, бекорчиликдан домино ўйнаб ўтиришибди. Овози оламни тутади. Ҳамма ёқ тарақ-турук, шарақ-шуруқ... Энсам қотиб, четлаб ўтиб кета қолдим. Раис бувагаям ҳайронман-да! Биз бригада планини юз ўттиз поиз дўнлирдик. Туманники юз йигирма, вилоятники юз етти... Нима қиласиз, шунча одамни бекорга боқиб ўтириб?

Аввал шуни ўйлаб хуноб бўлган эдим. Кейин тушунсан, Раис бува нима қилса, охирини ўйлаб қилар экан.

Ҳар куни пахта пунктида мажлис бўлишини эшитар эдим-у, ўзим бормагандим. Бугун палакат босиб бориб қолмайманми! Вой-бў, йифилиш эмас, қип-қизил қиёмат-ку!

Раис бува, Шайдул кассир, мен — учовлашиб, пахта пункти директорининг хонасига кирдик, одам одамни танимайди: уй ичи тутунга тўлган, бурчакдаги галанска печка қизиб кетганми, нафас олиб бўлмайди.

— Сводка! — деди тўрдаги стол олдида ўтирган Райком бува фильтрли сигаретини тутатиб. (Ҳатто саломга алик ҳам олмади.) Райком бувани аввал кўп кўрганман. Икки юзи анордек қип-қизил одам эди. Энди кўзлари

киртайиб, ранги калтакесакка үхшаб қопти. Юзи күкимтирми-ей, нима бало! Хона иссиқлигига қарамай, босидаги андатра телпагини ечишниям унутиби.

— Ўртоқ Алимов, сводка! — деди-ю, бир ютинган эди, узун бўйнидаги шафтоли данагидек учбурчак бақбақаси лиқиллаб кетди.

— Пажалиста! — Раис бува мулойим илжайиб, шимининг чўнтағидан аллақандай қофоз чиқарди. Вазмин қадамлар билан юриб бориб, Райком бува ўтирган столга қўйди. — Биру ўндан етти процент!

— Ана, бўларкан-ку!

Райком бува Раис бувага гапиряпти, деб ўйлагандим. Йўқ, дераза тагидаги курсида ўтирган новча одамга гапираётган экан. Папирос тутунидан яхши пайқамай қопман.

— Мумкин экан-ку, ўртоқ Ҳусниддинов! — Энди Райком буванинг овози таҳдидли жаранглади. — Нега „Машъал“ жамоа хўжалиги бир кунда биру ўндан етти кўрсаткич беради-ю, „Правда“ беролмайди?! Сизга қолса, „Машъал“га қор ёғмаган дерсиз? Ерингиз бир, сувингиз бир...

— Менда пахта йўқ! — деди новча киши тўнгиллаб. Овози ўлгудек йўғон экан.

— Йўқ? Нега йўқ?!

— Планни бажардик, мажбуриятни бажардик, пахта қолмади.

— Ним-ма?! — Райком бува сапчиб ўрнидан туриб кетди. Учбурчак бақбақаси универсал тракторнинг поршенидек пайдар-пай юқори чиқиб-паст туша бошлиди. — Нега „Машъал“да бор пахта сизда йўқ?! Нега район планини орқага сурасиз? Нега байроқдор облас-тимизнинг темпини пасайтирасиз?

Ҳусниддинов деган бало экан! Шундоқ Райком бувадан қўрқмади-я!

— Бор пахтани топшириб бўлдик! — деди ғўлдираб. — Йилт этган чигит қолмади.

— Эшитдингиз-а, ўртоқ Викторов! Баҳонасини эшитдингиз-а? — Райком бува бурчакдаги „галанска“ печка ёнбошида ўтирган тақирбош кишига юзланди.

Пахта заводининг директори Викторов тоға ўзбекчани бинойидек билади деб эшигандим: рост экан.

— Ишлаш халаган адам чора тапади, халамаган баҳана! — деди дона-дона қилиб.

Райком бува шу гапдан кейин ҳовуридан тушиш ўрнига баттар тутақиб кетди.

— Ҳусниддинов! — деди ҳайқириб. — Сиз чойхонада ёмас, райкомнинг кўчма бюросида ўтирибсиз!

— Асабийлашманг, ҳаммаси тушунарли! — Райком буванинг ёнида терлаб-пишиб ўтирган семиз киши сурнайга ўхшаб гийқиллади. — Ҳусниддиновга раислик юки оғирлик қилиб қопти. Обком бувага бу кимсанинг қилмишини хабар қилишга мажбурман.

— Эшигдингми, Ҳусниддинов! — Райком бува столни муштлади: — Обком вакилининг гапи гап. Раис бўламан, деб орқамиздан чамадон қўтариб юрганлар сонмингта! Йўқол!

Ҳусниддинов индамай ўрнидан турди. Эшик олдига борганида негадир тўхтади.

— Раҳмат... — деди илжайиб. — Ўзим ҳам жонимдан тўйгандим.

Райком бува тағин ҳайқирди.

— Сезилиб турибди. Ишингни прокуратурага топширмасам, одаммасман!

„Правда“ раиси чиқиб кетиши билан хонага жимлик чўқди. Ҳеч кимдан садо чиқмади. Қаёққа келиб қолдим ўзи! Асли, боя Раис бува „Юр, мажлисга борамиз“ деганида Тулпоримни миниб, уйга жўнаворсам бўларкан.

Эшик очилиб, бир қўлида пахта гулли чойнак, бир қўлида пиёла кўтарган паст бўйли киши кирди. Дарров танидим, пахта пункти приёмчиги — Жовли ака! Хумдек бошини икки елкаси ичига тортганча, катта-катта кўкимтирик кўзларида мулоим ўт ёниб, хона тўрига йўл олган эди. Раис бува дик этиб ўрнидан туриб кетди. (Айтаман-ку, Жовли ака тумандаги энг хурматли одам деб!) Раис бува унинг қўлидан чойнак-пиёлаларни олётганида Райком бува ҳам хижолат чекиб жилмайди.

— Овора бўпсиз-да, Жовли Менглиевич!..

— Овораси бор эканми? — Жовли ака укки күзларида яна ўт ёниб жилмайды. — Ичларинг узилиб кетдику. Ош тайёр, — деди Райком бувага эмас, семиз обком вакилига қараб. — Кул-кул товуқ ҳам совиб қолди.

— Э, шу топда ош ўтадими томоқдан... — семиз киши шу қадар чуқур хўрсиндики, назаримда қорниям пучқайиб қолгандек бўлди. — Темпни тушириб бўлмайди. Обкомга нима дейман? Бобойнинг аччиғи чиқади.

Жовли ака укки күзлари сузилиб Райком бувага қараб қўйди.

— Менимча, „Машъал“да ҳали пахта мўл...

Райком бува ярқ этиб, бизнинг Раис бувага юзланди.

— Уч фоиз қила оласизми?

Анграйиб қолдим. Қандай қилиб биру ўндан етти фоизни уч фоиз қиласиди?

— Қилмасангиз бўлмайди, — деди Райком бува хотиржамлик билан. Ҳатто шафтоли данагидек бақбақаси ҳам лиқилламай, узун бўйнининг қоқ ўртасида муқим тўхтаб қолди. — Ярим соатдан кейин юқорига сводка беришимиз керак.

Семиз киши чўзиб-чўзиб эснади.

— Амаллайсиз-да, энди, ўртоқ Алимов!

— Шайдул! — Раис бува бир ҳайқирган эди, ёнимда ўтирган Шайдул кассир сапчиб ўрнидан турди. Боши шифтга тегай деб қолди. (Ҳайронман, мирзатеракнинг қолипини шундан олганми, кассирилизнинг бўйи нақд икки метрдан ортиқ келади.) Ҳозир ҳам ўрнидан туриши билан ҳеч кимни кўрмай қолдим. На раисни, на Райком бувани! Аммо Раис буванинг гапини аниқ-таниқ эшитдим.

— Югур! — деди Раис бува. — Сенам бора қол, тутхўр!

Кейинги гапи менга аталганини тушундим. Раис бува меҳри товланиб кетди шекилли, мени яна „тутхўр“ деди.

Узун-қисқа бўлиб ташқарига чиқдик.

Шайдул кассирнинг пат-патига мингашиб кетяпман-у, ҳеч балога тушунмайман. Жамоа хўжалигининг уч фоизи камида ўтиз тележка пахта бўлади. Ярим кечадан ошган бўлса, варажага тушадиган қўсак ҳам қолмаган бўлса, ўтиз тележкани қаёқдан оламиз?

— Менинг бригадамда бир килоям йўқ! — дедим ҳар эҳтимолга қарши.

Пат-пат ҳайдаб кетаётган Шайдул кассир гапимни эшитмади чофи, елкаси оша ўгирилди.

— Нима?

— Менда пахта йўқ! — дедим бақириб. — Йўлга қаранг!

Негадир шу топда, бир вақтлар Шодивойнинг „Запорожец“ ида пичан фарамига кириб кетганимиз хаёлимга келди. Ер сирпанчиқ, билчиллаб ётибди. Устига устак туман. Йўл четидаги чироқлар кул орасидаги чўғдек хира милтирайди. Шайдул кассирга нима? Ёшини яшади, ошини ошади. Бир эмас, иккита хотини, учта куёви, тўртта келини бор. Ўзим қўрганман, молхонасида иккита говмиш сигир, учта хўқиз бўкириб ётибди. Ўлса ўлиб кетаверади-да! Жабр бўлгандан менга бўлади. Шайдул акага ўшаб иккита бўлмасаям, ақалли битта, хотин олайлик-да биз ҳам!

— Секироқ! — дедим биқинига муштлаб. Кучим борича уриб юбордим шекилли, у орқасига жаҳл билан ўгирилди.

— Обком вакили нима деганини эшитдингми? Ярим соатдан кейин юқорига сводка бериш керак! — деди шанғиллаб.

Мотоцикл жони чиққудек чираниб тариллай бошлиди. Икки қулоғим совуқ шамолдан музлаб кетди. Хайрият-еий, тўхтадик! Қарасам, жамоа хўжалиги идорасига келибмиз.

— Пахта қайси бригадада? — дедим ҳамон қулоғим шанғиллаб тургани учун бақириб. — Ярим кечада ўттизта тележкани қаёқдан топамиз, Шайдул ака?!

— Бақирма-эй! — кассир рапидадек қўлинни пахса қилди. Ўзи теракдек бўлсаям чаққон экан. Зипиллаганча идора томон йўрғалади.

— Мен кетаверайми? — дедим яна бурилиб.

— Ўчир! — Шайдул ака зиналардан қўтариilar экан, тайинлади. — Кетиб қолма, бирга борамиз.

Анча турдим. Эрталаб пайтавани юпқароқ ўраган эканман, оёғимдан муз ўтиб кетди. Бир ёқда қорин

таталаб кетяпти. Раис бувадаям одамгарчилик йўқ-да, ўзи! Жовли ака-ку, „ош тайёр“ деди. Бирпас сабр қилса бизам ердик, бир чўқим-бир чўқимдан. Совуқ кунда қовурма қул-қул товуқ ҳам тешиб чиқмайди. Одамнинг қорни оч бўлса, бунинг устига обдан совуқ қотса, уйқу босаркан. Қани, ҳозир уйга борсам-у, иссиққина шўрвадан бир косагинани ичиб...

Бир маҳал Шайдул aka папка кўтариб зинадан тушиб келди.

— Ма, — деди эски чарм папкани қўлимга тутқазиб. — Эҳтиёт қил!

— Қайси бригадага борамиз? — дедим бир қўлда папкани ушлаганча мотоциклга мингалиб.

— Бригадада пишириб қўйибдими, пахта пунктига! — Шайдул кассир ўшқириб берди. — Лулкага ўтири! Папкага хушёрг бўл!

Нима, мен иккиқат хотинманми, лулкада ялпайиб ўтирадиган. Папкани чанглаб, орқа эгарга мингалиб олдим.

Шайдул aka жаҳл билан бир қараб қўйди-ю, моторни тариллатди. Тағин елдек учиб кетдик. Анчагина юрдик. Кейин нима палакат босди, билмайман. Қорнимнинг очлиги таъсир қилдими, уйқу элитдими... Хуллас, Шайдул аканинг биқинидан қўш қўллаб чанглаб олганим эсимда...

Ҳайбатли дағдағадан уйғониб кетдим.

— Папка, қани, папка?

Кўзимни очсан, пахта пунктининг темир дарвозаси олдида турибмиз. Туман орасида қоровулхонанинг чирофи хира милтираётганидан билдим.

— Папка қани? — деди Шайдул aka чийиллаб.

— Қанақа папка?

— Бояги папка, аҳмоқ! Чарм папка!

Ростдан ҳам, ҳали мотоциклга мингашаётганимда қўлимда папка бор эди-я!

— Ҳайронман, — дедим елкамни қисиб. — Ҳали қўлимда эди.

— Уйим қўйди! — Шайдул кассир тарсиллатиб пешанасига урди. — Хонавайрон бўлдим! — Тўсатдан қўзи

олайиб ёқамга ёпишди. — Қаёққа ташладинг? Ростини айт! Ичагингни сууриб оламан, аҳмоқ!

Ие, нимага дүк қиласы менга. Нега ҳадсеб „аҳмоқ“ дейли! Найнов бұлса үзига! Худо берган бүй биздаям бор. Ёқадан олиш мана бунақа бўлади, деб бўйнига ёпишиб олдим. У ёқамни қўйиб юбориб, билагимни чангллади.

— Қўйвор! — деди бўғилиб нафас олиб. Бўйнини бўшатган эдим, энтикиб-энтикиб ялинди. — Жон ука! Ҳароб қилма мени! Бола-чақам бор. Тўйларингда хизмат қиласай, укажон!

Раҳмим келди. Бечорага бир гап бўлса, иккита хотини, учта күёви, тўртта қелини, сигирлари-ю ҳўқизлари додини кимга айтади.

— Ичидағи қофозлар шунчалик зарилмиди? — дедим ҳавотирланиб.

Шайдул кассир кўзимга илтижо билан термилди.

— Жудаям керакли ҳужжат, укажон! Ҳозир топмасак, Раис бува ўн йилни бўйнимга илади. Ростини айт: қаерга ташладинг?

— Билмайман, кўзим илинган экан, йўлда тушиб қолгандир-да!

— Юр, юр, жон укам! — Шайдул ака рапидадек кафти билан елкамга шаппатилади. — Балки қаерда тушириб қолдирганинг эсингга тушиб қолар.

Мотоциклга минаётганимизда маслаҳат бердим.

— Идорага қайтиб бориб, бошқа нусхасини ола қолайлик.

— Бунақа қофозда нусха бўлмайди, — у йиғламсираб, бурнини тортди. Шоша-пиша мотоциклини гуриллатди. — Э, Худо! — деди илтижо қилиб. — Ишқилиб топилсин... Ҳонавайрон бўламан, сочим оқарганда турмага тушаман...

Мотоцикл юриб кетди. Аммо бу сафар астароқ, авайлаброқ юра бошлади. Аксига олиб, туман қуюқлашган, йўл четидаги лампочкалар фира-шира кўринарди. Шайдул ака йўлни яхшироқ ёритиш учун бўлса керак, мотоциклини гоҳ у ёққа буради, гоҳ бу ёққа.

— Ўзинг шарманда қилма! — дейди дам-бадам.

Дала йўлига чиққанда мотоциклини тұхтатиб, азабазза ялинди:

— Құшожон! Ўзим айланай сендан. Уйланаётганингда битта ҳұқизни түяна қилмаган номард. Яхшилаб эслаб күр! Қаерга келганды ухловдинг?

— Ухлаганим йўқ, мизғидим!

— Ўл! — У яна мотоциклини юргизиб кетди. Бир чақиримча юргандан кейин тұсатдан тормозни босди. Бошим курагига урилиб, пешанам сирқиллаб кетди. У эгардан сакраб туриб, олдинга югурди. Мотоцикл чироғи ёруғида ўн қадамча нарида, йўлнинг қоқ ўртасида ётган папкани юлқиб олаётганини кўрдим. Дарров қиров тушибдими, папканинг усти оқариб қолибди. Шайдул aka шарақ-шуруқ қилиб папканинг ялтироқ қулфини очди-да, ичига қўл суқди.

— Хайрият! — деди энтикиб. — Худога шукур!

У папкани бандидан чангаллаб чопиб келди.

— Укам, — деди овози мулойимлашиб. — Жума куни жонлик сўйиб худойи қиласман. Пешинда! Сенам келгин, хўпми!

— Менга бера қолинг! — деб қўл чўзган эдим, жонхолатда папкани бағрига босди.

— Йўқ-йўқ, барака топ, укам. Ўзим... — У папкани эгар қошига қўндириб, устига миниб олди. Ҳар эҳтимолга қарши, „жойида тушибдими“, дегандек хотининг орасига қўл суқиб текшириб кўрди-да, мотоциклни орқага буриб, шангиллади. — Бўлган ҳангомани Раис бувага айтиб юрмагин, хўпми? Нақ иккаламизнинг теримизга сомон тиқади-я!

Терига сомон тиқишига ҳожат қолмади. Пахта пунктита қайтиб келсак, дарвоза олдида Жовли aka кутиб турган экан.

— Оёфингга тош боғлаганмисан, нима бало! — деди жеркиб. Папкани олди-да, аввал Шайдул кассирнинг, кейин менинг қўлимни қисди. — Райком бува хуноб бўлаётган эдилар. Раҳмат, сизларга жавоб.

НАРГИЗХОННИНГ ҲИНДУ ХОЛИ

Хоҳлаган одамингиз билан баҳс бойлашиб айтаманки, дунёда энг яхши нарса — севги экан. Яна бир марта хоҳлаган одамингиз билан баҳс бойлашиб айтаманки, дунёда энг ёмон нарса ҳам — севги экан. Авваллари, шеър китобни қўрсам, энсам қотарди. Энди билдим: шоирлар ҳам аввал биттасини яхши кўриб қолиб, кейин шоир бўларкан-да! Қийин экан у бечораларгаям. Хоҳ ишонинг, хоҳ ишонманг, аллақандай бир ой ичидаги ўзим ҳам тап-тайёр шоир бўлдим-қолдим.

Мен сени севаман,
Ишонгин менга.
Хоҳласанг жонимни
Бераман сенга!

Бу шеърни ўзим ёздим. Ёздим эмас, кечалари қўзими ни юмиб ётсан, лоп этиб хаёлимга Наргизхон кела-ди-ю, ўзидан-ӯзи шеър тўқиб ташлайман.

Ўзимиз ҳам айни қони гупиллаган бўз йигит эмас-мизми, шундоқ қўкрагимга икки литрли қумғонни қўйинг: ўн беш минутда шарақлаб қайнаб кетмаса, мен кафил! Оҳ тортсан, нафасим олов бўлиб чиқади. Тушлик пайтида ҳамма овқат еса, мен шийпон тагидаги ҳовуз бўйида, тарвақайлаб ўсган тол тагида қўксимни захга бериб ётаман. Бир ҳафта ўтмай, мен ётган жой қуриб-қақшаб ўтлариям сарғайиб кетди. Назаримда тол қуриб, ҳовуздаги сув буғлана-буғлана бир қулоч пасайиб қолдиёв! Бригададаги йигитлар ҳайрон. „Сенга нима бўлди, Қўшо, рангинг сомон бўпкетибди-ку, касал-пасалми-сан“, дейишади. Гапириб нима қилдим? Менинг касалимни қаёқдан тушунсин булар.

Қанақа бедаво дардга йўлиқдим ўзи? Дадамга айттолмасам, энамга айттолмасам? Ўртоқларим тушунмаса. Кечалари Тулпорим билан дардлашаман. „Наргизхонни яхши кўриб қолдим, ошна!“ дейман хўрсишиб. Тулпорим мендан ҳам чукурроқ хўрсишиб қўяди. „Биламан, у мени

менсимайди, кулади“, дейман. Тулпорим тагин хўрсинади. „Энди нима қиласиз, ошна, ёнимда Шоди бўлсаки юрагимни ёриб, ҳасратимни айтсан?“ Тулпорим индамайди. Нимаям десин? Тил-забони бўлмаса. Ёрдам бериш қўлидан келмаса... Кўзимга мўлтираб-мўлтираб қарайди.

Асли, бу савдолар баҳор охирлаб, жийда гуллаган кезларда бошланди. Ўша куни Жуман, „Идорага бораркансан, Раис буванинг зарил иши бормиш“, деб қолди.

Раис бувани биламан-ку, бекорга чақирмайди. Югурдим!

Бизнинг жамоа хўжалиги идорасини кўрмабсиз — дунёга келмабсиз.

Дала шийпонларининг мазаси бўлмасаям, Раис бува идорани боплаган. Икки қаватли мармар бино. Олди фонтан. Фонтан четида мажнунтоллар „Ассалом алайке-е-ем“ деб салом бериб турди. Одамнинг ёғи эриб кетадиган саратонда ҳам Раис буванинг хонаси муздеккина бўлади. Худди бир вақтлар Шодивой иккаламиз жойлашган Тошкентдаги гастинисадек.

Иккинчи қаватга кўтарилиб, шундоқ эшикни очганимни биламан! Гилам тўшалган қабулхонанинг бурчагида, оч ҳаворанг ҳарир пардалар осилган дераза тагидаги столда бир қиз ўтирибди... Ё алҳазар! Одам боласиям шунаقا чиройли бўладими? Йўқ, бу одам эмас, онам болалигимда айтиб берадиган эртакдаги парининг нақ ўзгинаси! Сочини чиройли турмаклаб, бир четига миттигина жийда шохчасини қистириб олган. (Иккинчи қаватга чиқишим билан димоғимга жийда гулининг ҳиди урилувди-я!) Эгнида нимпушти кўйлак. Деразадан тушиб турган нурда қомати аниқ-таниқ қўриниб турибди. Юзлари... Юзлари жудаям оппоқ эмас-ку, тандирда сингиб пишган кулчадек қизғиштоб. „Пари“нинг камондек қайрилма қошининг қоқ ўртасида жажжигина холи бор. Худди индийский кинодаги артисларга ўхшайди. Ўзим ҳам мабодо кинога кириб қолмадимми, деб у ёқ-бу ёққа аланглаб қўйдим. Йўқ, ўзим билган Раис буванинг қабулхонаси. Олти ой аввал, қишида келганимда ҳам қабулхона щунаقا эди. Гилам ҳам, оч ҳаворанг

ларпардалар ҳам. Аммо унда „Пари“ йўқ эди. Тиззаларим ўзидан-ўзи қалтирай бошлади. Келганимни билдириш учун йўталмоқчи эдим, томоғимдан хириллаган овоз чиқди.

„Пари“ узун-узун нозиккина бармоқлари билан машиникани чиқиллатишда давом этиб, менга юзланди. Мулойим жилмайган эди, юзи ёришиб кетгандек бўлди.

— Келинг, ким керак эди?

Овозми бу, кумуш қўнфироқнинг жарангими? Юрагим қинидан чиққудек ура бошлади. Тракторимнинг моториям бунчалик гупилламас.

„Пари“ машинкани чиқиллатмай қўйди.

— Ким керак эди? — деди кўзимга синовчанроқ тикилиб.

Гапирмоқчи эдим, лабим лабимга чиппа ёпишиб қолди. Қани оғзимни очолсам.

„Пари“ пиқ этиб кулиб юборди.

— Гарангмисиз?

Мўлтираб туравердим.

У менга бошдан-оёқ разм солиб чиқди.

— Соқовмисиз? — деди раҳми келиб.

— Ҳа! — дедим. Овозим йигламсираб чиқди. — Тилим йўқ.

„Пари“ ширин жилмайди.

— Гапирадиган соқовни биринчи кўришим! — у негадир оёғимга имо қилди. — Этигингиз лой экан.

Эрталабдан бери пайкал кечиб юргандан кейин этигим лой бўлмай, дўппим лой бўлсинми? Бошқа одам бўлса-ку, шунаقا дерди. Аммо „Пари“нинг дашномидан ер ёрилмади-ю, ерга кириб кетмадим. Индамай орқамга бурилдим-у, зиналардан пастга отилдим. Идора олдидаги фонтан зихига ўтириб, аввал ўнг оёғимнинг этигини суғурдим. Усти у ёқда турсин, ичигача тозалаб ювдим. Ўзиниям оқ ем қилиб юбордимов. Кейин чап оёғимнигини суғурдим.

Ҳаллослаб зинадан кўтарилидим, эшикни очдим. „Пари“ бояги жойида машинкани чиқиллатиб ўтирган экан. Ярқ этиб мен томонга қаради-ю, ангишвонадек

бежирим оғзини ярим очиб, узун-узун қайрилма киприкларини пирпиратди.

— Мени Раис бува чақыртирган экан... — дедим да-дилланиб.

„Пари“ ҳамон киприклари пирпираганча яна бир минутми-икки минутми тикилиб турди-да, үзини курси сұянчигига ташлаганча қаҳ-қаҳ уриб қула бошлади. Қи-зиқ, нега кулади бу? Ё этигимни чала ювибманми? Мундоқ қарасам, үнг оёғимда этик бор-у, негадир чап оёғимда йўқ. Ие, қўлимда экан-ку! Үзиниям чақалоқ кўтарган хотиндек бағримга босиб олибман. Қўнжи ерга қараб тургани учунми, ичидан чак-чак сув томади.

Қочмаган номард деб кўчага отилдим. Шу югурганча уйга етганда ҳушим сал-пал жойига келди. Онам ҳовлидаги сўрида хамир қориб ўтирган экан. Аҳволимни кўриб қўрқиб кетди.

— Тинчликми?

— Йўқ! — дедим ҳаллослаб. — Тинчликмас. Охирзамон бўлди.

Онам оғзини ланг очиб қолди.

Кечаси билан мижжа қоқмай чиқдим. Ўзидан-ўзи шеър тўқигим келади.

Отингни билмайман,
Айта қол ўзинг!
Ичимни ёндириб
Юборди кўзинг...

Уч кунгача гаранг бўлиб юрдим. Раис бува чақирганини баҳона қилиб, олдига борай десам, қўрқаман. Бормай десам, боргим келади. Учинчи кун чидолмадим. Эрталаб, далага бориш ўрнига қиртишлаб соқолимни олдим. Шипр атирдан юзимга мўлгина сепдим. Оппоқ кўйлак, янги шим, оёғимга лакированний туфли кийиб, мундоқ ойнага қарасам... Ҳа, энди бир йигит бўлса, бизчалик бўлар-да! Қарчигайнинг қанотидек қалин қошлар, хиёл қорароқ, хиёл озғироқ бўлсаям, бино-йидек юз, хиёл қийшиқроқ бўлсаям, ушласа ушлагудек қирра бурун. Бош ёрилганда қолган чандиқ соч тагида

күринмайди. „Пари“ дўппимни ечиб, сочимнинг орасини титкилаб ўтиармиди. Газеталарда бир эмас, саккиз марта мақталган, радиода гапирган „Машъал“ бригад бўлсак! Энг муҳими Худо берган бўй бор: биру тўқсон! Нари борса, Шайдул кассирдан бир қарич настмиз-да! Ҳозирги қизлар баланд бўйли йигитларни ёқтиришади. Тагин нима керак!

Лакированний туфлига чанг тегизмаслик учун кўча четидан битта-битта босиб кетаётсан („Пари“ бу сафар ҳам туфлингиз чанг экан деса, яна шарманда бўламанми?) димоғимга галати ҳид кирди. Қарасам, мозористон ёқасидаги чакалак четида жийда гуллаб ётибди. Қўлимга тикан киришига қарамай, битта шохчасини синдириб олдим.

Мармар зинадан чиқиб боряпман-у, тағин, тизза қизталоқ қалтирайди-да! Иккала оёғимни кесиб ташлагим келди! „Дадил бўл, Қўшо“ дедим-у, эшикни шахт билан очдим.

„Пари“ хаёл суриб ўтирган эканми, бир чўчиб тушди. Танимади! Үлай агар танимади.

— Ким керак эди?

— Сиз!

Шундоқ дейишга деб қўйдим-у, ўзим қўрқиб кетдим.

У ҳайрон қолгандек юзимга тикилди. Ҳатто икки қошининг ўртасидаги ҳиндуда холини нозик бармоғининг учи билан силаб ҳам қўйди. Худди аввалги сафардагидек бошимдан оёғимгача қараб чиқди.

— Вой, сизмисиз? — деди жилмайиб.

— Ҳа...

Шу туришда бақа бўлиб тикилиб қолдим, шекилли, у қўзини олиб қочди.

— Унақа қараманг одамга, — деди секин. — Қўрқиб кетяпман.

— Мен ҳам, — дедим ростини айтиб. — Йиқилиб тушай деб турибман. — Унинг раҳми келдими, жилмайди.

— Гулингиз чиройли экан, — деди қўлимдаги жийда шохчасига қараб.

Суюниб кетдим.

— Сизга! — дедим жонҳолатда шохчани узатиб. — Биласизми, биз томонда жийда кўп. Шодивойларнинг уйидан нарироқда мозор бор. Ўша мозорнинг атрофи чакалакзор. Жийда дегани тиқилиб ётибди. Эҳтиёт бўлинг, тикани ёмон.

„Пари“ энди жийда шохчасига қўл чўзган эди, ёнбosh томондаги чарм қопланган эшик очилди. Раис бува чиқиб келди.

— Ия, ҳа! — деди гоҳ „Пари“га, гоҳ менга қараб. Назаримда фалатироқ илжайгандек бўлди. „Пари“ дарров қўлини тортиб олди. Қип-қизариб нари кетди.

— Кўшвой, кўринмайсан? — деди Раис бува жиддий тортиб.

Мен учун „Пари“ жавоб берди.

— Қайси куниям келувдилар. Сиз районга кетгандингиз...

— Шунақами? — Раис бува тағин гоҳ унга, гоҳ менга қараб кўйди. — Кўшвой — маладес. Бизнинг „Машъал“ бригад шу-да! — деди елкамга қоқиб. — Наргизхон, телефон бўлса, мен йўқман. Қани юр-чи.

У охирги гапини менга айтганини кейин тушундим. Хаёлимда нуқул бир гап айланарди. „Оти Наргиз эканда. Тўппа-тўғри! Отиям индийский, ўзиям!“

— Э, ташласанг-чи, тиканагингни! — Раис бува жийда шохини қўлимдан юлқиб олиб, қабулхона бурчагидаги диванга улоқтириди. — Юр, срочний иш бор.

Муздеккина хонага кирдик.

— Гап бундоқ, тутхўр! — деди Раис бува тик турганча. — Сен эсли боласан. Шу кунларда районимизда бир ёзувчи пайдо бўлган. Эрта-индин сенгаям бориб қолса ажабмас.

— Борса, гаплашаверамиз, — дедим бепарволик билан. (Фикр-зикрим Наргизхонда эди. Гулимни олдими, йўқми?)

— Э, унақа мақтаб ёзадиганлардан эмас! — Раис бува, худди ўша ёзувчи рўпарасида тургандек, муштини дўлайтириди. — Ҳеч ким уни упалномочний қилмаган. Фирт ифвогар! Райцентрдаги аллақайси техникумда малим экан.

— Яхши... — дедим ҳеч балога тушунмай.

— Нимаси яхши! — Раис бува чақчайди. — Иғвогар дедим-ку, ҳамма ёқни така-така қилиб юрибди.

Наргизнинг ҳинду ҳолини силаб тургани лоп этиб хаёлимга келди.

— Чиройли... — дедим хўрсиниб.

— А? — Раис бува шунақанги бақириб бердики, чўчиб тушдим. — Бир иғвогар бутун районни остин-устин қилиб юради-ю, шу чиройлими? Эшитяпсанми, ҳов! — у қўлини бигиз қилиб, пешанамга нуқиди. — Райком буванинг ўзи айтди. Ўша иблисни қаматиб қутулмасак бўлмайди. Эрта-индин сенинг бригадангаям бориб қолса ажабмас. Гап сўраса, ҳеч нимани билмайман, деб тураверасан, уқдингми! Эслаб қол, фамилияси — Эргашип, тушундингми?

— Тушундим, — дедим секин. — Тушундим, Наргизхон...

— Нима? — Раис бува ёқамдан ушлаб силкитди. — Эс-хушингни йиф, бола! Эргашип гап сўраса, ҳеч нимани билмайсан, билдингми?

— Билдим. Билмайман!

— Бўлти, боравер! — Раис бува ёқамни бўшатди. Эшик олдига борганимда чақириб қолди. — Шошма, — деди юмшоқроқ оҳангда. — Биламан, дуруст боласан. Аммо бўйингга қараб тўн бич. Хўпми? Наргизхон — Жовли Менглиевичнинг жияни бўлади. Отаси райпо мудири. Уқдингми?! Бўлти, бора қол энди.

Қабулхонага чиқсан, Наргизхон ҳам, диван устида ётган жийда шохчасиям йўқ. Йўлакка чиқиб, анчагача талмовсираб турдим. Наргизхон гулимни олган бўлса, бундан чиқди... Энди илжаймоқчи эдим, лабим ўзидан-ўзи бурилиб, жойига келиб қолди. Агар Жовли аканинг жияни бўлса, отаси райпо мудири бўлса, бизга йўл бўлсин... Тенг — тенги билан... Раис бува тўғри айтди.

Тўрvasини йўқотган гадойдек талмовсираб чиқиб кетдим. Қандоқ азобларга қолдим-а? Ишонсангиз, томоғимдан овқат тугул, сув ўтмайди. Филқ этиб қайтиб тушади. Ҳали айтганимдек, Тулпоримдан бўлак сирдошим бўлмаса... Шодивой-ку, беш йилдан бери қорасини кўрсатмайди. Биринчи курсни битирганида каникулга

келган эди. Билмадим, нима жин урди жўрамни! Иккинчи курсдан бошлаб ёзда ҳам қишлоққа келмайдиган бўлиб кетди. Талабалар отрядига қўшилиб, курилишга борармишми-ей, Россия томонларда янги ер очаётганмишми-ей! Кучинг ошиб-тошиб кетаётган бўлса, кел. Ишимиз шунақсанги қўпки, бир ҳафтада қулофингдан кун қўринадиган қилиб қўямиз!

Бултур Раис бува „Жўранг ўқиши битиряпти, катталар билан гаплашдим, ўзимизнинг районга ишга келади“, деб юрганди. У ёқда Жамила хола ҳам тўй тараддудини кўриб юрувди. Буни қарангки, Шодивой келмади. Кейин эшитсам, Тошкентда ишлаб қопти. Ҳатто Раис буванинг ўзиям бир сафар менга ҳасрат қилди. „Жўранг bemexр бола чиқди, биттаю битта ўғлим деб шунча авайладим, яхши иш топиб қўйгандим, келмади“, деди.

Иш-пишини билмадим-у, барибир, жўрамдан мен ҳам хафаман. Жилла қурса меҳмон бўлиб келмайсанми, аҳмоқ! Мен сенга дардимни айтмайманми! „Шундоқ-шундоқ, жўражон, Наргизхонни севиб қолдим“, демайманми, сен менга жўялироқ маслаҳат бермайсанми!..

Ҳар куни эрталаб каллам далага бурилса, оёғим идора томонга тортиб кетаверади. Шу бир ой ичida Наргизхонни атиги икки марта кўрдим. Бир сафар идора рўпарасидаги фонтан ёнида хаёл суриб турсам, Раис буванинг „Нива“си гириллаб келиб қолди. У эшикдан Наргиз, бунисидан Раис бува тушишди. Алланимани гаплашиб идорага кириб кетишди. Мени кўришмадијам.

Иккинчи гал таваккал қилиб, Наргизхоннинг эшигини очдим. Хона бурчагида негадир хомуш турган экан. Мени кўриб, жилмайди. Гапни нимадан бошлашни билмай турган эдим, аксига олиб худди аввалги сафардагидек Раис бува хонасидан чиқиб қолди.

— Извогар келдими? — деди тўсатдан.

Ҳайрон бўлдим.

— Қанақа извогар?

Раис буванинг жаҳли чиқиб кетди:

— Нима дегандим сенга? Идорада ўралашгандан кўра ишингга бор! — Менга қанақа ўшқирган бўлса,

Наргизхонга ҳам шунақа ўдагайлади. — Отчётларни ким күчиради! Юринг! — шундай деди-ю, Наргизхонни хонасига бошлаб кириб кетди.

Вой, димоғингга беданам құнсин! Раис бұлмоқ туғул авлиё бұлмайсанми?! Нега дүқ қиласан! Ўтказиб қўйган жойинг борми! Келиб-келиб Наргизхонга-я!

Бир тўполон кўтаргим келди-ю, тўғриси, Наргизхондан уялдим.

Исанинг алами Мусадан деб, Чори бечоранинг калтак егани қолди. Урганим йўғу, шунга ўхшаганроқ иш бўлди.

Тушлик пайтида тол тагида кўкрагимни ерга бериб ётсам, шўрва ичиб бўлиб, нос чекиб роҳатини сураётган Чори вайсаб қолди.

— Эситдингми, ўв, Қўсо... — деди оғзида нос борштиги учун тили яхши айланмай, — Раис бувани бир секретари бор... Сунақа сиройли, сунақа сиройли, бир қосиқ сувминан ютсанг, зонинг роҳат қиласди...

— Нима? — учиб бордим-у, белидан олиб, кучим борича ҳовузга отдим. Чори бечора ҳовузнинг қоқ ўртасига шалоплаб тушди. Боядан бери тинимсиз вақиллаётган қурбақалар ин-инига уриб кетди. Толга боғлоғлиқ Тулпорим шаталоқ отиб қочмоқчи бўлди-ю, арқонни узолмади. Чори амаллаб қаддини ростлади. Негадир кўзи ола-кула бўлиб ўхчий бошлади.

— Нос кетди! — эски шолчага ёнбошлаб ётган Панжи дик этиб ўрнидан турди-ю, айюҳаннос солди. — Ичига нос кетиб қолди! Кафтини тўлдириб отган эди. Ўлиб қолади, бола!

— Ўлсин! — дедим жиннилардек ер тепиниб. — Ўлаверсин! Агар Наргизхонни яна бир марта...

Чори лойқаланиб кетган сувдан ҳовучлаб беш-олти марта ичди-да, чўзиб-чўзиб кекирди.

— Аҳмоқ! — деди ёшланган кўзларини ишқалаб. — Нима қилдим сенга?

— Яна бир марта гапирсанг... — сўқмоқчи эдим-у, аҳволини кўриб раҳмим келди. — Чиқ! — дедим ўдайлаб.

— Чиқолмайман! — Чори ҳовуз ўртасида турганча

гавдасини у ёқ-бу ёққа лапанглатиб қўйди. — Белимгача лойга ботиб қолдим! Торт!

Этигимни ечиб сувга тушишга мажбур бўлдим. Бечора ростдан ҳам белигача балчиққа санчилиб қолган экан. Тортиб чиққунча ўзимнинг ҳам силлам қуриб кетди. Чорининг этиклари шўлтилар, шими ачимсиқ лойға беланганди.

— Белни единг, хумпар! — деди афти буришиб. — Шуни аввалроқ айтмайсанми, уйини кўрсатиб қўймайманми!

— Жон жўражон! — чорининг этигини оёғидан суғуриб оларканман ялинишга тушдим. — Ростдан ҳам кўрсатасанми уйини!

— Э, ўл! — унинг афти аввалгидан баттар буришиб кетди. — Вой белим-а! — деди инқиллаб. — Лолазор посёлкасида туради. Шундоқ универмаг рўпарасида, — яна бели сирқиллади шекилли алам билан тўнгиллади. — Кўнглингга қўтирижомашов! Жовли аканинг жияни бўлади у! Сенга кўзи учиб турибдими?

— Оборасан-а? — дедим Чорининг этигини ҳафсала билан юварканман. — Майли белингни уқалаб қўяман. Огритмасдан уқалайман.

...Чори айтганини қилди. Ишдан кейин узун-қисқа бўлиб „Лолазор“ посёлкасига бордик. У универмаг орқасидаги каттакон темир дарвозани кўрсатиб, „шу!“ деди-ю, ура қочди. Назаримда Наргизхоннинг приёмчик тоғасидан, райпода раис бўлиб ишлайдиган отасидан қўрқди. Чори қўрқса-қўрқар. Мен нимадан чўчийман?.. Дарвоза яқинига бордим, кунбўйи офтобда қизиб ётган дарвозани силадим. Қарасам, бир тавақасига қип-қизил тили осилган итнинг расми чизиб қўйилибди. Оббо! Бир камим итга таланишим қолувди энди!

Кўрқа-писа орқага чекиниб, уйни томоша қилдим. Уй эмас, қаср! Пишиқ фиштдан қурилган. Деразасидан мўралайман деган одам каміда беш қулочли нарвон топиб келиши керак. Деворини айтмайсизми? Замбаракнинг ўқи тешиб ўтолмайдиган қалъа ҳам бунчалик бўлмас.

Ой чиққунча күча бошига бордим-келдим, бордим-келдим. Ичкарида чироқ ёнди. Кимдир телевизор қўйди шекилли, деразалардан бирида зангори нур кўринди. Аммо ҳеч ким дарвозадан чиқмадиям, кирмадиям!

Кетдик, тарвузимиз қўлтиғимиздан тушиб! Хато қипман! Асли Тулпоримни миниб келсам бўларкан. „Лолазор“ кам деганда саккиз чақиримча экан. Пиёда тупроқ кечиб уйга етгунимча тонг ёришди.

ЎН ТЎРТИНЧИ БОБ

ИФВОГАР

Раис бува „Хушёр бўл, бригадангга ифвогар бориб қолса ажабмас“, деб юрганча бор экан.

Бугун ўша иғвогар келди. Йигитлар-ку, тушликда қорнини қаппайтириб олишган. Мен бўлсам, деярли қуриб қолган тол панасида саҳрои кабирга айланиб кетган доимий жойимда ўрнимдан жилишга мадорим келмай ётган эдим. Тагинам фил эканман. Мана, масалан, сиз бир кун эмас, бир ҳафта эмас, роса бир ой шуқул ҳаво билан овқатланиб кўринг, ҳолингиз нима кечаркин? Ниначига айланиб қоларсиз!

Шундай қилиб денг, кўксимни ерга бериб ётсам, Тулпорим ҳанграб қолди. Тўғрисини айтсам, Тулпоримнинг илгариги шашти йўқ. Авваллари қандоқ эди! Файратга кириб бир ўқирса етти қишлоқ наридаги ўшаклар пилдир-пис бўлиб қоларди. Ҳозир унақа эмас, мадори етганча икки-уч ҳанграйди-ю, дами ичига тушиб кетади. Биламан. Унгаям қийин. Биринчидан, қариб қолди. Иккинчидан, менинг дард-ҳасратимни эшитавериб юраги эзилиб тамом бўлди. Чамамда, давленияси ошиб, хафақон бўпқолдиёв. Учинчидан, ҳар куни кечаси раппа-расо ўн олти чақирим йўл босади. Саккиз чақирим „Лолазор“га, саккиз чақирим орқага. Ҳар куни ишдан кейин иккаламиз Наргизхоннинг муборак дарвазасини зиёрат қилиб келамиз. Кеча кечаси ҳам борганимиз. Туриб-туриб қайтиб келганмиз... Чарчайди-да, шўрлик-

Шундоқ қилиб денг, мудраб ётсам, Тулпорим ҳанг-

раб қолди. Совуққина, ҳазингина ҳангради. Йигирма минутча олдин ҳам „соат тұрт бұлды“, деб хабар берган эди-ку! Қариб мияси айниб қолдими, нима бало!

Эринчоқлик билан бошимни күтарсам, шийпондаги эски шолчада бир одам чордана қуриб үтирибди. Дарров сездим, үзимизнинг қишлоқдан эмас. Аммо газетадан келадиган мұхбирларғаям үшшамайды. Радиодан десам, ашқол-дашқоли йүқ. Кийиниши ҳам үзимиз қатори. Оёғида чанг босган этик, әгнида, офтобда унниқиб кетген енгисиз қўйлак, бошида эски дўппи.

— Келинг, меҳмон! — деб ўрнимдан қўзғалған эдим, меҳмон, хижолат чекиб, қўл силтади.

— Қимирламанг. Баҳузур. Дам олаверинг.

— Э, бўлди! — дедим қўш қўллаб сўрашиб. — Дам олиб бўлдик. Ҳозир чой-пой...

— Овора бўлманг! — меҳмон билагимдан тутиб, астайдил рад қилди. — Үтиринг, сиз — Қўшоқжонсиз-а?

— Ҳа! — дедим ҳайрон бўлиб.

— Менинг фамилиям — Эргашев! — меҳмон қўзимга синовчан тикилди.

Хаёлимда бир сапчиб тушгандек бўлдим-у, сездирмадим. Вой абллаҳ-е! Раис бува айтган ифвогар сен экансан-да! Ажаб, ифвогар деганда юзидан заҳар томиб турадиган, қора қўзойнак тақадиган, озғинлигидан икки чакаги ич-ичига кириб кетган одам қўз олдимга келарди. Тавба, фитначилар ҳам үзимизга үхшаган одам бўларкан-да!

— Мен — экономистман, Қўшоқжон! — деди ифвогар хотиржамлик билан. — Техникиумда дарс бераман...

Қаранг, мулойим бўлиб қўйнимга кирапти. Экономист бўлсанг үзингта! Лақиљатмоқчимисан? Қўрамиз ким-кимни аврар экан! Раис буванинг „Нима сўраса билмайман, деб туравер“, дегани эсимга тушди.

— Билмайман! — дедим тўнғиллаб.

— Бўлиши мумкин, — Эргашев кулимсиради. (Кулимсирашиям үзимизга үхшайди, ярамас!) — Лекин мен сизни биламан. Сиз — машхур бригадир Қўшоқжон Салимовсиз.

— Билмайман!

— Отангиз Салимжон aka „Машъал“ жамоа хўжалигида анча йил бухгалтер бўлиб ишлаганлар.

— Билмайман!..

— Нима учун Алимов раис бўлиб келганидан кейин кўн ўтмай отангиз бухгалтерликдан бўшаганларини билласизми?

— Билмайман!

Ифвогар узоқ жимиб қолди. Хўрсинди.

— Кўшоқжон... — деди секин. — Айтинг-чи, дунёда онг оғир гуноҳ нима?

— Билмайман!

— Мен биламан! — деди кўзимга тикилиб. Шундагина сездим. Кўзи одамга чақир тиканакдек қадаларкан. Раис бува „Эҳтиёт бўл“ деганича бор экан. — Дунёда онг оғир гуноҳ — ўз онасини хўрлаш! — деди у дона-дона қилиб.

— Нима? — қоним қайнаб кетди. — Ким онасини хўрлабди!

— Ҳаммамиз...

Жинними бу? Нима деб вайсаяпти?

— Оғзингизга қараб гапиринг, aka! — дедим таҳдид билан.

У мендан кўз узиб, пахтазорга қаради.

— Мана шу ер, — деди қўли билан имо қилиб, — ўзимизнинг онамиз, тўғрими? Биз нима қиляпмиз ўзи? Дам бериш ўрнига, бир йил-икки йил, ҳордиқ бериш ўрнига пахта экамиз! Беда сепдик деймиз, пахта экамиз. Алмашлаб макка экдик деймиз, пахта экамиз! Бир ҳисса ўрнига ўн ҳисса, йигирма ҳисса, эллик ҳисса заҳар дори сепамиз. Ўз онамизга ўзимиз заҳар тиқиширамиз. Она-ку, боласининг гуноҳини кечирса кечирар, лекин Ер одамларнинг гуноҳини кечирмайди. Бир куни шунаقا қасос оладики... — у яна ярқ этиб кўзимга қаради... Илонми, нима бало! Күённи авраган аждардек одамни сеҳрлаб қўяди-я. Қанчадан-қанча йўғон комиссиялардан кўрқмаган Раис бува биттагина ифвогардан шунчалик чўчиғани бежиз эмас экан-да.

— Бугун бирор өл-юртни алдаб планни дўндиради, — деди у ҳамон кўзини кўзимдан узмай. — Эртага

ер адойи тамом бўлади. Ўлади, тушуняпсизми, ўлади! — у чуқур хўрсинди. — Томорқангизга нима эккансиз?

— Макка!

— Тўғри! Негаки макка экмасангиз, битта сиги-
рингиз билан иккита қўйингиз оч қолади.

Вой шум-ей! Битта сигир, иккита қўйимиз борли-
гини қаёқдан билди бу!

— Жамоа хўжалиги ҳам эқади ўша маккани! — у
истеҳзоли илжайди. — Далага эмас, қогозга. Кейин
моллар фалон тонна жўхори еди, деб справка ёзилади.
Қоғозга шунақанги кўп макка экиладики, ҳаммасини
еса, сигир тугул, филнинг ҳам қорни ёрилиб кетарди.
Аммо сигирнинг тили йўқ. Емадим деёлмайди. Макка
ўрнига тағин пахта экилади. Қоғозда макка, аслида
пахта, тўғрими?

— Билмайман, — дедим тўнғиллаб.

— Ўзингиз қишлоқда туриб, узумни шаҳардан со-
тиб оласиз! Икки кило олма учун район марказидаги
бозорга тушасиз.

Ичимдаги гапларни кўзимдан ўқиб оляпти-ку, бу!

— Э, билмайман, — дедим тескари қараб.

Энди туриб кетмоқчи эдим у қўлимдан тутди.

— Шошманг! — деди секин. Секин гапирсаям овози
шунақанги ҳокимона эдики, эсанкираб қолдим. — Қў-
шоқжон! — бу сафар у кўзимга илтижо билан термил-
гандек бўлди. — Гектаридан эллик бир центнердан ҳосил
олганингиз тўғрими?

— Билмайман!

— Нега билмайсиз, газетада чиқди-ку, ахир!

— Газетада чиққан бўлса, бундан чиқди, олган-
миз! — дедим зарда билан.

— Бу йил эллик уч центнердан олмоқчисиз, шуна-
қами?

— Оламиз, ишонмасангиз Раис бувадан сўранг!

— Раис бувани қўя туринг, — у елкамга дўстона
қўл ташлади. (Қаранг, яна авраяпти.) — Мен сизга ай-
тайми, Қўшоқжон! Академиянинг тажриба участкасида
ҳам бунақа ҳосил олиш амри маҳол. Сиз — олгансиз.
Қандоқ қилиб?

- Билмайман!
- Ўтган мавсумда бир машинада уч юз эллик тонна пахта тергансиз.
- Терганман! Кутулдимми?
- Унақа бўлса, икки юзта ҳашарчини нега салкам уч ой ушлаб турдинглар? — ифвогар кулди. Жуда хунук куларкан. Бащараси худди йифлаётган одамга ўштайди. — Битта машинада икки юз эллик тоннадан ортиқ пахта териб бўлмайди, укажон! — деди ялингудек бўлиб.
- Э, боринг, мен сизнинг укангиз эмасман! — дедим жоним чиқиб. — Тинч қўясизми-йўқми одамни!
- Бўпти, бораверинг, — у ҳафсаласи пир бўлиб, юзини ўтириди. Ҳайронман, негадир олдидан кетгим келмасди. Жоду қилиб қўйгани шудир-да!
- Кўшоқжон! — деди бир маҳал бошини чайқаб. — Биламан, сизларнинг жамоа хўжалигида қўшимча майдон кам. Лекин майдон бир эмас, икки ҳисса кўп бўлганда ҳам гектаридан эллик уч центнердан ҳосил олиб бўлмайди... Бир нарса сўрасам, кўнглингизга келмайдими? Фақат ростини айтинг: мана, газеталарда сизни мақтаб чиқишади. Эллик центнерчи дейишади. Шунга ўзингиз хурсандмисиз?
- Билмайман!
- Кечалари яхши ухлайсизми?
- Нима бало, жодугарми бу? Ҳали Наргизхонни севиб қолганимният айтиб берар!
- Бир ярим ойдан ошди: мижжа қоқмайман, — дедим хўрсиниб.
- Ана! — у қувониб кетди. — Нима, сиз одамларни кўр деб ўйлайсизми? — деди ҳаяжонланиб. — Энг ёмони шуки, одамлар сизга ишонмайди. Қалбаки „Машъал“-лигинизни билади. Сиз, ҳаммани кўр деб ўйлайсиз-у, аслида ўзингиз кўрсиз!
- Нима? — сапчиб ўрнимдан туриб кетдим. — Ифвогар бўлсангиз ўзингизга! Аммо одамни ҳақорат қилманг!
- Кечирасиз... Узр, — у яна юзини ўтириди. — Бригадангизда қанча одам бор?
- Билмайман! — дедим жаҳл билан.

— Қизиқ, бригадир, ўз аъзоларининг сонини билмаса!

— Биламан! — дедим ер тепиниб. — Ўн бир киши! Кутулдимми ё фамилиясиниям айтайми?

— Нега энди? — ифвогар ҳайратланиб елкасини учирди.

— Бригадангизда ўттиз икки киши ишлайди.

Вой иблис-ей! Вой ярамас-ей! Энди тухмат қилишга ўтдими!

— Ҳов! — дедим бўғилиб. — Яна бир оғиз гапирсангиз...

У пинагини бузмади.

— Ҳаммасини биламан, Қўшоқжон! Меҳнатни сиз қиласиз, ҳузурини улар кўради. Раис, бош бух., эканамис... Булар узоқда ўтирган „ака“ ларининг оғзига қараб туради. Беш миллион тонна сўраса, олти миллион берамиз, дейди. Гектаридан қирқ центнердан ҳосил оласан, деса, олтмиш центнер оламан, деб оғиз кўпиртиради! Умрида пахтазорга кирмаган одам пахтани қаёқдан билсин? Пахтакор меҳнати ўлимдан қийинлигини қаёқдан билсин?! Уларга пахтакорнинг ўзи керакмас, пахта керак! Булар бўлса уларнинг кўнглини овлаб мансабга эришади, орден олади. Жарақ-жарақ пул ишлайди.

Ростини айтсам, ифвогарнинг биттаям гапига тушунмадим. „Улар“ дегани ким, „булари“ ким? Ифвогар бўлса ҳамон пашшадек фингиллаб ётибди.

— Аҳвол шундай кетаверса, биласизми, охири нима бўлади?

— Билмайман, — дедим жоним ҳалқумимга келиб. — Билмайман!

У бирпас жим қолди-да, кўзимга тикандек қадалиб сўради:

— Ўн кун олдин бир юз саксон сўм маош олдингиз, тўғрими?

Нима? Яна қанақа фавро бошламоқчи бу?

— Бултур кузда олти ярим минг сўм даромад қилгансиз. Бригадангиз аъзолари ўртacha тўрт минг сўмдан...

Бу ёғига чидолмай қолдим. Бу қандоқ бедодлик! Нега тухмат қиласди! Ўтган йил якунида юз ўн сўм ол-

тәнман. Бор-йүғи юз ўн сүм! Қирқ уч сүм маош олғашимга уч ойдан ошди. Нимага тұхмат қиласы, бу аблас!

— Йүқол! — ёқасига қүш құллаб чанг солдим. Бүйни чумчукникідек ингічкагина экан-ку, иккі құллаб бүгіб ўтирибман. Битта құлимнинг ўзиям етиб ортиб қоларкан-ку! — Ҳх, аблас, — дедим алам билан. — Шунча шулим бұлса, аллақачон уйланиб олардим! — „Наргизхон“та дегім келди-ю, тилим бормади. — Нега тұхмат қиласан, номард! Нега ҳақорат қиласан, одамни, иғвогар!

Хүшим жойига келиб, мундоқ қарасам, бечоранинг юзи кесак бұлиб кетибди. Лабининг иккі четидан күкимтир сұлак оқыпти. Құлимни бұшатишим билан шилқ этиб ёнбошга йиқилди. Ётган жойида оёқ-құли баравар силкина бошлади. Үтакам ёрилиб кетди. Бир бечорани ўлдириб қўйдим, шекилли! Югуриб бордим-у, ҳовуздан дўппимга сув тўлдириб келиб, юзига сепдим.

Иғвогар инқиллаб кўзини очди.

— Сув! — деди инграб.

Чопқиллаб бориб, яна дўппимни тўлатиб келдим. У уч-тўрт қултум ичди-да, негадир лаби титраб илжайди.

— Билардим, — деди инқиллаб, — ҳалол йигитлигингни билардим, ука. Раҳмат, Салим ақа сени одам қилиб тарбиялаган экан.

Қизиқ, мен уни ўлар ҳолатга солсам-у, бу раҳмат деса. Э, ўл, иғвогар бўлмай!

Дўппимга тағин сув тўлдириш учун ҳовузга таллинган эдим, орқа томонда мотор гуриллади. Чўнқайиб ўтирган кўйи қўлтиғим остидан қарасам, Раис буванинг „Нива“си чанг-тўзон кўтариб, шийпон олдига келиб тұхтади. Раис бува эшикни қарсиллатиб ёпиб, тушдида, шийпонда худ-бехуд бўлиб ётган иғвогарни кўриб негадир илжайди.

— Баҳай, тинчликми? — деди менга қараб.

— Билмайман! Ҳеч нимани билмайман! — шундай деб ҳовуз томон ўгирилган эдимки, ўнг томондаги эшик очилганини, машинадан... Калта енгли гулдор кўйлак кийган, сочини битта қилиб ўриб орқасига таш-

лаб олган Наргизхон тушиб келаётганини күрдим. Дүп-пимни ҳовузга улоқтириб, олдига чопиб бордим. Шийпон томондан Раис буванинг кинояли овози келди.

— Ия, ҳа, ўртоқ „ёзувчи?“ Нима гап?..

— Ҳеч нима...

— Фийбатчининг жазоси шу бўлади, Эргашип!

Наргизхон аввал шийпонда бир ҳолатда ўтирган иғвогарга, кейин Раис бувага, кейин менга қаради.

Дилимдагиларни ҳозир айтмасам, бошқа қулай фурсат топилмаслигини билиб, тутила-тутила гап бошладим.

— Наргизхон! Биласизми?..

У ҳайратлангандек юзимга тикилди. Негадир қора-йиб, озиб кетибди. Иши қўп-да бечоранинг.

— Наргизхон... Мен... Мен сизни қўп изладим, — дедим минғиллаб. — Идорага бордим... Ўн етти марта. Уйингизга бордим. Ўттиз тўрт марта... Тулпорим билан... Қопафон итингиз бор экан...

У аввал қувонгандек бўлди, кейин, негадир қовоғи-ни солди.

— Керакмас, — деди лабини тишлаб.

— Нега?

— Рекс чиндан ҳам қопафон...

— Қопса қопаверсин! Еб қўйсаям майли. Менга барибир.

Наргиз энди жилмайган эди, лаънати Раис бува яна гапнинг белига тепди.

— Қани, жўнаб қол-чи, Эргашип! — деди овози гумбурлаб. — Тинчидингми, энди?

Иғвогар гандираклаброқ уч-тўрт қадам босди-да, негадир менинг ёнимга келди. Қўлимни қаттиқ сикди.

— Хайр! — сал нарироққа борди-да, орқасига қара-ди. — Тинчиганим йўқ, Алимов! — деди йиғлагудек илжайиб. — Токи виждоним тирик экан, тинчимайман!

Унинг гапи бу қулоғимдан кириб, унисидан чиқиб кетди. Ҳасад бўлса, Раис бува билан олишаверсин! Менга нима? Менга Наргиз керак!

— Наргизхон! — шунақсанги чуқур хўрсиндимки, бир яrim ойдан бери ичимда қизиб ётган олов ловуллаб

ёниб кетишдан қўрқдими, лип этиб ўзини „Нива“ ичига урди.

— Оббо азамат-ей! — Раис бува елкамга шаппати-лаганида ҳам икки кўзимни Наргизхон кириб кетган машинадан узмадим.

— Оббо тутхўр-ей! — Раис бува қўлтифимдан олиб тол тагига судради. Эргашиб боряпман-у, кўзим машинада. Наргиз орқа ўриндиқда ўтирибди. Биз томонга қарамайдиям.

— Вой тутхўр-ей! Аммо бопладинг, ифвогарни! Бир йўла ўлдириб қўя қолмадинг-да! Узоқдан кўриб турувдим! Ўзиниям мушук боладай эзфиладинг. Маладес! — Раис бува машина томонга тезгина қараб олди. — Ҳаммаси тушунарли, — деди елкамга тагин шаппатилаб. — Дидинг чаккимас, тутхўр! — У бир лаҳза ўйланиб қолди. Пешанаси тиришди. — Жўрангдан умид йўқ! — деди салмоқлаб, — ўқишини битириб келса, уйлантираман деб юрувдим, ўша ёқларда қолиб кетди. Билмадим, бу ёфи нима бўлади. Эсингдами, ҳов бирда мен сенга оталик қиласман дегандим. Ўша гапим — гап! Тўй қиласмиз... — деди тўсатдан. — Анчадан бери сезиб юрибман. Биласман, яхши кўрасан, шу қизни... Ўзим совчилик қиласман. — У бир зум иккиланган кўйи жимиб қолди. — Тўғри, Жовли Менглиевичлар катта даргоҳ. Аммо мен ўртага тушсан, финг деёлмайди. Қўлни ташла, тутхўр! Сенга оталик қиласман бўлсин! Бир ой ичида тўйингни ўтказмаган номард!

Машина чанг-чўзон кўтариб қўздан гойиб бўлганидан кейингина хушим жойига келди. Нима деди Раис бува? „Шу қизни обераман“, дедими! „Бир ой ичида тўй қиласмиз“ дедими! Наҳотки? Наҳот шу гап рост бўлса!

Толга боғлоғлиқ турган Тулпорим ҳам Раис буванинг гапини тушундими, ўзининг ёшлигини эсладими, қулоқлари диккайиб, иргишлай кетди.

— Эшитдингми, ошна! — дедим Тулпоримнинг бўйнидан кучоқлаб. — Раис буванинг гапини эшитдингми?

Кўзимга тикилиб туриб, худди фолбиндек дилимдаги гапларни айтиб берган ифвогар ҳам, уч ойдан бери

маош олмаганим ҳам паққос эсимдан чиқиб кетди. Күз ўнгимда Наргизхон-у, қулогимда Раис буванинг гапи: „Бир ой ичида тўйингни ўтказмаган номард!“

Кечгача шунақанги файрат билан ишладимки, тракторимни чийиллатиб юбордим!

ЎН БЕШИНЧИ БОБ

РАИС БУВА ОТАЛИК ҚИЛМОҚЧИ

Бугун идорада мажлис бўлди. Жуда катта мажлис. Ҳатто Райком бува ҳам, пахта пунктида ярим кечаси йиғилиш бўлганида қатнашган семиз киши — обком вакили ҳам келди. Хўп антиқа гаплар айтилди.

Шошманг, мажлис-ку, ўз йўлига! Аввал аканг қарагайнинг ҳаётида рўй берган баҳтли воқеаларни айтмасам, пақ этиб ёрилиб кетаман. Уволимга қоласиз!

Ўшанда Раис бува „Сенга ўзим совчилик қиласман“, деганида, ҳарчанд қувонмай, кўпам ишонгим келмаганди. Буям пат-пат олиб бераман, деган гапдек бўлса керакда, деб ўйлаган эдим. Буни қарангки, индинига ярим кечаси уйга келсам, (Тулпорим билан лўкиллаб тағин „Лолазор“га боргандик,) ҳовлимиз гул-гул очилиб кетибди. Сувлар сепилган, ҳамма ёқ чинни-чироқ қилиб, супурилган... Радио варанглаб „Учкудуқ“ни айтиб ётибди. Ошхонада синглим Мавжу ош дамлаяпти. Жиянчамни кўтариб олган онам мени камида ўн йил кўрмагандек қучоқлаб, бафрига босди. Жиянчам фурсатдан фойдаланиб бурнимга чанг солди. (Бодринг деб ўйлади шекилли, шунақанги куч билан тортдики, узиб олишига бир баҳя қолди.) Бурун ачишганига парво қиласман, жиянчани ўпиб эркалатдим. Ширин бола-да, ўзиям.

— Баҳтинг очилди, ўғлим! — деди онам негадир ўпкаси тўлиб. — Пешананг ярақлаган йигит экансан. Тезроқ кир, поччангга салом бер!

Ҳайрон бўлдим.

— Қанақа почча?

— Мавжунинг эри-да! Сендан бир ёш катта-ку, почча бўлади-да, болам!

Ёши катта бұлса үзига! Бириңчидан, у — опамнинг әмас, синглимнинг эри! Демак — күёв! Иккинчидан, Жуни урганда үласи қилиб дүпослаганимдан бери гаплашмаймыз. Қолаверса, кейинги иккі йилда биттаям тиңчать бермади. Шунга салом беришим керакми, инди?

Онам иккиланиб турғанимни сезди. Елкамга қоқди.

— Кира қол, жон болам. Поччанг хушхабар опкелди. Нешиндан бери кутиб үтирибди.

Айвонга чиқиб этик ечаётсам, ичкарида гунгур-гунгур суҳбат! „Наргизхон“, „Жовли Менглиевич“, „Райно“ деган сұзлар қулоғимга чалинди... Бир гап бор шекилли...

Эшиқдан киришим билан хонтахта түрида үтирган күёв дик этиб үрнидан турди. (Авваллари шимининг лазмоли бузилишидан құрқиб стулда үтиради. Йүқ, бу сафар лұла болишга ёнбошлаганча дадам билан бемалол чақчақлашыпти.)

— Қани, суюнчини чўзинг, күёвтўра! — деди шангиллаб. Жиндай „отиб олган“ шекилли, қучоқлашиб кўришди. Димогимга ачимсиқ ҳид урилди. — Шу дардингиз бор экан, бошда айтмайсизми, Қўшоқжон! Биз сизга бегонами?

— Нима? — дедим гарангсиб.

— Қаранг, тағин үзини гўлликка солади, амаки! — (Дадамни „амаки“ дейди.) — Қўшоқжон бало, амаки, Наргизхондек қизнинг бошини айлантириб қўйибди. Тўйни юриштириб юбордик, күёвтўра!

— Ростданми? — уйда дадам үтиргани ҳам пакқос эсимдан чиқиб кетди. Куёвнинг терлаб турган юзидан чўлпиллатиб ўпиб олдим.

У илжайиб жойига бориб үтиради.

— Қўрдингизми? — деди дадамга. — Жигаридан урган. Аммо үзиям зўр жойга қуда бўладиган бўлдингизда, амаки.

Уялган киши бўлиб, пойгакка чўнқайдим.

— Чой борми? — дедим одоб билан.

— Э, чойни қўйсанг-чи, зўр! — куёвнинг қип-қизил

юзи ялпайиб кетди. — Үткірроғидан олиб ке! — деди дилкашлик билан шанғиллаб.

Отамга қарасам, қовоғи солиқ. Лунжи учай-учай де-япти-ю, ўзини тийиб ўтирибди.

— Куда билан мақтанадиган одатим йўқ, — деди тўнғиллаб.

— Ие, қизиқмисиз, амаки, — куёв яна шанғиллади. — Ўғлингизнинг бошига бахт қуши қўниб туриби-ю, сиз ноз қиласизми? Отаси райпо раиси бўлса, тоғаси кимсан Жовли Менглиевич бўлса...

Дадамнинг лунжи учди.

— Менга нима? — деди чимирилиб. — Райпосиям, приёмчигиям бир гўр!

Нима? Дадам қанақа ўзи? Қачон қараса, йўлимга тўғаноқ бўлади! Энди отамнинг қайсарлиги деб Наргизхондан қуруқ қолишим керакми? Бекорларнинг бештасини айтибди! Шунақа қилса...

— Ўйлаб гапиряпсизми? — деди куёв ҳам ранжиб. — Нима қиласиз, пишиб турган ошни ланж қилиб... Айтдим-ку, кеча Раис бува мени идорага чақириб ҳаммасини тушунтириди. Очиини айтсам, шу қизни ўзим келин қилмоқчи эдим, Шодивой нобакор бола чиқди, деди. Қўшоқвойни ҳам ўз ўғлимдек яхши қўраман. Тошкентга обориб ўқишига жойлаштиромаганимдан ҳамон уялиб юраман, қайтага Шодивой эмас, шу бола ўқиб келса кўпроқ фойдаси тегарди, деди. Энди шу қиз бегона га кетмасин, дейман, деди, амаки! Раис бува ўртага тушмаганида қудангиз сиз тугул, райкомгаям эшигини очмасди.

— Худди ўша Раис буванинг ўртага тушгани ёқмай турибди, — дадам қайсарлик билан юзини ўгирди.

Онам дадамнинг феълини билгани учунми ё худди шу гапни кутиб, эшикда пойлаб турган эканми, жиянчамни кўтарганча шахт билан кириб қелди. Тўсатдан шунақанги шовқин солдики, қўлидаги жиянчам чинкириб йиғлаб юборди.

— Қанақа отасиз, ўзи? Шундоқ одамлар ғунчадек қизини дала думбул ўғлингизга бераман деса! Раис бува-

дек киши... — у чириллаб йиғлаётган болани күёвга узатди. — Ушлаб туринг. Раис бувадай киши ўртага тушса! Жовли акадек одам раиснинг юзидан ўтолмай хўп деса, тағин нима нозингиз бор. Нотавон кўнгилга қўтириш жомашов!

— Шуни айтинг! — күёв ҳамон йиғлаётган ўғилчалини овутишга уринди. — Бўлди, ўғлим, бўлди... — отамга юзланиб, ўшқирди. — У қизга кимлар харидор бўлганини биласизми? Раймилициянинг начальниги ўғлига сўраган. Главрач укасига сўратган. Нима қиласайлик, қиз ўғлингизга кўнгил қўйибди. Шунинг ўзи Кўшоқжоннинг омади чопгани эмасми?

Нима? Нима деди күёв? Бундан чиқди, Наргизхоннинг ўзиям...

Шартта ўрнимдан туриб, күёвни белидан кўтариб беш-олти марта чирпирак қилиб айлантирмоқчи эдим, онам тусатдан йиғлаб юборди.

— Харажатидан қочаётган бўлсангиз майли! — деди ростмана ҳўнграб. — Худога шукур. Укам бор! Жиянинг нинг тўйига биттагина ҳўкиз, тўрттагина қўй тўяна қил десам, бўйин товламас.

— Қалин пули биздан! — күёв сал иккиланиброқ турди-да, қўшиб қўйди. — Биламан, сизни қўлингиз қисқароқ. Пенсиядаги одамсиз, лекин хайрли ишни чўзиб бўлмайди... — Майли, ичкиликниям бир чеккасини кўтаришиб юборамиз. Бегона эмасмиз-ку, ахир... Икки ёш бир-бирига кўнгил қўйган бўлса...

— Ана! — онам энди йиғламай қўйди. Овози янаем дадиллашди. — Битта ўғлингиз учун узатган оёғингизни йифмай қўя қолинг!

Маладес, ўзимизнинг онамиз! Бормисиз, энажон!

— Сиз эртага совчиликка бораверинг! — деди күёв онамга қараб. — Бир боришда келин томон нон синдиришмаса, биз кафил!

Дадам лунжи учиб-учиб ўтириди-да, „билмадимов“, деб қўйди. Бу унинг рози бўлгани эди. Хайрият, анча енгил тордим.

Кейинги воқеаларни худди тушимда күраётгандек бўлдим. Куёв рост айтган экан. Онам биринчи боришида келин томон нон ушатишибди. Кейин аканг қарагайнинг, яъни куёвтўранинг нони синдирилди. Бундан чиқди, тамом! Наргизхон энди бизнинг жуфти ҳалолимиз! Дадам ҳам шундоқ одамларга қуда бўлаётганига ишонди: ҳовли деворининг камгак жойларига гувала босиб, қайтадан сомон сувоқ қилишга киришди.

Бундан ортиқ баҳт борми одамга! Раис буванинг яхшилигини нима билан қайтарай! Шодивой шундок отасини хафа қилиб юрибди. Тўйни эсон-омон ўтказиб олайлик, жўрамни излаб Тошкентга бораман, топиб айтаман, „Сен, Шоди, аҳмоқ экансан“, дейман. „Даданг тилло одам, хафа қилма, тезроқ қишлоқقا бор, сениям уйлаб қўяди“, дейман! (Албатта, Наргизхонни унга мўлжаллагани-ю, аканг қарагай илиб кетганини айтмайман. Нима қиласман хафа қилиб, жўрамни!)

Қаранг, шу пайтгача куёвимниям билмаган эканман-да. Йигитнинг марди шу экан-ку!

Тофамни айтмайсизми! Ойим қуданикида нон синдириб келган куннинг эртасига эшигимиз олдида „Зил“ машина вошиллаб тўхтади. Кабинадан тоғам тушиб, машина орқасига зинфиллаб ўтди.

— Бортни очишиб юбор, жиян! — деди илжайиб. Қарасам, машина устида филдай буқа кўндаланг турибди. Қоп-қора, шохлари қайрилиб кетган. Қонталаш кўзлари одамга ўқрайиб қарайди.

— Эҳтиёт бўл, — деди тоғам бортга чиқаётганимда. — Сузонғич экан уккағар! Ўзиям яримта „Запорож“-нинг пулига тушди.

Аслида-ку, бизнинг таомилда қиз томонга ҳўқиз эмас, ўтизтами-қирқтами қўй юборилади. Раис бува отамнинг қўли қисқалигини билгани учун Жовли Менглиевичга шипшиб қўйганми, хуллас, қудаларни биттагина буқа, беш-олтита қўйга кўндирибди.

Киройи келинникига юбориладиган бўлганидан кейин шунаقا гижинглаб турадиган буқа яхши-да! Бизни сузиб бўпти! Борт четига чандилаб боғланган арқонни

счиб, сакраб түшдим-да, пастдан туриб тортдим. Буқа үрини броқ ерга тушди. Түйиб пиво ичган одамдек оғиздан сүлак оқиб, чайқалиб-чайқалиб, уч-түрт қадам босди. Мастми, нима бало?

Эшикдан киргунча индамай келаётган эди. Кейин нима жин урди, билмайман! Бир маҳал қалин лаблари билан ерни исказ, таҳдидли овозда „мүү“ деб ўкирли-ю, найзадек шохларини нақд қорнимга тўғрилаганча гашланиб қолди! Тоғамнинг елкасига қоқиб нуқул дуо қилаётган онам чинқириб юборди!

— Қоч! Ўлдиради! Вой шўрим.

Онамнинг маслаҳатисиз ҳам арқонни ташлаб, аллақачон жуфтак ростлаб қолган эдим. Қанча тез қочсам, буқа лаънатиям кетимдан шунча тез югуради. Ҳайвонла, ҳайвон! Қадамидан ер титрайди. Ҳовлини уч марта айланиб чиқдик. Жонҳолатда югуриб бориб, бурчакда уйиб қўйилган ғўзапоя устига чиқиб кетибман. Бошини қуи солиб келаётган буқа, мўлжални хатороқ олди, шекилли, кучи борича тандирга калла урди. Бошини ғолибона кўтарган эди, шохига тандир илашиб чиқди. Шўрлик бошини у ёққа силкитади, бу ёққа силкитади, қани тандирдан қутулса! Фазаб билан мўраганча думини хода қилиб чунонам югуреди! Боши тандир ичида қолиб йўлни тополмагани учунми, шу кетганча шаталоқ отиб борди-ю, томорқа томондаги деворга урилди. Гурс этган овоздан ҳамма ёқ зириллаб кетди. Буқанинг бошига илашиб қолган тандир уваланиб ерга тўкилди. Буқа орқага тисарилиб, увалло чиранади, қани қимиirlатса! Ғўзапоя устида ўтириб, қўрқа-писа разм солсам, иккала шохи янгидан гувала босиб сувалган деворга санчилиб қопти! Ўл, бу қунингдан, баттар бўл! Тоғам, дадам, мен учовлашиб, икки шохига, бўйнига арқон солиб, молхонага киргизиб қўйдик. Эсон-омон келин томонга жўнатиб юборсак бўлди. Пишириб ейдими, хомлигича сайдими, ўзлари билади!

Тўй тараддуди қизиб кетди. Синглим ҳар куни энам билан райцентрга югуради. Келинга сарпо-сурук, қўрпа қавитиш, бало-баттар деган гаплар бор, ахир!

Фақат Наргизхон камнамо бўпкетди. Кунора идора олдига бораман, деразадан машинка чиқиллашиям эшитилмай қолди. Майли, келин деган куёв билан элбурутдан етаклашиб юрса уят бўлади. Кўпи кетиб, ози қолди. Икки ҳафтадан кейин — тўй!

Сиз томонларда қанақа билмадим-у, бизнинг жамоа хўжалигида тўйлар нуқул қишида бўлади. Тўғри-да, тўй бўлгандан кейин одамлар яираши керакми — керак! Бизнинг одамлар онда-сонда ичади. Аммо бир ичса хурмачаси ёрилиб кетгунча ичади. Бундан чиқди, эртасига ишга чиқолмайди. Шунинг учун тўйлар қишида, хотиржам паллада қилинади. Менга қолганда Раис бува тағин бир оталик қилди. Наргизхон иккаламиз Лайли Мажнун бўлиб юрганимизни тушуниб, тўйни ёзда ўтказишимизга розилик берди. Розилик бердимас, ўзи бошқош бўляпти. Ҳар кўрганда „Қалай, тутхўр, камчиликлар йўқми?“ деб сўраб қўяди. Ҳатто бугунги мажлисдан кейин ҳам шуни сўради. Умуман, бугун умримдаги энг баҳтли кун бўлди. Тўғриси, мажлисдаги гапларга унча қулоқ ҳам солмадим. Энг яхшиси шу бўлдики... Айтаверайми? Бугун... Бугун мени Наргизхон ўпди. Ўзи ўпди. Биринчи бўлиб!

Мажлис эрталаб соат ўнларда бошланди. Узоқдаги бригадалардан ҳам жамоа аъзолари олиб келинган, шекилли, идора олдида юқ машиналари, тележкалар тирбанд. Ишонасизми, биринчи қаватдаги залга одамлар тиқилиб кетди. Орқароқ қаторда биз ҳам ўтирибмиз. Саҳна ёп-ёруғ. Ҳаворанг мовут қопланган столга атиргуллар қўйилган... Саҳнага Раис бува, Райком бува, семиз киши — обком вакили, мелисаникига ўхшаган форма кийган бир одам, мен танимайдиган яна беш-олти киши чиқишиди. Орасида уккикўз Жовли акам ҳам бор. Э, тилимга тирсак чиқсин! Нега энди уккикўз бўларкан. Кўзлари биб-бинойи. Юзиям чип-чиройли. Бошини елкасига тортаётгани йўқ. Бир одамда ҳусн бўлса шунчалик бўлади-да!

Ҳамма ёқ қарсакбозлик бўлиб кетди. Шунда... Тўсатдан юрагим қинидан чиқиб кетай деди. Сапчиб ўр-

нимдан турган эдим, орқамда ўтирган чори этагимдан торди.

— Ўтири-е, терак!

Нега ўтиарканман! Ахир саҳнага Наргиз чиқяптику! Эгнида атлас кўйлак, бош яланг. Сочини турмаклаб олган. Томоғим қуруқшаб, нафас ололмай қолдим.

— Ўртоқлар! — деди Раис бува. — Ўртоқ жамоа аъзолари! Биламиз, ҳозир далада иш кўп. Сизларнинг қимматли вақтларингизни олиб, бу ерга йифишидан мурод шуки, кейинги пайтларда районимиизда Эргашиб деган бир „ёзувчи“ пайдо бўлган эди. Ўша иғвогар ишимизга кўп ҳалал берди. Элни бузишга уринди. Қани, қаёққача бораркин, деб қўйиб бердик. Ўша аblaҳ... — Раис буванинг овози қаҳрли тус олди. — Сиз ҳурматли жамоа аъзоларининг ютугини камситмоқчи бўлди. Ҳаммамизга мағзава сепди. Аммо ҳақ жойида қарор топмай қўймайди. Область, район ташкилотлари бу ишга аралашиб, оқ-қорани ажратди. Бугун район газетамиизда Эргашининг пўстагини қоқадиган пильетон чиқди. Ана, ўзларинг эшитинглар, — Раис бува тўсатдан Наргизхонга бурилди. — Ўртоқ Қўшишаева, марҳамат қилиб иильетонни ўқиб беринг! Одамлар қора кўланканинг кимлигини бир билиб қўйсин!

Наргизхон саҳнадаги стол бурчагидан оҳиста туриб, минбар томон юра бошлиди. Жимжит залда келинингизнинг муборак пошналари қарс-курс этиб турибди. Бизнинг юрак гурс-гурс этади.

Наргизхон минбарга чиқиб, газета қатини очди.

— „Қора кўланка“, — деди жарангдор товушда. Қўнғироқдек овозларингдан аканг айлансан! Мунча ширинсан! Мунча чиройлисан! Мунча ақллисан, Наргизхон! Мунча баҳтлисан, Қўшовой! Нимага юрагинг тарс ёрилиб кетмайди, хумпар!

Хушимни йиғиб олгунимча Наргизхон фельетоннинг ярмини ўқиб бўпти.

— Ютуқларимизни кўролмайдиган, ҳар яхшидан бир ёмон излайдиган, жамиятимизга доғ бўлиб тушаётган бунаقا кўланкалар бизга ёт! — деди у ўқишида давом этиб.

Қизиқ, негадир игвогарга раҳмим келди. Иғвогарми, фийбатчими, барибир яхши одам эди. Масалан, мен эшакдек ишлаб хемири ололмаётганимни ўша айтувдику! Пахта пунктига, пахта ўрнига пул топширишади, деганиям рост бўлса-чи! Ҳов, ўшанда, яrim кечаси пахта пунктида мажлис бўлганида Шайдул кассирнинг папкасини тушириб қолдирганимда нега бунчалик типиричилади? Балки... Папкадаги... Йўқ, жуда керакли ҳужжатлар деди-ку!..

Наргизхоннинг жарангдор овози хаёлимни чилпарчин қилиб юборди.

— Биз меҳнат қиляпмиз. Ҳалол, фидокорона ишлапмиз. Ютуқларимизни кўролмайдиган Эргашев деган қора юрак эса...

Овозларингдан ўзим ўргилай. Бийрон тилларингдан аканг айлансин. Наҳотки мана шу фаришта менинг жуфти ҳалолим бўлса! Наҳот унинг шаҳло кўзлари, бежирим ҳинду холи менини бўлса!

Наргизхон газетани ўқиб бўлиб, Раис бувага узатдида, жойига бориб ўтириди. Жонҳолатда қарсак чалиб юбордим. Бошқалар ҳам жўр бўлди.

— Қани, ким гапиради? — деди Раис бува ўрнидан туриб.

— Мумкинми? — Райком буванинг ёнида ўтирган Жовли ака қўлини баланд кўтарди.

— Марҳамат! Сўз межрайонний пахта пункти приёмчиги Жовли Менглиевичга!

Мен аҳмок, Жовли ака, қариндошим Жовли аканинг кўзлари шунақсанги чиройлилигини аввал нега пайқамабман-а? Қаранг! Кўзлари шунақаям меҳрибон боқади одамга, шунақаям сузилиб кетади.

— Дўстлар! — деди у кулимсираб. — Эргашев бутун районни, қолаверса, бутун байроқдор обласнимизни салкам икки йилдан бери овораи сарсон қиласди. Мана пильетондан кўриниб турибдики, у бориб турган иғвогар экан! Менимча, Эргашев ненормальний одам! Уни жиннихонага топшириш керак. Биз...

Жовли ака энди гапнинг ёғли жойига келганда, Райком бува столни шаппатилади.

— Йүк! — деди ҳайқириб. — Эргашев жинни эмас!

Жовли ака нима қилишини билмай қолди. Яхшиям Раис бува бор экан. Дарров Райком бувага сўз бериб қўя қолди.

— Сўз — ҳаммамиз учун ҳурматли Райком бувага.

Райком бува минбарга чиқмади. Турган жойида гапини давом эттирди.

— Бир латифа бор, эшитганмисизлар? Бир одам тегирмонга кириб, нуқул бошқаларнинг қопидаги унни ҳовучлаб-ҳовучлаб ўзининг қопига solaётганмиш. Тегирмончи сўрабди. „Сен кимсан, нима қиляпсан?“ деса, бояги одам „Мен — жинниман“ дебди. Тегирмончи айтибди. „Жинни бўлсанг, нега ўзингнинг қопингдаги унни бошқаларникига солмайсан“, деса, бояги айтармиш: „Мен жинниман, лекин аҳмоқ эмасман“, дермиш!

Залда қулги янгради. Тўғрироғи, энг аввал Раис бува кулди.

— Эргашип ўшанақа ақлли жиннилардан.

Райком буванинг томоғидаги шафтоли данагидек учбурчак бақбақаси лиқиллаб кетди.

— У бизнинг ютуғимизни кўролмайди. Тўғрими? — деди у семиз кишига — обком вакилига бурилиб.

Семиз киши ҳарсиллаб-гурсиллаб ўрнидан турди. Минбарга боришга эринди шекилли, бу ҳам турган жойида гапириб қўя қолди.

— Эргашев фақат „Машъал“га эмас, бошқа хўжаликларга ҳам тухмат қилган, — деди сув тиқилган сурнайдек фийқиллаб. — Фақат сизнинг районга эмас, бошқа районларга ҳам борган. Фақат пахтачиликни эмас, чорвани ҳам ўзича „тафтиш“ қилган.

— Туври! — биринчи қатордан асабий товуш эшитилди.

Танидим, „Ферма тоға“нинг овози.

— Туври, — деди у бақириб. — фермага бориб, тоза бошимни овритди. Жуз совлиқдан жуз тўқсон жетти қўзи олдиқ, десам, ўзингиз қўшилиб тудифизми дейди, уйинғ қуйғур!

Боядан бери сув қуйғандек жим турган зал қаҳқа-
ҳадан портлаб кетгандек бўлди. Негадир обком вакили
ақалли жилмайиб ҳам қўймади.

— Нега қуласанлар? — ўртароқ қаторда ўтирган
Шайдул кассир ўрнидан сапчиб туриб, қўлини пахса
қилди. — Аллақандай бир ғаламис пок одамларнинг
юзига лой чапласа, шу куладиган гапми?

Залга секин-секин жимлик чўқди.

— Гап шу! — деди обком вакили гийқиллаб. — Эр-
гашевнинг ишини прокуратурага оширишга мажбур
бўлдик. Ўзига ўзи жабр қилди. Оиласи ҳам безор бўлган
экан. Хотини билан суҳбатлашдик. Анчадан буён ажраш-
моқчи бўлиб юрардим-у, икки боламни кўзим қиймас-
ди, деди. — У бир зум жимиб қолди-да, таҳдид аралаш
сўради. — Қани ўртоқлар! Сизларнинг орангиздаям шу-
нақа „ёзувчилар“ борми? Марҳамат! Ҳамма шароитни
яратиб берамиз. Марказга бормоқчи бўлса, қўлига само-
лёт билетиниям олиб берамиз! Гостиницаларга брон-
ниям тўғрилаймиз. Борми, шунақа ифвогар?!

Милицияникига ўхшайдиган формали одам ўтирган
жойида мийифида кулди:

— Кўрқманглар. Пажалиста! Район прокуратураси
Эргашевга ўхшаганларни излаб юрибди ўзи...

Залга ғалати жимлик чўқди.

— Марҳамат, қўрқманглар! — деди семиз киши
баттар фийқиллаб. — Обком бува билан гаплашдик. Эр-
гашевга ўхшаганлар бўлса, бемалол ифво қилаверсин,
дедилар. Борми, шунақа мард?

— Узр! — Раис бува хижолат чекиб ўрнидан турди. — „Машъял“ликлар унақа эмас. Бизнинг одамлар — ҳалол!
Элимиз фийбатларга учмайди. Мана, масалан, Қўшоқ-
жон Салимов! Бу йил тектаридан эллик уч центнердан
ҳосил олишга бел боғлаган илфор бригадиримиз. Қаёқда-
сан, Қўшоқжон!

Мени чақиряптими? Вой, мен нима дейман? Тизза-
ларим қалтираб кетди.

— Турсанг-чи! — орқамда ўтирган Чори гарданимга
шунақанги зарб билан туширдики, гандираклаб ўрним-
дан турганимни ўзим билмай қолдим.

— Қаёқдасан, Қўшоқ! — деди Раис бува аланг-жалаң бўлиб.

— Бу ёқда! — Чори бир ҳайқирган эди, бутун зал менга ўгирилиб қаради. Саҳнага разм солсам, Наргизхон кўзлари ўтдек ёниб, менга тикилиб ўтирибди.

— Иғвогар сенинг бригадангта ҳам борган эди-а? — деди Раис бува.

— Билмайман... — дедим минғиллаб.

Чамамда, гапим оғзимдан чиқди-ю, бурним эшилди.

— Ўша аblaҳ, Салимовнинг бригадасига ҳам борган, — деди Раис бува столда ўтирган катталарга юзлашиб. — Шу ҳалол болагаям туҳмат қилган. Қўшоқжон маладес йигит! Туҳматга чидолмай иғвогарни бўғиб турғанининг устига бориб қолдим. Ажратиб олмасам ўлдириб қўярди. Тўғрими, Салимов!

— Сув бераётгандим! — дедим бўйнимга олиб. — Сиз борганда хуши жойига келувди.

— Эргашип сенга туҳмат қилдими?

— Қилди, — дедим овозимни баралла қўйиб. — Бултур гадовойда олти ярим минг сўм олгансан дейди. Ўн кун илгари бир юз сақсон сўм маош олдинг, дейди, номард! Қани ўша пул? Ўзим тўрт ойдан бери...

Гапимни тугатолмадим. Қийқириқ кулги, қарсакдан қулоғим ёрилиб кетай деди.

— Жим! Тише! — Раис бува столни муштлади.

— Тўрт ойдан бери бир тийин маош олмаган бўлсам... Панжини айтмайсизми? „Уйланаман деб қарзга ботганман, маош қачон тегади“, деб бошимни қотиради.

— Бўлди! — Раис бува негадир асабий бош силкиди. — Раҳмат.

— Турсунбой ака бўлса... — дедим дилимдаги гап қолиб кетмаслиги учун шоша-пиша.

— Бўлди, тушунарли...

— Ойсара янгам...

— Ўчир-е! — Раис бува кўзлари олайиб дағдаға қилди. — Ўтириб!

Ўтирсак ўтираверамиз-да! Гапираман деб кўзим учиб турибдими?

— Кўрдиларингми? — Раис бува қошини чимирди. — Эргашип ҳар хил қаварний саволлар билан оддий меҳнаткашларни чалғитмоқчи бўлган. Қарши бўлмасанглар менда бир таклиф бор. Эргашипга ўхшаган фаламисларнинг қилмишига жавобан бир иш қилсак... Бултур хўжалигимиз бўйича гектаридан қирқ уч центнердан ҳосил кўтарган эдик. Бу йилги мажбуриятимиз қирқ беш центнер эди. Келинглар, ҳаммамиз учун ҳурматли Обком бувага, Райком бувага жамоа хўжалиги бўйича гектаридан қирқ саккиз центнердан „оқ олтин“ оламиз, деб оширилган мажбурият қабул қиласиз! Қани, битта қарсак бўлсин, ўртоқлар!

Раис буванинг ўзи биринчи бўлиб қарсак чалди. Файрат билан чалди. Залдагилар ҳам бирин-кетин жўр бўлди... Бошқаларни билмадим-у, мен мажлис тезроқ тугай қолсин, деган умидда ўнг кафтилни чап кафтилга уриб қўя қолдим.

Тўғри-да, мажлис қанча тез битса, Наргизхон ҳам, мен ҳам шунча тез қутуламиз. Қачондан бери кўрмадим, ахир. Ақалли бир оғиз гаплашиб олай! Энди ўзимники, Наргизхон!

Ҳамма ўзини эшикка урди. Мен бўлсан, саҳнадан кўз узмайман. Катталар битта-битта саҳна четига чиқиб кетишиди. Фақат Наргизхон қолди. Саҳнада у, залда мен.

— Наргиз? — дедим бақириб.

Йўқ, бақирмабман. Овозим шивирлаб чиқибди. Ажаб, у барибир эшитди. Ялт этиб мен томонга қаради-ю, саҳна четидаги зиналардан туша бошлади.

Қатор турган ўриндиқларни тарақлатганча ўша томонга югурдим. Залнинг ўртарогида рўпара келдик.

— Наргиз... — дедим-у, кўлидан ушлашга журъатим етмади. — Розимисиз?

У кўзимга тезгина қараб олди.

— Сиз... — деди овози титраб. — Сиз яхши одамсиз!

Шундай деди-ю, иягимдан чўлл этиб ўпди-да, саҳна томонга чопқиллаб кетди. Ўнг юзим ёниб кетгандек бўлди. Иягимни силаб кўрсам... Фирт аҳмоқман-да ўзим! Кўрмайсизми, бугун соқолимни олмаган эканман! Нар-

гизхон ўпган жой ловуллаган күйи анграйиб қолавердим.
Шу иш ростдан ҳам ўнгимда бўлдими? Наргиз ростдан
ҳам мени ўпдими?

Юрагим қинидан чиққудек бўлиб ташқарига отилдим.

Раис бува фонтан ёнида турган қора „Волга“га меҳ-
монларни ўтқазаётган экан. Одоб сақлаб кутиб турдим.

„Волга“ жўнаб кетгач, у ёнимга келди.

— Оббо, гуппи-ей! — деди бош чайқаб. — Қовун туширишингга бир баҳя қолди-ку, тентак... Майли, зиё-
ни йўқ, — у ёш йигитлардек кўз қисди. — Қалай, кам-
чиликлар йўқми? Қаллиқ ўйинига боряпсанми? Нар-
гизхон энди ҳалолинг-ку! Қачонгача ўргатаман сенга,
тутхўр?!

ЎН ОЛТИНЧИ БОБ

ҚАЛЛИҚ ЎЙИН

Биз эскилик сарқитларидан қутулғанмиз. Бир замон-
лар „қалин“ деган гап бўларкан. Буни қаранг-а, одам
ўзи севган қизни сотиб олса! Бориб турган феодаллик-
ку, бу! „Сут пули“ дейилса, бу — бошқа гап! Ўзингиз
ўйланг: она бечора қизчаси қўкракдан аригунча озмунча
суг эмизганми? Қизчасини ўстириб, қофозга ўроғлиқ
қандек қилиб кўёвнинг кўйнига сопкўйган онанинг
„суг пули“ олишга ҳақи борми, ахир! Бўпти-да, нима
дайсиз тағин! (Дадам фақат эскилик сарқитларига эмас,
янгиликка ҳам қарши одам-да, ўзи! Синглимни узата-
ётганимизда „Она сути пулга сотилмайди“, деб „суг
ҳақи“ олмаган. Онам бечора қанча хафа бўлганди,
ўшандада.)

Ундан кейин... Авваллари келинга камида қирқта,
бўлмаса саксонта кўйлак совфа қилинар экан. Куда то-
мон кўйлакларни ҳамма кўрсин деб қатор қилиб осиб
қўяркан. Буни қаранг: келин саксонта кўйлакни нима
қиласди? Ҳар йили иккитадан кўйлак кийганда ҳам, шун-
часини тўзитгунча қирқ йил ўтиб, кампир бўлиб қол-
майдими? Устига устак семириши бор, озиши бор?
Мода эскириши бор! Ҳозир бу сарқитдан ҳам қутул-

ганмиз. Бор-йүги „түққиз“ қилинади. Яъни түққизта рұмол (орасида пуховой рұмол ҳам, японский сим рұмол ҳам бўлиши шарт), түққизта сирға (ёкут кўзли, фируза кўзли... Бриллиант кўзлисиям тешиб чиқмайди). Түққизта кўйлак (атлас, шойи, парча, замонавийрографи бўлсин десангиз — шифон, лайло, купон), түққиз жуфт туфли (баланд пошнали, паст пошнали, уйда киядиган, кўчада киядиган, ҳовли супурганда киядиган, кир ювганда киядиган), түққизта пайпоқ, түққизта узук, түққизта... Яна нимайди? Хуллас, у ёғи ҳимматингизга боғлик. Тўғри-да! Келин дегани очилиб-сочилиб юриши керакми, ахир. У уйгаям, кўчагаям бир хил кийим кийсинми?

Куда томонга юбориладиган ўттизтами-қирқтами қўй (биз осон қутулдик: битта ҳўкиз, билан бор-йүги тўрттагина қўй бердик, холос) юз киломи-икки юз киломи гуруч, ўн-ўн беш қоп ун, беш-ўн яшик ишқалад конфет, бир-икки яшик чой, сабзи-пиёз... Хуллас, арзимаган нарсалар. Нима, куда томон ҳаммасини ўзи ермиди! Эл олдига дастурхон ёзади, мана, бизнинг куёвни кўриб қўйинглар, дейди.

Раис бува Сожида қизининг тўнгич ўғлини тўй қилганида (уйлантириш эмас, ўғил тўйи қилганида) ўз қўзим билан кўрганман: тўйхонанинг қоқ ўртасига юк машинаси гуриллаб кириб келган. Машина устига ичкилик тўла яшиклар тахлаб қўйилган экан. Тўйга келганлар ўз мавқеига қараб, бир хиллари бир яшик коњякми, бир хиллари икки яшик арақми, виноми, машинадан ўзи тушириб олиб тўйгунча ичган эди... Бизнида қанақа бўлишини яна ўйлаб кўрамиз, ҳали орада „Раис чақирди“ бор. Буям ўзига хос одат. Тўй арафасида жамоа хўжалигининг энг ақлли, энг доно катталари тўпланиб, бир қарорга келиши керакми, ахир? Тўй дегани кенгашсиз бўлмайди-ку, тўғрими?!

Хуллас, биз томонларда эскилиқ сарқитлари йўқотилган. Фақат битта одат ҳамон бор. У ҳам бўлса „қаллик ўйин“. Афсус, шундоқ яхши удумимиз йўқолиб кетяпти. Бутун бошли областимизнинг нари борса икки-уч жойида сақланиб қолган. Ростини айтайми? „Қаллик ўйин“

ҳеч қанақа „сарқит“ эмас! Менга қолса, бу одатни бутун Ўзбекистонга ёйиш керак!

„Қаллиқ үйин“ни ким үйлаб топган бўлса, отасига минг раҳмат! Нима қипти! Куёв ўз ҳалолининг уйига боради. Албатта, кундузи — эл назарида эмас, қорон-филатиброқ боради. Албатта, эшикни очиб кирмайди. Девор ошадими, туйнукдан эмаклайдими, хуллас, бир йўлини топади-да! Ҳар борганида қўлида келинга аталган биронта совға бўлиши шарт. Атирми, бир жўра атласми... Майли-да! Келиннинг онасиға икки лўппак чойми, бирон кило ишқаладми, қўшиб олса, яна яхши. Негаки, „қаллиқ үйин“нинг бир шарти бор. Куёв „ўғринча“ борганини келин билан онасидан бўлак ҳеч ким билмаслиги керак. Худо кўрсатмасин, агар келиннинг отаси қўриб қолсами?! Шунақанги жаҳли чиқади, шунақанги жаҳли чиқадики... Тескари қараб, уйдан чиқиб кетади! Албатта, бутунлай эмас, бошқа ёқقا ҳам эмас, нариги уйга кириб эшикни ичидан беркитиб олади.

Бугун биз қаллиқда кетяпмиз! Бошда яп-янги дўппи. Эгнимизда оппоқ кўйлак, жинси шим. Илгари ҳеч бунақа шим киймаганим учунми, оёғим тахтакачлангандек қотиб турибди. Чўнтакда „Кармен“ деган атир (қайнанамизга совға), қўйинда бир жўра „жуҳуд“ атлас — Наргизхонга падарка! Шу кунгача Наргизхоннинг уйига Тулпоримни миниб келардим, бу сафар Турсунбой акамнинг пат-патини миниб олганмиз. Тўғри-да, қаллиқ үйинга ҳам эшак миниб борадими, одам. Тағин Наргизхоннинг олдига-я! Кеча Турсунбой акамга шуни айтган эдим, „пат-пат“ меники эмас, умуман, ҳеч нима меники эмас, янганг билан гаплашавер“, деб тўнғиллади. Ойсара янгамга қойилман. Бу сафар ҳечам зиқналик қилмади. Наргизхоннинг отини айтишим билан бўйнига осиб олган пат-пат калитини дарров олиб берди. „Бахтли-саодатли бўлинглар, ўзинглардан тининглар“, деб дуо ҳам қилди. Мотоцикл кўпдан бери миниilmагани учун аккумулятори кучсизланиб қолган эмасми, педални тепавериб, терлаб кетдим. Йўқ, ҳайтовур бир амаллаб моторни ўт олдирдим. Мана, кетяпмиз, „лулка“ни елдириб!

Наргизхоннинг қасрдек уйи олдига етиб келганимда аллақачон қоронғи тушган эди. Барибир барвақт келиб қолибман. Ўзим ҳовлиқдимми, пат-пат „Жигули“дек елдими, билмайман. Ҳар қалай, күчанинг у томон, бу томонида ивирсиб юрган одамларни кўриб уялдим. Мотоциклни универмаг панасига олиб ўтиб кутиб турдим. Назаримда, минг соат ўтдиёв! Ниҳоят, кўчалар тинчиб қолди.

Тариллатиб оламни бузмаслиги учун пат-патни етаклаб Наргизхоннинг дарвозасига келсак, ҳамма ёқ жимжит. Шоти қўйса етмайдиган деразаларда чироқ ўчган. Юрагим гупиллаб кетди. Бундан чиқди Наргизхоннинг онаси ҳовли ўртасидами, дарвоза олдидами, бизни кутиб турибди. Чўнтағимдаги атирни пайпаслаб қўйдим, жойида! Қизиқ, келиннинг ўзи қайси хонада экан?

Таваккал қилиб, дарвозани итаргим келди-ю, но мус қилдим. Манави падар лаънат деворнинг бирон ерида наҳра-паҳра жойи бордир, ахир! Бир вақтлар Ойсара янгамникига мушак сабзи олиб чиққанимда туйнукдан ўтганим эсимга тушиб кетди.

Мотоциклни дарвозадан эллик қадамча нарига, девор тагига обориб қўйиб, ҳамма ёқни текшириб чиқдим. Қаёқда! Девор, хумпар, бошдан-оёқ пишиқ фиштдан урилган, лой ўрнига цемент ишлатганми, нима бало! Туйнук тугул, тирқиш ҳам йўқ. Тағин бу деворга одамнинг бўйи етса экан! Туянинг устига чиқиб осилсанг ҳам, қўлинг чўзилиб қолади. Нима, уйимга бориб нарвон олиб келишим керакми энди! Хуноб бўлиб турган эдим, девор этагида, йўл ёқасида ғўдайиб турган бақатеракка кўзим тушди. Бахтимни қарангки, деворнинг у томонида ҳам гилосми, олчами, аллақандай дараҳт хўппайиб турибди. Жуда соз-да! Теракка осилиб, деворга чиқамиз. Деворга миниб олиб, озгина сурилсак, нариги томондаги дараҳтга етиб оламиз. Кейин қарабсизки...

Келинга аталган атласни елкамга ташлаганча теракка тирмашдим. Иш бундоқ бўлти. Бир зумда девор устига миниб олдим. Девор тепасига қиррадор қилиб тунука ёпилган экан. Сабил қолгур тунука кун бўйи офтоб

тигіда қизиб ётган эканми, шим тагидан орқамга жазилаб ёпишди. Күлимнинг куйганини айтмайсизми! Хүш, нима бўпти? Жон куйдирмасанг, жонона қайдада! Биламан, Наргизхон қўша-қўша хоналарнинг бирида мени интизор кутяпти. Онаси айвондами, ҳовлидами, ҳақ леб йўлимга кўз тикиб ўтирибди! Атири чўнтағимдами ахир? Жойида.

Яп-янги жинси шим ҳам расво бўлди! Атласга чанг юқмаса бас! Эрта баҳордан бери тунукага қўнган икки ёнлик чангни супуриб, сурила-сурила, ҳовли томондаги дарахтга омон-эсон етиб олдик. Гилос экан! Осмон бравар ёнгоқдан калла ташлаган одамга аллақандай гилос нима бўпти? Дарахт эмас, нақд шотининг ўзгинаси-ку, бу! Биз келишимизни мўлжаллаб атайлаб экиб, ўстириб қўйишганми дейман!

Икки қулочча жой қолганда тап этиб ерга сакрадим. Елкамга ташлаб олган атлас, сирғалиб, тупроққа тушди. Энгашиб, энди атласга қўл чўзган эдим, орқа томондан „F-фап“ деган ваҳимали товуш эшитилди! Юмшоқ жойим чунонам ачишдики, қўзимдан ўт чақнаб кетди! Жонҳолатда бурилиб қарасам, қулоқ-думи кесилган, камида Тулпоримнинг ярмича келадиган ит орқамга ёпишиб тортқиласяпти. Кўзлари оловдек ёниб, нуқул ириллайди, ҳайвон!

Уриб бўлмаса, тепиб бўлмаса, нима қилсаям, Наргизхоннинг ити! Жоним оғриб кетяпти-ю, дод солишга ор қиласман. Куёвмиз, ахир! Атласни ҳам унутиб, гилосга тармашдим. Шундаям қўйиб юбормайди, абраҳ! Индамай турсам, еб қўядиган. Чап оёқлаб кўкрагига бир тепдим-да, шохдан-шохга сакраб деворга чиқиб олдим. Бақатеракка етиб олишга қаноат қилмай, ўзимни таппа ерга отдим. Хайрият мотоцикл жойида турган экан. Педални увалло тепаман, қани ўт олса, лаънати! Йўқ, охири тун сукунатини тилка-пора қилиб, патиллаб кетди. Ҳа, майли! Аввал эгасига уйланиб олай, Рексни дарахтга боғлаб қўйиб, шунақанги савалайманки, итнинг кунини бошига солмасам, Кўшоқ отимни бошқа қўяман!

Мотоциклини тариллатиб, ҳайдаб кетдим. Ўнг думбам ловуллаб ачишарди. Калламга ғалати ўйлар келди. Қизиқ, ит боғлоқмиди, ечиқмиди? Келиб-келиб ит боғланган даражтдан тушдим шекилли...

Хаёлимни тўплаб олмасимдан орқа томондан бояги ваҳимали, бўғиқ вовуллаган овоз эши билди. Эгарда ўтирганча бурилиб қарасам, худди ўша лаънати ит қоронфида жунлари хурпайиб кетимдан югуриб келяпти. Бундан чиқди, ечиқ экан-да. Дарвоза ҳам очиқ экан-у, биз билмабмиз!

Кучим борича газни босдим. Буни қарангки, абраҳ ит мотоциклдан ҳам тез югуаркан. Худди самолётдай учиб келяпти. Қарасам, ириллаб келиб сонимга ёпишадиган. Жонҳолатда тормозни босган эдим, куч билан келиб лулкага урилдими, нима бало, орқа томонда аянчли „ванг-г-г“ деган овоз эши билди. Пат-патим йўлга қўндаланг бўлиб қолди. Ўгирилиб қарасам, чанг-тўзон орасида менинг жонимга озор берган ит типирчилаб ётибди. Ўл! Бу кунингдан баттар бўл!

Ҳамон ловуллаб ачишаётган жойимга қўлимни олиб борсам, кафтимга иссиқ нарса тегди. Тушундим. Бундан чиқди, синглим атайлабдан бозорга тушиб олиб келган жинси шимнинг бир парчаси итнинг оғзида қолибди. Ким билсин, ўзимизга тегишли этнинг ҳам талайгина улушкини ямлаб ютдими, бу очофат!

Бир маҳал ёрқин чироқ нуридан қўзим қамашиб кетди. Рўпарадан учиб келаётган аллақандай машина фийқиллаб тўхтади.

— Жонингдан тўйганмисан, аҳмоқ!

Ие, овоз танишга ўхшайди-ку! Ким бўлди бу?

Машинанинг чап эшиги очилиб ёпилди. Шофёр чироқ нурига ўтиб, қўлини пахса қилди.

— Эсингни едингми?

Ҳа, Раис бува экан! Кун иссиқ бўлса ҳам эгнида костюм, медалларини тақиб олган!.. Қизиқ, нега шофёр йўқ?

Шу пайт ўнг томондаги эшик ҳам очилди. Кимдир ерга сакраб тушди. Ҳаяжондан „ярадор“ жойимнинг

ачишиши ҳам паққос эсимдан чиқиб кетди. Наргизхонку! Атлас күйлак кийиб олибди. Чироқ нурида оёғида оқ туфлиси борлигини ҳам күрдим. Энди чақирмоқчи әдим, Раис бува шодон хитоб қилди.

— Э, сенмисан, тутхұр! Нима қилиб юрибсан, бемаҳалда?

Раис билан нима ишим бор? Хаёлимда бошқа гап чарх уарди. Бундан чиқди Наргизхон уйида йүқ экан-да.

Наргиз менга ярқ этиб қаради-ю, тупроқ чангитиб, биз келган томонга югуриб кетди. Тушундим, Раис буванинг олдида мен билан гаплашишга уялди...

Раис бува яқин келиб, құл чўзди.

— Оббо, тутхұр-е! — деди құлымни қисиб. — Тушунарли... Бугун шунақа бұпқолди, Күшоқжон! Районга мажлисга чақиришувди. Қаллигинг ҳам бориши керак эди, үтир машинаға.

У ҳамон йўл ўртасида кўндаланг турган мотоциклга разм солди-да, кулимсиради.

— Турсунбойнинг пат-пати-ку! Ўзимга айтмайсанми, янгисини падарка қилмайманми!

Эгардан тушишга уялардим. Шимим дабдала бўлиб кетган, орқам ачишяпти, қуриб кетгур.

— Бўпти, мен кетдим! — Раис бува „Нива“га минди. Машинасини кескин бурди-да, гизиллаб ҳайдаб кетди.

Наргизхон кетган томонга қараб қўйдим. Ўзи ҳам, ити ҳам кўринмасди. Чанг-тўзон орасида анча туриб қолдим...

ЎН ЕТТИНЧИ БОБ

ТҮЙ

Кўнгли ўсган одамнинг яраси ҳам тез битаркан. Наргизхоннинг Рексжони қопган жойим бир ҳафтача ачишиб юрди-ю, барибир тузалди. Ҳеч кимга айтмай ойнага тескари қараб ярамга кўкдори сурдим. **Кигиз** куйдириб босдим. Хуллас, ўнг томоним кирза этигимнинг тагчармидек қотиб қолганини ҳисобга олмаганди,

кўп ўтмай сен кўр-мен кўр бўлиб кетди. Қайтага яхши: ўша ёғимни ерга бериб ётсам, зах ўтмайди.

Бахт келса, қуша-қуша... деганларидек, ҳаётимда бирваракай иккита қувончили воқеа бўлди. Биринчидан, тўй. Иккинчиси... Шодивой келди! Ишонасизми, шунча йилдан бери қишлоқقا қадам босмай қўйган, ўқишни битирганидан кейин Тошкентда ишлаб қолган жонажон жўрам Шодивой тўйдан бир кун илгари уйимизга ўз оёғи билан кириб келди. Ўлай агар танимадим. „Запорожец“ини „Ферма тоға“нинг пичан фарамига калла қилдириб, Раис бувадан дакки еган жўрам шуми? Тошкентдаги гастинисада пул санайман деб шайтонлаб қолаёзган дўстим шуми? Қуёндек биққигина, юмшоққина ўртогим, чунонам ўзгариб кетибдики, одамнинг ақли шошади. Қоматни қаранг, қоматни! Қилич дейсиз! Одамга шунақанги синчилаб тикиладики, кўзи рентгенга ўхшаб, у ёғингдан кириб бу ёғингдан чиқиб кетгудек. Иккиланиброқ турган эдим, югуриб келиб, бир қучоқлади, бир қучоқлади, қовургаларим қирсиллаб кетди. Нуқул ўпади, хумпар!

— Қўйвор, ялаб ташладинг-ку, одамни, келинниям ҳақи бор бизда! — деб аранг қутулдим.

Хуллас, тўй устига тўй!

Майли, яххиси, бир чеккадан гапириб бера қолай. Шундоқ қилиб, таомил бўйича никоҳ тўйидан уч кун олдин „Раис чақирди“ бўлди. Отам тўй ташвиши билан елиб-югуриб, қон босими ошиб кетгани учун куёвим „Раис чақирди“га келадиган азиз меҳмонларнинг дастурхонига тааллуқли масалаларни онам билан маслаҳатлашиб қўя қолди. Бизларни овора қилмаслик учун рўйхатни ўзи тузиб келган экан. Чўнтағидан қофоз чиқариб шариллатиб ўқиб берди.

— Қанд-қурс, ҳўл мева, қуюқ-суюқ овқат ўз йўлига! — деди томоқ қириб. — Хўш, дегандан, беш кило қоқоти бодом. (Катта одамлар тишида чақиб ўтирса уят бўлади. Икки бармоғининг орасига олиб бир қисса ўзи синиб кетадигани тузук.) Уч кило ёнгоқ! (Чақиб мағзини ажратиб олишга вақт қани? Бозордан тайёр мағзи-

ни олиб құя қоласиз.) Түрт кило шүрданак. (Биз томон-ларда яхшиси топилмайды. Бухородан олиб келасиз.) Беш кило қора майиз. (Бунинг яраси осон. Райцентрдаги бозорда Учқоранинг манаман деган майизини сотади.) Анор суви (Раис бува конъякни анор суви билан закуска қиласылар.) Уч литрли шиша баллонда түрттагина бұлса стиб қолар. Аммо свежий бұлсин. Дашибодники бұлса, яна яхши. Нордон — ширин-да! Сабзи суви. (Унисини күпчилик ичмайды. Аммо Шайдул кассир арақ зотини оғзига олмайды. Ичкиликнинг ўзи тугул шишасидан қазар қиласы. Шу одамга.) Ҳа, боринг ана шундан беш литр бұлсин! Товук — ўтизта. Яхна гүшт — ўн кило. Ичкилик. Бир яшик конъяк — арманский. Жуда бұлмаса, „Белий аист“ дегани бор. Раис бува ўзимизнинг хашаки конъякларни ичмайдылар. Арақ — бир яшик. Пиво — уч яшиги етиб қоларов... Шампан керакмас. Мабодо Қўшоқжоннинг ўзи ичмаса... — у менга бир имо қиласыла, тағин томоқ қирди. — Битта қўй сўймай илож йўқ. Раиснинг олдига калла келиши керак-ку!

Куёв рўйхат ёзилган қофозни буқлаб-буқлаб чўнта-гига сукди. Эски кўрпачада хомуш ўтирган онам бармоқларини букавериб, ҳисобдан адашиб кетди шекилли, қўзлари жавдираб менга қараб қўйди.

— Сабзи суви неча дона эди? — деди гарангсиб.

— Булар... Тўйнинг дастурхонигами? — дедим куёвга термилиб.

— Нима? — куёв илон чаққандек сапчиб ўрнидан туриб кетди. — Сиз эчки олаётганингиз йўқ, Қўшоқжон, — деди овози титраб. — Уйланяпсиз... Биз ҳам „Раис чақирди“ қиласылмиз. Бир эмас учта қўй сўйганмиз. Ким билади, „Раис чақирди“га Райком буванинг ўзиям кепқоладими?... Улар ҳам сизу бизга ұшаган одам! Битта қорни бор. Ўлгунча эмас, тўйгунча ейди. Қолганини тўй дастурхонига тортиб юбораверасиз-да!

...Шундоқ бўлди. „Раис чақирди“га қишлоғимиздаги энг мўътабар одамлар келди. Яъни Раис бува, „Ферма тоға“, найнов Шайдул кассир, ўзимнинг тоғам, куёв. Дадам билан мени ҳисобламаганда беш киши бўлишиди...

Бодомлар чақилди, ёнғоқлардан тановул қилинди, ҳандалак ейилди... Раис бува конъякни анор сувисиз ичол-маслиги рост экан. Анор сувимиз дидига унча ўтиришмадими, бор-йўғи бир шишагина конъякни бўшатиб „Энди бизга узр, мажлисга борадиган одаммиз, бошқа ичолмаймиз“, деди. Шайдул кассирнинг арақ зотидан хазар қилишиям тўғри экан. Саккизтами, тўққизтами пивони уч литрли сабзи сувига омухта қилиб ичди-да, теракдек қаддини ростлаб, бир-икки силкиниб қўйди. Пиво пастроқ тушсин деди чоғи...

Шўрва ичиб, ош еб бўлингач, асосий мақсадга кўчилди.

— Хў-ўш, Салимбой aka! — деди Раис бува пеша-насидан маржон-маржон оқаётган терни сочиқ билан артиб. — Куда томонга жўнатиладиган ҳамма нарсалар жойида-а? Ҳўқиз, қўйлар, гуруч, латта-путта, „тўққиз“лар.

— Жойида... — бир чеккада ўтирган отам, зўрға овоз чиқариб минғиллади. Бечоранинг ранги кетиб, лунжини униришгаям мадори қолмаганини пайқадим.

— „Сут пули“, қуда-кудағайларга сарполар?..

— Ҳаммаси, — деди дадам баттар дами ичига тушиб.

— Маладес! — Раис бува „Қо-о-оп“ этиб кекирди. — Бўлмаса, масала ҳал экан-да! „Қизил тўй“ининг тартибини келишиб олсак бўлди. Микрофон...

— Биздан! — куёв қўлини кўксига қўйиб ўрнидан турмоқчи эди, чайқалиб, ёнбошлаб қолди. (Мехмонлар келгунча пишиб қолганди ўзи.)

— Биздан! — деди шангиллаб. — Техниканинг пирри — ўзимиз...

— Яхши! — Раис бува яна бир кекирмоқчи бўлди-ю, шаштидан қайтиб, чуқур нафас олиб қўя қолди. — Биламиз, тўй дегани ичкиликсиз ўтмайди. Беш яшик конъяк. Ўн яшик арақ. Уч яшик шампан, йигирма яшик пиво, ўттиз яшик минерал сув... Иссиқда сув жуда кетади...

Дадам Раис буванинг оғзидан муттасил отилиб чи-

қаётган сўзлардан қулоғи қоматга келгандай, икки юзи қўкариб кетди.

— Шунча ичкилиқ... Иссиқ кунда, — деб мингиллаған эди, Раис бува жеркиб берди.

— Ўлар жойдамисиз, Салим ака! Биттаю битта ўғлингиз... Эл ичида юрган одамсиз... Биз сизга қўпкари қилиб совринга ҳўқиз қўйинг деётганимиз йўқ, олиш қилиб, товоқ қўйинг деётганимиз йўқ. „Қўй сўйди“ қилинг, „куёв қочди“, „супра қоқди“ қилинг демадик! Нима қилсак, элимизниң обруси кетмасин, деб қиляпмиз. Ана, „Правда“ жамоа хўжалигида бир сувчи ўғлини тўй қилди. Олишнинг совринига тую қўйибди, азамат! Ушалардан кам жойимиз борми?! Яхшимас-да! — у аразлаб „Ферма тоға“га қараган эди, шурданак чақиб ўтирган „Ферма тоға“ тасдиқлади.

— Туври! Монға қоранг, Салимбой ака! Пул керакма сизға, обрўма?

— Райком бувани тўйингизга келишга аранг кўндирам, — Раис бува норозилик билан қошини чимирди. — Куёв ўзимизниң йигит дедим. Жовли Менглиевичниң қанча қадрдонлари бор. Ким билсин, ҳали обкомдан ҳам келиб қолишадими... Ундан кейин... Камида тўрт состав яллачилар бўлсин! Телевизорда чиқадиганларидан айтинг! Қаланғи-қасанфиларниң кераги йўқ. Хўуш, энди... — Раис бува чуқур ўйланиб қолди. — „Шарватхона“да ким туради?

— Мен! — куёв тағин ўрнидан турмоқчи бўлди-ю, бу сафар ёнбошлаб ўтиrmади. Гурсиллаб йиқилиб қўя колди.

— Бекор айтибсан! — Раис буванинг жаҳли чиқиб кетди. — Қўйни бўрига топширап эканмиз-да! Мехмонлар келмасидан арақнинг ярмини уриб қўярсан. Гап шу: „шарватхона“да Шайдул туради!

— Маъқул, Раис бува! — Шайдул кассир қўлини кўксига қўйди. — Бир шиша пивони бегона қилган — номард!

¹ Шарватхона — тўйда ичкиликлар сакланадиган жой.

— Маладес! Вечерни Жовли Менглиевичнинг ўзи бошқаради. Куда томон бўлсаям, зиёни йўқ. У кишини ҳамма катталар танийди... Ундан ташқари... Одамларни состап-состап билан жойлаш керак. Тўрда ўтирган катталарнинг олдида ҳар хил қаланғи-қасанғилар ўралашиб масин. Бизнинг истолга главний эканамис баковул бўлсин: парадичний одам. Бўлдими, опке, қаллани.

Раис бува менга буюргани учун дик этиб ўрнимдан турдим-у, ошхонага югурдим. Онам қўйнинг калласини аллақачон товоққа солиб тайёр қилиб қўйган экан. Қўй бечора сўйилаётганида бир кўзини юмиб ўлган эканми ё калла қозонга тушгандан кейин бўлганми, билмадим. Хуллас, калланинг чап кўзи жойида, ўнг кўзидан дарак йўқ.

Раис бува каллани чаққонлик билан кесиб тақсимлашга киришди. Дадам, шу уйнинг эгаси бўлгани учун улушига қўй пешанасининг гўшти тегди.

— Сен, Шайдулбой, хатга кўп тикиласан! — деди Раис бува тантана билан. — Кўзинг ўткир бўлса, ҳисобдан адашмайсан... — У пешанасидан муттасил оқаётган терни билагига артиб, каллани ўгириб қараган эди, қўйнинг кўзини тополмади. Ҳайрон бўлиб, бу томонини айлантириди. Енгил тортиб, кўзни пичноқ учига илиб, Шайдул кассирга узатди.

Куёв запчаст тарқатадиганида тили янаем бийрон бўлиши учун тилни тановул қилди.

— Яхши ҳасип экан, — деб қўйди лабини чапиллатиб.

Раис бува қўйнинг жаф гўштидан мўлгина кесиб олди.

— Сен бола маданият бошқармасида ишлайсан, кесакдан ўт чиққанми, нима бало, нуқул адолатдан гапирасан! — Раис бува жаф гўштини тоғамга илинди. — Ма, жафингга қувват берсин!

Бизга қулоқ тегди.

— Ма, тутхўр! Қулоғинг динг бўлса, келиннинг шивирлашини яхши эшитади! — Раис бува „қойил қилдимми“ дегандек ҳаммага бир-бир қараб қўйди.

„Ферма тоға“ қийқириб кулди...

— Туври, Раис бува! Қулоқ жеса, қулоғи узун бўлади!

Раис бува дандон сопли пичоқ билан қўйнинг бош суюгини чакди-да миясини туз, мурч билан ийлаб дума-лоқлади, каттароқ ёнғоқдагини ўзи еб олди.

— Р-раҳмат! — деди куёв ётган жойида ғўлдираб. — Р-раҳмат, Раис бува. Миядан кўпроқ енг. Ақлингиз тў-лишади!

Шу билан „Раис чақирди“ поёнига етди. Раис бувага тўн, Шайдул кассирга дўппи, „Ферма тоға“га қийик совфа қилдик. Азиз меҳмонлар хайрлашиб чиқиб кетганидан кейин асосий тўй тараддути бошланди.

* * *

Раис бува отамга „Тўйингизга катталар келади“ дегани бежиз эмас экан. Бир одамга хурмат бўлса шунчалик бўлар! Отам бир пенсионер бўлса, мен хашаки бир бригад бўлсан. Тўйимизга семиз обком вакили, Райком бува, пахта заводининг директори — тақирбош Викторов, — яна қанчадан-қанча казо-казолар келиб ўтиради-ю, мен севинмай ким севинсин! Аслида қайнатам ҳам келаверса бўларди-ю, таомил бўйича қизнинг отаси тўй куни куёвниги бормайди-да! Ҳаммадан яхшиси шуки, қадрдон жўрам Шодивой куёвнавкар бўлиб келинниги борди. Наргизхоннинг дарвозасидан кириб бораётганимизда аллақандай қилтириқ кампир „ун сочар“да мўлжални нотўғрироқ олиб кўзимга ун сепиб юборганини ҳисобга олмаганида, ҳаммаси зўр бўлди! Мен-ку, майли, Шодивойнинг кулранг костюми ҳам оппоқ унга беланди. Тўй қиласман, деб бўғзимизгача қарзга ботиб қолмаганимизда-ку, жўрамга эртагаёқ кулинг ўргилсин костюм совфа қилардим-а...

...Мана, ўтирибмиз, дастурхон тўрида! Ҳовлимиз машъала бўлиб кетган. Столлар ноз-неъматларнинг кўплигидан беланги бўлиб қолган. Ўнг ёнбошимда Наргизхон... Юзига ҳарир парда тутиб ўтирибди. (Пардаларингга жоним тасаддуқ.) Чап томонимда Шодивой! Яп-янги костюми расво бўлгани ҳалиям эсидан чиқмаганми, ҳайронман, қовоғи соликроқ. Нариёқда келиннинг дугоналари. Раис буванинг ёнбошида **Райком бува**.

Райком буванинг ёнида обком вакили, унинг ёнида Викторов!

Биз ўтирган қатор — улувларники! Ўзим-ку, ичмайман. Аммо „Наполеон“ коњяги-ю армани коњяқдан тортиб, „Посольский“ деган араққача (Викторов шунақа арақ ичаркан — ҳиди сезилмасмиш), думба-бовур закускадан тортиб, қул-қул товуққача, хандон пистадан тортиб бодомгача пайдар-пай келиб турибди. Раис бува айтганидек, главний эканамиснинг ўзи баковул.

Икки томондаги дастурхон иккинчи даражали: бўлим бошлиқлари, буғалтир, бош агрономларники. У ердаги коњягу арақлар „местний“. Закускалар ҳам ўртачароқ.

Этак томонда бригадамдаги жўраларим — Чори, Панжи, Жуман, Турсунбой ака, мактаб малимлари ўтиришибди. Уларга „Чашма“, пиво, қўл етар қилиб помидор, шўр бодринглар қўйилган. „Раис чақирди“да шунга келишилган. Пиво дегани шўр бодринг билан йиғлаб кўришади-да!

Бир маҳал микрофон ушлаган Жовли ака (йўғ-е, нега энди „Жовли ака“ бўларкан, ахир энди у менинг қариндошим-ку. Бундан чиқди Жовли акажоним!) Ўртага чиқди. Микрофонга уч-тўрт марта пуфлади.

Жовли акажоним микрофонни қўлига олиши билан келин-куёв ўрнимиздан туриб, таъзим қилдик. (Таомил шунаقا.)

— Қадрли азиз меҳмонлар! — деди Жовли акам тантанали оҳангда. — Бугун биз фақат районда эмас, областимизда донг чиқарган „Машъал“ жамоа хўжалигига ўтирибмиз. Шу сабабли биринчи сўзни облатимиз вакили, ҳаммамиз учун ҳурматли ўртоқ Гадоевга берамиз. Қани, бир қарсак бўлсин!

У шапир-шупур қарсаклар остида микрофон сими ни судраб келиб, обком вакилига тутқазди. Қаранг, семиз кишининг фамилияси Гадоев экан-да! Шу пайтгача билмаган эканман.

— Ўртоқлар! — деди Гадоев сурнайдек фийқиллаб. — „Машъал“ жамоа хўжалигини яхши биламиш!

Чинакам машъал хўжалик. Бу йил ҳар гектаридан қирқ саккиз центнердан „оқ олтин“ олмоқчисиз. Мен сизларга ҳаммамиз учун ҳурматли Обком буванинг саломини топшираман. — У бир қўлида микрофон чангллаган кўйи қарсак чалган эди, бошқалар ҳам жўр бўлди. — Келинглар, шу хўжаликнинг доно раҳбари, дўстимиз Тошмамат Алимовичнинг соғлиғи учун қадаҳ кутарайлик!

Жовли акажоним пилдираб келиб, микрофонни олди.

— Яна бир қарсак бўлсин! Авация, авация! — деди ҳайқириб. — Куйилсин!

Қарасам, ёнимда ўтирган Шодивой конъяк шишини очиб, ўзининг олдидаги қадаҳга тўлдириб қўяяпти. Мен ҳам шоша-пиша шампанга ёпишган эдим, тирсаги билан туртди.

— Менга бер! — деди тўнфиллаб. — Одоб сақлаб ўтирсанг ўласанми! Куёв деган номинг бор! — Шампанни пақиллатиб очди-да, бир эмас, иккита бокалга вошиллатиб тўлдириди. — Ич! Қаллиғингаям ичир!

— Мен ичмайман-ку, Шоди!.. — дедим нима қилишимни билмай.

Шодивой менга қайрилиб қарамади. Конъякни қултиллатиб ичиб олди. Парда остидан Наргизхонга шамиан узатдим.

— Жиндай ичинг... — дедим ялиниб.

Наргизхон мулойим жилмайди.

— Менга мумкин эмас.

— Менгаям, — дедим ростига кўчиб. — Бола бўлиб оғзимга олмаганман.

— Тўғри қиласиз... — Наргизхон боягидан ҳам ширинроқ табассум ҳадя этди. (Ўзим айланай меҳрибонимдан!)

Хушимни йифиб олиб, бошимни кўтарсам, Раис бува гапиряпти.

— Келинглар, ҳурматли дўстлар! Аввало ҳаммамиз учун ҳурматли Обком бувамизнинг, обком вакили ўртоқ Гадоевнинг, азиз акамиз Райком буванинг, заводимиз директори ўртоқ Викторовнинг, шу хонадон қуллси

савдо аълочиси ўртоқ Кўшшаевнинг, қолаверса, қадр-
донимиз Жовли Менглиевичнинг саломатлиги учун қа-
даҳ кўтарайлик! Биз — раҳбар ташкилотларимизнинг
ишончини албатта оқлаймиз! Гектаридан қирқ саккиз
эмас, қирқ тўққиз центнердан „оқ олтин“ оламиз!

Одамлар энди қадаҳга қўл чўзган эди, Раис бува
жеркиб берди.

— Шошманглар ҳов! Шундоқ улуғларнинг са-
ломатлиги учун атиги битта ичиб қутулмоқчимисан!
Йў-ўқ, бунақаси кетмайди, Обком бува учун битта,
ўртоқ Гадоев учун битта, Райком бувамиз учун битта,
ўртоқ Викторов учун, ўртоқ Кўшшаев учун, қадрли
Жовли Менглиевич учун алоҳида-алоҳида кетма-кет
олти марта ичасанлар! Оппоқ қилиб олмаган — хотин!
Ҳамма ўридан турсин!

Чор-ночор Наргизхон иккаламиз яна турдик. Бир
маҳал чап томондан фўлдираган овоз келди.

— Мана бу — Обком бува учун! Буниси — Райком
бува учун... Мана буниси дадам учун...

Қарасам, Шодивой конъякни пайдар-пай қуиб
отяпти.

— Жиннимисан, ўв! — дедим ўдағайлаб.

— Ишинг бўлмасин! — Шодивой фалати илжайди. —
Булар учун ичмай бўладими! Булар... Булар... — Жўрам
конъяк тўла қадаҳни шошилмай, жуда хотиржамлик
билан гул солинган вазага қуиди.

— Булар учун сен ичсан, мен ичаман, ана, гул
ҳам ичади...

Эсини еганми жўрам!

Раис бува зийрак-да! Шодивойнинг товушини эши-
тиб, микрофонда овозини баралла қўйганча, менга даш-
ном берди.

— Келинга ичирмайсанми, қанақа куёвсан ўзи!

Бояги бокални тағин Наргизхонга тиқишитирдим.

— Ола қолинг энди!

Наргизхон индамади-ю, кескин бош чайқади. Тўғри
қилди. Ўзи ичган қизларни жиним суймайди. Хайри-
ят-ей, ўтиришга рухсат тегди. Куёв-келин энди жойи-

мизга чўкаётган эдик, Раис буванинг гапи чала қолган ёкан.

— Ўртоқлар! — деди микрофонга. — Қўшоқжонни ҳамманг яхши биласанлар! — Яхши кўрасанлар! Менам ўз ўғлимдек кўраман. Энг передовой бригад! Тўғрисини айтсан, муштдай болалигидан меҳрим тушган. Адашмаган эканман. Атайлабдан Тошкентдек шаҳри азимга, катта ўқишига олиб борганимда, „Йўқ, Раис бува, мен шахтакор бўламан“ деган, тўғрими, Қўшоқжон? — Раис бува микрофонни чангллаган кўйи менга қараб қўйди. Нима дейишимни билмай қолдим. Шодивойга разм солсам, лаби бурилиброқ илжайиб ўтирибди.

Хайрият, Раис бува тағин зийраклик қилди.

— Гап қандай вазифани адо этишда эмас, қанақа адо этишда! Бугун Қўшоқ Салимовни бутун Ўзбекистон танийди. Келинни айтмайсизми, Наргизхонни! — Раис бува нафасини ростлаб олди-да, аввалгидан ҳам тантанаворроқ оҳангда давом этди: — Наргизхон ҳам ўзимизнинг фарзанддек гап. Ўзимизнинг қўзимиз ўнгига улгайди. Ўртоқ Қўшшаев, ўртоқ Менглиевдек одамларга шундоқ қизни энг зўр институтга жойлаш нима деган гап эди! Йўқ, қиз ҳаётни ўргансин дейишли. Дала заҳматкашларининг сафида бўлсин, дейишли. Наргизхон мактабни битириб жамоа хўжалигида тер тўқди. Бундан ортиқ фидойилик бўладими? Қўшоқжон! Ўғлим! — Раис бува курсиларни шарақ-шуруқ суриб, тепамга келди. Бир қўлида микрофон билан пешанамдан ўпди. — Отноаси шу қизни не умидлар билан қофозга ўроғлиқ қанддек асрари. Бошингга кўтариб юр, хўпми?

Ўпкам тўлиб Наргизга қарасам, юзлари лов-лов ёниб ўтирибди.

Раис бува қаддини ростлаб тағин микрофонга ҳайқирди.

— Келин-куёвга жамоа хўжалиги правлениеси но-мидан битта падарка тайёрлаганмиз. Қамчибек, қаёқдасан? Опкир!

Йўлак томонда қулогини қоматга келтириб мотоцикл тариллади. Ҳамма ёқни бензин ҳиди тутиб кетди.

Қамчибек мотоциклни тариллатганча ҳовли ўртасига миниб кирди.

Анграйиб қолдим. Раис бува ростдан ҳам менга мотоцикл совға қиляптими? Ахир бу „Урал“ку! Ўзим орзу қилган „лулка!“ Бундан чиқди, икки ҳафтача олдин „қаллиқ ўйин“га борганимда Раис бува, „Сенга „пат-пат“-нинг зўридан тўёна қиласман“, деб рост айтган экан-да!

— Келин билан мингашиб юраверларинг! — Раис бува елкамга қоқиб қўйди-да, стулларни тарақ-турук сурив тағин жойига қайтди.

Секин қарасам, Наргизхон уялиб, ерга қараб ўтирибди. Билади-да, „лулка“да юриш маза!

— Қарсак бўлсин, ўртоқлар! Қарсак бўлсин! — деди Жовли акажоним файратга тушиб. (Қаранг, ичган сари овози жаранглаб чиқяпти!) — Даврамизда тағин бир ҳурматли меҳмон ўтирибди... Адлия ходими... Терговчи, старший терговчи! Ҳурматли раисимиз ўртоқ Алимовнинг яккаю ёлғиз ўғиллари... Шодижон Тошмаматович бизнинг районга ишга келдилар!

Давранинг энг пастидан асабийроқ овоз келди.

— Раиснинг эси жойида! Сопини ўзидан чиқаради!

Ажаб, „Раис чақирди“да қўйнинг қулоғини еганим учунми, овоз эгасини аниқ-таниқ билдим: физика ўқитувчимиз Усмон Қиличев! Гапини битта мен эшидим, десам, Жовли акажонимнинг қулоғи меникидан ҳам узун экан.

— Ҳов, малим! — деди жеркиб, овози микрофонда гумбурлаб кетди. — Висир-висир қилмай жим ўтилинг, хўпми? Пенсияга чиқсан одам думини қиси-иб ўтиради. Қолаверса, кечаям чопиқقا уч юз ўрнига қирқта бола чиқсан. Бу — сизнинг таъсирингиз. Ўзингиз бўшаб кетган бўлсангиз ҳам мактабда сассиқ ҳидингиз қолган... Ҳўш... — Жовли акажонимнинг товуши тағин тантанали тус олди. — Даврамизда районнинг энг ҳурматли кишиларидан бири — старший терговчи Шодижон Алимов ўтирибдилар. Сўз ўртоқ Шодижон Тошмаматович Алимовга!

Жовли акажоним гандираклаб, биз томонга кела

бошладилар. Қарасам, Шодивой кафтлари билан юзини чангаллаб үтирибди. Маст бўпқолдими, нима бало?

— Шоди! — дедим биқинига туртиб. — Сен гапи-паркансан?

— Нима? — Шодивой юзидан кафтини тушириб менга қаради. — Нима дединг?

— Гапир! — Худди мактабда, бир партада үтиргандагидек тиззам билан сонига туртдим.

Жовли акажоним Шодивойга микрофон тутиб, ҳай-қирди.

— Қани, битта авация бўлсин, ўзимизнинг ёш кадрга!..

Шодивой чайқалиброқ ўрнидан турди-ю, бирдан жиддий тортди. Бир зумда кайфиям тарқаб кетдиёв! Гаплари милтиқнинг ўқидек. Ҳар сўзни чертиб-чертиб айтади. Нима қилсаям юрист-да!

— Жамоа хўжалигининг ҳисобот-сайлов йиғилиши зўр үтяпти! — деди вазминлик билан.

Ажаб, ҳамма жимиб қолди. Раис бува үтирган жойида қоши чимирилиб, паст овозда жеркиди.

— Шоди!

— А? — Шодивой оғзига микрофон тутганча отасига қаради. — Нима?

— Аҳмоқ! — Раис бува овозини янайм пасайтириб ўшқирди. — Кайфинг ошиб қолдими! Тўйда үтирибсан, тентак!

— Э, шунақами? — Шодивой чунонам ёйилиб кулдики, микрофонда овози етти қишлоқقا эшитилдиёв! — Узр! Мен бўлсам, „Машъал“ жамоа хўжалигининг ҳисобот мажлиси деб ўйлабман... — Қаранг, ҳаммаси батартиб. Ҳаммаси даражасига қараб бўлинган. „Улуғлар“ бир томонда. „Хашаки“лар бир томонда.

— Шоди! — Раис бува ўрнидан туриб кетди. Зўраки илжайди. — Жўрангни оёғи тўртта бўляпти. Кутли бўлсин демайсанми, ўглим?

— Шунақами? Узр... — Шодивой лаб-лунжини йиғишириб олди. — Ниятим шуки, Қўшо баҳтли бўлсин! Қўшо, жўражон! — у микрофонни ҳамон қўйиб қўбор-

май, дабдурустдан мени қучоқлаб олди. — Яхшиямык, сенга ўхшаган одамлар бор, бу дунёда. Кел, ўртоқ, битта ўпай, шошма, яна битта! Энди пешанангдан...

Қийқириқ, қарсак бўлиб кетди. Жовли акам микрофонни унинг кўлидан юлқиб олиб, нари кетди, давра ўртасига чиқишига мадори етмадими, йиқилиб кетишдан кўрқдими, турган жойида эълон қилиб қўя қолди.

— Навбат санъаткорларга!

Рубоб жаранглади, тор варанглади, доира баданглади, гармон фийқиллади, фижжак нола чекди. Санъаткорлар ҳам бало экан! Овози хезалакчалиш эркакларникига ўхшаган Азорхон деган хотин учта қўшиқ айтса, товуши эркакшода хотинларникига ўхшаган Шоматхон деган йигит тўрттани қўндиради. Бўривой дегани саккизта ашула айтса, Қулаҳмад ўн иккита қўшиқ билан жавоб қиласди. Қадаҳлар пайдар-пай айланиб турибди. Бирор арман конъягини отяпти, бирор „Чашма“. Бирор „Посольский“, бирор минерал сув.

Бир кўзим Наргизхонда. Сузилиб ўтирибди. Бир кўзим Шодивойда, кафти билан юзини чангллаб пайдар-пай ҳиқичоқ тортияпти.

Кокилахон деган раққоса даврага чиқиши билан тўйхона тандирдек қизиб кетди. Э, ўзиям офат экан, бу Кокилахон! Шунақанги ҳимо қиласди, шунақанги қилпанглайдики, одам зоти чидаб туролмайди. Тагин ҳар битта эркакнинг рўпарасига келиб киссасини ковламагунича муқом қилиб тураверади. Ана, тоғам чидаб туролмади шекилли, аллақанча пулни Кокилахоннинг зар дўпписи тагига қистирмоқчи эди, раққоса лип этиб юлқиб олди-ю, нари кетди.

— Вой до-од! Қоматингдан! — ёқавайрон бўлиб кетган куёвим илондек буралиб ўрнидан турди. Киссасини ковлаб бир боғлам пул чиқарди. Ҳовли ёп-ёргуф эмасми, аниқ-таниқ кўрдим!

Бир зумда куёвнинг пули қаёққа фойиб бўлганини ҳеч ким сезмади. Цирқдаги кўзбойлогочими, нима бало, бу Кокилахон!

— Наргизхон! — дедим парда ортидан келинингизнинг қулоғига шивирлаб. — Пулни қаёққа яшириди?

Наргизхон пиқ этиб кулиб юборди.

— Билмасам...

Энди „Воҳай-бала“ авжига чиқди. Қарсаклар осмонни титратди. „Ферма тоға“ товуқнинг оёғидек сертомир, қип-қизил бўйини чўзиб, муқом қилганча раққосанинг олдига ўйнаб кела бошлади. Қаҳқаҳа, қийқириқ бўлиб кетди.

— Ўзим ўргилай, кўзингдан аканг! — деди-да, киссасидан икки боғлам пул чиқариб Кокилахонга кўрсатди. Жайранинг найзасидек тиккайган мўйловини фолибона силаб қўйди.

Кокилахон ўйнаб келди-ю, пулга чанг солган эди, „Ферма тоға“ қув экан, пулни белининг орқасига яшириди.

— Битта ўпич берсанг...

— Ҳех, Мусайип! — микрофонда Жовли аканинг овози жаранглади.

— Номардлик қилма! Бер атаганингни!

Тўйиб мош еган хўроздек қип-қизариб кетган „Ферма тоға“ овоз қаёқдан келаётганини билолмай аланг-жаланг бўлиб қолди.

— А? — деди илжайиб. — Нима дедингиз?

Кокилахон ўйнаб турган кўйи, пайтдан фойдаланиб, лип этганча унинг орқасига ўтди. Кейин нима бўлди, ўзим ҳам тушунолмай қолдим. „Ферма тоға“ эсхушини йиғиб олиб, аввал ўнг қўлини томоша қилди. Кейин чап қўлини... Ундан кейин юзини юваётган одамдек, иккала кафтини нақд бурнига тақаб узоқ термилиб қолди. Кўзлари филай бўпкетди.

— Пулим! — деди ҳайқириб. — Пулимни нима қилдинг? Қайга тиқдинг, уйинг қуйгур!

Микрофон чанглаб турган Жовли акам бир имо қилганди, иккита забардаст йигит „Ферма тоға“нинг икки қўлтиғидан олиб, четга судради.

Қарасам, Наргизхон парда устидан кафти билан оғзини тўғсанча мириқиб куляпти!

— Қойил қилди-а, Наргиз! — дедим қулоғига.

— Росаям боплади, Құшоқ ака!

Шу баҳона келинингизни үпіб олмоқчи әдим, даврада „Лазги“ авжига чиқди. Кокилахоннинг бояғи үйинлари ҳеч гап әмас экан! „Лазги“га ғал келганида шунанғанги учеб кетдик! Ё тавба! Одам боласиям шунчалик бўладими!

Ё, алҳазар! Суяги йўқ-ку, бунинг! Сочининг учидан тортиб, товонигача баравар силкинади-я! Ростини айтсам, ўзим ҳам ўртага тушиб үйнаб кетай дедим.

Бир маҳал „шарватхона“ томондан шамолда тебранган теракдек чайқалиб Шайдул кассир чиқиб келди.

— Жонидан! Жонидан! — деди кўксига уриб. — Биз томонгаям бир қиё боқсинлар!

Обком вакилининг ёнбошида ўтирган Викторов қарсак чалиб юборди.

— Молодец, Шайдул! Ай молодец!

Мингталик чироқ айнан шу одамнинг тепасида тургани учунми, боши чунонам йилтираб кетдик, бир әмас, иккита лампочка ловуллаб, тўйхонани янаем нурафшон қилиб юборгандек бўлди.

— Давай, Шайдул, давай! — деди Викторов қийқириб.

Шайдул кассир белбоғи узилмаган бир пачка пулни боши устида баланд кўтариб имо қоқди:

— Жонидан!

Кокилахон минг бир тусда товланиб, Шайдул кассирга яқин келди.

— Жовли Менглиевич! — Райком бува бақбақаси лиқиллаб ҳайқирди. — Айтинг! Тўхтатсин! Бу ерда опициалний одамлар ўтирибди, яхшимас!

— Шайдул! — Жовли акам ўша заҳоти микрофон орқали буюрди, — кўп бодилик қиласкерма!

У сўзини тамомлагунча Шайдул кассир аллақачон Кокилахоннинг оппоққина юзидан үпіб улгурган эди.

— Бўлди, ўв! — деди Жовли акам алам билан.

Қаёқда! „Лазги“ авжига чиқиб кетган, Кокилахон жонҳолатда қилпилляяпти. Шайдул кассир бели боғлиқ уч даста пулни боши устида баланд кўтариб турибди.

Кокилахон қуй оҳангига мос қилик қилиб пайдар-пай сакрайди-ю, қани пулга бўйи етса! Шоти устига чиқиб сакрасаям етолмас.

— Сен ҳам битта ўпсанг, ҳаммаси сеники! — Шайдул кассир юзлари ялпайиб илжайди. Қишида шуба олиб киясан. Битта ўп, жонидан!

— Бас! — Жовли акам шунақанги чинқирдикси, микрофон чийиллаб кетди. Шайдул кассир қулини паст туширган эди, ўша заҳоти пулдан айрилди. Кокилахон ўйнаб-ўйнаб нари кетди. „Лазги“ ҳамон давом этарди.

Шайдул кассир, бир зумда шуича пулдан айрилгани нашъа қилди шекилли, аламини Кокилахондан эмас, Жовли акамдан олди:

— Эркакмисан, Жовли, — деди ўшшайиб, — қистир ўзингам мард бўлсанг!

Чап ёнимда алланима тарақлади. Бурилиб қарасам, Шодивой столни муштлаяпти.

— Шоди! — дедим қулига ёпишиб. — Эсингни йиф, жўра!

— Қойил! — Шодивой чайқалиб ўрнидан турди. — Ўргилдим, маймун ўйинларингдан! Хайр, дўстим! — у энгашиб бошимни бағрига босмоқчи эди, орқасига қалқиб кетди. Жўрам ийқилиб кетмасин, деб энди ўрнимдан қўзғалганимда аллаким орт томондан келиб, Шодивойни стул-пстули билан қўтариб, парда орқасига олиб кетди. Наргизхон икки қўллаб, билагимни чанглаб олди.

— Қўшоқ ака! — деди овози титраб. — Қўрқяпман...

— Бўлди, жоним, парво қилма! — шовқин-сурон орасида Наргизни маҳкам бағримга босиб, парда устидан юзидан ўпиб олдим, — жўрамни сал кайфи ошиб қолди.

— Эрқаклигимни кўрсатайми! — микрофонда Жовли акамнинг асабий овози жаранглади. — Кўриб қўй, боди! Мен сенга ўхшаган майдакаш эмасман! Бақча келинг, Кокилахон!

Раққоса худди шуни кутганде Жовли акамнинг рўпарасига ўйнаб келди.

— Мана! — Жовли акам шимилининг киссасидан сарғиши белбоғ тақилган беш боғламни чиқарди. — Олинг! —

деди Кокилахонга узатиб. — Ҳалолингиз бўлсин! Санъатингиз учун, талантингиз учун!

Шўрва қайнагандек сийрак қарсак чалинди. Қарасам, Раис бува, Райком бува, тўрда ўтирганлардан тагин беш-олти киши чапак чаляпти.

— Бирпасда шунча пул ишлаб олди-я! Бутун бошли матасиклга етади-ку, — дедим келинингизнинг қулоғига шивирлаб. — Маза-маза отарчиники экан-ку. Озроқ қарз сўрасам, берармикин?

Наргизхон, парда ортидан ширин пўписа қилди.

— Сўраб кўринг-чи?

Келинингизга дил кетиб, даврада нима бўлаётганини пайқамай қопман. Наргизхоннинг кўзида хавотир пайдо бўлганини кўрдим-у, бурилиб қарасам, Шайдул кассир қорнини ушлаб, икки букилиб турибди. „Раис чақирди“ дагига ўҳшаб пивони сабзи сувига кўшиб урган бўлса, ичи оғриб қолди, деб ўйлагандим, йўқ, кулаётган экан.

— Ҳи-ҳи-ҳи! — Шайдул кассир қаддини ростлаб хандон отди. — Ҳа-ҳа-ҳа! Ўзим берган пул! Ишонмасанглар қаранглар! Белбоғига ўзим қўл кўйганман!

Жовли акамнинг жаҳли ёмон экан! Кўлидаги мікрофон симини осилтирганча бошини икки елкасига тортиб, Шайдул-кассир томонга отилди. Наргизхон эшишиб қолмасин-ку, шу топда тоғаси яна уккига ўҳшаб кетди. Орада уч қадамча қолганида „ҳ-ҳа“ деди-да, Шайдул кассирнинг қорнини мўлжаллаб қалла урди. Кассир бечора қоқ тагидан арра солинган теракдек гурсиллаб ерга ағдарилди.

Ҳамма ёқ қий-чув бўлиб кетди.

Кокилахон ўйинга қанча уста бўлса, қочишга ҳам шунчалик чаққон экан! Ҳамон давом этаётган „Лазги“ оҳангига мос ҳаракатлар билан ўзини санъаткорлар ўтирган сўрига отди.

Кимдир сўқинди. Кимдир „дўст“ тортди. Негадир чироқ ўчиб қолди.

— Қўшоқ ака! — Наргизхон бўйнимга осилиб ялинди. — Қўрқиб кетяпман!

Келинингизни овутиб ўтирган эдим, бошим устига аллаким эгилди:

- Тура қол, Кўшо! Келинни уйга олиб кир!
Коронгида бўлса ҳам танидим: отам!
- Қўрқманг, болам, — деди Наргизхоннинг елка-сига қоқиб. — Уйга киринглар. Сизга деса бир-бири-нинг гўштини емайдими, булар!

Қайноққина, ширингина Наргизхонни бағримга босганча уй томон етакладим.

ЎН САККИЗИНЧИ БОБ

ШАҚ ЭТДИ, ПАҚ ЭТДИ, ПУФАК ЁРИЛИБ КЕТДИ!

Умрим бино бўлиб йифлаган эмасман, деганмидим?
Йўқ, йифлаган эканман, дўхтиржон. Бир марта!

Нега дейсизми? Қўйинг, бу гапларни айтишга уялади, одам! Ҳа, мен сода эдим. Аммо виждонсиз эмасдим. Гўл эдим, аммо ориятсиз эмасдим! Аҳмоқ эдим, аммо диёнатини пулга сотадиганлар хилидан эмасдим.

Кечагина бошига қўнган баҳт қушидан маст бўлиб юрган одам, эртасига муккасидан йиқилса фалати бўларкан. Одамнинг пешанаси тақ этиб деворга урилганидан кейин кўзи очиларкан. Шунча пайтдан бери кўр эканман, сўқир эканман...

Нима қилай? Кимга айтай дардимни? Отамгами? Тўйдан кейин уч кун ўтмай, қон босими ошиб йиқилиб қолди-ку ўзи? Жовли Менглиевич у ёқقا югуриб, бу ёқقا югуриб, янги қудасини вилоятдаги „катталар“ ётадиган банисага жойлади. Отам бунаقا илтифотдан хурсанд бўлди, дейсизми? Кўргани борганимда негадир маъюс кулимсираб кўйди.

Мен-ку дадамга ҳеч нима демадим. Лекин отам менга ўшаган гўл эмас. Уруш кўрган, тиззасидан қон кечган. Бирор ҳеч гапдан ҳеч гап йўқ, юзингта тупурса-да, „Бир ҳазил қилдим-да, ма, артиб ол“, деб чўнтағидан рўмолча чиқариб узатса, қанақа бўлади? Отам буни

билмайдими? Аслида, айб менда! Ўзимда! Мен — молфаҳмда! Дадамнинг ўрнига мен банисага тушишим керак эди. Ўладиган бўлса, мен ўлишим керак!

Онам бўлса, ўзи билан ўзи овора! Кунора автобусга ўтириб, дадамнинг олдига югуради. Нима қилай? Дардимни жўрам Шодивойга айтайми? Нима дейман? Отанг аблаҳ экан, дейманми? У ёғини сўрасангиз, Шодивой қишлоқда турмайди. Квартирада яшаб, туман марказида ишляпти. Ўша — менинг тўйим куни масти булиб чиқиб кетган кўйи қишлоққа қайтиб келмади.

Наргиз билан турмушимиз... Ит ётиш — мирза туриш. Бирга яшаймиз-у, ўртамизда бошқа бир одам, учинчи одам тургандек...

Бир вақтлар отам қўлимга пуфак тутқазиб, „Пуфла, ўслим, пуфла қани, қачон ёриларкин“, деганида хўп ўйлаб гапирган экан! Пуфак эртами-кечми ёрилиши керак эди. Сезиб турибман, ёриладиган пайти яқин қолди. Жамоа хўжалигида текшир-текширлар кучайиб кетган, Раис кўзимга кўринмайди. Тўғри-да, қандоқ кўринсин... Фунчани узсин. Тўйиб-тўйиб ҳидласин. Ҳадди сиққанича, кучи етганича эзфиласин... Кейин менга... Мен — нодонга узатсин. Устига-устак „Қоғозга ўроғлиқ қанддек, бoshингга кўтариб юр“, деб писанда қилиб ҳам қўйсин...

* * *

...Пуфак куз кунларидан бирида, айни терим қизиган паллада ёрилди. Раис ҳадя қилган, йўғ-е, садақа қилган пат-патга қўлимни ҳам теккизмадим. Қандоқ тегизай! Ҳаром-ку, ўша лаънати пат-пат! Бундан чиқди, бир вақтлар болалигимда мотоцикл минишни орзу қилиб юрганим „пат-пат“га Ойсара янгам эга чиққани, Турсунбой акам ўша нас босган лулкани минишга ҳазар қилгани, доим маъюс тортиб юришида гап бор эканда! Бундан чиқди, Раис бува Турсунбой акани, менга ўхшаб, онасининг қорнидан тушганча гўдак ҳолида қолган соддаларни пат-пат билан алдар экан-да! Раис „Ўлингни ўқишга олиб бораман“, „Машъал қиламан“, „Оталик қилиб уйлантириб кўяман“, деганда дадам

„Туллак раис берадиганини белбоғига боғласин“, дегани бежиз эмас экан-да!

Онам! Бечора онам! Шу номардга ишониб, отамга қанча дашном берди. Раис бувани фариштага қиёс қилди! Фаришта! Ўзидан қолган сарқитлар билан бошқаларни боқадиган „фаришта“! Йўқ! Раиснинг мағзаваси керакмас менга! Мағзавага қўшиб узатган пат-патиям керакмас!

Ҳаром! Ҳаммаси ҳаром!

Ҳар куни далага эшагимни миниб бораман. Ростини айтайми? Ҳаммасидан шу тилсиз — забонсиз жонивор афзал менга! Нима бўлганда ҳам қувлик-шумликни билмайди. Хиёнат қилмайди...

Тонг отмасдан эшак миниб чиқиб кетаман. Машинада пахта тераман. Уйга келишга юрагим йўқ. Кечалари шийпонда қолиб кетаман.

Бир куни кечқурун қатирмоч бўлиб кетган пайтавамни алмаштириш учун уйга келсам, онам эшик олдида типирчилаб турган экан.

— Тез бўл, болам, машина топ! — деди чирқиллаб. — Келинни дард тутиб қолди. Яхшиям ўзинг келдинг. Аксига олиб отанг ҳам банисада.

Отам Жовли Менглиевичнинг „илтифоти“ билан казо-казоларнинг шифохонасида бир ой ётиб, сал ўзига келган, аммо куз тушиши билан дарди қайталаб, бир ҳафта аввал тағин аҳволи оғирлашиб қолган эди. Уккикўз Жовли ака яна ўша касалхонага обормоқчи бўлганида, „Кўйинг, унақа жойлар менга тўғри келмас экан“, деб туман касалхонасига ётганди...

— Бўла қол, болам! — деди онам негадир қўзини олиб қочиб. — Қийналиб кетди бечора!

Нега тескари қараётганини билмасам экан! Уяляпти, бечора. Ажаб, қилгиликни қилган бошқалар-у, энам номус қиляпти. Тўйдан кейин уч ҳафта ўтар-ўтмас, онам „Келиннинг қадам олиши ғалатироқми?“ деб ярамга туз сепган эди. Кейин бу тўғрида бошқа гаплашмадик. Нимаям гаплашардик. Мана, ўша яра ёрилди! Жондан суйган Наргизхоним тўрт ойда туғиб берялти...

Уйга кирсам, Наргиз инграб ётибди. Қизик, хотининг туғай деб турса-ю, машинаси бор қўшнингга „Келинни туфуруқхонага олиб борайлик“, дейишга ор қилсанг, фалати бўларкан. Кимга айтаман? „Ия, Қўшоқжон, келин тезотар чиқиб қопти-ку“, демайдими!

Ноилож „пат-патни“ юргиздим. Онам келинни ӯрабичирмаб, лулкага ўтқазди. Ўзи орқага мингашаётган эди, жеркиб бердим.

— Тушинг! Йўлни ўзим биламан!

Мотоциклни учириб кетдим. Қоронги кўча, қоронги осмон... Бир кўнглим мотоциклни учириб бориб, симёғочга урсам-у, ҳаммасидан бир йўла кутулсам, дейман. Начора, шайтонга хайф бердим.

...Туфуруқхона эшигига етишимиз билан ичкаридан оқ ҳалат кийган икки хотин чиқиб, мотоцикл чироғининг ёруғида шу томонга югурди.

— Қўшоқ ака! — Наргиз ҳансираф ингради. — Мени кечиринг... — Қарасам йифлаяпти. Юпатгим келди-ю, негадир юпатолмадим. — Агар менга бир нима бўлса, — деди йифлаг. — Икки қўлим раиснинг ёқасида!

Шунда яна бир нарсани тушундим. Наргиз мени, мен молфаҳмни алдади. Аммо унда нима гуноҳ! Қўшақўша невара қўрган Раис уни шу кўйга солган... Нима дейишимни билмасдим. Айтадиган гапим ҳам йўқ эди. Нима дей? Нима қилай?

Оқ ҳалатлилар уни лулқадан суюб тушириши билан мотоциклни орқага буриб, елдириб кетдим. Хаёлимга тағин ўша гап келди. Ҳозир симёғочга уриламан, ё бўлмаса тикроқ жарга қулаб кетаман-да, ҳаммаси тамом! Мотоциклни учириб кетяпман. Нуқул хаёлимда шу гап айланади. Бўлди. Мен энди яшамайман! Мен ҳам одамманми? Мен ҳам эркакманми? Эртага одамларнинг кўзига қандоқ қарайман?..

Бир маҳал рўпарада машина чироғи кўринди. „Пат-пат“ни тўппа-тўғри чироққа бурдим. Энг сўнгти дақиқада машина ўзини кескин чапга олиб, фувуллаб ёнимдан ўтиб кетди. Чанг-тўзон орасида қолдим. Ҳамон учиб борарканман, хаёлимдан бошқа ўй кечди. Шошма, ўлиб

кетишдан осони йўқ. Аввал Раис билан, менга шунча „оталик“ қилган Раис билан икки оғизгина гаплашиб олай!

Кунгурадор дарвозаси қулф экан. Аввал муштладим. Кейин тепдим. Дарвозахонада чироқ ёнди. Елкасига тўн ташлаган Раис мени кўриб аввал ҳайрон бўлди, кейин севинди.

— Тинчликми, Қўшоқжон? Отанг тузукми? Келин яхшими?

— Яхши! — дедим лабим титраб. — Туғуруқхонага обориб қўйдим.

Раис ҳайрон бўлгандек кўзларини пирпиратди.

— Ия, Қўшоқжон? Ҳали муддати етмаганди шекилли? — деди-ю, бирдан тиззасига уриб, қаҳ-қаҳлаб кулиб юборди. — Вой, гуппи-ей! Вой ударниг-ей! Бу ёғиниям бопладим де! Хотиниям дасрочна туғдириб юбордим де! — У ҳовли томонга қараб бақирди. — Суюнчи опчик, хотин! Ўғилми-қиз? — деди менга юzlаниб. — Отини нима қўясан?

Титраб кетдим.

— Отини сен қўясан!

Унинг кулгиси шартта кесилди. Чироқ остида ранги бир гезарди-ю, юзи қаҳрли тусга кирди.

— Бу нима деганинг, ҳайвон! „Қаллиқ ўйин“га борганинг эсингдан чиқдими! Ўзим кўрганман!

Шуям одам бўлди-ю! Шуям эркак бўлди-ю!

— Ол матоҳингни!

Нарироқда турган „пат-пат“ни етаклаб, дарвозага рўпара қилдим. Елкам билан бир туртган эдим, дарвоза тавақаси очилди. Мотоциклнинг орқасига ўтиб кучим борича кажавасига тепдим. Дарвозахона қияроқ экан, „пат-пат“ ичкарига қараб фириллади. Раис сакраб ўзини четга олди. Мотоцикл шитоб билан филдираб бориб, оппоқ „Волга“нинг орқасига урилди. Рули қийшайиб, машинанинг орқа чироги чил-чил бўлди. Раиснинг кўзидан ўт чақнаб кетди.

— Машинани нима қилдинг, ҳароми! — деди ҳай-

қириб. Мушт ўқталиб, устимга келаётган эди, этигим-нинг қўнжидан пичоқ чиқардим.

— Келавер! — Қизиқ, шунақанги осойишта гапирдимки, ўзим ҳам ҳайрон қолдим. — Кела қол!

Раис турган жойида тахта бўлиб қолди. Шу пайт эркак деса эркакникига, хотин деса хотинникига ўхшамайдиган даҳшатли овоз ув тортди.

— Вой дод! Ўлдиряпти! Эримни сўяяпти!

Раиснинг ола-була кўйлак кийган хотини товушини баралла кўйиб, тагин бир додлади-да, супадек жойни эгаллаб, турсиллаб ерга ўтириб қолди.

Остонасига туфладим-у, бурилиб кетдим. Орқамдан Раиснинг чинқироқ ҳайқирифи эшитилди.

— Ҳароми! Эси паст, жинни! Мен бунга оталик қилдим! Уйлантириб қўйдим...

* * *

Эрталаб онам тугун-терсак кўтариб йўлга тушди.

— Келинимдан хабар олай. Бир йўла отангниям кўриб келаман.

Сезиб турибман. „Отангдан суюнчи оламан“ демади. Тўғри-да, суюнчини Раисдан хотини олсин! Эри яна битта болали бўлди-ку, ахир!

Эшагимни миниб, далага келдим. Тулпорни шийпон олдидаги толга боғлаб, ишга тушиб кетдим.

Машинада пахта теряпман-у, хаёл минг кўчага олиб киради. Нуқул ўзим билан ўзим гаплашаман. Нега шунчалик оёқ ости бўлдинг? Нега Раис сени шунчалик хор қилди? Тошкентга етаклаб борди, сув бўйига олиб бориб, суформай қайтариб келди! Шунчаки эрка ўғли Шодивойнинг кўнглини олиш учунми? Раис ўша „катта домла“га мўмайгина пул қистирмаса, сен тугул, Шодивой ҳам институтни тушида кўрарди. Нега ўша пайтда бу гапларни ўйлаб кўрмадинг!

Отанг „дипломат“га тахлаб берадиган жарақ-жарақ пулинг йўқ эди-ку, нега Шодивойга эргашиб Тошкентга бординг? Раис кўймадими? Нега сенга ёпишиб олди? Нега ўқитаман, юрист қиламан, деди?

Шошма! Ўнинчи синфни битираётганингда, имтиҳон бошланишидан олдин Раис Ойсара янгага атлас олиб келганмиди? Ўшанда Ойсара янга йиғлаганмиди? Турсунбой аканинг уйидан чиққанингда Раис нима деди сенга? „Бир-икки ой индамай юр, Турсунбойга кўринма“, дедими? Ҳа-а! Мана, гап қаёқда экан! Тўхта! Ўшанда Ойсара янга „Раис бошқа китоб топган, ўшани ўқийверсин“, деганмиди? Бундан чиқди ўша кезлари Раис бошқасига илакишиб юрган. Ойсара янга ундан аразлаган. Раис ярашмоқчи бўлиб, сендан Ойсарага совфа киргазган. Шошма-чи! Ўша Наргиз бўлмасин тағин! Йўқ, Наргиз у пайтда ёш бола бўлган. Бундан чиқди, Раис бошқа ўйнаш топган. Бундан чиқди, Наргиз биринчиси ҳам эмас, охиргиси ҳам...

Барибир! Раис сени шаҳарга бекорга олиб бормаган. Оғзидан гуллаб қўймасин, одамларнинг кўзидан узоқроқда бўлсин, деб атайлаб олиб кетган. Ҳов ўшанда, гастинцада Шодивойга нима деди? „Жўранг шунча ўйнади, бўлди-да“, дедими? Демак, сени шунчаки „ўйнатиб“ юрган. Тошкентдан қайтгандан кейин Ойсара янга билан ярашиб, тағин апоқ-чапоқ бўлиб кетган. Икки орада Турсунбой aka додини кимга айтишни билмай, ранги сомондек сарғайиб юраверган! Бечора! Сен бўлсанг, ишга раъи йўқ деб хафа бўлиб юрибсан! Йў-ў-қ, Раис чучварани хом санабди. Мен Турсунбой aka эмасман, ер чизиб юрадиган! Қўлидан келса, юрист ўғлини ишга солиб оттириб юборсан!

Шошма! Шодивой ўшанда, гастинцада нега бунча тўполон қилди? Нега „Кўшоқ институтга кирмаса менам қишлоққа қайтиб кетаман“, деб туриб олди? Ёлғондан қилдими? Ким билади? Ишониб бўладими, буларга? Ҳаммасининг илдизи бир! Қарға қарғанинг кўзини чўқимайди! Ҳатто бировнинг тўйида ҳам тараф-тараф бўлиб ўтиришади. Райком бува билан Раис тўрда, қирқ йиллик муаллим пойгакда! Шодивой ҳам пора билан ўқиб, терговчи бўлган-да! „Дадам айтди, юристларнинг топиш-тутиши зўр бўларкан“, деб ўзи айтгинку! Бундан чиқди... Унақа бўлса, нега таътил пайтиди

қишлоққа келмай қўйди? Менинг тўйим куни маст бўлиб, уккикўз Жовли ака, Шайдул кассирларни нега маймун ўйнатяпти, деди?

Хўп, майли. Ўзинг-чи, ўзинг? Ўзингда айб йўқми? Газетада мақтагани-ю, радиода „Машъал“ деганига маҳлиё бўлиб юравердингми? Гектаридан эллик центнер ҳосил олганинг, машинада уч юз эллик тонна пахта терганинг фирт ёлғон-ку! Шунчалик илфор экансан, нега ўзинг ҳам, бригадангдаги йигитлар ҳам носвой пулига етар-етмас ҳақ олади? Қаёққа кетяпти ўша пуллар? Бундан чиқди, кеч кузда, ярим кечаси пахта пунктида мажлис бўлган куни Шайдул кассирнинг папкасини йўлда тушириб қолдирганингда кассир шунчалик типирчилағани бежиз эмас экан-да!.. Кичкиналигимда икки карра икки — беш, деб юрганим ўйинchoқ экан-ку! Дунёда бунағанги ишлар бор экан! Хоҳласа, ҳаводан холва ясайди. Хоҳласа, халқни чўмичда қоқиб бойлик тўплайди. Давлатнинг кўзига чўп солиб „қаҳрамон“ бўлади. Хўш, шунаقا экан, „ифвогар“ Эргашев „Сенга билдиримай ведомость тузишади, пахта ўрнига пул топширишади“, деганида нега ишонмадинг? Ишонмадинг эмас, Эргашевни қоралаб ёзишган газетани Наргиз ўқиганида қарсак чалдинг! Нега? Йўқ, азбаройи Эргашевни ёмон кўрганингдан эмас, Наргизни яхши кўрганингдан чалгансан. Шошма?! Ўшанда Наргиз сени ўпган эди-а? „Сиз яхши одамсиз“, деган эди-а?! Демак, ўшанда Наргизнинг гапини бошқача тушунибсан-да. Мени жон-дилидан севади, деб ўйлабсан-да! Галварс!

Обком вакили, Райком, Раис — ҳаммаси бир томонга ўтиб турганидан кейин, жамоа хўжалиги манфаатини шулар ўйлади, булар, ахир катта одамлар, эсли одамлар дебман-да! Мен аҳмоқ шуларга ишониб юрибман-а! Шуларга-я! Ким ўзи булар?! Приёмчик, Жовли, райпо қайнатам, Раис, Шайдул кассир, тўйда елиб-юргурган куёв — ҳаммаси бир одам! Ҳаммаси! Ким билсин, балки Наргизнинг тан-жони „носогроқ“ эканини ҳаммаси билгандир. Ҳаммаси биргаллашиб мен аҳмоқни яна бир марта аҳмоқ қилгандир! Нега бўлмаса Раиснинг ўзи

тўсатдан тўйга бош-қош бўлиб қолди. Нега ўша ҳаром-хариш пат-патнинг калитини бўйнига осиб юрадиган Ойсара янгам Наргизнига боришимни эшитган заҳоти илжайиб, баҳт-саодат тилади. Балки яна бир норасмий „кундош“дан қутулганига, Раис тағин ўзиники бўлиб қолганига шукур қилғандир. Ифлос! Хотиним (қизик, нега энди менинг хотиним бўлсин, Раиснинг хотини-ку) билганини қилсин. Энди турмушимиз турмуш бўлмайди. Биламан, унгаям осонмас. Туғуруқхона эшигига бекорга йигламади. Ростини айтди. Хўп, шу билан менинг дардим енгиллашиб қоладими? Мен ни ма қилай, ахир? Қайси биридан қасос олай? Қандоқ қилиб? Ҳаммасини бир чеккадан сўйиб чиқолмайман-ку! Раис хоҳласа, бугуноқ мени обориб тиқиб қўяди. Ёнига Жовли тушади, Райком тушади, қайнатам тушади...

Хўп. Бўлмаса нима қилай? Бир ҳафтадан кейин Наргизни туғуруқхонадан олиб чиқиб, Раисдан бўлган болани „лу-лу-лу“ деб кўтариб келайми? Турсунбой акага ўхшаб бир умр одамларнинг кўзига қаролмай юрайми? Ў „Машъал“ бригад бўлиб, гектаридан олтмиш центнердан ҳосил кўтариб, медаль олайми? Ҳар мавсумда тўрт юз, катталар хоҳласа етти юз тонна пахта териб „қаҳрамон“ бўлайми? „Қаҳрамон“ эмиш! Раис хоҳласа шунаقا қиладики, ҳар куни мени далага жўнатиб, худди Ойсара янгамнинг уйига киргандек, Наргизнинг олдига қелади! Ким билсин, балки бир вақтлар Турсунбой акамга ҳам осмон баравар ваъдалар берган-дир?.. Раҳмат! Тупурдим, ўша ясама „қаҳрамон“ лигига!

Хаёл суриб, эгат бошига бориб қолибман. Ўгирилиб қарасам, бункер тўлиб кетибди. Машинани орқага бураётганимда шийпон томонда ўқ товуши эшитилди. Ҳайрон бўлиб, машинадан тушдим.

Шийпон олдидаги толга боғланган Тулпорим бoshини орқага ташлаганча икки газ сакраб кетганига кўзим тушди. Нарироқда, „Нива“ машинаси тўхтаб турарди. Эшагимнинг рўпарасида туриб милтиқ ўқталаётан Раисни энди кўрдим. У милидан тутун чиқиб турган милтиқни йиқилаётган эшагимга яна тўғрилади. Тул-

порим жон талвасасида арқонни силтаб ўзини орқага отди. Шу пайт аввалгидан ҳам қаттиқ гумбурлаган ўқ товуши қулогимга кирди. Милтиқ милидан тағин тутун чиқди. Эшагим ерга қулаганини қўрдим-у, ўша томонга югурдим.

Етиб келсам, Раис шийпондаги сўрида қўшофиз милтиқни тиззасига кўндаланг қўйиб, хотиржам ўтирибди. Учиб келиб, Тулпоримнинг устига тиз чўқдим. Ўн беш йиллик қадрдоним тупроқ ерда чўзилиб ётар, курагидан қон оқиб, қорайиб туарди. Бошини кўтарган эдим, очиқ қолган кўзларида худди одамникига ўхшаган ҳайратми, унсиз хитобми қўрдим. Қўлимга қон юқди. Бўйини ҳам ўқ тешиб ўтган экан!

Эсдан оғгандек сапчиб ўрнимдан турдим.

— Нима қилдинг? — дедим ҳайқириб. — Нима қилдинг, ҳайвон! Тилсиз-забонсиз жонивор нима гуноҳ қилди сенга??

— Пахтани пайҳон қилган! — Раис тескари қараб чирт этиб тупурди. — Бир гектар ерни!

— Қачон? Боглиқ турибди-ку!

Раис негадир хириллаб кулди.

— Бу — машинамнинг чирофини синдирганинг ҳаки! Кечаги тухматинг учун яна жавоб берасан ҳали!

— От! — кўксимга чанг солиб, кўйлагимни йиртдим. — Номард, келиб-келиб кучинг шу жониворга етдими? От, мард бўлсанг! От, ҳезалак!

— Бу — шунчаки предупреждена. Ҳали шунақанги кунларни қўрасанки! Хотинингни ҳақорат қилганинг учун, раҳбар ходимга пичоқ ўқталганинг учун... — у халатнусха кителининг тугмасини ечиб, жун босган кўкрагини хотиржам силаб қўйди. Милтиқ бандидан ушлаб, машинаси томон юрган эди, ерга чўккалаб қолдим.

— Ҳаромхўр! Ҳайвон! От, деяпман, эркак бўлсанг!

У „Нива“га ўтириб моторни юргизди.

— Шошма, — деди илжайиб. — Ҳар нарсанинг ўз мавриди бор!

Шундай деди-ю, машинани гуриллатиб кетди. Тура солиб, югурдим. Қўлимга тушган гувалани олиб, „Ни-

ва“нинг кетидан отдим. Тегмади. Ҳансираф чопиб борарканман, қоқилиб, юзтубан йиқилиб тушдим. Тиззамнинг кўзи сирқираб оғрир эди, оқсоқланиб қайтиб келдим.

Шийпон бурчагида турган, занглаб кетган кетмонни олиб, тол тагидан чуқур ковлай бошладим. Ишонасизми, эсимни таниганимдан бери йиғлаш нималигини билмаган, тўйдан кейин ўзимни неча марта ўлдиришга қасд қилганда ҳам кўзимга бир қатра ёш келмаган одам, эшагимни кўмаётганда йиғладим!

Кейин ҳовузда юзимни ювиб олиб, сўри чеккасига келиб ўтиридим. Узоқ ўтиридим.

Орқа томонда мотор гуриллади. Бурилиб қарасам, Раиснинг машинаси! Кетмон дастасини маҳкам чанглладим. Яхши! Раис милтиқ билан, мен кетмон билан! Ё у ўлади, ё мен! Аммо Раисни ўлдирсан, эшагимнинг тагига кўммаган номард! Тулпоримнинг гўрини очиб, судраб чиқаман-да, аввал Раисни ерга тиқаман! Кейин эшагимни! Токи Раиснинг ўлиги эшагимнинг тагида ётсин!

Машинадан коптоқдек дум-думалоқ Қамчибек тушди.

— Кўшоқжон... — деди ялиниб. — Тез бораркансиз! Райком бува чақирияпти.

Энди машина ичига биқиниб олиб, хунар кўрсатяптими, ҳезалак! Қарасам, йўқ, машина ичидан ҳеч ким кўринмайди.

— Жуда илтимос қилди, Райком бува! — деди шоғёр хуркиброқ.

— Ким у Райком буванг!

— Кўшоқжо-он! Янги камиссия ҳамма томонни қаттиқ текширияпти, умрида далага чиқмайдиган катталарнинг ҳаммаси ўша ерда. Қайнатангиз... Жовли Менглиевич...

— Менинг қайнатам йўқ!

— Мусайип ҳам ўша ерда. „Ферма тоға“.

— Э, ҳар юз совлиқдан икки юзтадан кўзи оладиган „Ферма тоға“ми?

Шоғёр суюниб кетди. Илжайди.

— Худди ўзи!

- Танимайман!
- Райком бува қаттиқ тайинладилар. Энг „Машъал“ механизаторимиз келмаса бўлмайди, дедилар.
- Эргашевни иғвогар деб қаматган ўша Райком бувами?

Шофёр индамай бошини қуи солди.

- Униям танимайман! — дедим хўрсиниб. Қизик, ичим бўм-бўш эди.

— Кўшоқжон! — шофёр елкамдан кучди. — Тўғрисини айтами? Бу камиссия тўсатдан босди. Жуда катта камиссия! Марказдан келган. Ўттиз киши! Гектаридан эллик уч центнердан ҳосил оладиган, мавсумда тўрт юз тонна пахта термоқчи бўлган йигитнинг ўзини кўрсатасан, деяпти. Раис бува, Кўшоқ Салимов фарзанд кўрган, хотинидан хабар олишга кетган, десаям қўймаяпти.

— Келаверсин, — дедим пинагимни бузмай.

— Бу ёққа қандоқ опкеламиз? Ҳосилнинг мазаси йўқ-ку! Райком бува айтди: олтинчи участкада машина тушмаган карта бор. Ўшанда яrim соатгина пахта териб кўрсатса бас, деди! Раис бува сизни хафа қилиб қўйган экан. Райком бува Раисни ёмон сўқди. Шу боланинг дилини оғритсангиз, сиздан норози бўламиз, деди. Шахсан ўзи илтимос қилди.

Мехрибончиликни қаранг! Тупурдим, ўша Раиснинг ҳамтовоқларига!

— Яп-янги машина тайёрлаб қўйишибди. Жон ука, хўп денг! — Қамчибек икки қўлини кўксига қўйди. — Мениям бола-чақам бор. Бормасангиз, Райком бува билан Раис бува теримга сомон тиқади.

У қўзимга шу қадар илтижо билан термилиб, шу қадар йиғламсирадики, хаёлимга фалати ўй келди.

— Қамчибек ака, камиссия ростдан ҳам марказдан келганми?

— Марказдан! Обком вакилиям пилдираб юрибди. Райком буванинг эс-хуши ўзидамас. Раис бува-ку, тамом бўлди, ҳаммага бир қараб талмовсирайди...

— Аввалгиларига ўхшаб пүгә сотилмайдими, камиссияларинг?

— Билмадим. Аммо зиёфттә күнмади... Раис бува „Бир пиёла чойимиз бор“, дөң эди, камиссия бошлиги жеркиб ташлади.

— Кетдик!

...Ростдан ҳам ҳали машина кирмаган, пахтаси оқиб ётган пайкал четида эллик өгли одам турган экан. Похол шляпа кийганлар, бош яланглар, дүпти кийганлар. Семиз обком вакили уларнинг атрофида гирдиқапалак! Соқолини қиртишлаб олган қайнатам, уккини-кига ўхшаган кўқимтири кўзлари аланг-жаланг Жовли-ака, пахта заводининг директори — тақирбош Викторов, икки гапнинг бирида „монга қоранд“ деб гап маъқуллаётган „Ферма тоға“, новча-терак Шайдул кас-сир, ингичка бўйнидаги учбурчак бақбақаси пайдар-пай лиқиллаб турган Райком бува, бирпасда ясаниб, медаль тўла қора костюмини кийиб олган Раис...

Раис машинадан тушишим билан шодон хитоб қилди.

— Мана, ўша „Машъал“имиз! Қўшоқжон Салимов! Буни қаранглар, бугун тўнгич фарзанди туғилди-ю, шундаям даладан чиқмайди. Бошқа участкада пахта тера-ётган экан, азамат.

Аллақаёқдан қайнатам пайдо бўлди.

— Қизча, кутлуғ бўлсин. ўғлим! — деди-ю, пешанамдан ўтмоқчи эди, юзимни чириллатиб ўгирдим. Раис уни нари суриб, яна хитоб қилди. — Бу участкага икки марта машина кирган. Ҳосилимизни қаранг! Учинчи теримга ҳам етилиб турибди.

Гапини қаранг. Оғзини очди, ичидан ёлғон чиқади, абраҳ! Бунақа „кўргазмали пайкал“ларни мавсум охирига-ча атайлаб асраб қўйишишнги фирт аҳмоқ ҳам билади-ку!

— Бунақа майдондан бемалол олтмиш центнердан олса бўлади, — деди у жилмайиб. — Қани, Қўшоқжон! Бир кўрсат ҳунарингни! — у комиссия вакиллари ортиқ-ча савол бериб, мени ўртага олишини хоҳламади шекилли, зипиллаб пайкал бошида турган машина томон етаклади.

Машина чиндан ҳам яп-янги эди. Дарров сездим, шпинделлари топ-тоза, кабинасидан ёқимли ҳид келиб турибди. Буям күргазмали машина! Икки соат пахта терасан-да, кейин яна олиб құяди.

„Хунаримни“ күргинг келиб қолдими? Ҳозир-да, шунаңғи хунар күрсатайки! Қизик, негадир қайнатамнинг „Қизча қутлуғ бұлсін“, дегани қулоғим тагида яна жаранглаб кетгандек бұлды. Бундан чиқди, Наргиз қиз туғибди-да! Раиснинг қизи! Ҳаромхұрлар! Ҳамтөвеклар! Күриб қўй!

Ричагни босиб шпинделларни шу қадар пастга туширдимки, ерга тегиб қолдиёв! Моторни юргизиб, кучим борича тепкини босдим. Машина қутурған филдек наъра тортиб, олдинга салчиди. Чанг-тўзон кўтарилиди. Бурилиб қарасам, бункерга пахта эмас, фўзапоялар, мажақланган кўсаклар патир-путир тушяпти! Қойил! Ўзим ҳам бир зумда аллақанча жойни ағдар-тўнтар қилиб ташладимов! Мана бунинг отини ер ҳайдаш деса бўлади! Машинам ўтган жой шип-шийдам! На пахта бор, на фўзапоя! Ер шудгор бўлиб кетганини айтмайсизми!

Бир маҳал Раис билан Райком бува машина кетидан югуриб қолди. Негадир кулиб юбордим. Бу кунингдан баттар бўл, ҳамманг! Раис ранги гезарганча қўлини пахса қилиб бақирди. Эҳ-ҳе, ҳалиям дўқ қиляпсанми?! Мана бўлмаса! Машинани шиддат билан далага кўндаланг қилиб бурдим. Одатда, терим машинасини кескин буриб бўлмайди. Бункер залваридан ағдарилиб кетади. Ҳозир ҳам шундай бўлди. Машина ўнг томонга оғидада, гурсиллаб думалаб тушди. Кабинадан отилиб кетдим. Пахтазор ўртасида анчагача қулоғим фувуллаб ётдим. Бошим каттароқ кесакка урилган эканми, сирқиллаб оғир, қулоғим щанғиллар эди.

Бир зумда устимга одам тўпланди. Шляпали, шляппасиз камиссия аъзолари, сурнайга ўхшаб фийқиллаб нафас олаётган семиз обком вакили, учбурчак бақбақаси лиқиллаб турган Райком бува, Шайдул кассир, қайнатам, укки қўзлари ёниб турган Жовли ака, башанг

кийинган Раис, қўйинг-чи, „Ферма тоға“ гача атрофимни ўраб олишди.

— Нима қилдинг, аҳмоқ! — Раис йиртилиб кетган ёқамдан бўғиб кўтарди. — Жамоа хўжалиги мулкини нима қилдинг, аblaҳ! — деди-да, юзимга тарсаки тортиб юборди.

Уриш мана бунаقا бўлади, деб қоқ жагига чунонам мушт туширдимки, Раис пуфакдек учиб кетди. Беш қадамча нарига — ариқ ичига бориб тушди. Пишиқ экан, хунаса! Пақ этиб ёрилиб кетмаганига ҳайронман. Югуриб бориб қорнига тепдим. „Фиқ“ этган овозни ҳамма эшилди.

— Нима қиляпсан! — Жовли ака хумдек бошини елкаси ичига тортиб чопиб келаётганини кўрдим. Йў-ўқ, мен Шайдул кассир эмасман, калла қўйишишингни кутиб ўтирадиган. Яқин келса нақал қоқилган этигим билан қоқ жагига тепишини мўлжаллаб турган эдим, аллаким, уни қучоқлаб, тўхтатиб қолди. Жовли, ўлжасига етолмаган уккидек кўзлари ёниб, „хув-хув“ деб типирчилади.

— Қани, келавер! — дедим жазавам тутиб. — Кела қол!

Қизиқ, яқин келадиган мард йўқ!

Вой номардлар! Вой жўжахўроллар! Ҳали сенларга хор бўлиб юрибманми!

— Камиссиянинг бошлиғи ким? — дедим бақириб. — Ким?!

Орага фалати жимлик чўқди.

— Ким? — дедим жонҳолатда чинқириб.

Кулранг похол шляпа кийган одам даврадан ажраб чиқди. Секин-секин яқин келди.

— Ўзингизни босинг, ука! — деди осойишта оҳангда.

— Сизми, бошлиқ?! Сизми? Айтинг?

— Мен! — У елкамга қоқмоқчи эди, қўлини силтаб ташладим. — Ёлғон! — тилимга биринчи келган сўз шу бўлди. — Ёлғон! Гектаридан эллик центнер ҳосил олганимиз — ёлғон! Бултур уч юз эллик тонна пахта терганим — ёлғон! Бир қоп пул даромад қилганим — ёлғон!

Давра орасидан Райком буванинг овози келди.

— Ўртоқ вакил! Илтимос, қулоқ солманг, бунга. Бу бола — шизофреник!

— Сен ўзинг шизо... Шизо... — у ёғига тилим келишмади. Баттар ҳайқирдим. — Ўзинг шунақасан! Ҳамманг ўғрисан! Ана, бизнинг ҳақимизни ўмарган ўғри! — оғзидан кўпик чиқариб ётган Раистга имо қилдим. — Мана ўғрибоши, завод директори билан пул тақсимлайди! — Хумдек калласини саланглатиб ҳамон мен томонга юлқинаётган Жовлининг башарасига тупурдим.

Кулранг шляпали вакил елкамдан қучди.

— Ўзингизни босинг, ука! Ҳаммасини аниқлаймиз!

— Кўйвор! — дедим типирчилаб. — Ҳаммасини айтаман! Шайдул кассир пахта ўрнига пахта пунктига пул олиб борган. Панжи уйланганинга беш йилдан ошди! Ҳалиям қарзидан қутулгани йўқ! Маош ололмайди.

— Кўйинг, Кўшоқжон! Уят бўлади! — соқоли қиртишланган қайнатам яқин келган эди, ифлос нарсани кўргандек юзимни ўғирдим.

— Йўқол, қўшмачи!

Аллақаёқдан тақирбош Викторов пайдо бўлди.

— Ну, дурак! — деди ялтироқ бошини чайқаб. — Ай дурак, а? Куп гапирма, ахмак!

— Сен аҳмоқ! Сен порахўр!

— Милиция! — оломон орасидан Райком буванинг ҳокимона хитоби янгради. — Милиция борми ўзи бу хўжаликда!

— Мана сенга мелиса! — дедим хунук қилиқ қилиб. — Ўша пуллардан сенам улушингни олгансан. Обком вакили ҳам. Бўлмаса, Эргашевни нега қаматдиларинг? Ҳалол одамни нега турмага тиқдиларинг! Ҳамманг ўғрисан! Ҳамманг ҳаромхўрсан. Виждонсизлар! Еган-ичганларинг — ҳаром, кийган кийимларинг — ҳаром, топган-тутганинг ҳаром. Мана, от! Ўлдир. Ўлдириб қўя қол! Жонимдан тўйиб кетдим!

...Кейин нима бўлгани эсимда йўқ.

Кўзимни очсам, деразасига темир панжара тутилган каталакдек хонада ётибман. Кўйлагим ёқавайрон. Шимим лой. Этигим ечиб олинган. Бир маҳал эшик очилиб заҳил юзли, бурнининг учи қизил, кўзлари ола-кула одам кўринди. Турқи совуқ бўлсаям кийинишни бопларкан. Эгнида оппоқ кўйлак, қирраси чиқариб дазмолланган кулранг шим, гард юқмаган қора туфли... Темир каравотдан туриб, аранг қаддимни ростладим. Негадир бошим сирқиллар, сув ичгим келарди.

— Салимов? — деди у чақчайиб.

— Шунаقا шекилли, — дедим хотиржамлик билан. Энди бу ёги менга барибир! Қўлидан келганини қilmайдими? Ажаб, дилим равшан эди. Ўлай агар, нимага шунаقا бўлганини ўзим билмайман... Фақат, отам билан онамга ачинардим.

— Хў-ўш... Менинг фамилиям — Қаландаров! Терговчиман! — заҳил юзли киши дафтар-қалам олди. Хонада курси йўқлиги учунми, темир каравотга ўтиришга иргандими, турган жойида қўлидаги қогоzlарни титкилади. Негадир кулди. Қизиқ, кулиши фалати экан. Худди калтакесак чирқиллаганга ўхшаркан. — Ҳурматингиз зўр, Салимов! Сизни овора қилмаслик учун кабинетга чақирмай, шу ернинг ўзида сўроқ қилиб кўя қоламиз. — Тўсатдан унинг кўзлари олайиб, овози қатъий тус олди. — Салимов! — деди шиддат билан. — Сиз жиноят Кодексининг... — қип-қизил бурнининг учини бармоғи билан пайдар-пай силаб, аллақанча ракамларни айтди. — „в“, „ғ“, „д“ пунктларига биноан жиноий жавобгарликка молик иш қилгансиз! Биринчидан, қонуний загсдан ўтган хотинингиз Наргиз Қўшшаеванинг оғир оёқлилигини била туриб қорнига тепгансиз! Қасдан! Хотинингизни преждевременний дард тутиб қолган. Сиз жиноятни яшириш учун Қўшшаевани район роддомига мотоциклда олиб боргансиз! Роддом эшигига ташлаб қочгансиз. Яхшиямки, гражданка Қўшшаеванинг организми кучлилик қилган. Чақалоқ соғ-саломат туғилган, — терговчи сабзига ўхшаш қип-

қизил бурнининг учини яна силаб қўйди. Турган жоийда қофоз титкилади. — Хў-ўш! — деди салмоқлаб. — Уч кило-ю етти юз ўн етти грамм!

— Нима у?

Қаландаров ҳайрон бўлиб, юзимга қаради.

— Нима, „нима“?

— Уч кило-ю етти юз ўн етти грамм нима?

— Нима эмас, ким? — Қаландаров ер тепиниб ҳайқирди. — Чақалоқни айтаман, галварс! Сенинг қизингни!

Хаҳолаб кулиб юбордим.

— Сўраб қўрдингизми, ўртоқ Қаландаров! Чақалоқ неча ойда туғилибди? Тўрт ойлик бола салкам тўрт кило бўладими?

Қаландаров кўзлари ола-кула бўлиб кетди.

— Биринчидан, мен сенга ўртоқ Қаландаров эмас, гражданин терговчи Қаландаровман! Иккинчидан, савонни сен эмас, мен бераман! Хў-ўш... 31 октябрь куни кечқурун соат йигирма иккидан эллик тўққиз минут ўтганда гражданка Кўшшаевани уриб, родомга ташлаб қочгансан. Орадан қирқ уч минут ўтгач, соат йигирма учдан қирқ икки минут ўтганида „Машъял“ жамоа хўжалигининг раиси, область советининг депутати, бир эмас, олтига ҳукумат нишони билан мукофотланган Тошмамат Алимовнинг уйига мотоцикл миниб, бостириб боргансан. Мотоцикл люлкасида қасдан олиб борган болтанг бўлган. Шу болта билан ҳурматли ўртоқ Алимовнинг меҳнатда эришган ютуқлари учун мукофот тарзida берилган 50-91 КФЛ номерли „ГАЗ-24“ „Волга“ машинасини уриб пачақлагансан. Кейин этигингнинг қўнжидан тифининг узунилиги 29 сантиметрли суяқ сопли пичоқ чиқариб, ўртоқ Алимовни сўймоқчи бўлгансан. Болтани топдик. Машина тагида ётган экан. Пичноқ қани?

— Раиснинг қорнида! Ёриб кўрсангиз топасиз! — дедим хотиржамлик билан.

— Бас! — Қаландаровнинг бурни баттар қизариб кетди. Назаримда бўйни ҳам қизариб, оппоқ кўйлагининг ёқаси лоларанг тусга кирдиёв! — Ўттиз иккинчи

октябрь, тфу, биринчи ноябрь куни нега Алимовни урдинг? Нега хизмат вазифасини бажариб турган раҳбарни тепдинг? Нега бўғдинг? Нега аллақандай ифвогар Эргашевни ҳимоя қилдинг?

Билмадим, яна кулгим қистади.

— Раис ўлмадими ҳали?! — дедим илжайиб. — Мен унинг калласига кетмон билан урувдим-ку!

— Шунақами? — терговчининг заҳил юзи ёришиди. — Ёзиг қўямиз. — Хў-ўш... Жиноятчи Салимов Тошмамат Алимовни кетмон билан бошига урган. Яхши! Яна? Ўртоқ Менглиевни-чи? Униям тепибсан-ку!

— Аниқ эсимда йўғ-у, чамамда уни тепмадим. Чопдим. Кетмон билан бошини чопиб ташладим. Кетмон ўткир эди-да! Ўз кўзим билан кўрдим! Раис икковининг боши узилиб, сапчадек думалаб кетувди. Пайкалда иккала бош ҳалиям ёнма-ён ётган бўлиши керак, ўртоқ...

— Ўртоқ дема! — Қаландаров бир чақчайди-ю, ёзишда давом этди. — Яхши! Буниям делога тикиб қўямиз. — У кафтларини иштача билан ишқалади. — Биласизми, Салимов! — деди мамнун жилмайиб, ҳатто овози ҳам мулойимлашиб кетди. — Шунча жиноят учун сизни камида ўн беш йил озодликдан маҳрум қилиш керак!

— Балки отарсиз?

— Энг сўнгги чорани кўриш ҳам мумкин! Албатта, бу ёғини суд ҳал қиласиди. Мухими шуки, жиноятчи айбини бўйнига...

„Бўйнига“ дейиши билан сапчиб туриб бўйнига ёпишган эдим, қизил бурни кўкариб дод солди.

— Дежурний!

Ёшгина навбатчи милиционер қуюндеқ учиб кириб, қўлимдан тутди. Терговчи ҳансираф нафас олганча чиийллади.

— Сенга энг олий жазони олиб бермасам, Қаландаров отимни бошқа қўяман. Старший терговчи билан начальникка бугун, ҳозир рапорт ёзаман!

Темир каравотга ўтириб, девор томонга қараб олдим. Қўлидан келганини қилсин!

— Мен шу ердаман! Нима гап? — деди кимдир эшик томонда.

— Ўртоқ старший терговчи! — Қаландаровнинг ийғламсираган товуши қулогимга кирди. — Оғир жиноят устида қўлга тушган Салимов допрос пайтида мени бўғиб ўлдирмоқчи бўлди. Мана! Бўйнимни кўриб қўйинг. Мана, бармоқ излари турибди. Рухсат этинг, экспертизага боришга!

— Йўқол! — старший терговчи шунақанги ҳайқирдики, каталак хона зинфиллаб кетди. Кейин жимлик чўқди. Хайрият, даф бўлишди!

— Қўшо... — бошим устида шунақанги таниш, шунақанги меҳрибон овоз эшитилдики, ўрнимдан туриб кетдим. Бурилиб қарасам, хона ўртасида Шодивой турибди. Қандоқ яхши! Энди мени қадрдон дўстим, йўғ-е, собиқ дўстим Шодивой, старший терговчи гражданин Алимов сўроқ қиласди! Хоҳлаган муддатни бўйнимга илади. Зўр-да, ўлдирсаям, дўст ўлдирсин!

Энди жойимга ўтираётган эдим, Шодивой илдам келиб қўлтиғимдан кўтарди.

— Вой жинни-ей! Терговчи деганиям жиноятчини кучоқлайдими ҳеч замонда!

Бир маҳал қарасам, кўзига ёш тўлиб турибди.

— Шоди? — елкасига туртдим. Жиннимисан?!

У юзимга диққат билан термилди.

— Қўшо! — деди овози хириллаб. — Биламан сенда гуноҳ йўқ.

Жаҳлим чиқиб кетди.

— Э, эсинг жойидами, Шоди! Айбсиз одамни бу ерга опкеладими? Отангни урганим — рост! Қорнига пичоқ санчганим рост! Ўлмай қолган экан, эртасига Жовли икковининг бошини кетмон билан чопиб ташлаганимам тўғри! Ўша кетмон шийпонда турибди. Бирор илиб кетмасидан топтириб қўй. Хотинимнинг қорнига тепганим ҳам — рост. Бўлмаса, тўрт ойда туғармиди!

— Ўчир! — Шодивой шусиз ҳам варварақ бўлиб кетган кўйлагимнинг ёқасига ёпишди.

— Кўйлакни йиртдинг, хумпар! — дедим бақириб.

— Құшо! Қүшшаева билан гаплашдим. Сенга ҳеч қанақа дағвоси йўқ, — Шодивой қўзимга тикилди. — Айб — бошқаларда! Сен бегуноҳсан.

Қарасам, йиғлаб юборадиган! Тўғрисини айтсам, жўрамга раҳмим келди.

— Шоди-и! — дедим ялиниб. — Битта хўп де, жон ўртоқ! Мени қаматги-ин! Неча йил берсанг ҳам гинг демайман.

— Ўчир!

— Шошма, мундай ўтиргин, жўра! — Шодивой-нинг елкасини силаб, ёнимга ўтқаздим. — Ўзинг ӯйлаб кўр. Сен ёш кадр бўлсанг. Беш йил бекорга ўқидингми? Қанча қийналдинг, тўғрими? Каникул пайтдаям қишлоққа келмадинг. Отанг сени ўқитаман деб шунча овора бўлди...

— Отам?! — Шодивой шу қадар алам билан инグラб юбордики, ўзимнинг ҳам қўзимга ёш қуилиб келди. Жўрам темир каравотда чўкканича юзини кафти билан тўсиб, узоқ ўтирди. Нима дейишни, нима қилишни билмасдим.

— Қўй, Шоди-и, хафа бўлма... — дедим секин.

— Отам... — Шодивой қўлларини туширди. Қўзида, одамнинг юрагини эзиз юборадиган алам бор эди. — Қандоқ бош кўтариб юраман, бу ерларда, жўра! — деди инグラб. — Ким деган одам бўлдим?! Ўн битта неваралик одам ўн саккиз яшар қизни шу аҳволга солса! Ҳамма нарсани пул билан ўлчаса. Ҳаром-хариш йўллар билан обрў топса. Энамнинг қўзига қандоқ қарайман, дўстим. Опаларимнинг қўзига қандоқ қарайман!

— Бўлди, жўра, бўлди! — дедим елкасига қоқиб. — Ҳаммаси яхши бўлади.

— Биласанми, Қўшо! — жўрам бақириб юбормаслик учун титраб турган лабини тишлиди. — Вилоят ички ишлар бошқармасида шу ишни менга топширишди. Сенинг ишингни! Отам билан райком атайлабдан областга боришган. Менинг қўлим билан сендан қасос олишмоқчи. Тушундингми?

— Яхши бўлти! — дедим енгил тортиб. — Мени қаматсанг, қутуласан! Отангни урганим рост-ку!

— Аҳмоқ! — Шодивойнинг кўзида ваҳимали ўт порлади. — Мениям ўзингта ўхшаган тентак деяпсанми, аҳмоқ!

Сал ҳовридан туширмасам бўлмайдиган.

— Шоди-и, — дедим ялиниб. — Отанг сени беш йил не умидлар билан ўқитди, жўра...

— Овсар! — Шодивой аламли кулди. — Биламан, ўқитди. Ҳар сессияда совфа-салом, пачка-пачка пул жўнатди. Айтсан, барибир ишонмайсан! Мен ўша пулларни қайтариб юборардим. Ўқишга пул билан кирганим етади. Энди бу ёғига... — у бир нуқтага тикилганча узоқ жимиб қолди. Маъюс кулимсиради. — Мен юристлар энг ҳалол одам дердим. Адлия сўзи — адолат сўзидан олинган дердим. Қадимги юнонларнинг Фемида деган хотин Худоси бор. Адолат ўшандан қолган, деб ўқитишарди. Рост, домлаларимиз орасида ҳалол одамлар кўп эди. Аммо ҳар зачётга пул йифиб оладиган абраҳамлар ҳам бор эди, Кўшо! Ишонасанми шунга! — у алам билан бош чайқади. — Аввал боши мен ўқимоқчи эмасдим. Сен қаерда бўлсанг, мен ҳам шу ерда бўлмоқчи эдим. Кейин ўша таъмагир домлаларни кўриб, охиригача ўқишга қасд қилдим. Шунинг учун таътилда Қозоғистон, Россияда жон куйдириб ишладим. Бу ёқларга қайтмоқчи эмасдим.

— Барибир келдинг-ку, — дедим бошқа гап тополмай.

Шодивой хўрсинди.

— Келдим эмас, юбориши.

— Бўлти-да, ишлайвер.

Жўрам лабининг бир бурчи билан илжайди.

— Осон экан-да! Ўз отангни сўроқ қилиш ўйинчоқ экан-да! Ўша алдам-қалдамларда отамнинг ҳам қўли борку! Ҳаммасининг илдизи бир-ку.

Қаранг, бу ёғини ўйламаган эканман. Шодивой шу қадар маъюс ўтирадики, жўрамга юрагим туздек ачиб кетди.

— Қўй, жўра! — дедим бошини силаб. — Хафа бўлма. Мени қаматсанг...

— Яна гапиради-я! — Шодивой сб юборгудек важо-
ҳатда чақчайди.

— Кулоқ солсанг-чи, аҳмоқ! — дедим жаҳлим чиқиб. —
Мени қаматсанг, ҳаммаси жойига тушади.

— Ўзинг аҳмоқ! — Шодивойнинг ҳам жазаваси қў-
зид кетди. — Эшакка ўхшаган бефаҳм. Қаматмайман!

— Қаматасан! Айбим бўйнимда-ку!

— Йўқ!

— Қаматасан! — алам устида темир каравотга мушт-
лаган эдим, қўлим чунонам санчиб кетдики,вой-вой-
лаб қолдим.

— Нима қилди, Қўшо? — жўрам қўлимни кафтлари
орасига олиб, силай бошлади. — Ёмон тегдими? Икки
қулоғинг билан эшитиб қўй, дўстим, сени қаматиб
қўймайман.

— Шоди! — дедим ялиниб. — Жон жўра! Дўст-
лигимиз ҳақи! Мени қаматгин. Битта жўралик қилгин.
Шунда ўзинггаям яхши бўлади.

ЎН ТЎҚҚИЗИНЧИ БОБ

ГАПНИНГ ИНДАЛЛОСИ

ЁКИ ҚУЛОҚҶА ЧАЛИНГАН ХАБАРЛАР

Энди ишондингизми, дўхтирижон! Мен жиноятчи
эмасман, жинни ҳам эмасман. Раисга пичоқ үқтал-
ганимдан тонмайман. Урганим ҳам рост. Шунинг учун
Раисдан тортиб Жовлигача, Райком бувадан тортиб
обком вакилигача мени жиноят курсисига ўтқазишига
хўп уринишиди. Уч ойгина қамашди ҳам. Шодивой
бекорга беш йил ўқимаган экан. Шунақанги файрат би-
лан ишга киришиб кетдики, мени жиноятчи деган-
ларнинг ўзи думини қисиб қолди. Омадим чопганини
қарангки, турмушимизда ғалати ўзгаришлар бўлди.
„Ифвогар“ деганимиз ўша Эргашев энг покиза одам
екан. Қамоқдан чиқиб келиб, у ҳам Шодивойнинг ёнига
кирибди. Наргиз — мард хотин экан. Судда мени оқлаб
чиқди. „Салимовнинг қилчаям айби йўқ“, деди. Очик-
дан-очиқ шунақа деди.

Шундан кейин ҳам мени тўрт ой жиннихонада сақлашди. Баъзи бировлар кўздан узокроқда туришимни хоҳлаган-да!

Онамнинг айтишича, қайнанам Раиснинг хотини билан роса юлишибди. „Эринг қизимга алимент берсин“, деб тўполон қипти. Раиснинг хотини „Бобоси тенги эркакнинг тўшагида ётган фар қизинг кучала еган жойига бориб қотсин“, дебди. Шундан кейин ҳаммаси бир-бирининг тагини ковлашга тушиб кетибди. „Ферма тоға“ Шайдул кассирни айблабди. Шайдул кассир бошбухни, бошбух Раисни, Раис Жовлини, Жовли завод директорини, завод директори Райком бувани, Райком бува обком вакилини! Хуллас, ҳамма ёқ тўс-тўполон бўлиб кетибди! Эргашев булар пахта ўрнига пул топширади, дегани рост экан. Ўша пуллардан бир улушини Раис ҳовлисидағи токнинг темир сўриси орасига тиққан экан, сув сизиб, аллақанчаси чириб кетганини кўриб афсусланибди. „Аслида салапан халтани беш-олти қават қилсан бўларкан“, дебди.

„Ферма тоға“нинг пичан гарамидан яна битта „Волга“ чиқибди. Буниси оқ эмас, қаймоқранг эмиш. Шайдул кассир ўз ҳиссасини пат-патнинг эски баллонига тиқиб, чордоқقا ташлаб қўйган экан. Пулни топиб олишганида иккита хотини билан қўшилишиб роса йифлабди.

Ҳаммадан ҳам Жовли ғалати йўлини топган экан. Бор бисотини темир идишга жойлаб, ҳожатхонага ташлаб қўйган жойидан суғуриб чиқаришибди. Ҳайронман, бунақа жойда ётган нарсани нимага ишлатмоқчи бўлганийкин? Сасиб-бижиб, ҳаром бўлиб кетмайдими?

Тақирбош Викторов — қув экан. Текшир-текшир бошланганида Шодивойга ариза кўтариб кепти. „Ўртоқ Алимов, мен областимизда рўй берётган припискаларни кўпдан бери кузатиб юрадим“, деб Раисдан тортиб Райком бувагача, обком вакилигача, ҳаммасининг сирини айтиб берибди. Шодивой, „Ўзингиз шу ишларга аралашмаганмисиз“, деса, „Мен кристальний, чистий одамман“, деб туриб олибди. Эртасига

Викторовнинг ҳовлисидағи чўчқаҳонадан дипломат тұла пул, яна аллақанча олтин-жавоҳирлар чиқибди. Текширувчилар „бу нима“ дейишса, Викторов елка қисибди. „Дунёда чўчқадек аҳмоқ жонивор йўқ, кўчада учраган нарсани ташмалаб келаверади-да“, деб тураверибди. „Беш метр чуқурни ковлаб, хазинани кўмган ҳам чўчқами“, дейишса, индамай кулиб турганмиш.

Ўша – отинг ўчгур жиннихонада ётганимда жонимга яна Шодивой оро кирди. Марказдан катта профессорни чақириб, мени текширтириб кўрди. Хайрият, руҳий касал эмас эканман.

Уйга келсам... Уйга келсам, отам қазо қилганига қирқ кун бўлган экан. Шу гапни эшитдим-у, тўсатдан йиқилиб тушдим. Ҳушимга келиб, ойнага қарасам, ўнг юзим оқиб тушган нондек чўзилиб кетибди. Бир кўзим катта, биттаси кичик... Сизнинг неврологический бўлимингизга қандоқ қилиб келганим ҳам эсимда йўқ.

Раҳмат, сизга дўхтиржон! Яхши даволадингиз. Мана, кўзим ҳам жойига келиб қолди. Аввал ғўлдираб гапирадим. Шукур, тилим ҳам бийрон... Фақат, биласизми, дўхтиржон... Баъзан кечалари уйқум ўчиб кетади. Отам нега ўлди? Наргиз нега баҳтсиз бўлди? Бегуноҳ бир қизалоқ нега туғилмасидан тавқи лаънат олди? Биласизми... Айниқса, Шодивойга ачинаман...

Икки ҳафта олдин Шодивой мени кўргани келди. Қиличдек жўрам нинадек бўпқопти. Рангида ранг йўқ. Катта тергов бошланганда раҳбарлардан илтимос қипти. „Мени шу ишдан озод қилинглар, ўз отамни қандоқ сўроқ қиласман?“ дебди. Тўғри-да! У ёқда онаси, бу ёқда опалари „Ўз отангдан айб излагандан кўра, ўлганинг яхшимасми?“ деб турса, бу ёқда минг-минг пуллар топилиб турса... Бошлиқлари жўрамнинг аҳволини тўғри тушунибди. Ишни бошқа терговчига олиб беришибди. Шунда Раис яна бир номардлик қипти. Шодивойга айтибди. „Янги терговчига шипшиб қўй, шу ишни бости-бости қилиб юборса, мен, Жовли, фермер, Шайдул,райком, обком вакили – ҳаммамиз йиғилишиб, нечта деса, шунча машина, қанча деса,

шунча пул топиб берамиз“, дебди. „Шундан қанчаси-
ни хоҳласанг, ўзинг олиб қолишинг мумкин“, дебди.

Ишонасизми, дўхтирижон, жўрам шу гапни айтатуриб, юраги ёмон бўпқолди. Каравотимга йиқилиб тушди. Яхшиям ҳамшира бор экан, укол қилиб зўрға ўзига келтирди. Шодивой ҳуши жойига келиб йифлади. „Кўшо, деди, дўстим, деди, ўз отам менга пора бермоқчи бўлса, қандоқ чидайман, наҳот ҳамма ёқ шунақа ҳаром-хариш бўпкетган бўлса“, деди.

Амаллаб юпатиб жўнатдим. Шунаقا, дўхтирижон, айниқса, жўрамга жабр бўлди!

Чарчадингиз-а, дўхтирижон! Майли, дам олинг. Энди... Битта илтимос бор. Ҳамшираларингизга айтсангиз: тузалиб қолдим. Чап думбамга нина санчавериб, илмашек қилиб юборди. Нима? Ўнг томонга нина ўтмайди-да, дўхтирижон! „Қаллиқ ўйин“га бориб ўнг томондан айрилганмиз. Қоқ ярмиси Рексконнинг оғзида қолиб кетган. Қолганиям — этикнинг тагчарми! Ҳамширанинг нинаси синиб қолади. Хўп денг, бошқа укол қилмасин, дўхтирижон! Кеча Шодивой яна келиб кетди. Менга тезроқ жавоб беринг. Хўпми? Шундоқ қилинг, дўхтирижон! Ишни соғиниб қолдим. Далани, пахтазорни қўмсаяпман. Терлаб-пишиб ишлагим келяпти. Бўптими, дўхтирижон! Раҳмат! Қўлни ташланг...

1987 йил

МУНДАРИЖА

<i>Биринчи боб</i> Касаллик тарихи.....	3
<i>Иккинчи боб</i> Мактабга кириб олдим.....	8
<i>Учинчи боб</i> Бизни синфда қолдирадиганнинг боши ўнта!.....	10
<i>Тўртинчи боб</i> Хих, тулпорим, хих!.....	18
<i>Бешинчи боб</i> Мушак сабзи.....	33
<i>Олтинчи боб</i> „Запорожец“дан туғилган „Волга“.....	40
<i>Еттинчи боб</i> Симли атлас.....	53
<i>Саккизинчи боб</i> „Кампир қонуни“.....	59
<i>Тўққизинчи боб</i> Биз талаба бўламиз!.....	70
<i>Ўнинчи боб</i> Домлажоннинг „хатоси“.....	87

<i>Үн биринчи боб</i> „Арпатехника“ қоидалари.....	107
<i>Үн иккинчи боб</i> Пахта пунктидаги мажлис.....	121
<i>Үн учинчи боб</i> Наргизхоннинг ҳинду холи.....	131
<i>Үн тўртинчи боб</i> Ифвогар.....	141
<i>Үн бешинчи боб</i> Раис бува оталик қилмоқчи.....	150
<i>Үн олтинчи боб</i> Қаллиқ үйин.....	163
<i>Үн еттинчи боб</i> Тўй.....	169
<i>Үн саккизинчи боб</i> Шақ этди, пак этди, пуфак ёрилиб кетди!....	187
<i>Үн тўққизинчи боб</i> Гапнинг индаллоси ёки қулоққа чалинган хабарлар.....	209

ЎТКИР ҲОШИМОВ

ИККИ КАРРА ИККИ — БЕШ

„O‘qituvchi“ нашриёт-матбаа ижодий уйи
Тошкент — 2018

Муҳаррир *M. Мирсаликов*
Бадиий муҳаррир *Б. Ибрагимов*
Техник муҳаррир *Н. Ниязмуҳамедова*
Мусаҳҳих *M. Мирсаликов*
Компьютерда саҳифаловчи *M. Ақбарова*

Нашриёт лицензияси А1 № 291 04.11.2016. Оригинал-макетдан босишига рухсат этилди 08.01.2018. Бичими $84 \times 108^1 / _{32}$. Кегли 10,5 шпонли. Times TAD гарн. Офсет босма усулида босилди. Офсет қозози. Шартли б. т. 11,34. Ҳисоб-нашриёт т. 9,22. Адади 5000 нусха. Буюртма № 19-18

Ўзбекистон Матбуот ва ахборот агентлигининг „O‘qituvchi“
нашриёт-матбаа ижодий уйи. Тошкент — 206
Юнусобод тумани, Янгишаҳар кўчаси, 1- уй.
Шартнома № 122-17

**84(5Ӯ)6
Х 71**

Ҳошимов, Үткир

Икки карра икки — беш [Матн]:
Ӯ. Ҳошимов. — Тошкент: „O‘qituvchi“
НМИУ, 2018. — 216 бет.

ISBN 978-9943-22-189-5

**УЎК: 821.512.133-31
КБК 84(5Ӯ)6**

Қатор асарлари билан ўқув-чилар меҳрига сазовор бўлган иқтидорли адаб Ўткир Ҳошимов-нинг ушбу ҳажвий қиссасини ўқиганда кайфиятингиз кўтарилади.

Кескин юмор остига олинган воқеалар фоят ҳаётий, таъсирчан акс этган.

Мазкур асар китобхонлар томонидан катта қизиқиш билан ўқилиши шубҳасизdir.



© „O'qituvchi“ NMU
100206, Toshkent sh.,
Yangishahar ko'chasi, 1,
Tel.: (+99871) 224-04-12,
E-mail: info@oqituvchi.uz.
Web-site: www.oqituvchi.uz

ISBN 978-9943-22-189-5

9 789943 221895